





De la  
Forge  
de l'Espr.  
del Haine

1h-5. G. 31.

~~SB  
III  
B?~~

12-13-C-10

# TRAITTE DE L'ESPRIT DE L'HOMME,

DE  
SES FACVLTEZ ET FONCTIONS,  
ET DE SON VNION AVEC LE CORPS.

Suiuant les Principes de RENÉ DESCARTES.

Par LOVIS DE LA FORGE, Docteur en  
Medecine demeurant à Saumur..



ex libris

Vitalis Jordani

A PARIS,  
Chez MICHEL BOBIN & NICOLAS LE GRAS, au  
troisième Pilier de la Grand'Salle du Palais, à l'Esperance  
& à L, Couronnée.

---

M. DC. LXVI.  
Avec PRIVILEGE DV ROY.

Digitized by Google

12.20 f

Νῦς ὁρῇ νῦς ἀκύνει τῷ δὲ ἄλλῳ  
- Κωφὰ καὶ τυφλά.

*Epicharme chez Clement  
Alexandrin.*





A  
 MONSIEUR  
 DE MONTMOR  
 CONSEILLER DV ROY  
 EN TOVS SES CONSEILS,  
 ET MAISTRE DES REQUESTES  
 Ordinaire de son Hostel;



MONSIEUR;

*Encore que ie deusse auoir quelque defiance  
 de la bonté de cét Ouvrage ; C'est neanmoins  
 avec autant de hardiesse que de respect que  
 i'ose vous le presenter , & que ie me flate que*

à ij

## EPISTRE.

vous y considererez moins les defauts de l'ou-  
 urier que la beauté de la matiere. En effet si l'on  
 devoit estimer un Liure par l'excellence de son  
 sujet, n'aurois-je pas lieu d'esperer que le mien  
 pourroit estre receu fauorablement de tous les  
 Hommes, puis qu'en leur donnant le portrait  
 de l'Esprit humain, ie soumetts à leur Jugement  
 ce qu'il y a de plus releué dans le Monde, &  
 le plus noble de tous les agens de la Nature?  
 Je n'aprehende point que l'on m'accuse de flat-  
 terie ou d'audace quand ie luy donne ces élo-  
 ges; nostre propre experience nous apprend qu'il  
 n'est sujet à l'autorité d'aucun Prince; Les  
 menaces, les suplices, & la plus cruelle Ty-  
 rannie ne scauroient retenir ses desirs ny forcer  
 ses volonteZ, & Dieu mesme dont il a re-  
 ceu l'Estre, & duquel il dépend absolument en  
 sa conseruation, luy a laissé dans ses actions  
 une liberté toute entiere. Aussi n'a t'il rien  
 en luy que d'admirable, on peut quasi dire qu'il  
 est incomprehensible, & ses qualitez sont si no-  
 bles & si rares qu'il n'y a que celuy qui les a  
 creées qui puisse les connoistre parfaitement.  
 C'est par luy seul que nous sommes capables  
 d'une veritable felicité, c'est par ses operations que  
 l'Homme s'eleue au dessus de l'Homme, & les di-  
 ferentes fonctions qu'il exerce sont autant de di-  
 uers degrez qui nous approchent de la Diuinité.

EPISTRE.

*Ainsi, MONSIEUR, quand mon inclination ne m'auroit pas fait resoudre depuis long-temps à vous dedier mon Esprit, ie ne pouuois faire un semblable present à une personne d'une Science mediocre : ce seroit profaner une si belle matiere que de la mettre entre les mains d'un Homme qui n'en scauroit pas decouvrir les merueilles, & si j'arreste mon choix à vous seul c'est parce que ie n'en connois point d'autre dont les lumieres soient plus vives & plus brillantes ny le Iugement plus solide & plus assuré. Je ne vous ay pas seulement consideré par les avantages de la Fortune, ie vous ay regardé comme un modele sur lequel ie pouuois tracer le tableau d'un Esprit acheué, & jay crû que ie ne pouuois l'offrir plus iustement qu'à celuy qui nous a donné de si glorieuses marques de la grandeur du sien. Les admirables Vertus qui brillent en vous m'ont fait remarquer ses diuerses perfections ; Quand ie n'aurois pas eu de raisons pour croire son immortalité, vos actions sont trop belles & vos sentimens trop genereux pour n'estre pas persuadé que le principe n'en scauroit estre perissable, & rien ne m'a fait connoistre si parfaitement le pouuoir que l'Âme doit auoir sur le Corps, que le iuste empire que vostre Esprit conserue sur le sien, qui malgré le trouble que les passions y peuenent apporter vous*  
à iij

## EPISTRE.

rend toujours le maître de vous mesme. Ouy, MONSIEUR, c'est en vous considerant avec l'estime & le respect qu'un grand merite nous inspire que j'ay decouvert une partie des choses que j'expose au public ; La source de nos erreurs ne m'a plus esté cachée depuis que j'ay pris garde aux moyens dont vous vous seruez pour les éviter : & ie ne doute plus que nous ne puissions estre libres sans estre indifferens ; puisque vous agissez si puissamment sur moy mesme, que bien que ie vous presente cet Ouvrage librement & sans contrainte, ma volonté toutefois s'y porte avec tant d'ardeur qu'elle m'oste toute sorte d'indifference.

Mais, MONSIEUR, il n'est pas necessaire de chercher tant de raisons pour vous rendre ce present considerable ; La gloire de nostre Philosophe vous est trop chere pour l'abandonner en cette occasion ; Vous sçavez que ses ennemis le combattent encore apres sa mort, & ie n'ay pas sujet d'esperer qu'ils veuillent le respecter dans mes Ecrits. C'est un destin qui n'est que trop ordinaire aux Hommes Illustres de se voir exposez aux attaques de leurs enuieux ; Ceux qui ne peuvent égaler leur merite s'efforcent d'en ternir l'éclat, & comme ces grandes lumieres les éblouissent ils mettent tout en usage pour les esteindre. Il ne faut donc pas s'estonner si

## EPISTRE.

*Monſieur Deſcartes n'a pas reçu de tous les eſprits l'approbation de ſa Doctrīne : Les Philoſophes ſont ſujets quelquefois à leurs paſſions auſſi bien que le reſte des Hommes , & ils ne ſçauroient ſouffrir des veritez qui ſont voir trop clairement combien leurs raiſonnemens ſont obscurs & leurs principes inutiles. Mais ce qui nous doit ſurprendre davantage , c'eſt de voir que le lieu de ſa naiſſance ſoit quaſi le dernier à luy rendre juſtice , & que ſon propre pays s'opole avec plus d'opiniaſtreté à l'eſtabliſſement de ſes maximes. Ce n'eſt pas que cet Homme incomparable n'ait eu de puiffans Proteſteurs , auſſi bien que d'iniuſtes ennemis : Deux grandes Princeſſes ont reçu ſes preceptes avec beaucoup d'eſtime : Des Prouvinces entieres ont imité leur exemple , & toute l'Europe ſçait avec quelle ardeur vous entreprenez ſa deſence. Non ſeulement vous ſoutenez ſon party par la force de vos raiſons ; Mais par une grace particuliere vous avez ſouuent fait de voſtre Maiſon le theatre de ſa gloire. Ces faueurs ſont trop conſiderables pour ne vous en faire que de ſecrets remerciemens : Il eſt juſte que nos reſſentimens paroiffent en public , auſſi bien que Voſtre Generoſité : Et quoy que ie ſois le moindre des Diſciples de ce fameux Philoſophe , ie ne veux pas eſtre le moins*

EPISTRE.

reconnoissant. Mais si ie luy preste ma voix  
pour vous rendre grace , i'espere qu'il me pre-  
stera son credit pour estre écouté de vous : Et  
que sous une autorité si favorable , vous ne  
desaprouverez pas l'assurance avec laquelle  
ie viens vous protester que ie suis ,

MONSIEVR,

Vostre tres-humble & tres-  
obeissant seruiteur,  
L. DE LA FORGE.

PRE-





*J. Patigny f.*

*Ceser peintrs fameux de vanter vos efforts ;  
 Vous ne peignez que nostre corps ;  
 Mais L'auteur de ce rare ouvrage  
 fait voir dans tout ce qu'il escrit,  
 que Luy Seul à cet avantage,  
 De Sçavoir peindre nostre esprit.*

IDLF





# PREFACE.

*Dans laquelle l'Auteur fait voir la conformité de  
la Doctrine de Saint Augustin, avec les  
sentimens de Monsieur Descartes,  
touchant la Nature de  
l'Ame.*



Q V A N D ie considere qu'entre les Veritez que Monsieur Descartes nous a enseignées, il n'y en a point auxquelles on se soit si fortement opposé, qu'à celles qui sont contenuës dans ses Meditations Metaphysiques; il me semble que ie ne pourrais sans beaucoup de temerité, me promettre vn traitement plus fauorable, pour l'Ouurage que ie mets au iour, puisque c'en est vne suite necessaire. Aussi, bien loin de me flater d'aucune esperance, ie suis desja fort persuadé, qu'il y a trois ou quatre fortes de personnes, à qui selon les apparences ie n'ay pas lieu d'esperer qu'il puisse plaire. Ce n'est pas que ceux qui lisent les Liures ne d'eussent peut estre aussi-

# P R E F A C E.

toſt accuſer les préiugez de leur Eſprit, que rejeter la faute ſur leurs Autheurs, ou ſur la nouveauté de leurs opinions, quand ils ne les entendent pas, ou qu'ils ne les peuvent gouſter. Mais neanmoins ie veux bien croire qu'il n'en eſt pas de meſme icy ; Et que toute la faute doit retomber ſur moy, ſi ie n'ay peu me rendre aſſez intelligible pour me faire entendre, ou ſi ie n'ay pas employé des raiſons aſſez fortes pour les conuaincre. Je ſçay qu'il eſt du deuoir de ceux qui compoſent, de taſcher autant qu'ils peuvent de contenter les Lecteurs, & de leuer tous les ſcrupules qui pouroient les arreſter ; C'eſt pourquoy ie veux eſſayer en cette Preface de ſatisfaire en quelque maniere ces trois ou quatre ſortes de perſonnes, qui pouront, comme ie croy, trouuer quelque choſe à redire en ce que j'ay écrit.

Et pour commencer par les premiers c'eſt à ſçauoir ceux qui ne cherchent rien autre choſe dans les Liures que la pureté du langage, & qui ne s'attachent qu'à ceux où ils rencontrent des periodes iuſtes, & des paroles bien choiſies ; l'auouë que j'aurois fort ſouhaitté de leur donner la ſatisfaction qu'ils deſirent ; Mais cela auroit eſté bien difficile à vn Homme qui a paſſé preſque tout le temps de ſa vie éloigné de la Cour & de l'Academie ; Outre que la matiere que j'auois à traiter ne me le permettoit pas ; & que m'eſtant touſiours plus attaché aux choſes qu'aux paroles, j'ay crû avec Monſieur Deſcartes que l'Eloquence eſt vn don de l'Eſprit plûtoſt qu'un fruit de l'étude ; Et que ceux qui

## P R E F A C E.

ont le raisonnement le plus fort, & qui digerent le mieux leurs pensées, afin de les rendre claires & intelligibles, peuvent tousiours le mieux persuader ce qu'ils proposent, encore qu'ils ne parlassent que bas-Breton; qu'ils n'eussent iamais appris de Rhétorique. C'est pourquoy i'ay pris soin principalement de bien concevoir mon sujet, (car il me semble absolument impossible, que ceux qui n'entendent pas bien vne matiere, la puissent iamais bien expliquer) & de le disposer de telle sorte, que les derniers Chapitres fussent des suites necessaires des premiers; & que ceux-cy n'en presuposassent aucuns autres. Je me suis aussi seruy des termes que i'ay crû les plus significatifs & les plus intelligibles; déterminant mesme la signification de ceux qui auroient pû estre équivoques, comme ceux d'*Esprit* & d'*Idee*. Que si quelque Cartesien trop scrupuleux se scandalise de voir que i'ay restraint ce dernier aux seules formes des pensées de l'*Esprit*; quoy que Monsieur Descartes s'en serue aussi pour signifier les formes des esprits animaux; ausquelles ces autres formes de nos pensées sont attachées, ie le prie de considerer que dans vne matiere aussi obscure qu'est celle-cy, & où la méprise estoit extremement à craindre, ie ne pouvois estre trop scrupuleux dans le choix des termes, ny prendre trop de soin d'éviter les équivoques & les disputes des mots. Je demande la mesme grace à ceux qui veulent qu'on observe vne pureté entiere dans nostre langue, & les prie de m'exculer, si dans vn *Traité* Metaphysique, ie

## P R E F A C E.

me suis seruy de certains mots consacrez à cette Science, comme de ceux de concept, d'identité, & de quelques autres, qui pourront peut-estre blesser la delicateſſe de leurs oreilles.

Les seconds, ſont les Philosophes de l'Ecole? Mais ſous ce nom, ie ne veux pas tant parler de ceux qui enseignent la Philosophie d'Aristote, ſçachant bien qu'il y en a plusieurs qui ne le font que pour obeïr à la couſtume & contre leur ſentiment, que de ceux qui apres auoir fait leur Cours, & eſtre ſortis du College, tout remplis de la bonne opinion d'eux-mesmes, pour auoir reſpondu publiquement, & auoir receu le Bonnet, ne jettent plus les yeux ſur aucun Liure de Philosophie; Et ne ſçauent des ſentimens de Platon & d'Aristote, qu'autant qu'on leur en a dicté dans leurs eſcrits, & qu'ils en ont retenu des explications de leurs Professeurs. Ceux-cy ſont les plus fâcheux auersaires des Disciples de Monsieur Descartes; Et quoy que ce ne ſoient pas les plus redoutables, ce ſont pourtant les plus difficiles à perſuader; D'autant que jugeant de tout, par ce qu'ils ont entendu de leurs Maistres, ſans penetrer plus auant dans leurs ſentimens, ils ne penſent pas qu'on puiſſe rien dire de contraire à ce qu'ils ont appris, ſans ceſſer d'eſtre raſſonnable; Et comme il n'y a point de queſtion, qu'ils ne rendent Problematique, par le moyen de leur Dialectique; ny de verité ſi reconnüe, qu'ils ne puiſſent combattre par leur diſtinctions, ils paſſent ſans y penſer de l'Ecole d'Aristote dans celle de Pyrrhon, qui eſt entierement contraire

# P R E F A C E.

à la nôtre. Il seroit pourtant aisé de les reduire, & de les ramener à la raison, s'ils vouloient reconnoître de bonne foy l'inutilité & l'obscurité de leurs Principes; L'inutilité, en ce qu'il est impossible de résoudre par leur moyen la moindre difficulté de Physique; Et l'obscurité, puisque sans doute des termes doiuent passer pour obscurs, lors qu'aucune Idée ne répond dans l'Esprit à la signification qu'on leur donne. Or nous n'auons l'Idée que de deux sortes d'Estres, parlant en general, l'Esprit de celuy qui est estendu, qu'on appelle *Corps*, & de celuy qui pense, que l'on nomme *Esprit*; Et partant quand on parle de quelques autres Estres, qui ne se peuuent rapporter ny à l'un ny à l'autre, ny à quelqu'une des proprieté ou accidens qui enferment dans leur concept l'Idée de l'un ou de l'autre, tels que sont ces Estres qu'on appelle formes Substantielles des Corps, qualitez réelles, impresses, intentionnelles, occultes, sympathiques, spécifiques, faculté concoctrice, retentrice, expultrice, &c. il est impossible qu'aucune Idée leur puisse répondre dans l'Esprit, ny que ce qu'on dit alors ait aucun sens qui se puisse concevoir. Mais ce n'est pas mon dessein de les combattre icy; Je sçay que les sentimens qu'on attribue quelquefois à l'Ecole, n'appartiennent pas tousiours à toute l'Ecole; Et qu'il y en a mesme quelques-uns parmy eux, qui font gloire de trouuer aujourd'huy dans Aristote, tout ce que l'on a decouvert de plus nouveau dans ce siecle. Je ne pretens donc pas attaquer tous les Sectateurs d'Aristote; Mais

# P R E F A C E.

ceux-là seulement qui sont dans les erreurs que ie tasche de refuter, avec lesquels mesme ie voudrois s'il estoit possible trouuer quelque moyen d'accommodement. Il faudroit pour cela que nous changeassions les vns ou les autres; Si ie leur proposois de quitter leur party, ils ne le trouueroient pas raisonnable; parce qu'ils se croient les plus anciens, comme s'il y auoit rien qui püst estre plus ancien que la verité. Ie veux donc me rendre plus facile; Car ie consens de me ranger de leur costé, s'ils peuvent rendre leur opinion, touchant la Nature de l'Ame, plus croyable & plus intelligible que celle de Monsieur Descartes; Mais iusques-là, ils me permettront de demeurer dans vne École où l'on entend du moins ce quel'on dit, & où l'on ne se vante point de sçauoir ce qu'on ne sçauoit comprendre.

Les troisièmes, qui pourront trouuer quelque chose à redire dans ce Traitté-cy, sont ceux qui rejettent toutes les opinions qu'ils estiment nouuelles, & qui ne pensent pas qu'il puisse y auoir rien de veritable, que ce qui est formellement touché dans Aristote, dans Platon; ou dans Epicure, & que ce que nous auons receu par tradition de l'Antiquité. Ceux-là trouueront sans doute fort mauuais, que ie ne cite presque aucun Auteur que celuy dont ie prétens debiter les pensées; avec si peu de soin mesme, que i'ay peur d'auoir quelque-fois transcrit ses paroles sans le nommer. Ie leur répondray premièrement que ne m'estant rien proposé dans cet Ouvrage, que de chercher ce que la seule lumiere de la raison,

9

P R E F A C E.

peut découurir de la Nature de l'Ame, ie n'ay pas dû me seruir d'aucune autorité; De sorte mesme, que quand i'allegue celle de Monsieur Descartes, ce n'est pas pour prouuer les choses que i'auance; mais pour faire voir seulement que ie raisonne selon ses Principes, & que ie ne m'éloigne pas de ses sentimens. Secondement, ie veux bien qu'ils sçachent, que si i'auois crû qu'avec des gens raisonnables ce n'estoit pas assez d'agir par raison, ie n'allegue presque aucune pensée de Monsieur Descartes, mesme de celles qu'on croit luy estre plus particulieres, pour la confirmation de laquelle ie n'eusse pû apporter autant ou plus d'autoritez Grecques & Latines, qu'on en sçauroit produire pour celles qui sont le plus communément receuës dans l'Ecole. Et pour leur en donner quelques marques, ie vais leur montrer icy en peu de mots, que les pensées de Monsieur Descartes, touchant la Nature de l'Ame, sont entierement conformes à la Doctrinne de S. Augustin, de Marcille Fiscin, & de quelques autres anciens Auteurs.

Monsieur Descartes commence sa Philosophie par le doute, & veut qu'on rejette toutes les opiniôs où il y a la moindre occasion de douter, afin de trouuer vn principe inébranlable, qui ne puisse estre contesté. Cette methode est entierement conforme au sentiment d'Aristote, ainsi qu'on peut voir au 1. Chapitre du 3.

# P R E F A C E.

liure de sa Metaphysique, qui porte pour Titre *De l'utilité de douter, & des choses dont il faut premierement douter*; Voicy ses paroles: [ Pour paruenir à la science que nous cherchons, il est nécessaire que nous parcourions premierement les choses dont nous deuons douter, c'est à sçauoir, les diuerfes opinions de ceux qui en ont traitté, & que nous regardions s'il y a quelque chose qu'ils n'ayent pas vû: Car il faut que ceux qui veulent acquerir vne connoissance évidente & exempte de doute, ayent premierement soin de bien douter, &c: ] Il n'auroit donc eu garde d'estre du nombre de ceux qui ont blâmé la premiere Meditation de Monsieur Descartes, comme peu nécessaire; y ayant pour le moins autant de nécessité de douter de tout vne bonne fois, lors qu'on cherche le fondement de toutes les Sciences, pour ne plus douter par après, que de recommencer sanscesse à l'entrée de chaque Science, comme Aristote le prescrit.

Je pourois confirmer cette methode par le passage de Saint Augustin qui est raporté dans les quatriémes objections; il est tiré du second liure du Libre-Arbitre, dans lequel il dit, parlant à Euodius; Je vous demande premierement ( afin que nous commencions par les choses les plus manifestes ) si vous estes? ou si vous ne craignez point de vous méprendre en répondant à ma demande? Bien, qu'à vray-dire.

Quare prius abs te  
quæro ( ut de ma-  
nifestissimis ca-  
piamus exordiū )  
verum tu ipse sis?  
an tu fortasse me-  
tuus, ne hac in in-  
terrogatione fal-  
laciis? eum vtrique



112

P R E F A C E

dire, si vous n'estiez point, vous ne pourriez pas estre trompé ? Car il semble par là que S. Augustin ait reconnu qu'on pouuoit craindre de se tromper en toutes choses, hormis dans la connoissance de sa propre existence, de laquelle il a crû quel'Esprit de l'Homme ne pouuoit pas douter ; Car, comme il dit fort bien dans le 3. Chapitre du 10. liure de la Trinité. Qu'est-ce que l'Esprit de l'Homme a en luy qu'il connoisse mieux que sa propre vie ? Or il ne peut pas estre sans viure ; & comme il est vn tout dont les parties sont inseparables, ou pour mieux dire, qui n'a point de parties, quand il vit, il vit tout entier ; Et il s'aperçoit qu'il vit, parce qu'estant vne chose qui pense, il ne peut agir sans s'en apercevoir. Si j'ay adjouté quelque chose au texte de ce passage, pour le rendre plus clair, j'espère que ceux que j'allegueray en suite feront voir que ie n'ay rien dit en cela qui soit contraire à la pensée de S. Augustin, témoin ce qu'il ajoute vn peu après. Quand l'Esprit, c'est à dire, la chose qui pense, cherche à se connoistre, elle a desia reconnu qu'elle estoit vne chose qui pense. Mais ce n'est pas encore le temps de parler de cette matiere, c'est pourquoy retournons à Euodius, à qui S. Augustin dit en continuant son discours. Puis qu'il est manifeste que vous estes ; ce qui ne vous seroit pas manifesté si vous ne viaiez ; il est aussi évident que vous vivez.

non esses, falli omnino non pot-  
ses ?

Quid eius ei tam  
notum est quam se  
vivere ? non potest  
autem mēs esse &  
non vivere ... si  
mens tota est, sic  
tota vivit, non  
autem vivere se.

Cum se nosse mēs  
querit, mentem se  
esse jam novit.

Ergo quoniam ma-  
nifestū est esse te,  
nec tibi aliter ma-  
nifestum esset, nisi  
viveres, id quo-  
que manifestum;

# P R E F A C E

, & te. viuere, intel-  
ligis ista duo esse  
verissima? ... Ergo  
tertium hoc se-  
rum est, hoc est  
te viuere.

Ne conceuez-vous pas que ces deux choses sont tres-veritables ? Et Euodius en tombant d'accord ; S. Augustin conclut, il est donc aussi manifeste que vous vivez. Or il n'est pas moins manifeste que ce raisonnement de S. Augustin ne se peut soustenir qu'en disant que la vie dont il parle icy, n'est pas celle du Corps, qui consiste dans la nutrition, parce qu'il a écrit ailleurs qu'elle se pouuoit faire sans qu'on s'en aperçût ; Mais celle de l'Esprit, qui consiste dans ses pensées, autrement pourroit-il dire ; *Il ne vous seroit pas manifeste que vous estes si vous ne viniez ?* Et il n'auroit pû non plus demander à Euodius, *Ne conceuez-vous pas que ces deux choses sont tres-veritables*, s'il n'auoit estimé qu'estant doiüé d'un Esprit, c'est à dire, d'une substance qui ne scauroit agir sans s'en apercevoir ; il ne scauroit viure, c'est à dire, penser, sans le scauoir, ny s'apercevoir qu'il vit, sans estre assuré de son existence. Vous voyez donc qu'il n'y a aucune difference entre le *Je pense, donc ie suis*, de Monsieur Descartes & la pensée de S. Augustin, que celle qui se trouue dans les mots. Et dans la suite de ce discours, S. Augustin fait voir à Euodius, que quand l'Ame aperçoit quelque objet des sens, elle n'a pas seulement la connoissance de cet objet, mais encore de l'operation par laquelle elle l'aperçoit, non pas par aucune reflexion qu'elle fasse sur soy-mesme, autrement il n'attribueroit pas aussi cette

# P R E F A C E.

mesme chose aux bestes, qu'on n'a iamais crû capables de réflexion ; Il faut donc que ce soit immédiatement, parce que l'Ame agit, qu'il a crû qu'elle s'aperceuoit de son operation. Personne ne peut ignorer combien cela est conforme au sentiment de Monsieur Descartes, qui appelle generalement pensée tout ce dont nous nous apercevons immédiatement, parce que nous le faisons ; voicy les termes de S. Augustin. On ne penseroit pas à ouvrir les yeux & à les tourner du costé de l'objet qu'on veut regarder, si l'on n'aperceuoit qu'on ne le voit pas, lors que les yeux sont fermez, ou tournez d'un autre costé. Or si l'on s'aperçoit que l'on ne voit pas, lors qu'on ne voit pas, il est necessaire que quand on voit on aperçoive que l'on voit, &c.

Namque aperire oculum & mouere aspiciendo ad id quod videre appetit nullo modo posset nisi oculo clauso vel non ita moto se id non videre sentiret. Si autem sentit se non videre dum non videt, necesse est, etiam sentiat si videt dum videt.

Mais afin de montrer plus particulièrement la conformité de S. Augustin avec les sentimens de Monsieur Descartes touchant la Nature de l'Esprit de l'Homme, ie mets en fait que S. Aug. a crû que l'Ame humaine estoit vne substance qui pense, immatérielle, immortelle, qui pense tousiours &c. dans le mesme sens, que Monsieur Descartes l'a establi. Pour vous le prouuer, lisez premierement ce que S. Augustin a escrit dans le liure de la quantité de l'Ame en ces termes ; Vous deuez entendre que quoy que Dieu ait créé l'Esprit de l'Homme, il est pourtant d'une certaine substance qui ne

Intelligendum enim ( quamquam Deus se erit autem ) habere illi certam substantiam.

# P R E F A C E.

quæ neque terrea,  
neque ignea, neque  
aërea sūt, neque hu-  
mida, nisi forte  
atbirrandum est  
Deum dedisse ter-  
ræ ut nihil aliud  
sit quam terra, &  
non dedisse animo  
ut nihil aliud quā  
animus sit. Si au-  
tem definiti tibi  
animū vis & quæ-  
ris quid sit ani-  
mus, facile respō-  
deo, nam mihi  
videtur esse quæ-  
dam substantia ra-  
tionis particeps,  
regendo corpori  
accommodata.

Ratio quidem est  
animi aspectus,  
quo per se ipsum  
verum intuetur;  
ratiocinatio verò  
est rationis inqui-  
sitiō: quare ista o-  
pus est ad viden-  
dum, illā ad in-  
quirendum.

tient rien de l'air, ny du feu, de la terre, ny de l'eau; si nous ne voulons croire que Dieu a bien pû accorder à la Terre qu'elle ne fust rien que Terre, mais non pas à l'Esprit de n'estre qu'Esprit. Que si vous voulez qu'on vous le définisse, & si vous demandez ce que c'est, il est aisé de répondre, que c'est vne certaine substance douée de raison, propre à regir le Corps. Dans le liure de l'*Esprit & de l'Ame*, il repete la même definition; Mais ne pensez pas que par le mot de raison, il ait entendu le raisonnement, ou le discours, ainsi que l'on fait communément dans l'Ecole, quand on définit l'homme *vn animal raisonnable*; Car au contraire, le passage qui suit dans le même liure, & qui est comme l'explication de celui-cy, fait bien voir que quand il l'apelle *vne certaine substance douée de raison*, c'est la même chose que s'il auoit dit vne substance qui a la faculté de penser ou d'apercevoir; La raison, dit-il, est la veüe de l'Esprit, par laquelle de luy-même il regarde la verité; Mais le raisonnement c'est la recherche qu'en fait la raison; C'est pourquoy celle-cy est nécessaire pour voir, & celui-là pour rechercher. Je sçay bien qu'on pourra trouuer d'autres passages, où il prendra la raison pour le raisonnement; Il ne faut pas s'en estonner; Car ce terme estant équivoque peut estre pris diuersemēt; Mais dans cette definition on ne le peut prendre que pour cette perception, qui fait

P R E F A C E.

que toutes les operations de l'Esprit sont des pensées, parce qu'elle se rencontre en toute. Lors que j'ay expliqué ce que c'est qu'une substance qui pense, j'ay dit que c'est une substance qui s'aperçoit de toutes ses actions & passions, & generalement de tout ce qui se passe en elle immediatement & non pas par reflexion.

Si le passage qui est rapporté par Monsieur Clerfelier dans la Preface sur l'Homme de Monsieur Descartes, permettoit de douter que cela ne soit conforme à la pensée de S. Augustin, en voicy vn autre qui osteroit tous les scrupules qu'on en pourroit auoir, il est dans le mesme liure de l'Esprit & de l'Ame, à peu près en ces termes. Que celui qui desire connoistre l'essence de son Esprit, rejette de l'idée qu'il en forme toutes les connoissances qu'il a tirées de dehors par les Sens de son Corps; Car toutes les ressemblances & images des Corps, toutes nos sensations, nos imaginations, & les vestiges de la Memoire, qui nous donnent occasion de nous souuenir des objets qui les ont tracés, apartiennent à l'Homme extérieur, c'est à dire, à nostre Corps; & ce ne sont que des messagers qui donnent occasion à l'Homme interieur d'apercevoir ce qui se passe au dehors. L'Esprit donc à qui rien n'est si present que soy-mesme par vne presence interieure & tres-veritable se voit en luy-mesme; Car estant

Remoueat ergo à consideratione sua, omnes notitias, quæ per corporis sensus extrinsecus capiuntur; quæ namque corporalia sunt, eorumque similitudines, sensus, & imaginationes in memoria infixæ, cum recordando reminiscuntur, ad exteriorem hominem pertinent; quamquam istis quasi nunciis anima exteriorem percipiat. Mens ergo cui nihil seipsa præsentius est, interiori, non simulata, sed verè præsentia videt se in se; Nihil enim tam nouit mens quam

# P R E F A C E.

id quod sibi præ-  
sto est; nec magis  
mei quicquam  
præsto est, quam  
ipsa sibi. Nam co-  
gnoscit se viuere,  
se meminisse, se  
intelligere, se vel-  
le, cogitare, scire,  
iudicare; hæc om-  
nia nouit in se, nec  
imaginatur, quasi  
extra se illa aliquo  
sensu Corporis  
recogerit, sicut  
corporalia quæ;  
coguntur; ex quo-  
rum cogitationi-  
bus nihil sibi af-  
fingat, ut tale al-  
iquid sese puer.  
Quidquid ei de se  
remanet, hoc so-  
lùm ipsa est, nihil  
enim tam in men-  
te est, quam ipsa  
mens, nec qui-  
quam se mentem  
nouit quemadmo-  
dum mens; Cum  
enim querit mēs  
quid sit mēs: pro-  
fecto nouit quod  
ipsa sit mens que  
se ipsam querit.  
Nec aliunde se  
querit quam se  
ipsa. Quum ergo  
querentem se no-  
uit, se utiq; nouit  
& omne quod no-  
uit tota nouit atq;  
ita totam se nouit:  
Etsi foris patte  
inueniā non se to-  
tam querat; quia  
tamen se tota  
querit, tota si-  
bi præsto est, nihil  
enim sibi se ipsa  
præsentius esse  
possit.

vne chose qui pense, il ne peut agir sans s'en  
apercevoir, ny s'en apercevoir sans se connoi-  
tre en mesme temps pour vne chose qui pense;  
l'Esprit ne connoissant rien mieux que ce qui  
est près de luy; Or rien n'en peut estre si près  
que luy-mesme; c'est à dire, ses propres pen-  
sées; C'est pourquoy il reconnoist qu'il vit,  
parce qu'il aperçoit, qu'il se ressouient, qu'il  
entend, qu'il veut, qu'il pense, qu'il sçait,  
qu'il iuge; Dautant que c'est en cela que con-  
siste la vie des Natures Intelligentes. Il recon-  
noist toutes ces choses en luy & par luy, à cause  
que c'est luy qui les fait; Et il ne s'imagine pas  
qu'il les touche par quelque vn des Sens de son  
Corps, dans quelque chose qui soit hors de  
luy, à la maniere que les Substances Corpo-  
relles sont touchées: Qu'il ne s'attribuë donc  
aucune des Idées qu'il en a, pour croire qu'il  
puisse estre quelque vne de ces choses; Puisqu'au-  
contraire, lors qu'il aura rejeté de sa pensée  
tout ce que son Imagination luy represente de  
la Nature des Corps, la seule chose qui luy re-  
stera, c'est à dire, sans laquelle il ne pourra se  
concevoir, & qu'il ne pourra nier qui ne soit en  
luy, à sçauoir, qu'il est vne chose qui pense &  
qui s'aperçoit, c'est cela seulement qui luy  
appartient, & qui est tout ce qu'il est. Aussi n'y  
a-t-il rien qui connoisse l'Esprit, c'est à dire, la  
chose qui pense, que l'Esprit mesme dont la  
Nature est de s'apercevoir de tout ce qui se

## P R E F A C E.

passe , ie ne dis pas dans son Corps , mais en  
 luy ; C'est pourquoy quand vne chose qui pense  
 cherche ce que c'est qu'un Esprit , c'est à dire ,  
 ce qu'elle est , certainement elle doit connoi-  
 stre qu'elle cherche , & qu'elle est vne Nature  
 qui pense , laquelle se cherche elle mesme ; Car  
 elle ne peut pas se chercher autrement que par  
 elle mesme , c'est à dire , par ses pensées. Re-  
 connoissant donc qu'elle se cherche , elle se re-  
 connoist par mesme moyen ; & tout ce qu'elle  
 connoist pour lors , elle le connoist toute entie-  
 re ; & ainsi elle se connoist toute entiere ; c'est  
 à dire , elle s'apperçoit des deux principales  
 sources de ses pensées. Que si elle ne se cherche  
 pas tout entiere , ayant desia trouué vne partie  
 d'elle mesme , c'est à sçauoir l'Entendement ,  
 par exemple , qui est la premiere source de ses  
 pensées , toutes-fois parce qu'elle ne peut pas  
 se chercher sans s'y employer toute entiere ,  
 c'est à dire , sans mettre son Entendement & sa  
 Volonté en exercice ; L'un entant qu'elle ap-  
 perçoit , & l'autre entant que c'est d'elle-mes-  
 me qu'elle se porte à cette recherche , toutes  
 les sources de ses pensées sont deuant elles de  
 telle sorte que rien ne luy sçauroit estre plus  
 present qu'elle mesme.

Ce passage ne permet pas , à mon auis , de  
 douter du sentiment de Saint Augustin si  
 toute-fois il y a quelqu'un à qui il reste en-  
 core quelque scrupule , ie le prie d'examiner ce

# P R E F A C E.

Cum ergo mens  
aërem se putat,  
aërem intelligere  
putat, se tamen  
intelligere se it:  
aërem autem se  
esse non scit, sed  
putat, secernat  
quod se putat, cer-  
nat quod sit, hoc  
ei remaneat.

luy-cy qui est encore plus formel, ie l'ay tiré  
du commencement du 10. Chapitre du 10.  
Liure de la Trinité, où S. Augustin dit, que lors  
quel l'Esprit croit estre de l'air, il croit aussi que  
cét air pour lequel il se prend est vne Substanc  
Intelligente, parce qu'il sçait & qu'il sent qu'il  
en est luy-mesme vne; Mais il ne sçait pas as-  
surément qu'il est de l'air, il le croit seulement;  
Qu'il separe donc ce qu'il sent & qu'il sçait avec  
certitude qu'il est, c'est à sçauoir vne Substan-  
ce-Intelligente, d'avec ce qu'il se croit estre avec  
quelque doute, & qu'il s'arreste seulement à  
cela, sans se prendre pour vne autre chose. Ie  
n'ay rien à dire après cela, sinon que le *cogitare*  
de Monsieur Descartes, & l'*intelligere* de S. Au-  
gustin ne sont icy que la mesme chose, c'est à  
dire, apercevoir.

Monsieur Descartes, dit que l'Esprit est im-  
matériel, dans le mesme sens & de la mesme  
maniere que ce S: Docteur l'auoit dit deuant  
luy dans le 4. Liure de l'*Origine de l'Ame* & dans  
celuy de la *quantité de l'Ame*, dans lesquels  
il ne nie pas seulement que l'Ame soit vn  
Corps; quand on prend ce terme pour signi-  
fier les membres visibles de l'Homme, mais  
encore quand il signifie toute sorte de Substan-  
ce estendue; en longueur, largeur & profon-  
deur, qui est capable par ses parties de rem-  
plir vn espace. Ie n'apporte point de passages  
pour le prouuer; Personne ne pouuant dou-



# P R E F A C E.

ter que ce ne soit là sa pensée, pour peu que l'on soit versé dans la lecture de ce Pere de l'Eglise.

Je ne m'arrestera pas non plus à monstrier qu'il a crû que l'Ame estoit Immortelle; mais ie ne puis m'empescher de faire voir de quelle façon il combat ceux qui disoient que si elle n'estoit vn Corps, elle seroit vne substance, vaine, vuide & sans realité, ou qui pensoient qu'il n'y auoit rien de veritable & de réel que ce qui tombe sous les sens ou sous l'imagination. Il refute les premiers dans le 4. Liure de l'*Origine de l'Ame* en disant, Mais vous me mettez derechef en peine, quand vous dites que si l'Ame n'est pas Corporelle, elle doit estre vne substance subtile, menuë, sans solidité, à la maniere de l'air, ou de l'espace que l'on conçoit vuide, comme quelques-uns l'ont voulu soutenir; Car il semble par vos Paroles que tout ce qui n'a point de Corps doit estre vne substance vaine; Si cela est, comment osez-vous dire que Dieu n'a point de Corps? Ne craignez-vous point que quelqu'un n'inferre de vos paroles que ce doit donc estre vne substance vaine & vuide? Il ajousté encore plus bas vers la fin du Chapitre. Mais il ne faut pas s'arrester icy dauantage: Car soit que vous croyez que l'air est vn Corps, soit que vous ne le croyez pas, vous ne deuez pourtant pas penser que j'aye dit que l'Ame estoit vne substance aérienne, mais bien qu'elle

Cassa futilis inanisque substantia:

Sed me rursus sollicitum facis vbi dicis, si anima caret corpore, vt sit, sicut quibusdam placet, cassæ inanitatis, æthereæ subtilisquæ substantia: His enim tuis verbis videris credere omne quod caret corpore inanis esse substantiæ. Quod si ita est, quomodo audes dicere Deum carere corpore, nec times ne sequatur, eum esse inanis substantiæ? . . . . sed non est diuicius hic immorandum, eum siue intelligas naturam aeris esse corpoream, siue non intelligas, me tamen putare non debes vel æream dixisse animam, sed omnino incorpoream . . . . Cur metuiamus ne sit

## P R E F A C E.

caſſæ inanitatæ  
anima, ſi ſic in-  
corporea, cum  
Deum fateamur  
incorporeum, nec  
eum caſſæ inati-  
tatis eſſe dicamus?  
Sic itaque potuit  
incorporeus Deus  
incorpoream  
creare animam,  
quemadmodum  
vivens viventem?

Quid enim minus  
ferendum & au-  
diendum eſt quam  
fateri nos ratione  
præſtare beſtiis &  
eam re fateri eſſe  
aliquid quam en-  
torem lumine ſen-  
timus, quam etiam  
non nullæ beſtiæ  
melius cernunt;  
id autem quod ra-  
tione contuemur,  
nil eſſe contende-  
re? quod ſi dice-  
retur tale eſſe qua-  
le illud quod oculi  
vident, præſtæd  
nihil indignius  
dici poſſe videretur.

eſt tout à fait incorporelle. Pourquoy crain-  
drons-nous qu'elle devienne vne ſubſtance  
vaine, à cauſe qu'elle eſt incorporelle, veu que  
nous auoions que Dieu eſt incorporel, & tou-  
tesfois nous ne diſons pas que c'eſt vne ſub-  
ſtance vaine. Auroit-il eſté moins poſſible à vn  
Dieu incorporel, de produire vne Ame incor-  
porelle, qu'à vn Dieu vivant de créer vne Ame  
vivante, puis qu'il eſt également l'un & l'autre.  
Et il condamne ceux qui croyoient qu'il n'y  
auoit rien de réel & de véritable que ce qui  
tomboit ſous les ſens & l'imagination, par  
ces paroles du Liure de la quantité de l'Ame.  
Qu'y a-t-il de moins ſupportable, que d'auoüer  
que nous auons la raiſon au deſſus des beſtes,  
& de confeſſer, que ce que la lumière Corpo-  
relle nous fait ſentir, eſt quelque choſe, qui  
eſt meſme quelquesfois mieux aperçu des be-  
ſtes que de nous; Et toutesfois de ſouſtenir  
que ce que la raiſon nous fait apercevoir n'eſt  
rien de réel, veu que ce ſeroit vne choſe in-  
digne d'un Eſprit raiſonnable de dire ſeu-  
lement que ce que la raiſon nous fait voir ſe-  
roit ſemblable aux choſes que nos yeux décou-  
urent.

Il y a bien encore d'autres points dans leſ-  
quels la Doctrinẽ de S. Auguſtin eſt confor-  
me aux ſentimens de Monsieur Descartes. Pour  
vous le faire voir, permettez-moy d'apporter  
encore quelques paſſages, qui montreront éui-

P R E F A C E.

demment qu'il a reconnu comme nous que l'Esprit de l'Homme pensoit tousiours; que les facultez de l'Ame n'estoient point distinguées d'elle; Qu'elles se rapportent à deux; l'une à apercevoir & l'autre à vouloir; Qu'il y a diuers degrez dans les sens; Que leurs especes & les Idées de l'Esprit sont choses différentes; que dans l'Homme le principe de la vegetation & de la nutrition est distingué de l'Ame; Enfin qu'il explique de la mesme maniere que nous l'vnion de l'Ame & du Corps, & le pouuoir qu'ils ont d'agir l'un sur l'autre; Et qu'il estime que Dieu pourroit faire vne machine semblable au Corps d'un animal, qui imiteroit sans connoissance toutes les actions que l'on croit communément que les bestes font par connoissance.

Il est manifeste que si S. Augustin n'auoit pas crû que l'Esprit de l'Homme ne cessoit iamais de penser il n'auoit pas écrit dans le 4.<sup>e</sup> Livre de l'Origine de l'Ame: Je n'ignore pas que quand on nous commande d'aimer Dieu de tout nostre cœur, on ne parle pas de cette partie de nostre chair qui est cachée sous les costes; mais de cette force par laquelle nous produisons nos pensées, à qui l'on donne ce nom à iuste titre; Car comme le mouuement du cœur qui fait le poux, en se rependant dans toutes les arteres ne cesse jamais, aussi nous ne cessons jamais de rouler quelque chose en

Nec ignoro, cum audimus, vt ex toto corde diligamus Deum, non hoc dici de illa particula carnis nostræ quæ sub costis latet, sed de illa vi quæ cogitationes hunc quæ merito appellatur hoc nomine; quia licet motus non cesset in corde, vnde se pulsus diffundit vsque quaque venarum, ita non quiesci-

# P R E F A C E.

mus aliquid cogi-  
tando versare.

Nihil mihi le-  
gis ut viuerem  
sciam, habet enim  
mea natura ut hoc  
nescire non pos-  
sum.

notre pensée. Il ajoûte encore à ce propos dans le même Liure. Il n'est pas nécessaire que vous m'aportiez aucun témoignage de l'Écriture pour m'apprendre que ie vis, car ie suis de telle nature que ie ne sçauois l'ignorer.

Cecy ne confirme-t-il pas ce que nous auons dit, que selon le sentiment de S. Augustin, l'Ame n'est rien autre chose qu'une Substance qui pense, c'est à dire, qui s'apperçoit de tout ce qu'elle fait, puis qu'il a dit qu'il tenoit de sa nature de ne pouuoir pas ignorer qu'il viuoit. Et apres auois dit dans le Liure de l'Immortalité de l'Ame, qu'elle ne pouuoit estre sans viure, & disant icy qu'elle ne peut viure sans s'en apercevoir, ne s'ensuit-il pas qu'il a crû qu'elle pensoit tousiours, principalement ayant ajoûté dans le 10. Liure de la Trinité Que l'Ame sçait qu'elle est, qu'elle vit; Parceque son Estre & sa Vie consistent dans l'Intelligence.

Sic ergo se esse &  
viuere scit; Quo-  
modo est, & viuut  
intelligentiâ

Anima est Spiri-  
tus intellectualis,  
semper viuens,  
semper in motu,  
&c.

Cela peut estre encore confirmé par la définition qu'il donne de l'Ame, dans le 13. Chap. du Liure de l'Esprit de l'Ame, en disant que l'Ame est un Esprit intelligent, tousiours uiuant, tousiours dans le mouuement, &c. Estant certain que par sa vie & ses mouuemens, il n'a pû concevoir autre chose que ses pensées, puis qu'il croit que l'Ame est immatérielle & incapable d'estre dans un lieu, comme nous ferons voir incontinent.

P R E F A C E.

Mais quand S. Augustin n'auroit pas parlé si clairement dans cette matiere, on ne pourroit pas toutes-fois douter que ce ne fust-là son sentiment; Car apres auoir écrit, comme nous auons raporté cy-dessus; Que l'Ame s'aperçoit aussi bien quand elle ne voit pas que quand elle voit, il s'ensuit, que si elle ne pensoit pas, elle deuroit aussi s'en apercevoir, & mesme avec plus de raison; Car il n'est pas necessaire que quand l'Homme ne voit pas, l'Ame s'en aperçoie tousiours, pouuant en estre détournée par quelque autre pensée: Mais si elle ne pensoit pas, quel objet pourroit l'empescher de s'en apercevoir? Ainsi elle penseroit dans le temps qu'on suppose qu'elle ne pense pas.

Je sçay bien qu'on peut m'objecter que S. Augustin a écrit, que l'Ame des Enfans qui sont dans le ventre de leur Mere estoit priuée de science & de volonté; mais cela ne s'opose pas à ce que ie viens d'auancer: Car nous ne croyons pas que leurs Ames soient sçauantes ny libres, bien que nous estimions qu'elles pensent dès ce temps-là. Et il n'y a pas de doute que S. Augustin, par le mot de Volonté, a entendu l'usage de la liberté, d'autant qu'il ne distingue pas les facultez de l'Ame d'avec l'Ame mesme. Il a décidé luy-mesme la question dans le 5. Chapitre du 14. Liure de la Trinité, où il conclut, *Non ignorare se potest, sed cogitare se non potest.* **Qu'elle ne peut**

*Non ignorare se potest, sed cogitare se non potest.*

# PREFACE.

pas ignorer qu'elle est ; mais qu'elle ne peut pas penser à ce qu'elle est.

Ce sçauant Personnage n'a pas crû que les facultez de l'Ame fussent autre chose qu'elle mesme, comme il paroist par le 34. Chapitre du Liure de l'*Esprit & de l'Ame* ; où apres auoir dit quel'Esprit del'Homme a diuers noms, selon les diuerses operations, il conclut ainsi.

*Ista autem hæc omnia adjuncta sunt Animæ, vt vna sit res, pro efficienciis tamen carnarum diuersa nomina sortita est ; in essentia namque simplex, in officiis multiplex. . . Nec aliud significo quam animam, cum mentem dico, sed propter aliud animā, & propter aliud mentem, nam totum quod homo videt hominis anima est ; cum autem anima in se agit se, & ex se & per se, sola mens dici solet. .*

Toutes ces facultez sont iointes à l'Ame si étroitement qu'elles ne sont que la mesme chose, à laquelle on donne diuers noms, par rapport à les différentes manieres d'agir ; Et bien qu'à raison de son essence elle soit tres-simple, elle semble pourtant se multiplier dans les diuerses charges qu'elle exerce. . . Quand ie l'appelle Ame, ie ne parle pas d'autre chose que quand ie la nomme Esprit ; mais ie luy donne le premier nom pour vne raison, & le second pour vn autre ; ie l'appelle Ame quand ie ne considere en elle autre chose sinon qu'elle donne la vie à l'Homme ; Mais quand ie regarde simplement de quelle maniere elle agit en elle mesme, d'elle mesme, & par elle mesme, pour lors ie la nomme seulement Esprit.

Vous pouuez lire encore ce qu'il en dit dans le 13. Chapitre du mesme Liure, en ces termes ; Les puissances de raisonner & de vouloir ne different pas dans la chose, comme elles font dans les noms ; puisque ces deux facultez ne sont qu'une mesme Ame, dont l'essence con-

*Ista tamen non differunt in substantiâ quemadmodum in nominibus, quoniam omnia ista vna anima est, proprie-*

P R E F A C E.

seruë son vnitë, nonobstant que ses proprietèz soient diuerses. Toute l'essence de l'Ame reside dans ces facultez, lesquelles ne la diuisent point en partie, parce qu'elle est simple & indiuisible; Et si on luy en attribue par fois quelques-vnes, cela se doit plustost entendre par analogie, que non pas d'une veritable composition; Elle a ses puissances, mesme auant que de se mesler dans le Corps, car elles luy sont naturelles, & ne sont pas autre chose qu'elles. Il confirme cecy dans le Chapitre 7. du mesme liure, où il reconnoist de plus que toutes les facultez de l'Ame se peuuent reduire à ces deux, apercevoir & vouloir. Voicy ses paroles. Il y a deux choses dans l'Ame qui ne sont pas autre chose qu'elle, à sçauoir le Sens ou la lumiere Naturelle, qui connoist tout & discerne chaque chose; Et de plus la faculté naturelle de vouloir ou de choisir, de laquelle l'Ame se sert pour aimer chaque chose selon le rang & le degré qu'elle tient.

tates quidem diuersæ, sed essentia vna.....

Tota animæ essentia in his potentiis suis consistit, nec per partes diuiditur cum sit simplex & indiuisua, & si aliquando partes habere dicitur, ratione potius similitudinis quam veritatis compositionis intelligendum est... Has potencias habet antequam corpori miscatur; naturales quidem sunt ei, nec aliud sunt quam ipsa.

Sunt enim duo in anima, & sunt id quod anima, naturalis sensus cognoscens omnia & diiudicans inter omnia, naturalis affectus quo suo ordine & gradu diligit omnia.

On peut aussi faire voir sans beaucoup de peine, que ce grand genie a estimé que l'Esprit de l'Homme ne pouuoit estre, à proprement parler, dans aucun lieu, par cette excellente definition qu'il en donne, dans le 5. Chapitre du Liure de la Connoissance de la veritable vie, laquelle est d'autant plus considerable que ce n'est qu'apres auoir donné la definition de toutes les diuerses choses auxquelles le nom

# P R E F A C E :

Anima Spiritus,  
est substantia in  
corpore, corpo-  
ris sui vita, invi-  
sibilis, sensibilis,  
mutabilis, illora-  
bilis, passibilis,  
nec quantitatum  
mensura, nec qua-  
litarum forma,  
vel coloris susce-  
ptibilis, memo-  
rialis, rationalis,  
intellectus, qualis,  
immortalis.

Est etiam illoca-  
lis, omne enim  
quod loco inclu-  
ditur altitudine,  
latitudine, lon-  
gitudine aëris cir-  
cumferibitur, igitur  
corpus est; sed  
ratio docuit ani-  
mam incorporeā  
esse, id est, nec cor-  
pus nec aliquod  
membrum habere.  
Igitur constat  
eam esse illocalem,  
non enim spatium  
aëris ut corpus  
occupat, nec cor-  
pus ut aqua utrum  
implet, sed ut  
calor igni illo-

d'Esprit peut conuenir, qu'il definit ainsi celuy de l'Homme. Cette Ame, qui est l'Esprit de l'Homme, est vne substance incorporelle qui communique la vie à son Corps, ( par laquelle vie nous ferons voir tantost qu'il n'a pas entendu vne vie vegetatiue, telle qu'on l'attribuë aux plantes, mais vne vie sensitiue, entant quel'Ame sent & raisonne dans le Corps) inuisible, douëe de la faculté de sentir, sujete au changement, incapable d'estre dans vn lieu; mais neanmoins passible, quoy qu'elle ne soit susceptible d'aucune quantité mesurable, d'aucune qualiré, figure, ny couleur, douëe de Memoire, de Raislon, d'Entendement & d'Immortalité. En suite de quoy, apres auoir expliqué les premieres parties de cette definition, il declare ainsi, pourquoy elle n'est pas capable d'estre dans vn lieu; Car, dit-il, tout ce qui est contenu dans vn lieu répond à l'étenduë en longueur, largeur, & profondeur de l'air, qui l'enuironne, & est Corps par consequent; Or la raison nous a enseigné que l'Ame estoit incorporelle, c'est à dire, qu'elle n'estoit ny Corps, ny partie d'un Corps qui pût remplir vn espace; Il est donc certain qu'elle ne peut pas estre dans vn lieu: Car elle n'occupe aucun espace d'air comme vn Corps, & elle ne remplit pas son Corps, comme l'eau fait vne vessie; Mais comme la chaleur est dans le feu sans y occuper de place, l'Ame est de mesme dans son Corps



P R E F A C E.

Corps, fans y estre estenduë localement. Car (comme il dit ailleurs) elle le possède & luy est presente, *non mole sed intentione*, c'est à dire, non par l'estenduë de sa Substance, mais par l'aplication de ses pensées.

Cecy appuye aussi tres-fortement ce que Monsieur Descartes a écrit à Madame la Princesse Elizabeth, dans la 29. Lettre du premier Volume. Que nous auions donné & attribué aux qualitez réelles la notion que nous auions de l'Ame & du Corps. S. Augustin a reconnu de plus aussi-bien que Monsieur Descartes, que l'Esprit de l'Homme n'estoit pas le Principe des fonctions vegetatiues & nutritiues, comme on peut voir dans le 9. Chapitre du mesme Liure de l'Esprit & de l'Ame.

D'autant; dit-il, que l'Ame de l'Homme peut subsister au dedans & au dehors du Corps, elle peut-estre appellée Ame ou Esprit; Ce ne sont pas deux Ames, l'une sensitiue, & l'autre raisonnable; l'une par laquelle l'Homme vit, & l'autre qui luy donne, comme on croit, la sagesse & l'intelligence; Ce n'est qu'une mesme Ame, laquelle vit en elle mesme par l'Entendement, & qui communique la Vie au Corps par les sens.

Ces dernieres paroles montrent, à mon aui, évidemment que S. Augustin n'a pas pensé que l'Ame raisonnable donnast à son Corps d'autre vie que la raisonnable & la sen-

caliter inest, ira  
anima corpus illo  
caliter possidet.  
Non mole sed in-  
tentione.

Anima quidem  
humana, quia in  
corpore habet es-  
se, & extra cor-  
pus, pariter ani-  
ma & spiritus vo-  
cari potest: non  
duo animæ sen-  
sualis & rationalis, aliter quâ ho-  
mo vivat, aliter  
quâ, ut putant,  
sciat. Sed una  
atque eadem ani-  
ma in semetipsâ  
vivit per intelle-  
ctum, & corpori  
vivam præbet per-  
sensum.

Humana nam-  
que corpus nec  
vivere nec nasci  
potest sine anima  
rationali; vegeta-

## P R E F A C E.

sur tamen, mouetur, & crescit, & humanam formam in vtro recipit antequam animam rationalem recipiat; sic ut etiam virgulta & herbas sine animâ moueri & incrementum habere videmus.

sitive, puis: qu'il ne fait mention d'aucune autre: Mais cecy n'est encore plus clairement par ce qu'il ajouste en suite: Le Corps de l'Homme, dit-il, ne peut viure ny naistre sans l'Ame; Mais il se nourrit, il se meut, il croist & il prend dans le ventre de sa mere la conformation interieure & exterieure du Corps de l'Homme, auant que de receuoir l'Ame raisonnable, à la maniere que nous voyons que les plantes & les herbes se meuuent & croissent sans Ame.

Mais de quelle maniere croiriez-vous qu'il a pensé que certe Amé donnoit à son Corps la vie sensitive, quand elle est jointe avec luy? Pour expliquer cecy nettement considerons vn peu de quelle sorte il parle de la nature du Sens, de ses diuers degrez, de ses especes, & des Idées de l'Esprit. Dans le *Liure de la Quantité de l'Ame* il dit que le sens est une passion du Corps qui par elle-mesme est aperceüe de l'Ame. Il ajouste en suite pour maintenir sa definition contre les objections qu'on luy pouroit faire, Bien que sentir & sçauoir soient choses differentes, n'estre pas caché toutesfois, ou estre aperçeu de l'Ame, est vn genre commun à l'vn & à l'autre, comme estre animal est vn genre commun à l'Homme & à la beste, quoy que ce soient deux estres fort differens. Or tout ce qui n'est pas caché paroist à l'Ame & en est aperçû.

Sensus est passio corporis, per se ipsam non latens animam.

Quamquam aliud sit sensus, aliud scientia; illud tamen, non latere, vtrique commune est: ut ipsi homini & bestiæ, quamuis plurimum differant, animal tamen esse commune est: non latet autem quidquid animæ apparet.

P R E F A C E.

Surquoy vous obseruerez que selon S. Augustin, estre aperçû de l'Ame est vn genre commun entre sentir & sçauoir ; Car ie ne croy pas qu'on puisse interpreter autrement *non latere animam*, que par *estre aperçû de l'Ame*.

Vous remarquerez secondement , que de cette façon il paroist que S. Augustin a reconnu pour le moins deux degrez dans le sens ; Le premier desquels est ce qu'il apelle *passion du Corps*, & le second est la pensée ou perception de l'Esprit qui s'aperçoit de cette passion ; C'est pourquoy il dit encore dans le cinquiesme Chapitre du 7. Liure de la *Trinité*, que la vision qui se fait dans l'organe du sens a quelque chose de spirituel, parce qu'elle ne se peut faire sans l'Ame ; Mais qu'elle n'est pas toute spirituelle ; Car la passion qui se fait dans l'organe , quand il est frapé par les objets , & qui s'apelle aussi sens , appartient au Corps. Ie ne croy pas non plus qu'il y ait lieu de douter qu'il n'ait de mesme distingué le troisieme degre du sens, des deux autres, c'est à sçauoir le Iugement qui suit la perception de l'Esprit , comme celle - cy suit la passion du Corps, puis qu'il dit en plusieurs endrois que c'est luy - mesme qui se trompe & non pas elle.

Il y a vn parfaitement beau passage dans le 24. Chapitre du 12. Liure de la Genese selon la letre, dans lequel il explique admira-

Visio quæ fit in sensu habet admixtum aliquid spiritale, quia sine anima fieri non potest; sed non totum ita est; quoniam ille qui formatur, corporis sensus est.

# P R E F A C E.

blement les diuerſes perceptions de l'Esprit ; avec la diuerſité qui ſe trouue entre les eſpeces du Corps & les Idées de l'Esprit ; Et qu'elle eſt ſa penſée touchant la maniere dont ſe fait la ſenſation , voicy comme ie le traduis en l'eſtendant vn peu , afin de le rendre plus clair. Quoy qu'il y ait diuerſes ſortes de viſions , ou perceptions de l'Ame , ſoit de celles par leſquelles elle aperçoit les choſes exterieures qu'elle ſent par les organes du Corps , comme ce Ciel Corporel , certe Terre , & toutes ces choſes qui peuuent eſtre conuës en eux , de la maniere qu'elles le peuuent eſtre ; Soit de celles par leſquelles elle aperçoit les choſes , qui n'eſtant plus deuant aucun de ſes ſens exterieurs , ſont ſeulement preſentes à ſon Esprit & à ſon imagination , par leurs Images ; Qui ſont ſemblables aux Corps , & qui eſtant moins attachées à la matiere qu'eux , donnent lieu de nommer Spirituelles les perceptions de l'Ame qui leur appartiennent , en comparaiſon de celles qui dependent des ſens ; Soit enfin de celles par leſquelles l'Ame conçoit les choſes qui ne ſont ny Corps ny Image ou reſſemblance de Corps. Chacune de ces viſions neanmois à ſon rang , & elles ne ſont pas toutes auſſi nobles les vnes que les autres ; Car la viſion Corporelle , qui eſt celle qui depend de l'action des ſens exterieurs , eſt moins noble que la viſion ſpirituelle qui apartient à l'imagination ; Mais la

Quamquam itaque  
in eadem anima  
ſiant viſiones , ſiue  
quæ ſentiuntur per  
Corpus , ſicut hoc  
corporeum cor-  
lum, terra & quæ-  
cunque in eis nota  
eſſe poſſunt, quem-  
admodum poſ-  
ſunt , ſiue quæ ſpi-  
ritu videntur ſimi-  
lia corporum ,  
ſiue cum mente in-  
telliguntur, quæ  
nec corpora ſunt  
nec ſimilitudines  
corporum , habent  
vtrique ordinem  
ſuum & eſt aliud  
alio præcellenti-  
us præſtatio eſt enim  
viſio ſpiritualis  
quam corporalis,  
& rursus præſtan-  
tior intellectualis  
quam ſpiritualis.  
Corporalis enim  
ſine ſpirituali eſſe  
non poteſt , quan-  
do quidem mo-  
mento eodem quo  
corpus ſenſu cor-  
poris tangitur , ſit  
etiam in animo  
tale aliquid , non  
quod hoc ſit , ſed  
quod ſimile ſit.  
Quod ſi non fieret  
nec ſenſus ille eſ-  
ſet quo ea quæ ex-  
trinſecus adjacent  
ſentiuntur , neque  
enim corpus ſen-

# P R E F A C E.

vision intellectuelle est encore plus noble que la spirituelle. La vision Corporelle ne sçau- roit estre sans la spirituelle ; car dans le mesme moment que le Corps est touché dans quelqu'un de ses sens, il se fait quelque chose de pareil dans l'Esprit , c'est à dire , dans l'organe de l'imagination ou du sens commun, qui est semblable à ce qui se fait au dehors , mais qui n'est pourtant pas la mesme chose ; Parce que, si cela estoit, cette impulsion qui vient du dehors, au moyen de laquelle nous discernons les objets extérieurs, ne pourroit pas s'appeller sens, n'estant pas accompagnée de la pensée de l'Ame ; qui n'est attachée à ce qui se fait au dehors, qu'entant qu'il est communiqué au sens commun ; D'autant que ce n'est pas le Corps qui sent, mais l'Ame par le Corps, duquel elle se sert comme d'un messager, pour former en elle mesme l'Idée de la chose qui luy est annoncée de dehors. La vision Corporelle ne se peut donc faire sans la spirituelle, qui par consequent ne paroist pas differente de la premiere, iusques à ce que les sens cessent d'agir, & que l'Homme trouue dans son Esprit les images des choses qu'on aperceuoit auparavant par les sens ; Mais la vision spirituelle peut bien estre sans la Corporelle ; comme lors que les images des Corps absens aparoiissent à nostre Esprit & à nostre

tit sed anima per corpus quo velut nuntiò vritur ad formandum in se ipsa quod extrinsecus nuntiat. Non potest itaque fieri visio corporalis nisi spiritalis simul fiat, sed non discernitur, nisi cum fuerit sensus ablatu à corpore, ut id quod per corpus videbatur invenitur in spiritu. At verò spiritalis visio etiam sine corporali fieri potest, cum absentium corporum similitudines in spiritu apparent & finguntur multa pro arbitrio vel præter arbitrium demonstrantur. Item spiritalis visio indiget intellectu uti dijudicaretur : Intellectualis autem ista spiritali non indiget, ac per hoc spiritali corporalis, intellectuali autem utraque subiecta est.

## P R E F A C E.

imagination ; soit que nous nous seruions de cette faculté pour nous représenter volontairement plusieurs choses ; soit que leurs especes reuiennent d'elles mesmes sans y estre appellées. La vision spirituelle a besoin de l'intellectuelle pour estre reconnüe & jugée ; Mais celle-cy n'a besoin d'aucune des deux autres ; Et ainsi il est aisé de voir que la vision Corporelle est soumise à la vision spirituelle ; & que l'un & l'autre le doit estre à l'intellectuelle.

Il n'y a rien de si aisé que de voir combien ce passage a de raport avec les sentimens de Monsieur Descartes ; Et ie ne pense pas mesme que ceux qui liront le texte Latin qui est à la marge , se puissent persuader que ce que j'ay ajousté dans ma traduction , pour le rendre plus clair , & pour faire mieux voir la pensée de Saint Augustin , luy fasse aucune violence. Concluons donc que quand il a dit cy-deuant que l'Ame donnoit la vie sensitive à son Corps , il n'a pas pensé qu'elle luy communiquast la faculté de connoistre qui reside en'elle ; & qu'il n'a voulu dire autre chose , sinon que le composé qui se fait de l'Ame & du Corps , quand ils se joignent , receuoit de l'Ame la puissance d'apercevoir les choses qui frapent son Corps.

Qui voudra sçauoir plus au long le sentiment de ce Sçauant Docteur , peut lire l'en-

## P R E F A C E.

troit que ie viens de citer, & de plus le 6.  
Liure de la Musique, dans lequel on trouuera  
qu'il dit premierement; Car pour moy ie ne  
pense pas que l'Ame anime son Corps d'autre  
sorte, que parce que dans les passions du  
Corps elle agit avec plus d'attention & d'ap-  
plication à ce qu'elle fait; Et ie ne croy pas  
qu'elle souffre rien du Corps; Mais j'estime  
qu'elle fait de luy & dans luy comme d'un  
sujet que Dieu a soumis à sa domination.

Que peut on dire qui approche dauantage de  
ce que nous auons écrit de l'Vnion de l'Ame  
& du Corps? Saint Augustin ajouste, Que tous  
les accidens Corporels, qui se presentent de-  
uant nostre Corps, & que les objets de dehors  
enuoyent à nos sens, n'agissent pas sur l'A-  
me; Mais qu'ils font quelque chose dans le  
Corps, qui tantost est conforme à l'action de  
l'Ame, & tantost luy est opposé. Cela ne s'ac-  
corde-t-il pas bien avec ce que nous auons  
dit de la distinction des especes & des Idées?

Vû principalement qu'il continuë ainsi, Et  
pour ne vous tenir pas plus long-temps, il ne  
me semble pas que l'Ame souffre rien du Corps  
quand elle sent; mais seulement, qu'elle ap-  
porte plus d'attention dans son action, lors  
qu'il souffre quelque chose des objets; Et que  
soit que les impressions qu'ils font sur luy ren-  
dent les actions de l'Ame plus faciles, ou qu'el-  
le les rendent plus difficiles, selon l'oposi-

*Ego enim ab ani-  
ma corpus hoc a-  
nimari non puto,  
nisi intentione fa-  
cientis; nec ab illo  
istam quicquā pa-  
ti arbitror, sed fa-  
cere de illo & in  
illo tanquam de  
subiecto diuinitus  
dominationi suæ,*

*Corporalia ergo  
quæcumque huic  
corpori ingerun-  
tur, aut obijciun-  
tur extinctæ, nō  
in anima, sed in  
corpore aliquid  
faciunt, quod ope-  
ri eius aduersetur,  
aut congruat.*

*Et ne longum fa-  
ciam, videtur mi-  
hi anima cum sen-  
tit in corpore, non  
aliquid ab illo pa-  
ti, sed in eius pas-  
sionibus attentius  
agere: & eas actio-  
nes suæ faciles pro-  
pter convenientiā,  
sive difficiles pro-  
pter inconuenien-  
tiam, non eam la-  
tere, & hoc est,  
quod sentire dici-  
tur.*

# P R E F A C E.

Cum igitur ipsum sentire, mouere sit corpus, aduersus eum motum qui in eo factus est.

Has operationes passionibus corporis puto animam exhibere cum sentit, non easdem passiones recipere.

Non igitur absurdè credimus motus suos animam, vel actiones, vel operationes, vel si quo alio nomine commodius vocari possunt, nō latere, cum sentit.

tion ou la conformité qu'elles ont avec elle, elle s'en aperçoit tousiours, & c'est ce qu'on appelle sentir. Enfin il conclut : La sensation n'est donc rien autre chose, que le mouuement que l'Ame imprime dans son Corps, contraire à celuy qu'il reçoit des objets, entant qu'elles'en aperçoit. J'ajoute, *entant qu'elle s'en aperçoit*, tant à cause des autres definitions qu'il a données du sens, qu'à raison de ce qu'il a dit peu auparauant. Qu'il croyoit que l'Ame quand elle sent, apportoit de son costé ces operations ( c'est à dire ces perceptions ) & les joignoit aux passions du Corps : Mais non pas qu'elle reçût en elle ces mesmes passions. Et ensuite; C'est donc avec raison que nous croyons que l'Ame quand elle sent s'aperçoit de ses mouuemens, actions ou operations ou de quelque autre nom plus commode dont vous puissiez les designer.

On ne scauroit nier apres cela que la maniere dont Saint Augustin explique la sensation ne soit fort esloignée de celle de l'Ecole, & qu'il n'y a que peu ou point de difference entre luy & Monsieur Descartes sur ce sujet; Et quoy que cela ne paroisse pas d'abord, j'esperois pourtant le faire voir si ie ne craignois d'estre trop long. En effet il y a beaucoup d'apparence que la chose est ainsi, vû qu'en deux passages differens Saint Augustin ne semble pas reconnoistre d'autre Ame dans les bestes & dans



P R E F A C E.

& dans les plantes qu'un Esprit Corporel. Le premier de ces Passages est pris du 33. Chapitre du Liure de l'Esprit & de l'Ame ; l'appelle Esprit Corporel un Corps composé d'air & de feu, lequel à cause de sa subtilité ne peut estre vû, & qui vivifie & fait vegeter les autres Corps : Quelques-uns desquels il fait vegeter seulement, sans leur donner le sentiment, tels que sont les arbres, les herbes, & les autres plantes qui naissent de la terre ; Et il y en a d'autres, comme les brutes, auxquels il donne la vie & le sentiment. L'autre passage se lit à la fin du 4. Chapitre du Liure de la Connoissance de la véritable vie, un peu deuant la definition de l'Ame raisonnable, en ces termes ; L'Ame des bestes est un Esprit vital composé d'air & du sang de l'animal ; Il est invifible, doué de sentiment & de Memoire, mais priué d'Entendement, & il se dissipe dans l'air & meurt avec la chair.

*Spiritum corporeum voco aërem, vel potius ignem, qui pro sui subtilitate videri non potest, & corpora interiorius vegetando vivificat; quodam autem vegetat tantum & non sensibiliter, sicut arbores, herbas, & universa in terra germinantia; quodam sensibiliter & vegetat sicut omnia bruta animalia.*

*Vita brutorum animalium est spiritus vitalis consistens de aëre & sanguine animalis, invifibilis, sed sensibilis; memoriam habens, intellectu carens, cum carne moriens, in aëre evanescens.*

Y a-t-il rien de plus conforme à la pensée de Monsieur Descartes que ce que dit icy S. Augustin ? Et quoy qu'il donne la faculté de sentir à cet Esprit, n'est-il pas manifeste qu'il ne l'a entendu que du premier degré du sens, suivant ce qu'il a écrit dans le 38. Chapitre du mesme Liure, où il distingue la faculté de sentir de l'Ame, de celle du Corps, qu'il appelle *Vis ignea*. C'est pourquoy il y a lieu de croire que quand il a écrit que l'Ame mou-

## P R E F A C E

toit le Corps contre le mouuement de l'objet , il n'a pas estimé qu'elle fit cela par elle meſme , mais par le moyen des eſprits animaux. Cecy demanderoit peut-eſtre vn peu dauantage d'explication : mais comme i'ay déjà dit , j'aurois peur d'eſtre ennuyeux : Je ne puis toutesfois finir cette matiere ſans rapporter vn paſſage de Plutarque conforme à ce que nous venons de voir ; il eſt couché dans le Liure de la Sagacité des Animaux en ces termes ; [ Il y a au vn diſcours de Straton le Phyſicien , qui montre qu'on ne ſçauroit ſentir en aucune façon ſans la penſée de l'Eſprit : Car il arriue ſouuent que nous parcourons des yeux les lettres d'vne écriture , & que nos oreilles ſont frappées par le ſon des paroles , ſans que nous les entendions ny aperceuiſſions , quand noſtre Eſprit eſt appliqué à quelque autre objet , chacune deſquelles choſes neanmoins reuient apres , & ſe repreſente à noſtre penſée , c'eſt pourquoy l'on dit , *Qu'il n'y a que l'Eſprit qui voye , & entende , & que les autres choſes ſont ſourdes , & auengles* : Parce que la paſſion des yeux & des oreilles , quand elles ſont frappées des objets n'excite aucun ſentiment , ſi la penſée de l'Eſprit en eſt éloignée. ]

Retournons à Saint Auguſtin , & tâchons de découurir ſ'il eſt encore d'accord avec Monſieur Deſcartes touchant l'Vnion de l'Ame

# P R E F A C E.

& du Corps, & la maniere dont ils agissent l'un sur l'autre. Penseriez-vous que s'il auoit erû que l'Esprit de l'Homme fut autrement vni à son Corps que par ses pensées il eût écrit, Pour moy ie ne pense pas que l'Ame anime le Corps d'autre sorte que par ce qu'elle apporte plus d'attention & d'application à ce qu'elle fait pendant les passions du Corps? S'il se fût persuadé que quelque autre cause eust attaché les pensées de l'une aux mouuemens de l'autre que la seule Volonté de Dieu, auroit-il dit qu'elle agit sur le Corps comme sur vn sujet que Dieu a soumis à sa domination? S'il eust pensé que le Corps agissoit sur l'Esprit à la maniere des causes vniuoques, & que leur vnion eust consisté en autre chose que dans le commerce des pensées de l'un & des mouuemens de l'autre, auroit-il ajousté, Qu'il ne luy semble pas que l'Ame souffre rien du Corps quand elle sent dans le Corps, mais seulement qu'elle agit avec plus d'attention pendant qu'il souffre quelque chose des objets; & qu'il croit que quand elle sent, elle ajousté ses opérations aux passions du Corps; Mais qu'elle ne reçoit nullement ces mesmes passions. Enfin s'il eust jugé, que ces opérations & ce mouere qu'il dit estre *sentir*, que l'Ame apporte de son costé, quand les sens sont frapez, eussent esté de veritables mouuemens, auroit-il eû tant de peine à les nommer, quand

Ego autem ab anima corpus hoc animari non puto, nisi intentione facientis.

Corpori diuinius subiecto dominationi suæ.

Videret mihi anima cum sentit in corpore, non ab illo aliquid pati, sed in eius passionibus attentius agere; has operationes passionibus corporis puto animam exhibere cum sentit, non easdem recipere.

Non igitur absurdè credimus, motus suos animam, vel actiones, vel

# P R E F A C E.

operationes, vel si  
quo alio nomine  
commodius voca-  
ri possunt, non la-  
teret, cum sentit.

il a écrit, C'est donc avec raison que nous croyons que l'Ame, quand elle sent, s'aperçoit de ses mouvemens, actions ou operations, ou s'il y a quelque nom plus commode à donner à ces choses?

Je ne pense pas qu'on puisse trouver une plus grande conformité que celle qui se rencontre entre ce que dit S. Augustin & ce que j'ay avancé sur cette matiere : Car premièrement il a crû que cette union ne consistoit pas dans une presence locale accompagnée d'estendue; mais dans l'union des pensées de l'Esprit & des mouvemens du Corps, lequel il remplissoit *intentione*, non *mole*. Secondement, il n'a pas crû que le Corps agist sur l'Ame en luy faisant recevoir ses passions, mais en luy donnant occasion d'agir en mesme temps : car comme il dit, Dans le mesme temps que le Corps est touché il se fait aussi quelque chose de semblable dans l'Esprit, qui n'est pourtant pas le mesme. Troisièmement, il n'a pas crû que l'Ame donnast le mouvement au Corps autrement que par sa volonté. C'est pourquoy il soutient dans le Livre des 83.

Eodem momento  
quo corpus tangi-  
tur, fit etiam in  
anima tale ali-  
quid, non quod  
hoc fit, sed quod  
simile sit.

Moueri per se ani-  
mam sentit, qui  
sentit in se esse vo-  
luntatem; nam si  
volumus, non aliud  
de nobis vult; &  
iste motus animæ  
spontaneus est.  
Hoc enim ei tri-  
butum est à Deo:  
qui tamen motus

questions. Que celui qui sent en luy une volonté, ne peut qu'il ne sente aussi que son Ame se meut d'elle mesme : Car quand nous voulons, un autre ne veut pas pour nous; & ce mouvement de l'Ame vient d'elle mesme, & de son fonds; car cela luy a esté accordé de la

# P R E F A C E.

part de Dieu ; Ce n'est pas toutesfois vn mouuement local, comme celuy des Corps, d'autant que le mouuement local ne peut conuenir à vne substance qui n'est pas Corps ; Et quoy que l'Ame par sa volonté, c'est à dire par cette maniere de mouuement qui n'est pas local, meue son Corps localement, il ne s'ensuit pas pourtant qu'elle se doieue aussi mouuoir de mesme.

Enfin, c'est de la mesme façon que nous, qu'il determine qu'elles sont les pensées de l'Esprit & les mouuemens du Corps, entre lesquels cette vnion se trouue principalement, lors qu'il dit au 14. Chapitre du Liure de l'Esprit & de l'Ame, Que le Corps & l'Esprit ont aussi de la ressemblance dans quelques-vnes de leurs parties, c'est assauoir dans la partie supérieure ou plus noble du Corps, & dans la plus basse partie de l'Esprit, dans lesquelles ces deux substances se peuuent joindre d'une vnion personnelle, sans perdre toutesfois ny confondre leur nature particuliere : car chaque chose aime son semblable. C'est pourquoy l'Ame qui est Esprit, & la chair qui est veritablement Corps, peuuent s'vnir conuenablement dans leurs extremités, dans lesquelles elles ont quelque rapport, c'est assauoir dans la partie fantastique ou imaginatiue de l'Ame, laquelle n'est pas Corps, mais toutesfois semblable au Corps, & dans la partie sensitiue du Corps

non de loco in locum est tanquam corporis; localiter enim moueri corporis proprium est: & cum anima voluntate, id est illo motu qui localis non est, corpus tamen suum localiter mouet, non ex eodem monstratur & ipsa localiter moueri.

Sunt etiam veriusque quædam similia, corporis scilicet supremum, & spiritus infimum, in quibus sine naturarum confusione personali tamē vnione facile coniungi possunt, similia enim similibus gaudent. Itaque anima quæ spiritus est, & caro quæ verè corpus est, in suis extremitatibus facile & conuenienter vniantur, id est in phantastico animæ quod corpus non est sed simile corpori, & in sensualiitate corporis, quæ scè spiritus est, quia sine anima elle non potest.

# P R E F A C E.

qui est presque spirituelle, parce qu'elle ne peut estre sans l'Ame.

Quelle peut-estre cette partie fantastique de l'Ame qui n'est pas Corps mais semblable au Corps, si ce ne sont les pensées confuses de l'imagination qui ne sont pas Corps, estant des operations de l'Esprit : Mais toutesfois semblables au Corps, parce qu'elles le representent, & qu'elles en dependent ? Et quelle peut-estre cette partie sensitive du Corps, qui est presque esprit, parce qu'elle ne peut-estre sans l'Ame, sinon cette *ignea vis*, ou les esprits animaux, qui n'auroient pas le pouuoir de nous faire rien sentir si celuy qui a vny l'Ame au Corps n'auoit aussi attaché nos pensées aux formes qu'ils prennent.

L'ay dit dans le commencement de ce discours, que les sentimens de Marcile Ficin n'estoient pas éloignez de ceux de Monsieur Descartes. Ceux qui ont leu sa Theologie Platonique n'en peuuent douter, & j'en pourrois conuaincre les autres par quantité de passages : Mais ie croy que celuy-cy doit suffire ; Voicy comme il parle ; Mais comment est-ce que les Esprits peuuent communiquer leur estre au Corps ? Se méle-t-ils avec luy ? Point du tout ; Car tout ce qui se méle perit & perd sa nature, en se confondant avec vn autre. Seroit-ce en touchant le Corps ? Non ; car l'atouchement ne peut-estre qu'en-

*Sed quomodo esse  
suum impertiant  
corpori ? miscetur  
ne ipsum ? mini-  
me ; perit enim &  
confunditur quod  
miscetur. An tan-  
gunt corpus ? ne-  
quaquam ; Tactus  
enim duorum est  
corporū proprius.  
Nunquid claudun-  
tur in eo ? neque*

## P R E F A C E.

tre deux Corps. Sont-ils enfermez dans luy? Nullement; car il n'y a que les Corps qui puissent estre enfermez dans vn lieu. Que font donc ces formes spirituelles dans le Corps quand elles luy communiquent leur estre? Elles le penetrent de tous costez par leur essence; elles destinent à son seruice toutes les facultez de leur essence; & d'autant que l'Estre de chaque chose vient de son essence, & que les operations naissent des facultez, en joignant leur essence, elles luy communiquent leur estre, & en luy destinant leurs puissances, elles luy font part de leurs operations; de telle sorte que de cette vnion de l'Ame & du Corps il resulte vn seul Estre composé, qu'on apelle animal, & vne seule operation; Cecy se doit entendre de l'vnité de composition & d'accompagnement & non pas d'identité.

Il ne faudroit pas faire vne Preface, mais des Liures entiers, si l'on vouloit rapporter tous les passages qui se trouuent dans les Oeuures de S. Augustin conformes au sentiment de Monsieur Descartes, soit au sujet de l'Ame, soit touchant la machine de son Corps, entre lesquels celuy-là n'est pas des moindres où il reconnoist que Dieu pouroit faire vne machine semblable à vn animal, laquelle imiteroit tous les mouuemens d'un animal effectif, sans le secours d'aucune Ame: Et il ne confirme pas peu tout ce que nous auons dit sur cette

*istud; non enim loco claudirur, nisi corpus. Quid igitur agunt hæ formæ in corpus quâdo ipsi esse suum communicant? Penetrant ipsa vndique essentia sua, virtutē essentia suæ dedicant illi; cum verò ab essentia ducatur esse & à virtute produat operatio, conjungēdo essentiam impertiant esse, dedicando virtutem operationes communicant, vt ex animæ corporisque congressu vnum euadat esse animalis, operatio vna.*

# P R E F A C E.

matiere. Ce passage est dans la 102. Lettre en ces termes, Je suis estonné de voir que vous pensez que par le seul commandement de Dieu, sans le secours d'aucune Ame, la nature Corporelle toute seule ait pû rendre vn son semblable à cette voix qui a dit, *Tu est mon Fils*; Et que vous ne croyez pas de mesme, que Dieu puisse produire vne machine semblable au Corps de quelque animal que ce soit, qui imite la figure & le mouuement des choses viuantes, sans l'entremise de l'Ame d'vn animal. Car si la Creature corporelle rend bien obeysance à Dieu en ce point, qu'elle enuoye des sons semblables à ceux qui sortent de la gorge des Corps animez, sans le secours d'vne ame viuifiante, iusques à porter dans nos oreilles l'espece d'vne voix articulée, pourquoy la mesme Creature n'obeira-t-elle pas de mesme à la toute-puissance du Createur, en montrant à nos yeux la figure & le mouuement d'vn oyseau sans le ministère d'vne Ame viuifiante.

Voicy à mon auis vn assez grand nombre de passages pour contenter ceux qui ne veulent rien receuoir qui ne soit apuyé de l'autorité de l'Antiquité, pour leur persuader qu'on en auroit bien peu alleguer dans le corps du Liure, & mesme beaucoup dauantage, si dans vn écrit purement Philosophique on auoit crû se deuoir seruir d'autres armes que de celles de la raison.

Mais

Mirror tibi videri  
sonitum illius vo-  
cis quâ dictū est;  
Tu es Filius meus,  
non mediante ani-  
ma, sed diuino nu-  
tu, solâ corporali  
naturâ sic fieri po-  
tuisse; & non tibi  
videri eodem mo-  
do posse fieri cuius  
libet animantis  
speciem corpora-  
lem, motumque  
viuenti similem,  
diuino nutu, nullo  
animali interposi-  
to spiritali. Si enim  
obtemperat Deo  
creatura corporea,  
sine viuificantis  
animæ ministerio,  
vt edantur soni  
quales edî ex cor-  
pore animato so-  
lent, vt forma lo-  
cutionis articulata  
auribus inferatur,  
cur non obtempe-  
ret, vt sine viuifi-  
cantis animæ mini-  
sterio, figura mo-  
tusque volutris,  
eâdem potentia  
creatoris ingera-  
tur aspectibus.



## P R E F A C E.

Mais peut-estre n'y en a-t-il pas encore assez pour apprendre à certaines gens ensevelis dans les sens ( & c'est la quatriesme sorte de personnes que j'ay dit que cet Escrit pouroit choquer ) que l'on peut concevoir d'autres substances que celles qui sont l'objet des sens ou de l'imagination. Qu'ils écoutent donc encore vne fois ce que dit ce fameux Docteur de l'Eglise dans le 32. Chapitre du Liure de *l'Esprit & de l'Ame*, & il leur apprendra la cause de leur erreur & le moyen des'en retirer avec la mesme methode que Monsieur Descartes a fait après luy. La raison pour laquelle l'Esprit de l'Homme a tant de peine à se reconnoistre, vient de ce qu'il est entre les Corps, auxquels son affection, & l'habitude familiere qu'il a avec eux, le fait penser continuellement; Cela est cause qu'il ne peut pas aisément se retirer chez luy pour se regarder sans témoins, & que les images des choses Corporelles se representent à luy pour le troubler dans sa retraite: car son affection l'a attaché aux choses sensibles qui sont hors de luy, par vn lien si estroit, que mesme quand elles sont absentes, leurs images neanmoins sont tousiours présentés à sa pensée, c'est pourquoy il ne peut pas sans quelque violence les rejeter hors de soy pour ne considerer rien que luy & que ce qui appartient précisément à sa nature; Qu'il retourne donc chez soy pour s'y arrester, sans se chercher au

*Sed quia in istis est corporibus quæ cum amore cogitant, & cum quibus amore assuetudine est, non valet sine imaginibus eorum videre semetipsâ, vel esse in semetipsâ: nam tanto glutino amoris ei coheserunt hæc quæ foris sunt corporalia, ut etiam cum absint ista, imagines eorum præsto sunt cogitanti. Quapropter discernere eas à se non potest, ut se solam inspiciat & videat. Videat ergo ad se ut stet in se, nec sicut absentem se quærat, sed velut præsentem se cutet cernere, & discernere: & intentione voluntatis quâ per alia vagabatur, statuæ in seipsâ, & se co-*

## P R E F A C E.

*gitet, ut seipsam  
cognoscat, & di-  
ligat; Ita videbit  
quod nunquam se  
non amaverit,  
nunquam nescie-  
rit, sed alia secum  
amando, cum ijs  
se confundit, ita  
ut ab eis sine ma-  
gno labore separa-  
ri non possit, qui-  
bus cum amore ih-  
hærit,*

déhors ; comme s'il pouvoit estre absent de luy, ou que quelque chose luy pust estre plus presente que luy mesme. Qu'il tâche donc de se regarder comme present, & de se separer de tout ce qui ne luy appartient pas. Et si sa volonté employe la mesme force dont elle se sert quand elle le porte hors de luy, pour arrester sa pensée chez luy, & pour ne penser qu'à luy, afin qu'il se connoisse, & qu'il s'aime, il reconnoistra qu'il n'a jamais esté sans s'aimer, ny sans se connoistre, bien qu'il l'ignorast; Parce qu'aymant aussi avec soy les choses Corporelles, son amour faisoit qu'il se confondoit avec elles ; d'autant qu'il ne pouvoit separer de sa pensée sans beaucoup de peine, l'Idée de ce qu'il aimoit.

Mais vous ne demanderez sans doute le moyen de faire ce que dit icy S. Augustin ; C'est à dire de rentrer en soy-mesme, pour connoistre quelle est la nature de son Ame, & s'en former vne Idée qui ne conuienne qu'à elle seule, & qui represente aussi toutes les choses que nous sçauons qui luy appartiennent ? Je dois vous l'apprendre sans doute si ie desire que vous preniez quelque plaisir dans cet Ouvrage, & que vous en tiriez quelque vtilité : Mais outre que si vous y prenez bien garde, ie m'en suis desja en partie acquité, en raportant les diuers témoignages de S. Augustin, j'espère que la lecture des premiers Chapitres acheuera le reste.

27

P R E F A C E.

Je vous diray pourtant en peu de mots, que trois choses peuuent beaucoup aider à cela, lesquelles ie souhaiterois que l'on eust faites avant la lecture de ce Liure; La premiere est de lire attentiuement les Meditations de Monsieur Descartes, car elles apprendront à se defaire des préjuges de l'enfance, & des Idées des choses sensibles; Et à se former celle d'une chose qui Pense, que l'on reconnoistra facilement estre differente de l'Idée d'une chose Estenduë; d'où il suit necessairement, comme ie feray voir, que ces deux choses sont differentes.

La seconde, est de lire le Liure de l'Homme; Car comme il fait voir qu'il n'y a aucun mouvement (à la reserue de ceux qui dépendent de la pensée) qui ne se pust faire dans vne machine qui n'auroit point de connoissance, il apprend en mesme temps que cette pensée doit estre quelque chose de bien different des qualitez de la matiere; & qu'il n'y a qu'elle qui appartienne proprement à l'Esprit de l'Homme; puisque tout le reste se pouroit faire sans luy; Et partant qu'il est seulement vne chose qui Pense.

La troisieme, est necessaire seulement pour ceux qui n'estant pas accoustumez aux abstractions Methaphysiques, ne peuuent ou (comme il y a plus d'apparence) croient ne pouuoir rien conceuoir qui ne soit Estendu. Je permets à ceux-là de conceuoir l'Esprit de  
é.é ij.

## P R E F A C E.

l'Homme avec vne telle extension, figuré ; & couleur, qu'ils voudront, pourueu qu'ils ne luy ostent pas la faculté de penser ; Et que de mesme que si tous les Corps pensoient, les Geometres ne laisseroient pas de considerer l'estendue, & les proprietéz qui en resultent, sans prendre garde à la pensée ; eux aussi dans l'Esprit de l'Homme, qui sans contredit est vne chose qui pense, vueillent ne considerer que la pensée, & les proprietéz qui la suivent, sans considerer l'estenduë qu'ils y suposent ; Et ie m'assure qu'ils n'auront pas fait cela longtemps, qu'ils reconnoistront qu'ils ont l'Idée d'une chose qui pense, sans le mélange d'aucune estendue ; Et qu'ainsi cette substance, qu'ils suposoient estendue, parce qu'ils ne croyoient pas la pouuoir conceuoir autrement, ne l'est point du tout.

Après cela ie ne leur demande rien autre chose, sinon qu'ils lisent cet Ouvrage, non pas en courant, mais avec vn peu d'attention ; Et ie suis certain que s'ils quittent les préjugés de l'enfance & de l'Ecole, pour n'écouter que la raison, ils ne trouueront rien qui ne soit tres veritable, qui ne suive necessairement des premieres veritez que Monsieur Descartes a demonstrees, & qui ne soit mesme appuyé de l'Autorité de S. Augustin, qui a dit en mille endroits que l'Esprit de l'Homme n'est pas vne chose Estendue ; Mais qui ne l'a

P R E F A C E.


jamais déclaré si nettement que dans la 28. Lettre qu'il écrit à S. Ierôme, dont voicy les paroles, avec lesquelles ie finis cette Preface; Bien qu'il soit difficile de persuader aux plus grossiers & tardifs que l'Ame est incorporelle, j'auoüe toutesfois que j'en suis persuadé; Car pour ne tomber pas dans vne dispute de mots, quand la chose est certaine, si l'on apelle Corps toute sorte de substance, ou essence, qui est en quelque façon en soy-mesme, & par soy-mesme, & non pas comme l'accident dans autre chose que luy, l'Ame de l'Homme est Corps en ce sens-là: Ou si vous ne reconnoissez point d'autre nature qui soit veritablement incorporelle, que celle qui est souuerainement immuable, & qui est par tout toute entiere, l'Ame est encore Corps en ce sens-là; Car il est certain qu'un Esprit finy ne scauroit estre tel. Mais si rien ne merite d'estre appellé Corps, que ce qui peut-estre tellement dans un espace, que soit qu'il y soit arresté, ou qu'il s'y meue, il le remplisse, & que sa plus grande partie en occupe un plus grand, & la plus petite un moindre, en telle maniere qu'il y ait moins dans la partie que dans le tout, l'Ame dans ce sens ne scauroit estre Corps.

Incorpoream quodque esse animam, & si difficile tardioribus persuaderi potest, mihi tamen, fateor esse persuasum; Sed ne verbi controuersia vel superfluo faciam, vel merito pariar; quoniam cum de re constat, non opus est certare de nomine; si corpus est omnis substantia, vel essentia, vel si quid aptius nuncupatur, id quod aliquo modo est in se ipso, corpus est anima. Item si ea solam incorpoream placet appellare naturam, quæ summè immutabilis est, & ubique tota est, corpus est anima; quoniam tale aliquid ipsa non est. Porro si corpus non est nisi quod per loci spatium aliquam longitudinem, latitudinem, altitudinem ita constituitur, vel mouetur, ut maiori sui parte maiorem locum occupet, & breuiore breuiore. minusque sit in parte quam in Toto, non est corpus anima.



# T A B L E

## DES CHAPITRES

CHAPITRE PREMIER.	 <i>Essein &amp; Diuision du Traitté.</i>	page 1
CHAP. II.	<i>De la nature de l'Esprit de l'Homme, &amp; qu'il est plus aisé à connoistre que le corps.</i>	pag. 5
CHAP. III.	<i>Que tout ce qui Pense est immatériel.</i>	pag. 12
CHAP. IV.	<i>Preuue de la mesme chose, contre ceux qui admettent des Substances Corporelles &amp; Spirituelles.</i>	p. 24
CHAP. V.	<i>Autre preuue, contre ceux qui n'admettent que des Substances Corporelles.</i>	pag. 37
CHAP. VI.	<i>Que tout ce qui Pense, pense toujours, tandis qu'il existe.</i>	pag. 53
CHAP. VII.	<i>Que l'Esprit est immortel.</i>	pag. 63
CHAP. VIII.	<i>Des facultez inseparables de l'Esprit, &amp; de celles qui sont particulières à celui de l'Homme.</i>	pag. 74
CHAP. IX.	<i>De la connoissance en general.</i>	p. 89

## TABLE DES CHAPITRES.

- CHAP. X. Des especes Corporelles , & des Idées ou actions intellectuelles. pag. 97
- CHAP. XI. De la Volonté. pag. 144
- CHAP. XII. De l'Esprit , considéré par rapport à la durée & au lieu. pag. 175
- CHAP. XIII. De la maniere dont l'Esprit & le Corps en general peuvent estre vnis. pag. 184
- CHAP. XIV. De la maniere dont l'Esprit & le Corps de l'Homme en particulier sont vnis ; Et quelles sont les choses qui nous font connoistre leur vnion. pag. 203
- CHAP. XV. Des causes & des articles de cette vnion , & de son siege principal. pag. 222
- CHAP. XVI. Comment l'Esprit & le Corps agissent l'un sur l'autre ; Et comment vn Corps en meut vn autre. pag. 242
- CHAP. XVII. De la Nature & diuersité des sensimens de l'Ame pag. 263
- CHAP. XVIII. De l'Imagination. pag. 278.
- CHAP. XIX. De la Memoire , & de la Reminiscence. pag. 323
- CHAP. XX. De l'Entendement , du Raisonnement & de la Parole. pag. 346
- CHAP. XXI. Des Emotions de la volonté. pag. 355
- CHAP. XXII. De l'Origine des inclinations & des auersions Naturelles , qui n'ont

# TABLE DES CHAPITRES.

	<i>pour cause que le Corps.</i>	pag. 375
CHAP. XXIII.	De la partie superieure & inferieure de l'Âme, ou de l'Esprit de l'Homme.	pag. 382
CHAP. XXIV.	De la volupté, & de la douleur.	p. 395.
CHAP. XXV.	De l'estat de l'Âme apres la mort.	pag. 403
CHAP. XXVI.	Quel est le souverain bien de l'Homme pendant cette vie.	pag. 413
CH. XXVII.	De la principale source de nos erreurs, & des moyens de les éviter.	pag. 422
CH. Dernier.	Remedes généraux contre les foudres des passions, & les adversitez de la fortune.	pag. 437

Fin de la Table des Chapitres.

TRAITE



7




# TRAITTE DE L'ESPRIT DE L'HOMME

---

*Deſſein & diuiſion du Traitté.*

## CHAPITRE I.

 E ne doute point que ceux qui auront leu les Eſcrits de Monſieur Deſcartes , & qui auront pris garde avec combien de facilité & de clarté il a expliqué tous les Phenomènes du Grand Monde , & tous les Mouuemens du Petit , n'ayent beaucoup de regret que la Mort l'ait empêché de nous donner ce qui luy reſtoit à demonſtrer , pour nous faire entièrement connoiſtre la Nature de l'Homme. Je crains bien néanmoins qu'au lieu de les conſoler de cette perte, ce Traitté que ie donne

A

pour suppléer à ce qu'il auroit peu faire, n'augmente encore leur déplaisir, lors qu'ils compareront la rudesse de mon discours, & la foiblesse de mon raisonnement, avec la netteté de ses paroles, & la force de ses demonstrations; & qu'ils ne m'accusent de temerité d'avoir osé toucher à son Ouvrage de l'Homme, veu principalement que la partie qui doit traiter de l'Esprit est la plus difficile. Ils diront peut-estre que ie devois imiter en cecy les Disciples de ces fameux Peintres, Appelles & Parrhasius, adjoustant simplement au bas de son Liure, Descartes faisoit; comme ceux-cy se contentoient de mettre au pied des dernières ébauches de leurs Maîtres, Parrhasius faisoit, Appelles faisoit, plustost que d'y donner le moindre coup de pinceau pour les rendre plus accomplies. J'aurois sans doute pris ce party, dans la connoissance que j'ay de la difficulté de l'entreprise; ou du moins ie l'aurois laissé executer à quelqu'une de ces sçauantes Plumes qui nous ont déjà donné en des sujets aussi difficiles des preuues si manifestes de ce qu'elles sont capables de faire, si ie n'auois crû pouuoir tirer des Liures qu'il a luy-mesme fait imprimer, & des deux volumes de Lettres qu'un de ses Amis nous a donnez, des materiaux suffisans pour la construction de tout cet Ouvrage. En effect s'il est vray, comme un Lecteur un peu attentif n'en peut douter, que bien que ce grand Genie n'ait pas expliqué tou-

tes les matieres de la Philosophie, il n'y en a pourtant aucune dont il ne nous ait appris à surmonter les difficultez, cela se rencontre principalement en celle-cy : Car bien qu'il n'ait jamais sur cela déclaré entierement sa pensée; soit pour laisser quelque sujet à ses Disciples sur lequel ils peussent exercer leur esprit, soit pour ne pas donner davantage de prise aux calomnies de ses enuieux, il n'a peu toutefois en parler si sobrement, qu'il ne nous ait laissé plusieurs marques dans ses Escriits, par où nous pouuons assez aisément reconnoistre comment il en auroit parlé, s'il en auoit voulu escrire. Mais quoy que ie croye les auoir apperceuës, i'en aurois renfermé la connoissance dans moy-mesme, si la gloire de mon Maistre, le dessein de plaire à ceux qui aiment sa memoire, & la deference que i'ay pour mes amis, ne les en auoit tirées presque malgré moy. Outre ces raisons i'ay crû estre obligé de publier ce Traitté, apres ce que Monsieur Clerfelier, à qui i'en auois fait voir quelque chose, en a dit dans la Preface, & ce que i'en ay dit moy mesme dans mes Remarques sur l'Homme de Monsieur Descartes, afin de dégager sa parole & la mienne, & faire connoistre clairement la part que prend l'Esprit de l'Homme dans les mouuemens de son corps. Et pour entrer d'abord en matiere, & faire voir le plan de cét Ouurage, voicy comment ie le diuiseray. Je diray premierement, en quoy consiste la nature

de l'Esprit de l'Homme ; Secondement , quelles en sont les fonctions , si on le considere en luy mesme , & comme separé de son Corps ; Je monstrey en suite de quelle sorte le Corps & l'Esprit sont vnis ensemble ; En quatriesme lieu , quelles sont les actions qui resultent de cette vnion ; Et enfin , ie traiteray des moyens principaux pour bien conduire toutes les actions de l'Esprit , afin d'estre dès cette vie le plus heureux que l'on puisse estre. Lesquelles choses ie decriray le plus briuement , & tout ensemble le plus nettement qu'il me sera possible , éuitant toutes sortes de discours superflus , & ne m'arrestant qu'à suiure la verité & les traces de Monsieur Descartes ; & si l'on croit que ie m'en éloigne tant soit peu , l'on m'obligera de me redresser ; & ie promets de suiure les aduis que l'on me donnera , ou de rendre raison pourquoy ie retiendray les miens. Au reste , comme c'est icy vn Escrit purement Philosophique , dans lequel ie n'ay point d'autre dessein que de rechercher ce que la seule lumiere naturelle nous enseigne de la nature de l'Esprit , de ses facultez , & de ses fonctions , & que ie ne pretens pas me seruir d'aucune des Veritez que la Foy nous a reuelées , ny tirer aucunes preuues de l'Escripture , ie supplie aussi ceux qui auront à m'opposer quelque chose de n'en employer aucune contre moy ; non pas que ie ne reconnoisse l'Escripture pour la regle de la Verité , ou que ie craigne

d'auoir auancé quelque proposition qui la combat, mais parce qu'il me semble qu'elle n'est pas bien employée dans la Philosophie, dont le principal but est de decouurir les veritez, où la seule lumiere naturelle peut atteindre.

*De la nature de l'Esprit de l'Homme, & qu'il est plus aisé à connoistre que le Corps.*

## CHAP. II.

COMME nous auons esté enfans auant que d'estre hommes, & que nous nous sommes seruis de nos sens & de nostre imagination, auant que nous fussions capables d'employer nostre Entendement & nostre Raison à la recherche de la verité, Nous nous sommes tellement accoustumez à recourir à eux, dans toutes les choses que nous voulons connoistre, qu'il n'y a personne qui ne ressent qu'il est tres-difficile de s'en détacher; & ceux qui ne le peuuent faire, prennent pour des contes faits à plaisir tout ce qui ne tombe point sous leurs sens, & pour des choses impossibles tout ce qu'ils ne peuuent imaginer. Il faut pourtant se resoudre à surmonter cette difficulté, si l'on veut comprendre quelque chose de la nature de l'Esprit de l'Homme, dont l'essence, les facultez & les operations ne tombent point sous les sens. Rejettons donc

bien loin toutes les especes que nous en auons receuës iusques-icy, & nous recueillans dans l'interieur de nostre conscience; examinons ce qu'un chacun de nous experimente en soy-mesme. Nous serons d'autant plus assurez de la verité de ces Experiences, que nous en serons nous-mesmes les ouuriers & les tesmoins, & nous les trouuerons d'autant plus faciles, que pour les observer nous ne serons pas obligez de sortir de chez nous, ny d'employer d'autres instrumens que ce mesme Esprit que nous taschons de connoistre.

Pour y paruenir nous disons premierement, que par l'Esprit de l'Homme, nous entendons ce principe interieur de toutes nos connoissances, de nos appetits, & de nos volontez, par le moyen duquel nous produisons toutes nos fonctions qui enferment quelque pensée, & dans lequel comme dans leur premier sujet elles sont toutes receuës. Je ne m'estens point icy à vous expliquer plus au long la nature de ce principe; si c'est vn corps, ou vne substance immaterielle; ou seulement la façon ou le mode d'un corps, comme Monsieur le Roy a crû qu'il pouuoit estre; Je le feray dans la suite; Je desire seulement que vous consideriez icy deux choses: la premiere, que ce principe doit estre vne substance. Car puis que tout le monde conuient en ce point, que la substance n'est rien autre chose que le premier sujet de quelque propriété ou accident, il faut de neces-

tité que ce qui possède en nous la faculté de penser, & qui est le premier sujet dans lequel toutes nos pensées en particulier sont receuës, soit vne substance ; Et partant bien que nous ne sçachions pas encore de quelle nature & condition elle est, nous ne pouuons pourtant douter que nous n'ayons en nous vne substance qui pense, qui est ce qu'on appelle l'Ame ou l'Esprit de l'Homme. La seconde chose qu'il faut considerer, est que soit que cette substance qui pense soit vne mesme chose avec celle qui est estenduë, que nous appellons le Corps, soit qu'elle en soit differente, nous la connoissons plustost, & nous sommes plus assurez de son existence, & de ce qu'elle est en tant qu'elle pense, que nous ne le sommes du Corps ou de la substance estenduë. Cette verité est si claire, que Messieurs Gassendy & le Roy, quoy qu'ennemis declarez de la Metaphysique de Monsieur Descartes, en sont demeurez d'accord. C'est pourquoy ie n'entreprendrois pas de la prouuer, si ie pensois que tous ceux qui pourront lire cét Escrit, eussent auparauant leu ses Meditations; Mais comme il s'en pourra trouuer quelqu'un qui ne les aura pas veuës, & qu'il est tres-important de bien establir cette verité, ie repeteray icy sommairement tout ce qu'il a dit en ce lieu-là, qui peut seruir à son establissement.

Lors quel'on s'est vne fois determiné à chercher vne verité assurée dans les sciences, laquelle ne puisse estre ébranlée par aucun doute, pour pe-

tit qu'il puisse estre , l'on ne sçauroit paruenir à cela sans se resoudre de rejeter comme fausses , c'est à dire , de ne s'en pas seruir dauantage que si elles estoient fausses , toutes les opinions dans lesquelles on peut trouuer le moindre sujet de douter. Dans ce dessein , ie vois premierement que ie puis douter de la verité de l'existence de toutes les choses sensibles : Car bien que les sens , ces témoins infidelles , ne nous trompent pas en toutes choses , c'est assez qu'ils nous ayent quelquefois trompez , pour nous deffier entierement de la verité de celles que nous n'apprenons que par leur rapport. Si on objecte à cela qu'ils ne nous ont iamais deceus , lors que l'objet , le milieu , & l'organe ont esté bien disposez ; Ie respons que ce qui semble nous rendre certains de l'existence des choses sensibles , est que leurs idées se presentant à nostre Esprit , souuent malgré nous , & sans que nous nous y attendions , nous nous sentons portez à croire qu'elles procedent de quelques objets extérieurs qui frappent nos sens ; Mais dauant que nous experimentons dans le sommeil & dans le delire des Phrenetiques , qu'il n'est pas besoin qu'aucun objet semblable ou different de ce que nous sentons touche nos sens pour émouvoir en nous les mesmes pensées , celui qui commence à chercher la verité par ordre , & qui est resolu à douter de tout , iusqu'à ce qu'il ait trouué quelque chose dont il ne puisse douter , ne peut auoir pour lors aucun fondement certain qui l'as-

seure



seure de l'existence des choses sensibles , puisqu'il ne seroit pas impossible qu'il eust toutes les mesmes pensées qu'il a , & que les choses luy parussent de la mesme façon qu'elles sont , quand bien mesme aucun objet extérieur ne frapperoit ses sens : mais du moins direz vous , l'on ne peut pas douter des veritez Mathematiques , par exemple que deux & trois ne soient cinq , & qu'un triangle n'a que trois costez ; l'aduoüe que pendant que j'arreste mon esprit sur la consideration de quelqu'une de ces veritez , ie ne puis m'empescher de la croire ; mais si tost que ie l'en détourne tant soit peu , & que ie prens garde que plusieurs se sont trompez dans des choses qu'ils ne croyoient pas moins euidentes , & que cela m'est aussi quelquefois arriué ; ou qu'enfin la pensée d'un Dieu Tout-puissant me vient en l'Esprit , qui pour son plaisir ou pour d'autres raisons que ie ne sçay pas , a pû me produire de telle nature que ie m'abuse dans ce qui me paroist le plus euidant , il me semble que ie puis douter des veritez Mathematiques aussi bien que des autres. Que s'il se trouue quelque malheureux Athée qui aime mieux douter d'un Dieu si puissant que d'aduoüer que toutes choses sont incertaines , quel-qu'autre cause enfin qu'il apporte de mon estre , plus elle sera imparfaite , & plus auray-je raison de croire que ie le suis assez pour me tromper en toutes choses. Mais pendant que ie doute ainsi de tout & que ie pense qu'il n'y a rien de certain,

aucun Esprit, aucun Corps, point de Ciel, point de Terre, à tout le moins moy qui doute, moy qui pense ne suis-je pas quelque chose? Ouy certes, & quelque imparfait que ie sois, quelque soin qu'on prenne à me decevoir, il faut de necessité que j'existe pendant que ie pense.

Voyons maintenant quel ie suis, moy qui suis certain que ie suis, & prenons garde de ne rien prendre pour nous imprudemment. Ie suis sans doute quelque chose; Quelle chose? Vne chose qui pense, c'est à dire, qui doute, qui desire, qui connoist, qui affirme, qui nie, qui craint, &c. Car enfin ie sens que ie doute presque de tout, que ie desire en sçauoir dauantage, que ie connois que ie pense, que i'affirme cela estre veritable, que ie nie tout le reste, que ie crains d'estre surpris, qu'y a il en tout cela qui puisse estre mis en doute, & dont ie ne sois aussi certain, que de ma propre existence & de ma pensée? Mais n'est ce pas aussi moy qui vois, qui sens, & qui imagine; Puis qu'il n'y a ny Ciel, ny terre, & que ie n'ay aucun Corps, ie ne puis ny voir, ny sentir, ny imaginer; mais toutes-fois ie ne sçauois nier que du moins il me semble que ie vois, que ie sens, & que j'imagine; il est vray, mais aussi il n'y a rien en cela qui differe de ma pensée. On dira peut estre, qu'il ne seroit pas mal à propos d'examiner icy, si moy qui pense, ne serois point quelque partie de cette substance Estendue, laquelle i'ay prise iusqu'à present pour moy mesme, c'est à dire en vn mot, si la mesme chose

qui Pense en moy , ne seroit point aussi Estendue, bien que ie ne le descouure pas encore ; A quoy ie n'ay autre chose à respondre presentement , sinon que ie ne dispute pas maintenant de cela , nous le verrons cy après : mais ie sçay fort bien que ie puis supposer qu'il n'y a aucun Corps au monde , & que sans changer cette supposition , ie ne laisse pas d'estre certain que ie suis vne chose qui Pense. Partant ie conclus de tout ce discours ; premiere-ment, que cette proposition, (ie pense, d'oc ie suis,) est la premiere conclusion certaine qui se presente à ceux qui conduisent leurs pensées par ordre , & qui leur decouure l'existence de quelque chose ; Secondement, que mon Ame, c'est à dire, cette substance qui Pense en moy, est plus aisée à connoistre que le Corps, ou que la substance Estendue, puisque les doutes les plus Hyperboliques ne sçauroient me faire douter de son existence ; & que ie trouue vne infinité de proprieté de ma pensée , auant que ie puisse songer seulement à chercher celles du Corps ; En troisieme lieu, que l'idée de la Pensée, & celle de l'Estendue, sont entierement differentes , puis que ie puis conceuoir l'idée de la Pensée, en niant mesme qu'il y ait aucune substance Estendue ; & enfin ie conclus que cette idée de la Pensée ne m'est point venue par les sens , lesquels ne nous representent iamais rien que d'Estendu. Ces quatre Verités sont les quatre fondemens de tout ce Traicté.

---

*Que tout ce qui pense est Immatériel.*

CHAP. III.

**I**E ne sçauois assez m'estonner, de ce qu'entre toutes les questions de la Philosophie, n'y en ayant aucune qui ait iamais esté tant recherchée, ny touchant laquelle il y ait eu vne si grande diuersité d'opinions parmy les Philosophes anciens & modernes, que celle qui regarde la nature de l'Esprit de l'Homme, il n'y en a point toutesfois, où ils ayent moins reüssy; ce qui non seulement est arriué à cause de la difficulté de la matiere, qui est au dessus des sens, mais encore parce que s'estans principalement attachez à considerer le rapport, qui est entre l'Esprit & le Corps auquel il est joint, ils se sont rendu la connoissance de ce qu'il estoit en luy mesme, plus difficile; Car ne distinguans point la force qu'à le Corps de se mouvoir de luy mesme, d'auec celle, par le moyen de laquelle quelques mouuements du Corps sont soumis à la volonté de l'Esprit, quelques vns ont crû que l'Esprit estoit vn Corps, ou du moins, l'harmonie ou le mouuement d'un Corps; & si quelques autres faisans reflexion sur ses actions les plus nobles & les plus releuées, ou estans esclairez des lumieres de la Foy, ont pensé que l'Esprit estoit quelque chose d'Immatériel, toutesfois

parce qu'ils l'ont considéré à la façon des autres formes de la matiere. & qu'ils luy ont attribué toutes les propriétés qui se remarquent en nous, ils s'en sont formé vne idée, partie corporelle, & partie spirituelle aussi ridicule que celle des Chymeres & des Hippocentaures. Ils auroient néanmoins peu se deliurer assez facilement de ces erreurs, si laissant pour vn temps la consideration du Corps, ils se fussent arrestez à regarder ce que l'Esprit est en luy mesme, auant que d'examiner la maniere de son vnion avec le Corps: car qu'elle que puisse estre cette vnion, elle ne scauroit l'empescher d'estre ce qu'il est. C'est ce que nostre Philosophe a fait admirablement bien; & au moyen de quoy il a démonstré son Immaterialité si fortement que ie pourrois me dispenser icy de rien adjoulter à ce qu'il en a dit, si ie ne voyois que ses demonstrations n'estant pas accommodées au stile de l'Ecole ne leuent pas toutes les difficultez qu'elle tire des subtilités de la Logique; outre que ce point estant le plus important de tout l'ouurage, il seroit en quelque façon imparfait, si sans l'expliquer dauantage ie me contentois de tirer simplement les conséquences qui suiuient nécessairement des demonstrations. C'est pourquoy ie tascheray de faire voir le plus clairement qu'il me sera possible, que tout ce qui Pense est Immatériel; car cela estant vne fois bien prouué, tout le reste de ce que i'ay à dire de la nature de l'Esprit de l'Homme suit nécessairement; ce que ie feray

premierement en general, puis aussi en particulier, tant contre ceux qui ne reçoivent que des substances Corporelles, que contre ceux qui en reconnoissent de Corporelles & de Spirituelles.

Or ayant à vous prouver que toutes les choses qui pensent sont Immaterielles, il me semble que ie ne sçauois mieux vous faire entendre l'estat de la question, qu'en vous expliquant d'abord, ce que ie conçois par le mot de Pensée, & par celuy de Matiere, afin que vous puissiez apres cela mieux iuger si la Matiere & la Pensée se peuuent rencontrer dans vne mesme substance simple; car qu'elles se trouuent quelquefois vnies ensemble dans vn sujet composé, ce que nous experimentons tous les iours en nous mesmes ne nous permet pas d'en douter. Je vous diray donc que ie prens icy la Pensée pour cette perception, conscience, ou connoissance interieure que chacun de nous ressent immediatement par soy mesme quand il s'aperçoit de ce qu'il fait ou de ce qui se passe en luy. Ainsi toutes les connoissances de nostre Entendement & tous les mouuements de nostre Volonté, toutes nos imaginations, & toutes les actions de nos sens, ne sont rien autre chose que de differentes façons de Penser. D'autre costé par la matiere, i'entens toute sorte de substance Corporeile, c'est à dire Estendue, quelle qu'elle soit, grossiere ou subtile; qui a pour son essence (ainsi que Monsieur Descartes la démontre) l'extension en longueur, largeur & profondeur, qui est indefini-

ment diuisible, mobile, & impenetrable : Car puis qu'estre Estendu n'est rien autre chose qu'auoir des parties les vnes hors des autres, il me semble que la penetration qui les met les vnes dans les autres, ne peut compatir naturellement avec l'Estendue. Ainsi j'appelle vn estre Immateriel, celuy qui n'a point d'extension, & qui n'est pas capable par consequent d'estre le sujet d'aucun des accidents du Corps; & ie tascheray de vous mon-  
strer que toutes les choses qui Pensent sont de cette nature.

Le vous prie de considerer d'abord, que comme nous n'auons point d'autre notion de l'estre & de la substance en general, sinon qu'elle est le premier sujet de quelques attributs, ou proprietés, aussi ne scaurions nous auoir de meilleur fondement, pour reconnoistre si deux substances sont differentes, que lors que nous remarquons qu'elles sont le sujet de diuers attributs; car chaque chose ayant son essence qui la distingue de toute autre, laquelle essence ne nous peut estre connuë que par ses proprietéz, il ne peut pas y auoir d'autre moyen pour reconnoistre leur distinction, que la diuersité de leurs proprietéz : aussi iusques icy l'on n'a point apporté d'autre marque, que celle là pour faire voir la difference des indiuidus, des especes & des genres. Et s'il suffit pour montrer la difference de Pierre & de Paul, du feu & de l'eau, du marbre & du lait, de dire que Pierre est à Paris, & Paul à Rouën; que le feu nous échauf-

diuerſes que celles de l'Eſtenduë & de la Penſée; & toutefois (diſent-ils) nous voyons ces proprieté vnies enſemble dans le feu, dans le lait, & dans l'aimant, d'autant que tous ces attributs ne ſont pas contraires, mais ſeulement diuers, & ſe peuuent rencontrer dans vn meſme ſujet. Ils objectent en ſecond lieu, qu'il y a deux ſortes de Penſées, l'vne qui a pour objet la connoiſſance des choſes ſpirituelles, vniuerſelles, & indeterminées, & l'autre qui s'attache aux Corporelles, particulieres & determinées; Que la premiere eſt veritablement vn appanage de l'Eſprit, mais que la ſeconde n'eſt point au deſſus des forces du Corps. Ces objections, quoy que fortes en apparence, n'ont pourtant en eſſet aucune ſolidité, & ſeruent bien plus à mon ſujet qu'elles n'y nuident. Pour vous le faire voir, conſiderez premierement que les idées que nous auons de la Penſée & de l'Eſtenduë ſont autrement oppoſées entr'elles, que ne le ſont celles de la figure du Mouuement, & de toutes les autres proprieté qu'ils ont alleguées. Car peut-on dire qu'il n'y a point de rapport entre le Mouuement & la Rondeur, puis qu'il y en a vn ſi grand entre la figure en general & le mouuement, qu'il eſt impoſſible de conceuoir le mouuement, que dans vn Corps qui ait quelque figure, comme auſſi on ne ſçauroit imaginer de figure que dans vn ſujet capable de mouuement; Et ſ'il n'y auoit aucun Corps mobile au monde, pourroit-on ſe figurer qu'il y euſt quelque choſe de rond, com-



me ie puis conceuoir vne chose qui Pense, en niant qu'il y ait au monde aucun Corps Estendu.

Mais peut-estre que l'on dira que la chaleur, & la secheresse qui se trouuent dans le feu, la blancheur, & la douceur du lait, & les deux vertus de l'aimant, ne sont pas moins differentes que la Pensée & l'Estenduë. l'auouë qu'il n'est pas si aisë de faire voir l'affinité de ces qualitez entr'elles, que celle de la figure & du mouuement, quand on ne s'arreste qu'à ce que nos sens en decouurent.

Mais ceux qui ont tant soit peu de connoissance de la veritable Physique, & qui ont renoncé à tous les Estres Scolastiques, & à toutes les qualitez qu'on attribué faussement aux objets de nos sens, parce qu'ils sont en quelque façon cause des sentimens que nous en auons, n'ont pas de peine à conceuoir comment toutes les qualitez qui paroissent si differentes, peuuent quelquefois compâtir ensemble & se rencontrer dans vn mesme sujet; Dautant que la pluspart n'estant point du tout dans les sujets auxquels on les rapporte, telles qu'elles paroissent à nos sens, & ne dependant que de la grosseur, figure, situation, & mouuement de leurs parties, il n'y a presque point de sentimens si differentes, qu'un mesme objet ne soit capable d'exciter; Et ainsi ce n'est pas merueille si la chaleur & la secheresse se trouuent dans le feu, puis qu'elles dependent toutes deux de son actiuité; Si la blancheur & la douceur se trouuent dans le lait, c'est à dire, si le

fait est capable d'exciter en nous ces deux sentimens, puis que cela ne depend que de la disposition, & du mouuement de ses parties; Si l'aimant a la vertu d'attirer le fer, & celle de diriger toujours quelques-vnes de ses parties vers les Poles; puis que la mesme matiere subtile, qui est capable de faire qu'un de ses Poles regarde toujours le Nort, est capable aussi de faire que le fer se porte vers l'aimant, ainsi que l'a admirablement bien expliqué Monsieur Descartès. Or en tout cela nous ne voyons rien que nous ne iugions bien se pouuoir rencontrer dans vn mesme sujet, & quelque diuersité qu'il y ait entre ces qualitez, ou plustost entre les sentimens que nous en auons, nous trouuons pourtant vn tel rapport dans leurs causes; c'est à dire, dans ce qui est du costé des objets qui les excitent, que l'on est obligé de reconnoistre que tout cela n'est rien autre chose en eux que des sujets & des dependances de l'Estendue, & de ses proprietéz. Il n'y a donc aucune comparaison, entre la maniere dont ces qualitez sont opposées les vnes aux autres, & l'opposition, ou la diuersité qui se rencontre entre la Pensée & l'Estendue, qui est telle qu'on ne scauroit en conceuoir vne plus grande.

Mais enfin (dira-on) ces deux attributs ne sont pas contraires, mais seulement diuers, & partant ils ne sont pas incompatibles. Voila le dernier refuge de nos aduersaires; & le plus fort de leurs Argumens.

Mais cette difficulté a desia si clairement esté resoluë par Monsieur Descartes, dans les Remarques qu'il a faites sur le placart de Monsieur le Roy, qui contient ses Assertions touchant l'Ame raisonnable, que ce seroit vouloir apporter de la lumiere en plein iour, que d'entreprendre de l'éclaircir dauantage. Je remarqueray donc simplement icy, que lors qu'il s'agit d'attributs qui constituent l'essence de quelques substances, il ne sçauroit y auoir entr'eux de plus grande opposition, que d'estre diuers; car estant tels, que la notion de l'un n'est en aucune façon comprise dans la notion de l'autre, ainsi que la notion de l'Estenduë n'est point comprise dans la notion de la Pensée, ny celle-cy dans la notion del'Estenduë, il est impossible qu'ils puissent conuenir à vn seul & mesme sujet, d'autant que ce seroit de mesme que si l'on disoit, qu'un seul & mesme sujet à deux différentes natures, ce qui ne se peut dire sans contradiction d'un sujet simple & non composé, & toutes les fois que deux semblables attributs, chacun desquels peut estre ainsi conceu distinctement sans l'autre, se rencontrent dans quelque sujet, c'est vne marque asseurée que ce sujet là est composé: car par là l'on connoist clairement, que l'un n'est pas vn mode de l'autre, mais qu'il est l'attribut de quelque chose qui peut subsister sans luy. La seule difficulté qui peut donc icy rester, est de sçauoir si la Pensée & l'Estenduë sont deux attributs essentiels qui constituent l'essence de quelques substan-

ces, car si cela est, comme ces deux attributs sont fort differents, les deux substances qu'ils constitueront ne sçauroient manquer d'estre diuerfes. Or cela ne sera pas difficile à vous prouuer, si vous prenez garde qu'il est de la nature des Modes, & des Accidens, de ne pouuoir estre conceus sans le premier sujet auquel ils appartiennent, ny mesme les proprietéz sans l'essence de laquelle elles emanent necessairement ; mais que l'essence le peut fort bien estre sans les modes, & les proprietéz qui dependent d'elle ; Tellement que c'est vne marque infallible que deux attributs sont non seulement essentiels, mais mesmes qu'ils constituent l'essence à la substance à laquelle on les attribue, lors qu'ils sont tels qu'ils peuuent estre conceus sans tous les autres, & non pas les autres sans eux. Or si vous exceptez certains attributs qui appartiennent à la substance en tant que telle, & qui par consequent appartiennent à chaque substance, comme sont ceux de subsister par soy, d'estre le sujet de quelques actes, &c : Il n'y en a aucun autre qui ne renferme dans son Concept, ou la Pensée, ou l'Estenduë ; de telle maniere pouruant que dans l'idée de ceux qui enferment l'Estenduë aucune Pensée n'est comprise, & dans l'idée de ceux qui enferment quelque Pensée, on ne remarque aucune Estenduë : mais pour la Pensée, & l'Estenduë ce sont deux attributs qui peuuent fort bien estre conceus l'un sans l'autre, & qui n'en presuppisent point d'autres auquel ils



appartiennent. Concluons donc que la Pensée & l'Estendue sont non seulement deux attributs essentiels, mais mesme qu'ils constituent l'essence de la chose à laquelle on les attribue, & qu'ils sont encore plus incompatibles & plus contraires, que ne sont le froid & le chaud, qui peuuent bien se rencontrer l'un apres l'autre dans vn mesme sujet, au lieu qu'il est absolument impossible que deux attributs essentiels, tels que la Pensée & l'Estendue, puissent iamais se rencontrer dans le mesme sujet, ny en mesme temps, ny successivement.

Quant à l'objection que font ceux qui mettent de la difference entre les Pensées des choses Immatérielles, & celles des choses Corporelles, c'est à dire, entre les Conceptions de nostre entendement, & les Perceptions de nos sens, c'est vne objection friuole, qui tesmoigne beaucoup d'ignorance dans ceux qui la font, & qui fait voir qu'ils ne se sont iamais estudiez à former des notions claires & distinctes de la substance corporelle, ny de la substance spirituelle. Car ie vous prie, nos sensations sont elles moins des perceptions ou des pensées, pour auoir le Corps pour objet; & n'est-ce pas vne chose ridicule de vouloir dire que le sentiment ou la pensée d'une chose corporelle, soit corporelle elle mesme, toute pensée ne porte elle pas avec soy le caractère d'un Esprit? Quelle idée pouuons nous auoir de la substance spirituelle, sinon qu'elle est vne chose qui Pense? Et quelle

notion nous en reste-t'il si nous en détachons la Pensée? Je sçay bien que l'action du Corps doit interuenir dans nos sensations, & que pour sentir il faut que l'origine de quelqu'un de nos sens soit disposé d'une certaine façon, ce qui ne se peut faire que par le mouuement; mais ny l'action de l'objet extérieur qui meut & dispose l'organe, ny le changement de figure & de situation que cause en luy cette action, ny le transport qui s'en fait au cerueau, ne sont point des sentiments ny des pensées, mais seulement ce qui résulte immédiatement en l'Esprit de ce qu'il est vny à l'organe corporel ainsi meut & disposé par ses objets. Il y a donc vne grande difference entre ce qui appartient au Corps dans nos sensations, & ce qui appartient à l'Esprit; le mouuement qu'imprime l'objet extérieur, & le changement de l'organe appartiennent au Corps, mais cela n'enferme aucune pensée; la seule perception, le seul sentiment, ou la seule pensée appartient à l'Esprit, & cela n'enferme en soy aucune Estendue. Et partant tout ce que nous auons dit iusques ici, conclut également pour toutes les sortes de Pensées qui sont en nous, & prouue clairement que les vnes & les autres ne presuppasant aucune Estendue, tout ce qui Pense est Immatériel.

*Preuve de la mesme chose , contre ceux qui  
reçoivent des substances corporelles &  
spirituelles.*

C H A P. IV.

**L**A proposition que nous auons expliquée dans le Chapitre precedent ne peut estre ataquée que par deux sortes de Philosophes; Les vns croient que cét Vniuers est composé de substances spirituelles, & de substances corporelles; mais ils estiment que la Pensée n'appartient pas si particulierement aux premieres, qu'elle ne se communique aussi quelquefois aux secondes; & les autres au contraire sont si fort persuadez qu'il n'y a rien au monde que des Corps, les vns plus grossiers, les autres plus subtils, qu'ils ne doutent nullement que la Pensée & toutes nos Connoissances ne soient des proprietéz qui appartiennent à ceux cy à raison de leur subtilité. Mais bien que les vns & les autres ayent formé vn party considerable, & par son antiquité, & par le nombre de ses sectateurs, j'espère neanmoins faire voir qu'ils se sont tous trompez, qu'ils ne sçauoient auancer que des objections friuoles, & que s'ils eussent voulu suiure leurs propres Principes, ils eussent peu descouvrir la verité que j'auance; aussi est ce par ces mêmes Principes que ie les veux combattre.

Pour

Pour commencer par les premières, personne n'ignore que le mot d'Esprit, ou d'Ame, ne signifie originairement presque dans toutes les langues, rien autre chose que l'air que nous attirons & renvoyons dans la respiration ; on la puis après appliqué à toutes sortes de souffles ; & ensuite après avoir remarqué que nous ne vivions qu'autant de temps que nous respirions, on la pris pour ce Principe de vie qui nous faisoit respirer ; Depuis il a été particulièrement attribué à cette partie supérieure de l'Ame, par laquelle nous entendons, d'autant que c'est la vie de l'Esprit ; & enfin par ressemblance on a donné ce nom à ces Intelligences, entièrement indépendantes & dégagées de la matière, qu'on a crû occupées à mouvoir les Cieux : & c'est de ces sortes de Substances & des Corporelles, que ceux contre qui j'agis présentement ont crû que toute la Nature étoit composée. Or pour faire voir avec plus de force, & tout ensemble avec plus d'evidence, que c'est à ces sortes d'Esprits, prenant ce mot dans le dernier sens, que la Pensée convient privativement à tous autres ; & pour éviter toutes sortes de distinctions & d'équivoques, je demande premièrement à nos adversaires ce qu'ils entendent par ces paroles, SUBSTANCE SPIRITUELLE ; Ils me répondront qu'ils entendent une Substance Immatérielle : Je leur demande en second lieu, quelle notion & quelle idée ils ont de cette Substance Immatérielle, & ce qu'ils conçoivent quand ils



en parlent; Il faut qu'ils auoient qu'ils ne congoient rien, & qu'ils n'en ont aucune idée positive, ou qu'ils confessent qu'ils entendent vne substance qui a la faculté d'appercevoir, & de vouloir; c'est à dire en vn mot, vne chose qui Pense. D'où ie conclus que l'essence de la Substance Spirituelle consiste en ce que c'est vne chose qui Pense; puis que suiuant les Principes de leur Maître Aristote, l'essence de chaque chose consiste en ce, sans quoy elle ne peut estre conceüe. Il faut donc que ce soit la Pensée qui constituë l'Esprit dans la nature de Spirituel, & d'Immatériel, & partant qu'elle ne se puisse rencontrer dans vne substance Corporelle.

Mais peut estre aimeront-ils mieux auoier qu'ils n'ont aucune notion positive de la substance Spirituelle, & qu'ils ne sçauent ce que c'est, sinon simplement qu'elle n'est-pas Matérielle; ou bien ils diront que la Pensée qui luy est propre, est celle qui appartient à l'Entendement. C'est pourquoy pour éclaircir dauantage cette Matière, & leur ôter tout scrupule, ie suppose en premier lieu, que la Substance est le Genre souuerain, dont le Corps & l'Esprit sont les deux premières & seules Espèces. En second lieu, que par le Corps ils entendent avec moy toute sorte de Substance Matérielle & Estenduë, & par l'Esprit vne chose Immatérielle & non Estenduë. En troisiéme lieu, que l'espèce ne sçauoit conuenir aux choses à qui le Genre n'appartient pas; comme par exemple, si

l'homme n'a aucune connoissance, il est vray de dire qu'il n'a point de sentiment, parce que le sens est vne espee de connoissance; & au contraire, que ce qui se dit de l'Espee peut-estre attribué au Genre: car s'il n'estoit pas vray de dire qu'il y a des Corps qui Pensent, il ne seroit pas vray non plus de dire, que les bestes brutes ont quelque Pensée.

Je ne croy pas qu'ils puissent faire difficulté de recevoir ces suppositions, dautant qu'elles sont conformes à leurs Principes, & qu'elles sont si claires, qu'il n'y a point d'esprit tant soit peu attentif, & qui ait la moindre teinture de Philosophie, qui les puisse nier. C'est pourquoy cela estant supposé, ie raisonne de la sorte: Les premieres especes d'un Genre souverain ne sçauroient conuenir entr'elles, que dans les attributs essentiels de ce Genre souverain, autrement elles ne seroient pas les premieres especes, & la chose dans laquelle elles conuiendroient seroit un Genre qui tiendrait le milieu entr'elles, & ce Genre souverain: Or est-il que la substance est le Genre souverain dont l'Esprit & le Corps sont les premieres & seules especes; partant ils ne peuuent conuenir que dans les attributs essentiels de la Substance. Voyons maintenant quels sont ces attributs. Ce sont sans doute ceux sans lesquels la Substance ne peut-estre conceüe, & qui conuiennent à toutes les Substances également, comme d'estre par elles-mêmes, d'estre le premier sujet de quelques proprieté, de s'exclure mutuellement l'une l'autre, de n'estre point soustenuës,

&c. lesquels se trouuent par tout ; Mais pour la Pensée & l'Estendue, soit qu'on les considere en general ou en particulier, du consentement mesme de nos aduersaires, elles ne sont point du nombre de ces attributs, puis que selon leur doctrine, on voit des substances qui ne Pensent point, & d'autres qui ne sont point Estendues. Poursuiuons ; Ce qui ne conuient que dans les attributs essentiels de la substance, differe naturellement dans tous les autres ; Or est-il que l'Esprit & le Corps ne conuiennent que dans les attributs essentiels de la substance ; Il faut donc de necessité qu'ils different, & qu'ils soient opposez dans tous les autres, c'est à dire, dans tous ceux qui ne leur appartiennent pas en qualité de substance ; Et partant puis qu'ils tombent d'accord que la Pensée & l'Estendue ne sont pas du nombre de ces attributs essentiels de la substance, & qu'ils auoient que les Corps sont Estendus, & que les Esprits Pensent, ils doiuent auoier aussi qu'il est impossible qu'un Esprit soit Estendu, & qu'un Corps Pense ; Car puis que toutes les proprieté qu'on peut attribuer à l'Esprit & au Corps leur conuiennent essentiellement en qualité de substance, à la reserue de la Pensée & de l'Estendue, & de toute leur suite & dépendance, ils ne peuuent differer que dans ces deux attributs, & il y auroit de la contradiction à dire qu'ils se puissent ressembler dans vne chose, dans laquelle ils sont formellement opposez : L'on ne sçauoit donc sans contradiction attribuer au-

une Pensée au Corps, ny aucune Estendue à l'Esprit.

Pour éviter la force de cette demonstration, nos parties aduerfes disent trois choses. La premiere, que la connoissance sensitiue qu'ils attribuent à quelques Corps est d'un genre tout à fait différent de celle de l'entendement; La seconde, que sans cette connoissance les actions des brutes ne scauroient s'expliquer, & partant qu'il faut reconnoître, ou que les Corps sont capables de quelques pensées, ou établir vne Intelligence pour la conduite de chaque animal; La troisieme, que suivant nostre opinion, les Corps ne seroient pas seulement priuez de la pensée, mais encore de la vie, puis qu'elle se rencontre aussi dans les substances Spirituelles. Examinons ces choses par ordre. Je répons premierement, que la connoissance sensitiue, & l'intellectuelle ne sont pas d'un genre différent quand on les regarde en elles memes, & qu'elles ne sont point autrement opposées que comme deux différentes manieres d'appercevoir. Secondement, si cela estoit, ou bien la maniere de connoître par les sens seroit commune au Corps & à l'Esprit, ou bien elle ne pourroit conuenir qu'au Corps seul. Or on ne peut pas dire le premier, parce que la connoissance des sens n'est pas vn des attributs de la substance, & nous auons démontré que l'Esprit & le Corps n'auoient rien autre chose entr'eux de commun que ces sortes d'attributs: On ne peut non plus

dire le second ; car si la connoissance des sens n'appartenoit qu'au Corps seul , il faudroit reconnoître deux principes de connoissance dans l'Homme sans necessité ; & il faudroit de plus que cette maniere d'appercevoir enfermast dans son idée la notion de l'Estenduë , comme font toutes les autres qualitez corporelles ; or nous auons fait voir le contraire dans le Chapitre precedent , & partant on ne peut pas dire qu'elle conuienne au Corps.

Venons à la seconde difficulté , à l'occasion de laquelle ils nous font toutes les autres. Ils objectent donc qu'en ostant toutes sortes de pensées aux substances corporelles , il s'ensuiuroit , ou que les Bestes brutes n'auroient aucune connoissance , ou bien qu'elles auroient vne Ame Spirituelle. L'un desquels semble manifestement faux , estant impossible d'expliquer toutes leurs actions sans leur attribuer quelque sorte de connoissance , & l'autre paroist injurieux à l'Homme. Cette objection est la plus considerable de toutes , parce qu'il semble impossible de ne pas croire que les actions des Bestes sont accompagnées des mesmes sentiments & connoissances que nous auons , lors que nous faisons les mesmes actions , ou que nous sommes frappez par les mesmes objects. Mais pour vous faire voir que la difficulté que nous auons a déraciner cette ancienne opinion , ne vient pas tant d'aucune raison solide qui nous la persuade , que de l'habitude que nous auons

contractée dès nostre Enfance de iuger ainsi. Voicy ce que ie respons. Premièrement, nous ne disons point absolument parlant, que les bestes ne connoissent point, au contraire ie suis tout prest de le reconnoistre, si tost que l'on m'aura fait voir quelque signe évident & certain de leur connoissance. Mais ie dis que s'il est vray que les brutes ayent quelque sentiment ou quelque perception interieure, qu'excite en elles l'action des objets exterieurs sur l'Organe de leurs sens, & si elles font toutes leurs actions avec dessein de les faire, les raisons alleguées iusques icy, & celles que j'apporteray encore cy-après, montrent qu'il est necessaire que le principe de cette perception & de ce dessein soit Spirituel. Or quand cela seroit (ce que nous ne croyons pas) cela ne seroit aucunement injurieux à l'Homme : car ie ne vois aucune necessité, que tout ce qui est Spirituel soit de mesme espece, & ait les mesmes avantages & prerogatiues que l'Esprit humain. Secondement, ie dis que tout ce que nous remarquons dans les diuerses actions & les instincts des bestes se peut fort bien expliquer sans le secours d'aucune pensée ; Ceux qui en douteront n'ont qu'à lire le Traicté de l'Homme de Monsieur Descartes, & les remarques que j'ay faites dessus, pour s'en esclaircir. Je respons en troisiemesme lieu, que soit que les bestes apperçoivent, ou non, cela ne sert de rien pour expliquer toutes leurs actions. Pour vous le faire voir, consi-

derez, qu'il y a deux sortes d'actions dans les bestes, les vnes sont sensibles, comme leur demarche, leurs sauts, & generalement toutes celles qui parroissent à nos yeux; les autres sont insensibles, sans lesquelles toutesfois les premieres ne sçauroient s'executer, & ce sont celles qui appartiennent aux organes interieurs de leurs Corps. Or bien qu'il semble d'abord qu'on rende raison de tout ce qu'elles font, en disant qu'elles ont enuie de le faire, soit qu'elles s'approchent de ce qu'elles desirent, soit qu'elles s'esloignent de ce qu'elles craignent, & que par le moyen de la connoissance de leurs sens, elles choisissent les moyens conuenables pour paruenir à la fin qu'elles se proposent; toutesfois à regarder la chose de près, cela n'est pas suffisant: car à moins de vouloir aussi que leur ame soit plus habile que la nostre, & qu'elle connoisse non seulement les objets qui se presentent deuant elles, mais encore de quelle maniere elle doit mouuoir les Esprits animaux, les nerfs, & les muscles pour l'execution de leurs desseins, la difficulté reste toujours: Seroit-ce assez (par exemple) pour expliquer le mouuement d'un vaisseau qui seroit porté tantost en Syrie; & tantost en Afrique, de dire que le Pilote qui est dedans a dessein d'y aller, & qu'il a connoissance de la route qu'il doit tenir, ne faudroit-il pas outre cela qu'il sçeust parfaitement bien l'usage de tous les instruments du Vaisseau, & qu'il eust l'adresse de s'en bien seruir pour agir en  
vray

vray Pilote & le pouuoir bien conduire; & si par malheur il ignoroit ces choses, ne seroit-on pas obligé de reconnoître vne autre cause du mouuement du Vaisseau, que le seul dessein du Pilote & la connoissance qu'il auroit des chemins si l'on voyoit qu'il suiuit fort bien la route? Il ne sert donc de rien de reconnoître dans les bestes vne Ame qui connoisse, pour expliquer comment leurs Corps sont capables d'exécuter tous les mouuements que nous remarquons en elles, & qu'on croit communément qu'elles font avec dessein; non seulement parce qu'il est bien plus difficile de conceuoir comment les pensées & les desseins de cette Ame sont capables de pousser les Esprits animaux en la maniere qu'ils le doiuent estre pour exécuter ce qu'elle se propose, que n'on pas d'imaginer comment ces mesmes Esprits sans aucune pensée sont determinez par les diuerfes actions des objets, & par la disposition presente du Cerueau à couler dans les muscles & les mouuoir de la façon que nous voyons qu'ils se meuuent; Mais encore d'autant que nous experimentons en nous mesmes, que nostre volonté, ny la connoissance que nous acquerons par l'Anatomie des parties de nostre Corps, ne nous rendent pas ny plus dispos, ny plus agiles que nous le sommes naturellement. Nous n'en sommes pour cela ny plus sçauants ny plus instruits de la maniere dont les mouuements de nostre Corps se joignent avec nos pensées, nous



en voyons bien l'effect, & nous l'admirons, & nous ne cesserons iamais de l'admirer. Je supplie enfin nos aduersaires de me dire s'il est impossible que Dieu fasse vne machine semblable à celle d'un chien dans toutes ses parties interieures & exterieures, laquelle imite parfaitement toutes les actions & passions d'un veritable chien, avec cette seule difference qu'elles ny seront accompagnées d'aucune connoissance ny d'aucun dessein (ainsi qu'ils croient qu'elles le sont dans cette beste) mais elles seront seulement causées & entretenues dans cette machine par l'action des objets, par les dispositions acquises ou naturelles du cerueau, & des autres parties de son Corps, & par le cours de ses esprits. S'ils disent que Dieu ne le scauroit faire, il est aisé de leur faire voir qu'ils n'ont pas raison de le dire, parce qu'ils ne scauroient apporter aucune bonne raison, pourquoy ils ostent cette puissance à Dieu; Car cette connoissance & ce dessein estant des choses tout à fait differentes de l'impression des objets sur les sens, & des actions & mouuements de la beste, il ne scauroit estre impossible qu'elles en puissent estre separées. Supposant donc que Dieu a mis cette machine entre plusieurs Chiens, ie leur demande comment & par quel signe, ils reconnoistront cette machine, dont toutes les actions & mouuemens se font par la seule disposition de ses organes, & l'impulsion des objets d'avec un veritable Chien, dans lequel

les mesmes mouuements se font avec connoissance & dessein, s'ils disent qu'ils ne la sçauoient reconnoistre ils auouënt en mesme temps qu'ils ont tort de dire que les veritables Chiens connoissent, puis qu'ils ne remarquent pas en eux plus de signe de connoissance, que dans vne machine qui n'en a point, & s'ils pensent remarquer cette machine, & la distinguer, ie leur demande par quel signe: car il est certain, que ce ne sont pas ny tous les mouuements, ny tous les signes des passions, puis que nous supposons qu'elle imite parfaitement tout ce que feroit vn Chien, à l'occasion des mesmes objets. Quels sont-ils donc ces signes? Ie veux bien leur apprendre; s'il y a vn principe de connoissance dans le Chien, il doit vray semblablement auoir la faculté de se manifester; Or se soustiens qu'il ne le sçauoit faire qu'en parlant, c'est à dire, en determinant les changements de sa voix, où quelques autres actions de son Corps, à estre des signes de ses pensées, & des signes qui ne soient pas seulement naturels, mais moraux & purement d'institution: d'autant que les connoissances & les desseins de la chose qui pense n'ont aucune liaison necessaire avec les actions qui les accompagnent. Or nous ne voyons point dans les bestes aucuns signes qu'on puisse dire estre purement d'institution: Car nous n'y remarquons autre chose que les signes naturels de leurs passion; Et bien que ces mesmes signes puissent aussi estre des signes

d'institution, nous sommes assurez du contraire par deux raisons tres fortes. La premiere, parce que les signes d'institution dependant de la seule volonte de la chose qui pense, il est moralement impossible, comme l'experience fait voir, qu'ils ne soient pas differents selon les diuers lieux, les diuers temps, & les diuerses personnes. La seconde, parce que si la signification du cry des bestes estoit purement d'institution; il seroit impossible que les ieunes la peussent entendre, & suiure des aussi-tost qu'elles sont nées comme nous voyons qu'elles font. Concluons donc, que iusques à ce que nous ayons remarqué que les bestes soient capables d'instituer des signes, qui nous representent & signifient leurs pensées, nous ne pouuons sans temerité leur attribuer aucune connoissance. Passons à la derniere difficulté que l'on tire de la vie des Animaux & des plantes, que l'on dit leur estre commune avec les Esprits : Mais il est aisé de répondre, que la vie que l'on attribué aux plantes & aux Animaux, & celle que l'on attribué aux Esprits n'ont rien de semblable que le nom : Car la vie de ceux-cy consiste dans leur pensée, & celle des autres consiste dans le mouuement que la plus pure portion de leur sang, si ce sont des Animaux, ou du suc alimentaire, si ce sont des arbres, donne aux parties les plus grossieres de leurs Corps. En telle sorte que les vns & les autres ne vivent qu'autant de temps que ce sang ou ce suc est capable de les agiter & de les entre-

tenir dans leur constitution naturelle. Et ainsi malgré les objections qu'on nous a faites, nous pouvons conclurre que mesme suivant les maximes de nos aduersaires, ce principe interieur de nos Pensées n'a point d'Estenduë, & par consequent est exempt de tous les accidents qui la presupposent, & est Immatériel.

*Autre Preuve contre ceux qui ne recoiuent que des substances corporelles.*

CHAP. V.

**L'**On ne sçauroit exempter d'erreur ou de blasme les Philosophes qui ont crû que toutes les substances estoient corporelles; comme ont fait Epicure, Tertullien, Vorstius, Hobbes, & quelques autres. Car ou ils ont pris le mot de Corps pour celuy de substance, & ont entendu generalement tout ce qui estoit de réel & de positif dans la Nature, & non pas seulement imaginaire, comme les desenseurs de Tertullien disent que ce Docteur a parlé; où bien ils ont voulu dire par là que routes les choses estoient Estenduës & materielles. Mais bien que ce soit vne chose permise, & qui dépend purement de l'institution des Hommes, d'attacher aux mots telle signification que bon nous semble, toutefois il ne le faut iamais faire sans en auertir le

Lecteur ; à moins dequoy c'est vne chose ridicule de changer la signification ordinaire d'un nom sans aucune necessité. C'est pourquoy quand bien Tertullien en mettant Dieu & nos ames au rang des Corps, n'auroit voulu dire autre chose sinon que ce sont des Estres réels, & non pas des chimeres (ce qui n'a iamais esté dit par personne) il ne laisseroit pas d'estre blasmable, pour auoir sans besoin estendu la signification de ce mot au delà de sa signification ordinaire ; donnant ainsi occasion à ceux qui ne sçauent pas qu'elle est en cela sa pensée de s'imaginer qu'il a crû que Dieu & nostre ame estoient materiels. Epicure est tombé dans la mesme faute, sur vne autre matiere, lorsqu'il a dit que nos sens ne se trompoient iamais. Car il est bien certain qu'il n'a pas voulu nier, que les iugemens que nous faisons sur le seul rapport de nos sens, ne fussent assez souuent faux, ny que les objets ne fussent quelquesfois autrement qu'ils ne nous apparoiſſent, qui est toutefois la seule chose qu'entendent ceux qui disent que les sens se trompent : mais il a seulement voulu dire, que les operations des sens estoient veritables, de cette verité qu'on nomme d'existence, c'est à dire, que les objets paroissent veritablement tels qu'ils nous paroissent. Ce qui n'est point du tout en question, & qui n'a iamais esté nié de personne, non pas mesme par les Stoïques ; Mais si Tertullien a voulu dire, comme il y a grande apparence, que tou-

tes les choses estoient corporelles ou estenduës, il s'est trompé lourdement, & est tombé dans vne erreur, de laquelle il se seroit facilement tiré, luy & ceux qui le suiuent, s'ils auoient voulu faire vn peu plus de reflexion sur les operations de leur Esprit, & examiner avec attention les idées qu'ils pouuoient trouuer en eux mesmes. Et i'espere que ceux qui liront cét Escriit avec soin & sans prejuge, connoistront qu'ils conçoient beaucoup de choses dans lesquelles ils n'apperçoient aucune Estenduë. Ce que ie pretens donc faire voir dans ce Chapitre, est qu'il y a, ie ne dis pas des Esprits, car le mot est trop équivoque en cét endroit, & mes aduersaires mesme en demeureroient d'accord, mais des substances sans aucune estenduë, & entierement détachées de la matiere. Considérez ie vous prie que la Puissance de Dieu estant infinie, & l'entendement de la plus parfaite Creature estant extrêmement borné & finy, il seroit ridicule de dire que nous peussions concevoir plus de choses que Dieu n'en sçauroit faire; nous ne sçaurions donc rien concevoir d'impossible, si nous retraignons ce mot aux seules choses que nous apperceuons clairement & distinctement. Aussi, à proprement parler, nous ne connoissons rien que ce que nous voyons de clair & de distinct dans chaque objet, & il ne faut pas que les Logiciens apportent icy leur Estre de raison, leur chimere, & leur hypocentaure: car sans m'e mbarasser dans

cette question ; ie me contenteray de respondre à ceux qui tiennent l'affirmatiue, que puisque faire vn Estre de raison, c'est conceuoir le Neant sous la forme de l'Estre, il est impossible que ie puisse iamais apperceuoir le Neant clairement ; d'où il s'ensuit que tout ce que ie conçois clairement ne peut estre l'idée du Neant, mais celle de quelqu'Estre actuel, ou du moins possible. Cela estant ainsi supposé, qui peut contester qu'il ne suffise de pouuoir conceuoir deux proprietéz reciproquement l'une sans l'autre, pour conclure qu'elles peuuent exister separement, du moins par la toute-Puissance de Dieu ? Je dis conceuoir de part & d'autre & mutuellement ; Car là où cela n'est pas reciproque, comme par exemple entre l'estenduë & la rondeur, desquelles ie puis bien conceuoir la premiere sans la seconde, mais non pas la rondeur sans l'estenduë ; Il s'ensuit seulement que la premiere peut estre sans la seconde ; & non pas la seconde sans la premiere ; Et qu'ainsi il n'y a tout au plus qu'une distinction modale entre ces deux choses. Mais il y en auroit vne réelle si elles pouuoient estre conceuës reciproquement l'une sans l'autre. Si vous vous souuenez comment dans le second Chapitre vous auez conceu vne chose qui Pense, avec toutes les suites de sa Pensée, pendant que vous doutiez encores'il y auoit rien d'Estendu dans le monde, pourrez-vous nier que vous conceuiez alors la Pensée sans l'Estenduë ? Et n'experimentez-vous pas que vous

pouuez

pouvez de mesme imaginer l'Estenduë sans aucune Pensée? D'où vous pouvez conclure qu'elles se peuvent trouver separement, & qu'ainsi ces deux proprietéz sont distinguées réellement. D'où il s'en suit que la substance qui sert de soutien à la Pensée est aussi distinguée réellement de la substance qui soutient l'Estenduë, & qu'elles peuvent exister separement. Et si l'on conclut fort bien qu'il peut y auoir des choses rondes lesquelles ne seront point quarrées, & des choses quarrées qui n'auront point de mouuement, parce que la quadrature peut estre imaginée sans la rondeur & sans le mouuement, n'auons nous pas mesme raison de conclure qu'il peut y auoir des substances sans Estenduë, puisque la notion que nous auons de la Pensée est tout à fait differente de celle de l'Estenduë. Je sçay bien qu'on me dira que ie prouue seulement qu'il peut y auoir des Estres qui Pensent qui ne seront point Estendus, & non pas que tout ce qui Pense n'a point d'extension: Je respons qu'il me semble que ie fais voir l'un & l'autre en mesme temps, puisque ie montre que la Pensée & l'Estenduë sont deux attributs réellement distinguez; Mais quand bien ie ne l'aurois pas fait, cela seroit suffisant pour ce lieu-icy, dans lequel ie n'agis que contre ceux qui disent que toutes choses sont Estenduës. Continuons donc à raisonner ainsi avec eux. S'il n'y a point d'autre substance que les Corps, il faut demeurer d'accord que ces deux mots, sub-



stance & Corps ont la mesme signification, & que la Pensée & toutes ses suites sont des propriétés de la nature Corporelle, lesquelles ne se peuvent communiquer à d'autres, puisque suivant leur opinion l'univers n'est composé que de corps. Or pour faire voir la fausseté de cette proposition, considerez, ie vous prie, que tout ce qu'on peut attribuer au corps luy conuient, ou comme son essence, ou comme vne suite de son essence, ou seulement par accident; & partant puisque selonc eux la Pensée est vn attribut du Corps, il faut qu'elle luy conuienne de l'vne de ces trois façons. De dire que la Pensée constituë l'essence du Corps, ou qu'elle en soit vne suite, on ne le peut sans attribuer la connoissance à tous les corps, ainsi que faisoit Campanelle: mais comme personne de bon sens ne suit cette opinion, ie ne m'amuse pas aussi à la refuter. Il faut donc que la Pensée soit seulement vn accident du Corps, ou qu'elle ne luy appartienne point du tout: Car enfin quand bien elle seroit la difference essentielle de quelque corps particulier, cela n'empescheroit pas qu'à l'égard de la nature corporelle en general on ne la pust appeller vn accident: Or cela ne sçauroit estre, d'autant que la nature de l'accident ou du mode est telle, qu'il ne peut estre conçu sans son premier sujet, au lieu que le sujet le peut bien estre sans cét accident ou ce mode. Ainsi parce que ie puis imaginer la substance estenduë sans la figure ronde, ou sans le mouvement, & que ie ne puis pas de mesme concevoir

ny l'un ny l'autre sans vne substance estenduë, ie suis assuré que l'une & l'autre sont des accidents ou proprieté du corps. Il n'en va pas de mesme de la pensée, car ie la conçois fort bien sans la substance estenduë, & celle-cy sans la pensée, ce ne peut donc estre vn accident ou propriété du corps; Et ainsi on ne peut pas dire qu'il n'y ayt dans le monde que des substances corporelles, puisque nous sçauons qu'il y a des choses qui pensét, & que la pensée n'appartient point du tout au corps ny comme son essence, ny comme vn accident; Il faut donc qu'elle fasse vn genre de substance à part.

Monsieur le Roy pour eluder cette demonstration, que nous tirons de ce que la Pensée & l'Estendue peuuent estre conceuës séparément l'une & l'autre, apporte cette comparaison dans la responce aux notes de Monsieur Descartes sur son placard, laquelle est entierement contre luy, bien qu'elle semble le fauoriser. Il dit, que s'il y auoit vn homme qui eust vne croix d'argent dans sa poche, & qu'il sçeut seulement qu'il auroit vne croix, sans sçauoir de quoy elle seroit faite, pourroit dire, ie connois clairement & distinctement que i'ay vne Croix dans ma poche, sans conceuoir que i'y aye de l'argent, & en niant mesme qu'il y en ayt au monde; Et toutefois il ne pourroit pas conclure que la Croix & l'argent fussent deux choses séparées, bien qu'il les puisse conceuoir séparément; Et partant il pretend auoir aussi droit de dire que nous n'auons pas meilleure

raison de conclure que le Corps & la Pensée sont deux Substances différentes, à cause que nous voyons que nous les pouuons apperceuoir séparément. Il est aisé de répondre, qu'il y a vne totale difference entre l'exemple de la Croix & ce que nous disons; d'autant que l'argent n'est pas le premier sujet de la figure de la Croix, mais l'estenduë; c'est à dire, l'argent dont la Croix est faite n'est pas susceptible de cette figure, parce que c'est vn métal de telle nature, autrement il n'y auroit que l'argent qui en fust capable; Mais c'est à cause que l'argent est vn Corps, c'est à dire vne Substance estenduë, qu'on en peut faire vne Croix. Au contraire cela confirme nostre opinion; Car si de ce que celuy qui a vne Croix dans sa poche, & qui le remarque, ne peut supposer qu'il n'y a point de Corps au monde, il s'ensuit que cette figure doit estre vn accident du Corps; Pourquoi ne pouuons nous pas conclure que la pensée n'est point vne propriété du Corps, puisque nous pouuons supposer qu'il n'y a aucun Corps au monde, dans le temps mesme que nous sentons que nous pensons? Monsieur Gassendy entre les objections qu'il a fait contre les meditations de Monsieur Descartes met celle-cy comme vne des principales; Que tout de mesme qu'un auugle né, en sentant la chaleur du Soleil, & n'aperceuant pas sa lumiere, ne pourroit dire, autre chose sinon que le Soleil est vne substance qui échaufe, & que neanmoins il ne s'en suiuroit

pas que la mesme chose qui l'échauffe, ne fust pas aussi lumineuse; de mesme l'Ame, qui est aveuglée par vne ignorance volontaire, se resoluant de douter de tout ce qu'elle ne voit pas clairement, peut bien dire qu'elle est vne chose qui pense, lorsqu'elle s'en apperçoit, mais elle ne peut pas nier qu'elle ne soit aussi estenduë, bien qu'elle ne l'aperçoive pas encore évidemment. A cela ie répons deux choses, la premiere, que la comparaison de l'aveugle n'est pas iuste, d'autant que ne connoissant point la lumiere, il ne peut pas nier que ce qui échauffe soit aussi lumineux. Car n'ayant aucune idée de la lumiere, il ne peut pas sçauoir si elle est differente de la chaleur, ny supposer qu'il n'y a aucun Corps lumineux au monde; Mais, bien qu'en nous resoluant de douter de tout, nous nous dépouillions de toutes nos anciennes opinions dans lesquelles nous trouuons quelque incertitude; nous retenons neanmoins nos premieres idées, entre lesquelles celle de la Pensée & de l'Estenduë se rencontrerent; Et nous auons iuste raison de conclure qu'elles sont differentes, puisque nous nous apperceuons que nous pensons, dans le mesme temps que nous nions qu'il y ayt aucune Substance estenduë; Car cela ne se pourroit faire, si nous nepouuions conceuoir l'une sans l'autre; Et ie diray icy en passant, que le principal but de Monsieur Descartes dans sa seconde Meditation, est de monstrier qu'il a l'idée d'une substance qui pen-

se existante, dans le temps mesme qu'il niequ'il y ayt au monde aucune substance estendue, afin de faire par là bien concevoir la Nature de la Substance qui pense, & donner en mesme temps à connoistre que toutes les proprietéz qu'il decouvre ensuite luy appartenir necessairement, n'appartiennent en aucune façon à la Nature Corporelle ; puis qu'il sçait qu'elles existent sans qu'elle suppose l'existence d'aucun Corps.

La seconde chose que ie répons est, que cette comparaison est entierement contre luy ; Car comme il s'ensuit que la lumiere & la chaleur peuvent estre separément, de ce que l'Aueugle peut concevoir l'une sans penser à l'autre ; Il faut conclure par la mesme raison, que la Pensée & l'Estendue peuvent se rencontrer separément.

Mais il me semble que i'apperçoy Monsieur Hobbes qui s' imagine que nous l'en croirons sur sa parole, & qui nous dit que bien que la Pensée puisse estre conceuë sans le Corps par vne abstraction mentale ; C'en'est pas à dire qu'elle soit distinguée d'auec luy ? Voicy ses paroles couchées dans la vingt-deuxiesme page de son liu. de Corpore: *Hinc originem trahunt quorundam Metaphysicorum crassiores, qui ex eo quod considerari potest cogitatio sine consideratione Corporis, inferre volunt non esse opus Corporis cogitantis ; Et ex eo quod quantitas considerari potest, non considerato Corpore, existere putant quantitatem sine Corpore, & Corpus sine quantitate ; Ita ut addita ad Corpus quantitate, tum demum fiat quantum. Ab ea*

*dem fonte nascuntur illæ voces insignificantes, substantiæ abstractæ, essentia separata aliaque similia &c.* Quand ie ne répondrois point autrement à cette obiection qu'en la niant simplement, Monsieur Hobbes ne pourroit pas s'en plaindre, puisque luy-mesme n'apporte aucune raison pour la souter. Toutesfois, pour la confirmation de la verité, & pour luy monstrier que ces Metaphysiciens qu'il accuse, ne se sont pas trompez si lourdement que luy; Il est bon d'examiner la chose vn peu dauantage, suiuant ses principes mesmes, Prenez donc garde premierement qu'en cét endroit par le mot de Pensée il n'entend pas la Substance qui pense, mais seulement ses operations, lesquelles sont seulement des modes de cette Substance.

Prenez garde en second lieu, que chez luy les noms de sujet, de Corps, & de substance ne signifient que la mesme chose, laquelle il appelle sujet par rapport aux accidents qui y sont receus, substance en tant qu'elle subsiste indépendamment de nostre imagination, & enfin la nomme Corps parce qu'elle remplit vn espace. Cela supposé; i'auoüe, & il est vray, que lors que ie conçois deux attributs ou deux proprietéz l'vne sans l'autre, il ne s'ensuit pas touïours qu'elles soient distinguées réellement, comme il arriue quand ie ne les puis considerer separément qu'avec confusion & par abstraction, soit à la maniere que les Methaphysiciens conçoient le genre sans penser aux especes qui luy sont inferieures, ou

quand ils considerent vn accident en particulier, Par exemple vne pensée, en faisant abstraction de son sujet ; soit à la façon que les Geometres regardent l'Estenduë sans considerer les Corps, dans lesquels elle est receüe ; Et pour lors tant s'en faut que ie puisse conclure qu'elles peuuent exister separément, qu'aucontraire la confusion que ie remarque dans l'idée que i'en forme, & la violence que ie me fais pour conceuoir separément des choses qui n'ont pas vne idée separée, me doit faire soupçonner que ce n'est en este que la mesme chose, & qu'il n'y a tout au plus entre elles qu'une difference modale, ou rationnelle, pour parler en termes de l'Ecole. Mais lors que ie puis apercevoir separément deux attributs ou deux proprietéz, telles que la Pensée & l'Estenduë, reciproquement l'une sans l'autre, en telle sorte que ie vois qu'elles ne se presuposent point l'une l'autre, ny vne troisiéme commune aux deux, & que ie puis conceuoir que quand l'une des deux ne seroit point, l'autre ne laisseroit pas d'estre, & tout cela avec vne connoissance claire & distincte ; C'est tellement la marque d'une distinction réelle, qu'il n'est pas même possible d'en feindre & d'en imaginer vne autre dans les choses que nos sens ne nous font iamais voir separées.

Ie finirois icy ce Chapitre, si ie ne voyois que nos Aduersaires se vantent d'auoir des demonstrations, que toute Substance est Corps. En effet ie  
me

me souuiens d'auoir leu trois diuers ouurages qui le pretendoient prouuer, ou que du moins nostre Ame estoit Corporelle ; Mais parce que les raisons du premier des trois ne prouuent autre chose sinon que l'vnion du Corps & de l'Esprit de l'Homme seroit impossible s'il n'estoit Corporel, nous attendrons à en parler lors que nous traiterons de cette vnion, laquelle estant vne fois bien conceuë, reduit au néant toutes les objections que l'on tire de la sympathie du Corps & de l'Esprit de l'Homme. Pour retourner à Monsieur Hobbes, auquel appartient le second, & qui se vante dans le premier Chapitre de son Liure de *Corpore*, que la Philosophie, qui auant sa naissance estoit reduite à manger du gland, luy a l'obligation de ce qu'elle mange à present vn peu de pain ; Il dit en mille endroits, que les Substances intellectuelles sont des termes qui se destruisent, que tout Homme est Corps d'autant qu'il est Animal, qu'il n'y a rien d'opposé au Corps que l'accident ; mais il n'entreprend point de le prouuer que dans son *Leuiathan*, dans lequel il raisonne ainsi, page 34. *Le Corps est ce qui est capable de remplir vn lieu, & d'estre partie réelle de l'Vniuers ; Car l'Vniuers n'estant qu'un assemblage de Corps, tout ce qui ne l'est point n'en peut faire partie, de mesme qu'il ne peut y auoir de Corps qui n'en soit vne. Le Corps s'appelle Substance, parce que il est subiet au changement, c'est à dire, au mouuement & au repos &c. Partant le Corps & la Substance ne signifient que la mesme chose,*



ainsi ces mots *Substances incorporelles*, sont des termes frivoles, qui se détruisent mutuellement estant joints ensemble, comme qui diroit *un corps incorporel* : Voila cette celebre demonstration qui égale les Geometriques, & qui le met au dessus de tous les Philosophes, laquelle nous fera perdre l'immortalité, si nous n'y prenons garde. Mais n'en ayons point de peur ; Messieurs de l'Academie d'Oxford y ont desia pourueu ; Et nous ne serons point reduits au rang des Bestes, s'il ne demonstre auparauant (ce qu'il ne fera iamais) que l'Vniuers n'est qu'un assemblage de Corps, qu'il n'y a que le Corps qui soit suiet au changement, & qui merite le nom de Substance ; Iusques-là il nous pardonnera si nous ne receuons pas sa demonstration, qui est bastie sur ces deux fausses propositions. Le docte Vvardus page 270. de la recherche qu'il a faite de la Philosophie de Monsieur Hobbes, pretend mesme le conuaincre du contraire, & luy faire voir que selon ses propres principes l'Ame doit estre Incorporelle. Vous auancez, dit-il, dans l'onzieme Chapitre du Liure du Corps, que c'est le mesme Homme qui est vieil & qui est ieune, non pas à raison de son Corps qui n'est pas le mesme, mais de sa forme qui est la mesme qui a esté dans sa Generation, & qui est le principe du mouuement ; Partant il faut que vous concluyez que cette forme n'est ny le Corps ny son mouuement ; Elle est d'ailleurs vne Substance, puisque vous dites qu'elle est le principe du mouuement, & le subiet de quelques accidents ; cette forme

*est donc selon vos maximes mesmes vne Substance Incorporelle.* Il me semble qu'on peut encore conuaincre Monsieur Hobbes de la mesme verité sans sortir de ses principes, en raisonnant ainsi avec luy. La Pensée, selon vous, ne peut estre vn Corps, ny vn accident du Corps; Car si c'estoit vn Corps elle ne pourroit estre conceuë sans luy, & toutes-fois dans le passage allegué cy-dessus vous estes demeuré d'accord qu'elle le pouuoit estre: Ce n'est pas aussi l'accident d'un Corps; Car vous deffinez l'accident vne façon de conceuoir le Corps, & vous auez dit le contraire dans le mesme passage; Il faut donc que la Pensée soit la propriété d'un Estre Incorporel. Le troisieme ouurage que i'ay veu sur cette matiere porte pour titre, *Preuve de la vraye Philosophie demonstratiue, que toute Substance finie est Corps..* Son premier raisonnement, auquel tous les autres se reduisent est tel. *Toute Substance diuisible en parties diuisibles à l'insiny est Corps; Or est-il que toute Substance finie est telle, & que toute Substance crée est finie, donc &c.* Je répons, sans examiner s'il peut y auoir quelque chose de créé qui soit insiny, que chaque Creature est finie dans sa nature & selon ce qu'elle est; Ainsi les Corps sont finis dans leur estendue, & les Esprits dans leurs Pensées; Et tout de mesme qu'on ne peut pas dire que le Corps soit finy dans la Pensée, de mesme l'Esprit n'est ny finy ny insiny dans l'Estendue; Or bien qu'un Esprit soit finy dans sa faculté de penser, & dans son action, il n'est pas

pour cela diuisible en parties, d'autant que la diuisibilité est vne suite de l'Estenduë, laquelle ne luy conuient pas : En effet qui a iamais conceu la moitié ou le quart d'une Ame ? Void-on que les grandes Ames occupent plus d'espace que les petites, & lors que nous comprenons beaucoup de choses, nostre Esprit est-il bien plus gros, que lors que nous en comprenons moins ? Je sçay bien que l'on medira que les Esprits n'estant pas partout, doiuent estre bornez & finis, non seulement dans leur Pensée, mais encore dans leur Substance ? Mais ie ne répondray pas icy à cette obiection, non plus qu'à beaucoup d'autres qu'on pourroit faire touchant les empeschemens que le Corps apporte aux fonctions de l'Esprit, d'autant que leur solution dépend d'une plus ample explication de sa Nature, & de la maniere qu'il est quelque part ; Mais ie répondray plus bas à chacune en son lieu. Il est temps de passer à vne autre matiere ; C'est pourquoy finissons ce Chapitre, & concluons, que tout ce qui Pense estant Immatériel, on ne peut pas douter qu'il n'y ait des Substances Spirituelles.

*Que tout ce qui Pense, Pense toujours, tandis  
qu'il Existe.*

## CHAP. VI.

**L**E témoignage de nostre conscience nous assure si certainement & si éuidemment que nous auons la faculté de penser, que ie serois ridicule, si ie voulois apporter d'autres preuues de cette verité que celle de nostre propre experience; C'est pourquoy ayant tasché de démonstrer dans les Chapitres precedents que la Pensée ne scauroit se rencontrer avec l'Estenduë dans le mesme sujet simple, ie ne pense pas que personne puisse à present douter que l'Homme ne soit vn composé d'une substance Estenduë, que nous appellons Corps, & d'un autre qui Pense que nous nommerons toujourns desormais Esprit, quand bien mesme ie ne pourois conceuoir la maniere de l'Vnion de ces deux choses si differentes. Car il y auroit de l'imprudence de douter d'une Verité constante & manifeste, parce que nous remarquerions de l'obscurité dans vn autre. Cette Verité estant donc estable taschons maintenant d'en deduire tout ce qui peut nous decouvrir la Nature de cet Esprit, soit en general, en le considerant seulement comme vne chose qui Pense, soit en particulier, en examinant qu'elles

sont les proprietétez qui luy apartiennent en tant qu'il est vny au Corps. Ce n'est pas assez de sçauoir en general que l'Esprit est vne chose qui Pense, si l'on ne sçait de plus qu'elle est la Nature de la pensée, & que c'est en elle précisément que consiste l'essence de l'Esprit. Apres auoir examiné toutes les diuerses actions & passions de l'Esprit, & regardé ce qui se trouue de particulier en chacune d'elles, & ce qu'elles ont de commun; Il me semble pouuoir définir que la Nature de la Pensée consiste dans cette conscience, ce témoignage, & ce sentiment interieur par lequel l'Esprit est aduertý de tout ce qu'il fait ou qu'il souffre, & generalement de tout ce qui se passe immédiatement en luy, dans le temps mesme qu'il agit, ou qu'il souffre. Je dis immédiatement, afin de vous faire connoistre que ce témoignage & ce sentiment interieur, n'est pas different de l'action ou de la passion, & que ce sont elles mesmes qui l'auertissent de ce qui se fait en luy; & qu'ainsi vous ne confondiez pas ce sentiment interieur avec la Reflexion que nous faisons quelquefois sur nos actions, laquelle ne se trouue pas dans toutes nos pensées, dont elle est seulement vne espeece; Et i'ay dit de plus, dans le temps mesme qu'il agit ou qu'il souffre, afin que vous ne pensiez pas, quand l'Esprit n'agit plus, c'est à dire quand il a changé de pensée, qu'il soit necessaire qu'il se ressouuienne d'auoir agy, & de s'en estre apperceu. Et ainsi la substance qui pense n'est rien autre chose qu'un Estre qui

s'aperçoit de tout ce qui se passe en luy, soit qu'il agisse luy mesme, ou qu'un autre agisse sur luy, & qui s'en aperçoit précisément dans le temps mesme que la chose se fait, d'où vous pouvez tirer cette importante verité, que tout ce qui se fait en nous sans que l'Esprit s'en apperçoive ce n'est pas l'Esprit qui le fait; Et que tout ce qui ne dépend point directement ou indirectement de ses pensées luy est absolument estrange; vous pouvez encore conclure de là qu'il y a de la contradiction à dire que l'Esprit ne Pense pas toujours pendant qu'il existe: Car puis que l'Esprit n'est rien autre chose qu'une substance qui s'aperçoit de tout ce qui se passe en soy; s'il agit ou pâtit il doit s'en apercevoir; Il doit donc toujours s'apercevoir de quelque chose; & consequemment il est impossible qu'il ne pense pas toujours. Esclaircissions un peu davantage cette matiere, afin de leuer toute la difficulté que la nouveauté luy donne. Ceux qui ont considéré de plus près les Essences des choses, ont remarqué qu'entre les attributs essentiels qui appartiennent à un mesme sujet, il y en a toujours quelqu'un duquel les autres dérivent comme des ruisseaux de leur source; Ainsi nous voyons que toutes les propriétés de l'Homme viennent de l'Union de l'Ame & du Corps comme de leur origine; & que l'estenduë est la base & le fondement de tout ce que nous apercevons clairement dans le Corps. Or pour reconnoître ces attributs, il faut considérer

quel est celuy de tous les attributs d'un sujet que n'en presuppose aucun autre, & à raison duquel tous les autres luy conviennent; Et lors qu'on l'a trouvé, il n'y a pas lieu de douter que celuy-là ne doive passer pour la source de tous les autres. C'est ainsi qu'on a remarqué que dans la Nature du Corps l'Estenduë tient le premier lieu; parce que tout ce qui est meü est estendu, tout ce qui est figuré est estendu, tout ce qui est divisible est estendu, tout ce qui a une certaine quantité, & qui remplit un lieu est estendu, & si le Corps n'estoit point estendu il ne seroit pas capable d'estre le sujet d'aucun de ces accidents; Mais tout ce qui est estendu n'a pas de nécessité, un mouvement, une certaine figure, une telle situation, ou une telle quantité; Et bien qu'il soit nécessairement divisible, & naturellement impenetrable; Toutesfois ces deux proprietéz ne sont que des sujets & des dépendances de l'Estenduë; puis qu'elles en dérivent, & qu'elles la presupposent. Ceci confirme ce que nous venons de dire de la Pensée à l'égard de l'Esprit, & nous apprend qu'elle est la difference essentielle & la racine de tous les attributs: Car si ie sens, si ie vois, si j' imagine, si j'entens, si ie me ressouviens, si ie veux, ou si ie ne veux pas, la Pensée se trouve dans toutes ces actions; Mais si ie pense, il n'est pas nécessaire que ie produise aucune de ces actions en particulier, c'est à dire, que ie voie, que ie sente, que j' imagine &c. Ce qui fait voir que toutes ces di-

verses

tierres facultez, comme autant de diuerſes branches, ſortent de la Penſée comme de leur tronc, & que les actions particulieres en ſont cōme les fleurs ou les fruits. C'eſt donc dans la Penſée que reſide l'eſſence de l'Eſprit, puis que toutes ſes autres puiffances en dériuent, & qu'à proprement parler toutes leurs fonctions ne ſont que des différentes manieres de penſer. Or comme nous montrerons plus bas toutes nos diuerſes Penſées ſe reduiſent manifeſtement à deux branches, dont l'une eſt la puiffance que nous auons de connoiſtre, & l'autre celle de vouloir ou de choiſir, c'eſt à dire, de nous déterminer à quelque choſe que nous preferons à ſon contraire: & de fait, ſentir, imaginer, ſe reſſouuenir, entendre, &c. N'eſt-ce pas apercevoir ou connoiſtre? Et de meſme vouloir, conſentir, reſuſer, juger, deſirer, craindre, heſiter, &c. Ne ſont-ce pas des ſuites & des dépendances du pouoir que nous auons de nous déterminer? Vous pouuez donc voir que c'eſt au ſeul Monsieur Deſcartes que nous auons l'obligation de nous auoir fait connoiſtre la nature de l'Eſprit; Car bien que deuant luy pluſieurs grands Philoſophes, en qualifiant les Eſprits du nom d'Intelligences, ayent aucunement découuert quelle eſtoit leur Eſſence; Il eſt pourtant certain que (l'Entendement preſuppoſant la faculté de Penſer, & ne renfermant pas toutes les qualités qui appartiennent à l'Eſprit) on ne peut pas dire qu'ils nous ayent entierement monſtré & enſigné quelle eſtoit le fond de la na-



ture. Puis que c'est donc dans la faculté que l'Esprit a de Penſer que ſa nature conſiſte, ce ne peut eſtre qu'une meſme choſe avec luy ; Autrement le meſme Eſtre ſeroit différent de luy meſme, ſ'il pouvoit y auoir vne diſtinction réelle entre vne Subſtance & ſon Eſſence ; Et d'autant que nous ne pouuons conceuoir clairement cette faculté ſans l'Esprit, ny luy ſans elle, il n'y a tout au plus entre eux qu'une diſtinction de raiſon. Il n'en va pas de meſme de cette faculté & de ſes actions ; Car parce que nous pouuons apperceuoir la Subſtance qui Penſe ſans aucune de ſes Penſées en particulier ; nous diſons qu'il y a vne différence modale entre la Subſtance & ſon action, ſemblable à celle que nous reconnoiſſons entre l'Eſtendue d'un Corps & ſa figure particulière. Il ne me ſemble pas que ce que diſent les Theologiens, lors qu'ils aſſeurent qu'une Creature ne ſçauroit eſtre le principe prochain de ſon action, s'oppose à ce que nous venons de dire, que l'Esprit & la Faculté de Penſer ne ſont que la meſme choſe : Car il ne faut pas expliquer leur propoſition, comme ſ'ils pretendoient qu'il y euſt neceſſairement vne diſtinction réelle entre vne choſe, & la faculté par laquelle elle agit ; D'autant qu'ils ſe contrediroient eux meſmes : car ſuiuant cette diſtinction, cette Faculté ſeroit elle meſme vne Creature ſeparée de ſon ſujet, laquelle ou ſeroit le principe prochain de ſon action, ou bien elle auroit beſoin d'une ſeconde faculté, & celle-cy d'une troiſieſme, & ainſi inf-

qués à l'infiny, ce qui est absurde. De plus par quelle probabilité pourroient-ils dire que l'accident pourroit estre le principe prochain de son action, & qu'une substance ne le pourroit pas estre. Mais ie croy qu'ils veulent seulement dire, qu'il n'y a point de Creature qui puisse agir sans le secours actuel du Createur. Ce qui est tres-veritable.

Reuenons maintenant à nostre première proposition, que l'Esprit doit Penser toujours; laquelle ie ne crois pas que qui que ce soit ait auancée auant Monsieur Descartes; l'espere pourtant qu'on l'a trouuera veritable; si outre ce que nous auons déjà dit, l'on considere que tout de mesme que nous ne voyons aucun Corps qui ne soit actuellement Estendu, & non pas seulement en Puissance, & qui ne doïue auoir actuellement quelque figure, & non pas seulement estre capable de receuoir celles qu'on luy voudra donner; de mesme la Nature de l'Esprit ne consiste pas seulement à auoir la faculté de Penser, mais encore il est necessaire qu'il ait toujours quelque Pensée pendant qu'il existe, de laquelle il s'occupe, qui l'entretienne, & qui soit le soutien de sa vie. Considerez en second lieu, que tout ce qui existe doit estre actuellement quelque chose, & non pas seulement en Puissance; car ce qui n'est qu'en Puissance, n'est rien, à dire le vray: cela estant, comment pouuez-vous conceuoir vne chose qui Pense, si vous ne suposez qu'elle ait quelque Pensée? Vous me direz, qu'il suffit que l'Esprit ait la Puissance

de Penſer, encore qu'il n'en exerce aucune fonction ; Mais auez-vous bien pris garde que le Corps ne ſeroit rien, ſ'il n'eſtoit actuellement Eſtendu, & qu'il fuſt ſeulement capable de l'eſtre ; Il en eſt de meſme de l'Eſprit, lequel eſtant eſſentiellement vne choſe qui Penſe, ceſſeroit auſſi-toſt d'eſtre, ſ'il ceſſoit vn moment de Penſer ; Et comme l'Eſtenduë d'un Corps en particulier ne peut ſubſiſter ſans eſtre bornée par quelque figure, de meſme la Penſée de l'Eſprit créé ne peut exiſter ſans eſtre déterminée par la forme de quelque Penſée particulière. Conſiderez encore, ie vous prie, que ſi la Subſtance qui Penſe ne produit aucune Penſée, il faut que ce ſoit, ou parce qu'elle ne le veut pas, ou parce qu'elle ne le peut pas ; Si c'eſt le dernier, elle n'a donc pas la puiſſance de Penſer, & conſequemment ce n'eſt pas un Eſprit ; & ſi c'eſt parce qu'elle ne veut pas, elle penſe déjà, parce que vouloir ou ne vouloir pas ſont des façons de Penſer, d'où il ſ'enſuit clairement que l'Eſprit ne ſçauroit eſtre ſans penſer toujours. Vous me direz, peut eſtre, qu'un Peintre peut auoir la puiſſance de peindre, quoy qu'il n'en puiſſe faire aucun acte faute de toile ou de couleur, & que l'œil ne laiſſe pas d'auoir la faculté de voir, quoy que la nuit il ne puiſſe rien apercevoir, faute de lumière, & qu'ainſi l'Eſprit peut n'auoir aucune Penſée, non pas manque de volonté ou de puiſſance, mais par le défaut des eſpeces ou des Idées qui ſeruent à ſa connoiſſance. Je réponſ

qu'il y a bien de la difference entre ces choses & l'Esprit, parce que le Peintre travaille au dehors, & que la perception des sens presuppose l'action de l'objet, lequel ne peut estre aperçu par la puissance visuelle s'il n'est capable d'agir sur elle; Mais la faculté de penser ne presuppose pas dans toutes ses fonctions l'existence d'un objet extérieur; Et quand bien il seroit vray que l'Esprit ne pourroit auoir l'idée d'aucune chose qui soit hors de luy, si elle ne luy estoit enuoyée de dehors, à tout le moins l'idée de soy-mesme & de sa propre existence ne luy sçauroit manquer, & comme il est essentiellement connoissant, il ne sçauroit estre sans Pensée.

Vn sçauant Homme de mes amis m'objecta vn iour, que l'Esprit pourroit bien ne pas penser, parce qu'il ne le voudroit pas, sans toutesfois que l'on pust dire qu'il pensast. Je luy répondis que cette volonté ne pouuoit pas venir à vn Esprit sans qu'il s'en apperceut, & consequemment sans qu'il en eust la Pensée; à quoy il repartit, que cela n'estoit vray que simplement dans le temps que sa volonté le determinoit à ne point penser, & qu'apres que l'acte de cette determination seroit passé, l'Esprit ne Penseroit plus. Je luy répondis encore, ou bien l'Esprit changera de volonté vn moment apres qu'il se sera déterminé, ou bien il n'en changera pas; Si c'est le premier, il s'aperceura de ce changement, & s'il n'en change pas, la premiere Pensée par laquelle il s'est aper-

ce de cette volonté demeurera, & ainsi il Pensera tousiours: Car comme le Corps retient tousiours la mesme figure pendant qu'il n'arriue rien qui la change, ainsi la mesme Pensée est tousiours présente à l'Esprit iusques à ce qu'il en succede vne nouuelle.

La plus forte objection qu'on puisse faire contre nostre proposition vient de ce qu'il semble que si l'Esprit pensoit tousiours, & qu'il eust tousiours pensé depuis le premier instant qu'il a esté vny au Corps, nous deurions nous ressouenir de quelques vnes des pensées que nous auons eües dans le ventre de nos meres. A quoy ie réponds, que nous ne doutons pas que nous n'ayons tous les iours mille & mille Pensées, soit en veillant, soit en dormant, desquelles toutesfois nous ne gardons aucun souuenir; Et parrant qu'il ne s'ensuit pas que l'Esprit n'ait pas Pensé dès le premier moment qu'il a esté créé & vny au Corps, encore qu'il ne se ressouuienne d'aucune Pensée qu'il ait eu alors; Mais ie parleray plus au long de cette matiere, en traittant de la reminiscence. Remarquez seulement que mesme l'Ecole d'Aristote auroit deü par ses propres Principes reconnoistre que l'Esprit Pense tousiours; Car il n'y a aucun de ses Sectateurs qui ne mette l'Esprit de l'Homme au rang des choses viuantes, & qui n'establisse l'essence de la vie, non pas seulement dans le pouuoir d'agir, mais dans l'action; d'où il s'ensuit manifestement que l'Esprit ne pouuant

DE L'ESPRIT DE L'HOMME. 63  
estre sans viure, ny viure sans agir, ny agir sans  
s'en apercevoir, il doit Penſer continuellement,  
& qu'il ceſſera d'eſtre quand il ceſſera de Penſer.

---

*Que l'Esprit eſt Immortel.*

C H A P. V I I.

**B**IEN que tous les Hommes ſouhaittent d'eſtre Immortels, & qu'il n'y en ait preſque aucun qui ne taſche par ſes Ourages, ou par ſes enfans, par ſes baſtimens, ou par ſes conquêtes à ſe dérober au trépas, il ſ'en trouue pourtant quantité qui déclarent vne guerre ouuerte à l'Immortalité de leur Ame, ou qui en font pluſtoſt vne Article de leur Foy, qu'une conſequence de leur raiſonnement. Il eſt vray que comme cette vérité ſi importante à la conduite de la vie a eu des ennemis, elle a eû, auſſi de puiſſans deſſenſeurs; Toutes les Religions la ſuppoſent, toutes les Sectes des Philoſophes (ſi vous en exceptez celle d'Epicure) ont entrepris de la prouuer; Mais bien que ie croye qu'ils ſont tous venus à bout de leur deſſein, & qu'il n'y ait point d'Esprit raiſonnable qui ne ſe doiue rendre à la force de leurs raiſons; Ils me pardonneront pourtant ſi ie diſ, qu'il n'y a aucune Secte, ancienne ny moderne, des principes de laquelle cette vérité ſuiue ſi neceſſairement & ſi manifeſtement que de la noſtre, dans laquelle

cette conclusion est si aisée à tirer, si facile & si évidente, que ie m'estonne comment on a peu reprocher à Monsieur Descartes qu'il ne l'auoit pas prouuée. Il est vray qu'il ne l'a pas mise au frontispice de ses Meditations, ny traittée expressement dans la Metaphysique, mais cela n'empêche pas qu'on ne doie dire qu'elle y est contenuë, comme vne consequence qui suit infailliblement de ses principes. Et de fait, que pretendent autre chose ceux qui veulent que leur Ame soit mortelle, sinon qu'elle ne puisse estre ou agir sans le Corps? Cela estant, n'est-il pas clair qu'il a montré qu'ils se sont trompez, en faisant voir que la chose qui pense est réellemēt distinguée du Corps, & que partant elle peut estre sans luy. D'où il s'en suit clairement qu'elle n'a pas non plus besoin de luy pour exercer ses Pensées; puis qu'elle ne peut pas estre sans Penser. Au contraire quelque forte, & quelque estroite que nous paroisse l'vnion de l'Esprit & du Corps, comme elle ne les peut pas rendre vne mesme chose, nous auons plustost lieu de croire, veu les empeschemens que nous sentons, que le Corps apporte tous les iours aux fonctions de nostre Entendement, que la mort mettra l'Esprit en liberté, que de penser qu'il doie accompagner le Corps au trépas. Je sçay bien que quelques vnes des operations de l'Esprit se ressentent de la bonne ou mauuaise constitution du Corps, pendant le temps de leur vnion, d'où quelques vns pretendent auoir droit de conclure, que quand  
ils

Ils ne seront plus vnis, l'Esprit n'agira plus, & ne pourra plus estre ; Mais cette conclusion est aussi peu soutenable, que seroit celle d'un Homme, qui voyant un sçauant Peintre engagé par sa promesse à imiter parfaitement les bons ou mauuais Tableaux que seroit un autre Peintre ignorant, pendant tout le temps qu'ils seroient ensemble, luy attribueroit toutes les fautes de l'original qu'il imiteroit dans ses copies, ou croiroit qu'il ne pouroit rien faire de luy mesme, lors qu'ils seroient séparéz ; parce qu'il luy auroit veu imiter pendant quelque temps l'ignorance de son associé. Il en est de mesme de l'Esprit de l'Homme, les loix de son vnion avec le Corps ( comme nous monstrerons dans son lieu ) l'obligent à imiter, autant que sa Nature luy permet, la constitution du Corps auquel il est ioint par celles de ses Pensées qui en dépendent ; Mais neanmoins nous ne pouuons pas pour cela conclure qu'il se ressent de ses infirmités, ou qu'il ne doie plus estre, quand vne fois leur liaison sera rompuë ; Car nous sçauons d'ailleurs tres-parfaitement que ce sont deux Substances non seulement distinctes, mais mesme totalement differentes, & cela ne nous doit porter tout au plus qu'à admirer la puissance & la sagesse de celuy qui les a si estroitement vnies, qu'il semble que ce ne soit que la mesme chose.

Je pourois me contenter de cette demonstration, si ie ne voulois que prouuer simplement que l'Esprit est immortel ; mais desirant éclaircir en-



tièrement tout l'estat de la question, & ostertout les scrupules que vous pourriez auoir: Je vous prie de considerer avec moy que la vie est vn terme fort equiuoque, non seulement à cause des diuerſes choses auxquelles on l'attribuë, mais encore à cause des diuerſes significations qu'on luy donne; dont les principales se raportent à trois; Car tantost ce mot est pris pour signifier l'existence simple; tantost pour vne existence accompagnée d'action, & enfin quelquesfois pour la coexistence, ou la demeure d'une chose avec vne autre; Mais de quelque façon qu'on le prenne, l'Esprit de l'Homme doit estre immortel; Et pour vous le faire voir commençons par la premiere.

La vie est prise pour l'existence simple dans ce passage de Boëce, où il définit l'Eternité, la possession entiere & parfaite d'une vie sans fin. C'est aussi dans ce mesme sens que dans l'Eſcriture Dieu iure par sa vie, c'est à dire, par la necessité de son estre, & qu'Aristote a dit, que la vie des Animaux estoit leur Estre; & c'est encore suiuant la mesme signification que nos aduersaires disent, que l'Âme meurt avec le Corps, c'est à dire, selon leur langage, qu'elle cesse d'estre; & partant mourir, dans vn sens opposé à celuy dans lequel nous prenons à present la vie, c'est n'estre plus. Or entre les choses qui cessent d'estre; les vnes sont composées, les autres sont simples, les premieres perdent leur existence, lors que les parties qui les composent se separent; mais les secondes ne sau-

roient perir que par vn aneantissement, lequel estant au dessus de la force de toutes les Creatures, aussi bien que la Creation, on peut asseurer que tous les changemens qui arriuent dans la Nature ne sont pas capables de faire perir les choses simples; & partant puis qu'on ne peut pas ignorer, apres ce que nous auons dit, que l'Esprit n'en soit vne, puis qu'il est Immateriel, & n'a point de parties. on ne peut pas douter non plus qu'il ne soit immortel & incorruptible. L'Ecole d'Aristote est en cecy d'accord avec Monsieur Descartes, que les Substances simples ne peuuent cesser d'estre que par vn aneantissement, & que cet aneantissement est au dessus des forces de la Nature, puisque c'est sur ce fondement qu'elle establit l'incorruptibilité & l'immortalité de la matiere premiere.

Mais quelqu'un dira peut estre que ie ne prouue pas que l'Autheur qui a creé ces sortes de Substances ne les puisse faire perir; Je le sçay bien; aussi cela n'est-il pas en question: car qui a iamais ignoré qu'il n'y a que Dieu seul qui existe necessairement; & que parce qu'il est encore plus simple que les autres Esprits, il ne peut commencer ny cesser d'estre; & que tout le reste n'existe qu'autant de temps qu'il luy plaist? Mais neanmoins ie pretens auoir suffisamment démontré l'immortalité de l'Esprit, ayant fait voir qu'aucune Creature n'est capable de le détruire, & qu'il n'y a que la volonté du Createur qui le puisse faire mourir: Car nous ne voyons rien qui nous puisse

faire soupçonner qu'il ait cette volonté. Bien loin de l'auoir reuelé, toutes les Religions qui rapportent leur origine a quelque reuelation diuine pretendent qu'il a asseuré le contraire, & l'on n'a iamais remarqué dans la Nature aucun exemple d'un pareil aneantissement. Nous sçauons d'ailleurs que Dieu est un Estre tres parfait, & parant immuable dans ses volontez, & s'il nous semble que les changemens de la Nature en marquent quelqu'un en luy, & s'il nous parle mesme quelquefois dans l'Ecriture comme s'il s'estoit repenty, & auoit changé de volonté, c'est qu'il s'accommode à la foiblesse de nostre Entendement, qui est trop petit pour conceuoir toutes les choses qu'il renferme dans l'estenduë de son decret, & la maniere avec laquelle il change toute la Nature sans se changer. C'est par l'Immutabilité de ce decret que nous sommes asseurez qu'il n'aneantira iamais les choses qu'il a vne fois créés, & c'est par la connoissance que Monsieur Descartes en a eüe, qu'il a auancé dans ses principes, que Dieu conseruoit par la mesme action, la mesme quantité de mouuement, & de matiere qu'il a produite la premiere fois; C'est decette vnitè d'action, & de cette Immutabilité, que naist la force que chaque chose a de se maintenir dans l'estat où elle est, sçauoir celles qui se meuuent dans le mouuement, celles qui se reposent dans le repos, les choses separées dans leur separation, & celles qui sont vnies dans leur vnion, iusques à ce qu'el-

les en soient chassées par vne autre plus forte.

Auant que de passer outre il ne sera peut estre pas mal à propos que ietache de resoudre vne difficulté qu'on m'a proposée autrefois sur vne matiere fort aprochante de celle-cy. Comment on doit accorder ce que dit Monsieur Descartes sur la fin de la troisiésme Meditation, que considerant la nature du temps, il remarque qu'il ne s'en suit pas qu'une chose qui est à present doive continuer d'estre vn moment apres, avec ce qu'il dit dans ses Principes de la force qu'à chaque chose pour se conseruer dans l'estat où elle est. Quand il dit cela dans ses Meditations, il feint ne sçauoir pas encore s'il y a vn Dieu; & pour ce sujet il examine le pouuoir qui doit estre à tous les momens en chaque chose pour se conseruer dans l'estre qu'elle a; & il conclut qu'il doit estre tout le mesme dans chaque moment pour se conseruer que pour estre la premiere fois, à cause que toutes les parties du temps sont independantes les vnes des autres; de sorte que ce qui n'a pas le pouuoir de se donner l'Estre au premier moment, n'en peut aussi auoir pour se conseruer dans le second, & ce qui ne se donne pas l'Estre presentement ne peut aussi se conseruer à l'auenir. Mais d'autant qu'il se consideroit alors soy-mesme, & qu'il ne reconnoissoit point qu'il eust en luy le pouuoir qui le faisoit estre en ce moment là (car s'il l'eust eu il en auroit eu connoissance) d'autant qu'il ne se consideroit alors que comme vne chose qui pense; Il a eu raison de

dire que de ce qu'il estoit maintenant, il ne s'en-  
fuiuoit pas qu'il d'eust estre vn moment apres. Il  
n'y a que Dieu seul en qui par apres il remarque  
que ce pouuoir doit de necessité se rencontrer, par  
lequel il est & subsiste necessairement, & qui fait  
aussi estre & subsister toutes les autres choses au-  
tant qu'il luy plaît; Et ce pouuoir n'est autre chose  
en Dieu que l'immensité mesme de son essence.  
Mais quand dans ses Principes il parle de la force  
que toutes les choses ont de se conseruer dans l'é-  
tat où elles sont, il considere cette force par dépen-  
dance à l'ordre de Dieu, qui a luy-mesme établey  
les Loix de la Nature sur l'immutabilité duquel  
elles sont fondées, & non pas dans aucun pouuoir  
qui soit en elles sans dependance.

L'on prend la vie pour vne existence accompā-  
gnée d'action; quand nous disons qu'un Hom-  
me est en vie lors qu'il est agissant, & qu'une flâme  
est viue; lors qu'elle échauffe & éclaire; C'est  
dans ce sens que Virgile chante; *Bello viuida vir-  
tus; Viuida bello dextra; viu tentat prauertere amore  
flamine uiuo*. L'Escripture s'en sert aussi de la mesme  
façon, appellāt les eaux viuantes la force d'une fon-  
taine qui rejaillit. Cette sorte de vie est Corporel-  
le ou Spirituelle; La Corporelle, n'est rien autre  
chose que le mouuement, & la mort qui luy est  
opposée c'est le repos. Il est vray qu'on n'a pas ac-  
coustumé de donner le nom de vie au mouuement  
de toutes sortes de Corps, mais seulement à celuy  
des parties interieures des Corps Organiques.

c'est à dire, des Plantes & des Animaux. Pour le regard de la vie Spirituelle on ne la sçauroit mettre ailleurs que dans la Pensée. C'est pourquoy vous ayant, à mon auis, suffisamment prouué dans le Chapitre precedent, que les Esprits pensent toujours pendant qu'ils existent, & dans le commencement de celuy-cy. ayant monsté que rien n'est capable de les faire cesser d'estre; Il n'en faut pas dauantage pour conclure qu'ils viuront toujours, non seulement de la vie qui consiste dans l'existence simple, mais encore de celle qui est accompagnée d'action. Platon est de ce mesme sentiment lors qu'il dit dans le dixiesme Liure des Loix, que les choses qui ont le pouuoir de se mouuoir sont viuantes, & plus bas que d'auoir ce pouuoir, c'est l'attribut de cette Substance que nous appelons Ame; Enfin de peur que nous n'estimassions qu'il entend parler de quelques mouuemens Corporels, il s'explique vn peu plus bas, & dit, que les mouuemens de l'Ame sont vouloir, considerer, auoir soin, consulter, opiner bien ou mal, se réjouir, s'attrister, oser, craindre, haïr, aimer. Ciceron prend semblablement la Pensée pour la vie de l'Esprit, lors qu'il dit dans ses Tusculanes, *Loquor autem de homine docto & erudito, cui viuere cogitare est.*

La dernière signification de la vie, c'est quand on la prend pour la demeure d'une chose avec une autre, ou d'une Substance qu'on considere vnice avec vn accident qui la perfectionne: C'est

de cette façon que , *Valere , non viuere , vita est. Viuamus , mea lesbia*, dit Catulle, & qu'on appelle vn homme viuant pendant que son Ame est vnie avec son Corps; C'est dans ce mesme sens qu'Aristote appelle la vie, *permanfionem anima cum calore*, & que les Medecins la deffinissent la demeure de la chaleur dans l'humide; C'est encore de cette façon. que l'vnion des Fideles avec Dieu est appellée la vie eternelle; & que Platon a dit, que la Philosophie estoit la contemplation de la mort. Il est euident que le nom de vie, dans tous ces passages y est pris pour signifier l'vnion de deux substances ensemble, ou d'une substance avec vn accident qui la perfectionne, & qu'en ce sens le tout est appellé viuant, lors que ses parties sont iointes, & qu'il est censé pour mort quand elles sont séparées. Suivant cette signification, il est manifeste que tout Corps est mortel, parce qu'on peut le considerer comme vn tout, à raison des parties desquelles il est composé, qui ne sont point si estroitement liées qu'elles ne puissent estre diuisées; & tout au contraire, tout Esprit, c'est à dire toute substance qui Pense, est Immortel, d'autant qu'il n'est composé d'aucune partie; Car on ne demande pas, s'il peut estre séparé du Corps, ou priué de quelque qualité qui le perfectionne, comme de la joye ou de la grace de Dieu; Mais seulement si en le regardant comme vn tout, il peut estre détruit par la dissolution de ses parties, que non seulement il n'a point, n'estant pas  
estendu,

estendu, mais il n'est pas même possible d'y en imaginer aucune, car on n'a jamais conçu la moitié ny le tiers d'un Esprit; C'est pourquoy comme il est indiuisible, il est aussi immortel de sa nature. Ciceron l'a dit auant moy, dans l'endroit que j'ay allegué, apres l'auoir leu dans le Phedon de Platon.

*Animi autem cognitione dubitare non possumus, nisi plane in physicis Plumbei simus, quin nihil sit admixtum, nihil Concretum, nihil Copulatum, nihil coagmentatum; nihil duplex; quod Cum ita sit, Certe nec secerni nec diuidi, nec discerpi, nec distrahi potest; nec Interire Igitur, est enim Interitus quasi discessus & secretio ac direptus earum partium qua ante Interitum Iunctione aliqua tenebantur.*

Concluons donc que l'Esprit estant vne chose entierement distinguée du Corps, & estant vn estre simple, lequel ne peut perir que par vn aneantissement total, duquel nous n'auons iamais veu aucun exemple dans la nature, & que la reuelation Diuine ne nous assure point deuoir arriuer; puis qu'enfin il Penie tousiours, & qu'il est indiuisible, il ne doit aussi iamais cesser de viure, & est tellement independant du Corps, que quand même le Corps cessera d'estre, l'Esprit sera tousiours stable, & subsistera eternellement.



*Des facultez inseparables de l'Esprit, & de celles qui sont particulieres à celuy de l'Homme.*

CHAP. VIII.

**S**I nous aportions autant de soin à examiner les operations de nostre Esprit, que nous en aportons à considerer les objets de nos sens, & si nous faisons aussi souuent reflexion sur nos Pensées que sur les mouuemens de nostre Corps, nous nous estonnerions comment il est possible qu'il se trouue des personnes qui croient connoistre bien plus aisément leur Corps que leur Esprit, dont la Nature est telle qu'il ne se peut rien passer en luy sans qu'il s'en aperçoie. Laissons dans cette erreur ceux qui ne suiuent point d'autres guides que leurs sens & leur imagination, & qui ne voudront pas avec nous reflechir sur leurs Pensées pour contempler la Nature del'Esprit. Nous nous sommes trop bien trouués des reflexions que nous auons desia faites pour ne les pas continuer, & comme elles nous ont appris son Existence, sa Nature, & son Immortalité, nous auons lieu d'esperer qu'elles nous découuriront de mesme toutes les autres choses qui nous restent à connoistre touchant ses facultez & ses actions, & ses differentes manieres de Penfer. Pour venir à bout de ce dessein, il me semble que nous ne deuons pas seulement confi-

derer quelles sont les facultez qui accompagnent necessairement le pouuoir que nous auons de Penser & qui sont comme les apanages d'une Nature qui Pense, mais que nous deuons encore nous consulter nous mesmes, en tant que cōposez de Corps & d'Esprit, & voir qu'elles sont celles de nos actiōs qui sont accompagnées de Pensées, ou qui en dépendent en quelque maniere; d'autant que nous ne voulons pas tant parler de l'Esprit en general considéré comme une chose qui pense, que de celuy de l'Homme en particulier, en tant qu'il est vny au Corps, & de cette façon nous ne decouurerons pas seulement toutes les diuerses facultez de penser qui sont en nous, & qui nous conuiennent en tant qu'Hommes, mais aussi celles qui sont inseparables de nostre Esprit, & qui le touchent, pour ainsi dire, de plus près, c'est à dire, qui luy conuiennent essentiellement, en qualité d'une chose qui pense.

Toutes celles de nos operations qui sont accompagnées de Pensées, se peuuent rapporter à deux especes; La premiere, est de celles qui partent de la puissance que nous auons d'apercevoir ou de connoistre; La seconde est de celles qui viennent de la faculté de vouloir ou de nous determiner. En effet toutes les actions de nos sens & de nostre imagination, & toutes celles de l'entendement & de la reminiscence, ne sont rien autre chose que des differentes manieres d'apercevoir; & de mesme aussi nos jugemens, nos inclinations, nos ap-

petits , & toutes les diuerſes motions de la volonté ne ſont rien que des différentes manieres de vouloir & de ſe determiner , dont la puiffance de mouuoir eſt vne ſuite , mais vn peu plus éloignée : Toutes les autres fonctions qui ſont en nous ſont bien à la verité des fonctions de l'Homme , mais hormis celles dont nous venons de parler qui enferment toutes quelques ſortes de Penſées , il n'y en a point qui appartient à noſtre Eſprit.

Quand ie conſidere maintenant la Nature de la Penſée , & de ce témoignage interieur par lequel nous nous aperceurons de nos actions , ie vois que la Puiffance de connoiſtre en general en eſt vne ſuite neceſſaire ; mais quand i'examine par apres nos différentes manieres de connoiſtre , ie ne trouue que l'entendement pur que ie puiſſe croire eſtre inſeparable de l'Eſprit ; parce qu'il n'y a aucune autre faculté de connoiſtre qui ne depende du Corps en quelque façon , & cependant la notion que i'ay de l'Eſprit me fait connoiſtre qu'il en peut eſtre ſeparé , & que ie puis fort bien le conceuoir ſans luy. Pour mieux entendre cecy , ſçachez que par la faculté de connoiſtre en general , i'entens la faculté que nous auons d'apercevoir , quoy que ce ſoit , de quelque maniere que ſe puiſſe eſtre , ſans en porter iugement ; & ie prens l'entendement pur pour cette faculté par laquelle l'Eſprit aperçoit ſes propres Penſées , & generalement tout ce qu'il conçoit ſans l'aide d'aucune idée corporelle ; Et l'on ne peut pas douter qu'il n'y ait pluſieurs

choses qu'il conçoive de cette façon, apres ce que nous auons dit iufques icy de la Nature de la Pensée, & ie croy que cette faculté est plus inseparable de l'Esprit qu'aucune autre; parce que, comme nous dirons en son lieu, pour entendre l'Esprit n'a besoin que de luy-mesme & de ses propres portions, au lieu que pour sentir & imaginer il est necessaire que le Corps soit touché & disposé d'une certaine façon par les objets, ou du moins que l'Esprit se tourne vers le Corps.

La seconde espece de nos Pensées vient, comme nous auons dit, du pouuoir que nous auons de nous determiner, en donnant ou refusant nostre approbation aux choses que nous aperceuons. Ce pouuoir considéré en general n'est pas moins essentiel à l'Esprit que la Puissance de connoistre: Car lors que l'Esprit s'aperçoit qu'il est attentif à quelqu'objet, bien que si vous voulez il puisse douter qu'il soit tel qu'il l'aperçoit, on ne scauroit neanmoins concevoir qu'il puisse ne pas iuger qu'il existe, luy qui Pense à cet objet, & consequemment il faut qu'il ait la faculté de iuger, laquelle n'est qu'une suite de celle de se déterminer. De plus, si nous iugeons des autres Esprits par le nostre, nous concluons encore la mesme chose: car nous remarquons en nous mesmes, que nous sommes interieurement poussez & incitez à iuger ou suspendre nostre iugement, selon la clarté ou l'obscurité de nos idées, ce qui ne seroit pas, si la Puissance d'approuver ou de reprobuer n'estoit

vn apanage de nostre Esprit. Et n'est-ce pas presque la mesme chose ; d'apercevoir qu'une chose est telle, & de le iuger ? Ou s'il y a quelque chose de plus à le iuger n'est-ce pas seulement l'aprobation que nous y donnons, laquelle nous sentons fort bien venir de nous mesmes, bien que nous experimentions que nous la donnons infailiblement, quand nous apercevons la chose évidemment, & que nous la refusons, quand nous y remarquons quelque obscurité. Vous voyez donc que la Puissance de choisir, de vouloir, ou de se determiner ( car ie prens tout cela pour la mesme chose ) n'est pas moins vne suite de la Pensée, que la faculté de connoistre ; D'où vous devez conclure que les autres inclinations ou émotions de la volonté, comme celles qui nous portent à la ioye, à l'amour, au desir, du moins celles qui sont ( causées par vne perception évidente ) accompagnent aussi necessairement la nature de l'Esprit, & en sont des apanages ; puisque ce ne sont que des diuerses manieres de nous determiner, par lesquelles nous nous joignons de volonté aux choses que nous croyons nous estre bonnes, ou nous nous separons de celles que nous iugeons estre mauuaises. Car lors que nous apercevons quelque objet, ou nous le regardons simplement en luy mesme, & pour lors l'idée par laquelle il nous est représenté est claire & distincte, & nous donnons nostre aprobation à tout ce qu'elle nous en monstre ; mais si elle est obscure, & que

nous prenions garde à cette obscurité, nous la refusons; & cela s'appelle iuger. Mais lors que nous le considérons par raport à nous mesme, si nous apercevons clairement qu'il soit capable de nous perfectionner, ou de nous nuire, pour lors nous nous sentons portez avec autant de force à nous y joindre ou à nous en separer de volonté, que nous estions auparavant incitez à luy donner ou refuser nostre approbation, selon que l'idée que nous en auions estoit claire ou confuse. Concluons donc de tout cecy que la Puissance de connoistre & celle de se determiner sont des ruisseaux qui coulent incessamment de la Pensée, & qui sont inseparables de l'Esprit. Mais comme il n'est pas necessaire que l'Esprit possede en tout temps, & en toutes sortes d'estats toutes les differentes manieres d'apercevoir dont il est capable, & qu'il n'y a que l'entendement pur qui n'en puisse jamais estre separé; De mesme, de toutes les émotions de la volonté, il n'y a que celles qui dépendent d'une connoissance claire & distincte qui luy soient propres, & qui l'accompagnent toujours. Pour les autres, qu'on nomme communement les passions de l'Ame, qui naissent de son vnion avec le Corps, & qui sont causées, entretenues, & fortifiées par quelque mouuement particulier des Esprits animaux, elles ne peuuent se rencontrer en luy, non plus que la Puissance de mouuoir le Corps, que pendant le temps de son vnion, & partant elles n'en sont pas inseparables,

& l'Esprit ne laisseroit pas d'estre ce qu'il est, c'est à dire, vne chose qui Pense, encore qu'il fût privé de ces sortes de passions. Mais bien que ces deux facultez, sçavoir celle d'apercevoir & celle de vouloir, soient deux proprietiez essentielles à la Pensée, & que nous conceuions mesme dans l'idée d'une chose qui Pense la Puissance de connoistre auant celle de vouloir; Celle-cy neanmoins est plus noble que l'autre; en ce qu'elle depend moins dans son action des choses posterieures, que l'Esprit en est plus le maistre, & qu'elle le perfectionne dauantage: Car souuent nos connoissances ne dependent point de nous, aulieu que la Puissance de vouloir & de nous déterminer de nous mesme est tellement à nous, qu'elle ne sçauroit estre esclaué d'un autre. Car puis que vouloir c'est choisir, & que l'on ne choisit pas quand on est forcé, si nostre élection dépendoit d'un autre que de nous, c'est à dire, si nous nous sentions portez à embrasser ou à fuir les choses que nous embrassons ou fuions, par quelque force estrangere, & non pas par celle de nos propres connoissances, nostre Entendement seroit vne puissance inutile, & ce seroit en vain que nous nous vanterions d'auoir le pouuoir de nous déterminer; neanmoins comme ces deux facultez ne sont pas distinguées de l'Esprit ny de la puissance de Penser, & que ce sont seulement deux ruisseaux que nous ne sçaurions concevoir sans leur source, elles ne sont pas non plus distinguées réellement entr'elles; tout ainsi

ainsi que la figure & le transport d'un Corps ne sont pas distinguez ny de luy ny de son estenduë. Ces deux facultez ne sont donc que la chose mesme qui pense, laquelle tantost connoist & tantost se détermine; mais qui est bien plus noble par le pouuoir qu'elle a de se déterminer d'elle mesme, que par celuy d'apercevoir & de connoistre. Or tout ainsi qu'il seroit inutile d'établir deux sortes de puissances, l'une pour reconnoistre le vray d'avec le faux, l'autre pour discerner le bon d'avec ce qui est mauuais, de mesme l'Esprit n'a besoin que d'une seule faculté pour se déterminer à choisir le vray & le bon, & à quitter le faux & le mauuais. Nous apellons la premiere Entendement, quand le mot se prend generalement pour la faculté que nous auons d'apercevoir de quelque maniere que ce soit, & nous donnons apres Monsieur Descartes le nom de Volonté à ce pouuoir que nous auons de nous déterminer, soit à l'égard du vray, soit à l'égard du bien; ne restraignant pas simplement ce nom, comme on fait dans l'Ecole, à ce principe de nos actions morales, mais l'étendant generalement au principe de toutes nos déterminations; tant pour les raisons que ie viens d'alleguer, que parce qu'il ne me semble pas que l'Esprit agisse d'une autre façon pour embrasser le vray & rejeter le faux, que pour suiure le bien & s'éloigner du mal, se portant également à l'un & à l'autre par la détermination de sa volonté; Ne voyant pas d'ailleurs qu'il soit possible de donner un nom plus



conuenable à cette source commune de toutes nos déterminations , que celui que nous luy auons donné, & ne remarquant point d'autre difference entre la maniere de nous déterminer à l'égard du bien, & celle de nous déterminer à l'égard du vray, sinon que le vray & le faux ne touchant point le Corps nous ne sentons point de repugnance à nous y déterminer , ce qui n'arriue pas de mesme à l'égard du bien ou du mal ; & aussi , qu'auant que l'Esprit puisse se ioindre de volonté au bien, ou se separer du mal, il aperçoit qu'il est necessaire qu'il luy ait donné ou refusé auparauant son aprobatio. Pour donc bien distinguer les fonctions de ces deux premieres & principales puissances, & remarquer iusques où s'étendent leurs bornes & leurs limites. Prenez garde que lors que nous conceuons quelque chose, par exemple, la Pensée, la conception que nous en auons est vn acte de nostre Entendement, c'est à dire, de la puissance que nous auons d'apercevoir ; Mais lors qu'en consequence de tout ce que nous aperceuons en elles, nous demeurons d'accord que la Pensée n'est point estenduë, ce consentement que nous donnons est vn acte de nostre volonté, aussi bien que lors que nous iugeons qu'une chose est bonne ou mauuaise, & qu'en suite de cela nous nous resoluons à la poursuiure ou à la fuyr ; ou s'il y a quelque difference entre ces deux actes de nostre volonté, elle n'est pas assez grande pour nous empêcher de reconnoistre qu'ils partent tous deux de la

puissance que nous auons de nous déterminer. Je n'adiousteray rien icy dauantage touchant la Nature de ces deux maistresses facultez, & ne répondray point non plus à ceux qui pourront trouuer mauuais que nous estendions de la sorte le nom & les fonctions de la volonté, parce qu'il est facile à vn chacun d'y répondre, & que la dispute qu'on nous pourroit faire icy ne seroit presque qu'une dispute de nom. Ces deux facultez n'estant donc que la mesme chose en substance, c'est à dire, n'estant toutes deux que des facultez de penser qui partent de la mesme source, ce n'est pas merueille si leurs diuers actes sont aussi presque tousiours accompagnés les vns des autres; & l'on peut remarquer que comme nous ne sçaurions nous déterminer surquoy que ce soit, si nostre Entendement n'y interuient, de mesme il n'est pas moins éuident, que si tost que nous aperceuons quelque chose nostre volonté s'emeut incontinent pour luy donner ou refuser son approbation. La principale difference que ie remarque entre les fonctions de l'une & de l'autre, est que generalement parlant toutes les operations de l'Entendement, & toutes les autres sortes de perceptions ou de connoissances, qui se trouuent en nous peuuent estre prises pour des passions de l'Ame, comme au contraire on peut nommer ses actions toutes les operations de la volonté; dont la raison est que le plus souuent nos perceptions ne dépendent point de l'Ame, mais de l'action des objets extérieurs, & de la di-

uerfité des mouuemens qui font excitez dans le cerueau , là où nous expérimentons que nos volontez viennent directement de nostre Ame , & semblent ne dépendre que d'elle.

Après auoir ainsi considéré les fonctions de l'Entendement & de la-volonté , & veu en quoy elles conuiennent , & en quoy elles different , il me reste icy à dire vn mot des diuerfes especes en quoy elles se diuisent.

La faculté que nous auons d'apercevoir ou de connoistre se peut diuiser en quatre especes. La premiere est l'Entendement pur , par laquelle comme nous auons dit , l'Esprit sans aucune idée corporelle aperçoit toutes sortes d'objets, soit materiels soit immateriels ; La deuxiesme est le sens, soit interieur, soit exterieur ; La troisieme est l'imagination , sous laquelle ie comprends aussi le sens commun , à cause qu'ils n'ont qu'un mesme organe , & se seruent des mesmes objets ; Et la quatriesme est la reminiscence , c'est à dire, cette faculté par laquelle nous aperceuons que nous auons autrefois eu la mesme Pensée, soit qu'elle se represente ainsi de nouveau à nostre Esprit de dessein-formé ou par hazard. Je ne parle point icy de la memoire, c'est à dire, de cette faculté Corporelle, laquelle par le moyen des vestiges qu'elle retient des especes des objets Corporels , a le pouuoir de retracer vne seconde fois ces especes , & faire ainsi penser l'Esprit vne seconde fois à la mesme chose, à cause que la memoire ainsi considérée sans aucun

rapporra la Pensée qu'elle produit dans l'Esprit, est vne puissance purement Corporelle.

Ie n'examine point icy non plus le nombre des sens, ny ce qu'ils ont chacun de particulier parquoy ils different les vns des autres, tant parce que c'est vne chose que tout le monde semble connoistre par sa propre experience, & dont on a les oreilles assez rebatuës, que parce que Monsieur Descartes en a parlé assez clairement & suffisamment à la fin de ses Principes de Philosophie, & dans son traité de l'Homme, auquel ie vous rennoye, & aux Remarques que i'ay faites dessus.

L'autre grande source des facultez de nostre Esprit se diuise (ce semble) en beaucoup plus de ruisseaux que la premiere, dautant que nous sentons que nostre Ame s'emeut en beaucoup plus de differentes manieres qu'elle n'a de diuerfes façons de connoistre. Car premierement, lors que nostre perception nous decouure quelque chose qui nous estoit auparauant inconnuë & sur laquelle nous n'auions encore rien iugé, nostre Esprit par le moyen de là volonté, c'est à dire, de cette force qu'il a de se mouuoir & de se déterminer, s'arreste, & suspend son iugemēt, s'il y void quelque obscurité, ensuite il delibere, & si tost qu'il y remarque quelque chose de clair, il y mesle son consentement, & le refuse à tout ce qui ne luy paroist pas évident; Secondement, lors que ce mesme Esprit ne regarde plus la chose en elle mesme, mais par rapport à nous, la volonté se trouue aussi-tost émuë

de quelqu'une de ces six passions, l'admiration, l'amour, la haine, le desir, la ioye, & la tristesse, qui sont les especes principales & primitiues des emotions de l'Ame, qui en comprennent encore sous soy vne infinité d'autres; ainsi que l'on peut voir dans le traitté particulier que Monsieur Descartes en a fait exprés, où il a parlé si sçauamment du nombre, de l'ordre, des causes, & de l'utilité des passions. L'on peut encore comprendre, comme autant de ruisseaux qui dériuent de cette grande source, tous nos appetits naturels, aussi bien que nos passions, non pas entant que les vns & les autres sont des perceptions confuses de l'Ame, car en ce sens nous les auons mis au rang de nos sentimens interieurs; mais entant qu'ils incitent l'Ame à vouloir les choses auxquelles elles preparent le Corps, ou auxquelles le Corps se trouue desia disposé; C'est ainsi que la soif, par exemple, incite l'Ame à vouloir boire, la faim à vouloir manger, & que tous les autres appetits naturels font appliquer l'Ame, & luy font venir l'enuie de remedier aux besoins & necessitez du Corps.

Il y a encore en nostre Esprit d'autres facultez qui semblent venir de ces deux puissances coniointement, & participer de la nature de l'une & de l'autre; tel est le pouuoir que nous auons de réfléchir sur nos Pensées, de diuiser, d'assembler, d'arranger & de comparer les idées les vnes avec les autres; tel est encore le pouuoir de raisonner, c'est à dire, de decouurir vne verité inconnue par le

moyen d'une autre connuë : Car toutes ces puissances participent de l'Entendement, à cause de la perception qui s'y rencontre & de la volonté, en tant que c'est elle qui applique l'entendement à la recherche & considération de son objet : Vous remarquerez icy en passant que cette faculté de raisonner semble estre comme une suite de la Nature de l'Esprit créé ; Car quelque grande que puisse estre l'étendue de sa connoissance, toutesfois estant bornée, il ne se peut faire qu'il n'ignore beaucoup de choses, & bien qu'entre les Esprits il y ait diuers degrez de connoissance, neanmoins parce que toutes les veritez sont enchainées, il n'y en peut auoir de si basses, qu'il ne luy puisse seruir d'échelon pour decouvrir quelque verité ; & vous ne le sçauriez mettre dans vn degré si sublime, qu'il ne luy reste encore vne infinité de choses à sçauoir ; Et plus vous luy aurez acordé de lumiere naturelle, plus vous luy aurez aussi donné de moyens pour en decouvrir, & cela n'est autre chose que raisonner. La puissance que nous auons de parler, c'est à dire, d'expliquer nos Pensées par quelques signes, semble aussi participer de l'Entendement & de la Volonté, qui attache comme il luy plaist les conceptions de l'Esprit à certaines paroles ou autres signes extérieurs qui n'ont point de raport avec elles, & c'est proprement en quoy consiste la parole. Si nous en croyons nostre conscience nous ne douterons point non plus que la force de mouuoir le Corps ne soit aussi vn apana-

ge de l'Esprit & de sa Pensée ; mais elle semble principalement dépendre de la volonté ; Car en effet si nous examinons la chose de près nous trouvons que nous n'avons point d'autre idée de cette force, sinon que nous remuons tous nos membres quand & comment nous voulons, sans en pouvoir donner d'autre raison principale que nostre volonté mesme ; Il est vray que nous expérimentons aussi que ce n'est pas cette puissance qui remue immédiatement & par elle mesme nos membres extérieurs ; Car si cela estoit il n'y auroit point de Paralytiques, n'y ayant point d'Homme en qui cette volonté ne se rencontre ; & mesme, comme dit fort bien Monsieur Descartes dans la 21. lettre du premier volume, nostre Ame ne conduit pas directement par sa volonté les Esprits animaux dans les lieux où ils peuvent estre utiles ou nuisibles ; c'est seulement en voulant ou pensant à quelque autre chose ; avec laquelle les mouvemens propres pour cet effet sont naturellement joints. C'est ainsi qu'il faut entendre tous les endroits, où il dit que l'Ame n'a pas le pouvoir de faire mouvoir le Corps, c'est à dire, de le mouvoir directement en remuant par elle mesme les muscles ; ou augmentant le mouvement des Esprits qui y peuvent aller pour les mouvoir : mais il ne nie pas qu'elle n'ait le pouvoir de les déterminer à couler plustost vers vn muscle que vers vn autre, sans rien changer dans leur mouvement que la seule détermination : Et pour preuve que c'est la Pensée, ie pour-

rois

rois alleguer mille endroits où il met la force de l'Ame entre les causes qui peuuent déterminer le mouuement de la glande & des Esprits ; mais nous parlerons plus amplement de cecy lors que nous traiterons en particulier de cette force ; outre que ie croy qu'il est si évident que la determination de nostre Volonté fait que nous remuons quelques membres qui ne se remuroient point sans cela, qu'il n'est pas necessaire que ie m'amuse à le prouuer, n'y ayant personne à qui l'experience ne l'enseigne. Voila quelles sont les principales facultez tant de l'Esprit en general que de celuy de l'Homme en particulier, dont nous parlerons encore plus amplement dans les Chapitres suiuaus.

---

*De la Connoissance en general.*

CHAP. IX.

**A** Pres auoir parlé de toutes les fonctions de l'Esprit en general, pour venir à vne explication plus particulière, il me semble que nous deuôs premierement déclarer ce que c'est que la connoissance, parce qu'elle est la base & le fondement de toutes les autres Pensées de l'Esprit. Ceux qui ont leu avec attention le traité des fonctions de l'Esprit de Monsieur Chanet, peuuent voir combien il y a eu de diuerſes opinions touchant la Nature de la Connoissance ; les vns croyent qu'elle consiste



dans l'vnion de l'objet avec la puissance, les autres dans la reception de l'espece, & d'autres enfin dans la perception. Pour luy il ne sçait presque ce qu'il en doit dire, il se tourne de tous costez sans sçauoir à qu'elle opinion il doit s'arrester. Il n'est pas du sentiment de ceux qui mette la nature de la connoissance dans la perception, parce qu'il dit ne sçauoir pas ce que ce terme veut dire; C'est pourquoy il auroit mieux fait de n'en point parler du tout, que de blâmer ce qu'il n'entend pas. Il n'est pas aussi de l'opinion de ceux qui la mettent dans la reception de l'espece, ou dans son vnion avec la puissance cognoscitiue (laquelle selon luy n'est pas differente de l'organe) d'autant qu'il a creu qu'il n'y auoit aucun endroit du cerueau où elle ne pût pas estre receuë, & ainsi vmie à la puissance cognoscitiue, sans estre conuë. Il semble veritablement d'abord dire que la connoissance consiste dans l'attention, mais il s'en dedit aussi-tost, voyant bien que de quelque maniere qu'il explique cette attention, elle ne se rencontre pas dans toutes nos connoissances, principalement si l'on dit avec luy que l'attention n'est autre chose que la contraction des ventricules du cerueau; ce qui n'est pas probable, à moins que d'auancer qu'il n'y a que les animaux qui connoissent. Il conclud à la fin du Chapitre, que nostre connoissance n'est rien autre chose que le discernement. Il me semble toutesfois, afin de dire aussi ce que ie pense de ces diuerfes opinions, dans vne

matiere qui est, s'il faut ainsi parler, obscure pour estre trop claire, que dans cette derniere pensée il n'a pas mieux rencontré que dans les autres : Car s'il prend ce discernement pour la fonction de l'Esprit par laquelle, il iuge que les choses qui ont des idées differentes ne sont pas les mesmes ; Il est manifeste que ce jugement presupose la connoissance & n'en est qu'une suite ; & s'il veut que le discernement soit simplement la premiere operation de l'Esprit par laquelle il sent & conçoit les objets differents diuerfement, sans assurer ou nier cette difference, outre que cela ne se peut pas proprement appeller discerner ; Il s'ensuiuroit encore que tout discernement presuposant vne comparailon de deux idées l'une avec l'autre, les premieres perceptions de l'esprit ne meritoient pas le nom de connoissance, puis qu'estant les premieres elles n'ont pû estre comparées avec d'autres. Ce n'est pas non plus dans l'attention que reside l'essence de la connoissance ; Je confesse bien qu'elle sert infiniment à la rendre plus évidente & plus distincte ; mais nous ne pouuons pas dire qu'elle y soit nécessaire, puisque l'experience iournaliere nous fait obseruer en nous mesmes, que nous aperceuons quantité de choses auxquelles nous ne sommes point attentifs. De plus, soit qu'on regarde cette attention comme vne action de l'Ame par laquelle elle s'attache à considerer vn objet, puisque cét attachement presupose qu'il est déjà present interieurement à l'Esprit, & qu'il ne le peut pas estre

sans estre aperceu, parce que c'est en cela que consiste la nature de la chose qui pense, ce ne sçauroit estre dans cét attachement que reside nostre connoissance. Soit d'autre costé que cette attentio soit prise pour vne contraction des ventricules du cerueau, ou pour l'épanchement de la glande apellée conarion vers vn costé du cerueau plustost que vers l'autrelequel panchemét determine les Esprits animaux à prendre leur cours vers cét endroit, & fait qu'ils n'en peuuent pas estre si aisément détournez, ny recevoir l'impression de quelque objet extérieur, & obligent ainsi l'Ame pendant qu'elle est dans le Corps, à estre attentiuë & contempler l'espece qui se trace pour lors dessus la glâde, on ne peut pas dire que la connoissance consiste dans l'attention, puisqu'il l'Ame separée & les Anges connoissent, dans lesquelles toutesfois ce panchement & cette contraction ne peuët auoir de lieu.

Ces raisons feront peut estre qu'on aimera mieux mettre la connoissance dans l'vnion, ou la reception de l'espece dans la puissance, & de fait ie prefererois cette opinion aux precedentes, si ie n'en estois détourné par des considerations, dont la premiere est, qu'il faudroit mettre l'air & les miroirs entre les substances connoissantes, si connoistre en general n'est rien autre chose que de recevoir vne espece; Ce n'est pas non plus la reception de l'espece dans les organes extérieurs des sens, ny mesme dans celuy qu'on prend communément pour l'instrument de l'imagination qu'il faut éta-

blir la connoissance , d'autant pour le premier que l'œil d'un Bœuf mort reçoit aussi bien l'espece de l'objet extérieur qu'un œil vivant ; Car vous pouvez remarquer ( suivant ce que dit Monsieur Descartes dans sa Dioptrique ) que si vous mettez un œil de Bœuf dans le trou d'une fenestre , en sorte qu'il regarde d'un costé un lieu qui soit éclairé , & que de l'autre la chambre soit tellement fermée qu'il n'y puisse entrer de iour qu'au trauers de cet œil , si vous en coupés par apres le derriere autant qu'en emporte la membrane appellée retine , & que vous mettiez en sa place vne coque d'œuf , ou quelqu'autre Corps blanc , vous pourrez remarquer , dis-je , que la peinture des objets du dehors s'y fera aussi distinctement que sur la retine d'un œil vivant , pour le moins s'il n'est point trop ou trop peu pressé pour la distance des objets. Adjoûtez encore à cela nos diuers songes , nos imaginations fausses , & celles que nous faisons volontairement lors que nous pensons à quelque Palais , ou autre chose que nous ne voyons pas ; Car il se trouue quelque connoissance dans tous ces actes , quoy que fausse en quelques vns , sans que l'on puisse dire qu'il se fasse aucune reception de l'espece dans l'organe extérieure. Pour le second , c'est à dire , la reception de l'espece dans l'organe de l'imagination , ce ne sçauroit non plus estre la connoissance : car pour conclure en un mot , en quelque part & de quelque maniere que l'espece materielle puisse estre receuë , ce doit estre vne chose

aussi différente de la connoissance , que le Ciel l'est de la terre , bien qu'il en ait quelques endroits où pendant l'vñion de l'Ame & du Corps elle ne peut estre receüe sans luy donner occasion de penser , & de produire vne acte de connoissance : Dautant que toutes les especes des sens , de l'imagination , & de la memoire , ne sont rien autre chose que des suites du mouuement local que l'objet extérieure imprime sur nos sens , comme nous auons veu dans le traité de l'Homme ; ou du moins , suivant le sentiment de l'Escole ; Ce sont des accidents Corporels , entre lesquels , & nos Pensées & nos connoissances on ne peut pas concevoir qu'il y ait le moindre raport : Et à parler icy nettement , si ceux qui donnent vn principe connoissant aux Bestes Brutes ne conçoient pas que leur connoissance soit autre chose que la reception de l'espece materielle , ou s'ils ayment mieux que les diuers mouuemens de quelqu'une des parties interieures de leur cerueau , nous voila d'accord ; Car non seulement nous ne dénions pas aux Bestes ces diuers mouuemens ; mais mesmes nos aduersaires ne sçauoient nier que iamais Philosophe ne les a si bien expliquées que nous. Toutesfois comme nous auons vne idée de nostre connoissance entierement différente de celle du mouuement local ; Ils nous pardonneront si nous ne pouuons prendre l'un pour l'autre ; mais quand toutes ces raisons ne seroient pas suffisantes pour monstrier que l'acte de la connoissance est differend de la re-

ception de l'espece materielle, cette dernière-cy ne permettroit pas d'en douter, d'autant que nous voyons que nous auons la perception des actes de nostre Volonté, & de nos Jugemens, lesquels toutesfois ne forment aucune espece, aucune trace ny peinture dans l'organe del'imagination, lors qu'ils se terminent à vn Estre-Spirituel, comme lors que nous meditons & raisonnons de la nature de la chose qui pense & de ses attributs, & toutes-fois on ne peut pas nier que ce ne soient des actes de connoissance.

Que fera-ce donc que cette admirable fonction, dont l'essence paroist si cachée ? Pour moy ie pense que la raison pour laquelle on a tant de peine à la trouuer, c'est parce qu'on s'amuse à la chercher entre les Corps, & hors de la Nature del'Esprit; En effet si toutes les fonctions de la connoissance sont des operations, qui ne tiennent rien de la matiere, & qui ne sortent point de l'Ame; c'est s'amuser grossierement de regarder ailleurs que dans l'Esprit mesme pour en decouvrir les ressorts: Car bien qu'il y ait quelques vnes de nos perceptions lesquelles dependent du Corps; il n'y en a point toutesfois qui n'appartiennent à l'Esprit, & qui ne soient receuës dans son interieur. Nous auons prouué cy-deuant que la Nature de l'Esprit estoit d'estre vne chose qui Pense, & nous auons dit que l'essence de la Pensée consistoit dans cette conscience & cette perception que l'Esprit a de tout ce qui se passe en luy;

Partant tout ce qu'il aperceura immédiatement fera de nécessité quelque chose qui luy sera intérieur : C'est pourquoy si nous nous arrêtons précisément à cela , & si nous separons nos connoissances de nos jugemens & de nos raisonnemens, comme nous le devons faire , puisque ce sont des operations differentes ; Je pense que nous ne sçaurions mieux definir nos connoissances qu'en disant que connoistre est simplement apercevoir, ce qui est interieurement représenté à nostre Esprit, & qu'à proprement parler rien ne luy est représenté de la sorte que ce qui se passe en luy , c'est à dire, ses actions & ses passions. Mais ne voy-je pas desia que Monsieur Chanet me demande ce que c'est que cete perception, & quelle difference il y a d'auec la reception del'espece. Je luy repondray que la reception de l'espece materielle, en quelque endroit du cerueau qu'elle se fasse, est aussi differente de nostre perception, que le Corps l'est de l'Esprit, & que ce n'est pas mesme la production de l'idée, qui represente, ny la reception dans l'interieure de l'Ame ; mais la conscience ou la perception que l'on a de cete idée. Apres cela qu'il ne me demande rien dauantage, & qu'il applique à la perception ce qu'il a dit de la connoissance des sens, dans la soixante-cinquiésme page de son traitté des fonctions de l'Esprit, & qu'il considere luy-mesme que le seul moyen d'expliquer quelque chose, c'est de l'exposer par vne autre plus claire & plus évidente ; mais n'y en ayant point

point qui le soit plus que nos pensées, & nos perceptions, c'est vn dessein plein de temerité d'en vouloir décrire la Nature ; Et qui entreprend de la définir par d'autres noms que ceux auxquels nous auons attaché les premieres idées que nous en auons, entreprend l'impossible. Ce qui est à peu près la mesme chose qu'auoit dit auparauant Monsieur Descartes, que les Philosophes se trompoient souuent en voulant définir des choses tres-simples, & suffisamment conuës d'elles mesmes par des termes qui sont plus obscurs qu'elles. Ne perdons donc point de temps dauantage à expliquer la Nature de la connoissance laquelle se découure bien mieux par ce que l'experience nous en apprend, que par le discours, ou si nous auons quelque chose à adiouter, que ce soit seulement pour vous faire souuenir que toutes nos perceptions doiuent passer pour les passions de l'Esprit, à cause qu'elles sont tousiours excitées ou par le mouuement de quelque partie de nostre Corps, ou par la determination de nostre volonté.

---

*Des Especes Corporelles, & des Idées ou Notions intellectuelles.*

CHAP. X.

**I**L y a deux raisons principales qui rendent la Nature de la connoissance difficile à décou-  
N



urir ; La premiere est, que la plus-part des Hommes s'imaginent que les Corps en sont capables aussi bien que les Esprits , & s'acoûtument tellement peu à peu à concevoir l'acte de la connoissance à la maniere des accidents de la matiere, qu'il est tres-difficile apres cela de leur en faire former vne autre idée , & de leur apprendre à distinguer les proprieté de l'une & de l'autre. La seconde est, que l'on confond presque tousiours les Idées ou Notions que l'Esprit aperçoit immediatement, avec les Especes Corporelles qui seruent à l'imagination & aux sens. C'est pourquoy apres auoir fait voir que les Corps ne pensent point, & sont entierement priuez de connoissance , nous deuons tâcher de monstrier quelle est la Nature de ces especes Corporelles qui viennent des objets , & sont receuës dans les organes des sens , & quelle est celle de ces Idées ou Notions intellectuelles & Spirituelles que nostre Esprit contemple pour concevoir. Mais auant que d'entrer en matiere, ie dois vous aduertir, qu'encore que dans les escrits de Monsieur Descartes le nom d'Idée soit aussi bien donné aux especes Corporelles, c'est à dire aux impressions des objets sur les sens , auxquelles les Pensées de l'Esprit sont attachées, comme aux Idées qui apartiennent particulièrement à l'Esprit, & qui sont les formes de ses Pensées ; neanmoins dans ce Chapitre, & mesme dans tout ce Traité, pour éuiter la confusion & l'équiuoque, ie ne prens iamais le nom d'Idée que dans le dernier

sens, & l'appelle les autres Idées du nom d'espèces Corporelles. Cela étant supposé, nous définissons après Monsieur Descartes les Idées ou Notions Spirituelles, cette forme de chacune de nos Pensées par la perception immédiate de laquelle nous avons connoissance de ces mêmes Pensées; en telle sorte que nous ne pouvons rien exprimer par paroles, lors que nous entendons ce que nous disons, que de cela même il ne soit évident que nous avons en nous l'Idée de la chose signifiée par nos paroles; & nous appellons espèces Corporelles, l'impression que fait l'objet intérieur ou extérieur sur nos sens intérieurs ou extérieurs, à laquelle la Pensée ou le sentiment que nous avons à son occasion est attachée. Mais nous n'expliquons point encore pour le présent, si cette impression à laquelle quelqu'un des nos Pensées sont ainsi unies, n'est rien autre chose que le changement que l'objet apporte au cours des Esprits Animaux; en ouvrant quelques-uns des pores des ventricules du cerveau, auxquels aboutissent les fibres des nerfs sur lesquels il agit ainsi que vous avez peu lire dans le Traité de l'Homme de Monsieur Descartes; ou si ces espèces sont de petites Images dont notre Âme se sert pour concevoir les objets qui touchent nos sens, & au moyen desquelles plusieurs se persuadent que se forment toutes nos connoissances.

Pour bien éclaircir cette matière qui est de très grande conséquence, il me semble que je dois d'abord expliquer en général la Nature de ces espèces

Corporelles , & leur difference d'avec les Idées Spirituelles; & en suite monstrez quelle est l'essence de ces dernieres, leur cause, & leur difference.

Fracastor, celebre Medecin, dans le discours qu'il a fait de l'Entendement, croit que l'Esprit de l'Homme ne contemple point d'autres especes que ces petites Images qu'il se persuade que les objets extérieurs enuoient à nos sens & à nostre imagination ; Erreur grossiere, mais commune : car il n'y a gueres de personnes qui ne s'imaginent leur Ame comme vn petit Ange logé dans leur cerueau , où il contemple les especes qui luy viennent des objets , comme autant de diuers petits Tableaux qui luy representent tout ce qui se passe au dehors ; à la maniere à peu près d'un Homme qui regarde dans vn Miroir. Je sçay bien qu'on me dira quela plus part des autres Philosophes ne sont pas de son opinion , & qu'ils mettent de la difference entre les especes de l'imagination , & les Idées de l'Entendement ; Mais ie n'ignore pas aussi, que ceux-là mesmes, dans leurs Liures n'en parlent pas d'une autre maniere que s'ils ne les croyoient pas differentes les vnes des autres ; & qu'en tout ce qu'ils disent de l'action des sens & de l'imagination, ils font paroistre qu'ils ne pensent pas que l'Ame de l'Homme ait besoin d'autres Idées que de ces petites Images volantes, que les vns apeilent especes réelles & les autres especes intentionnelles. Cette erreur, qui est tres-nuisible à ceux qui veulent connoistre la Nature de leur

Esprit est vn des préiugez de nostre Enfance, pendant laquelle l'Esprit de l'Homme ne faisant aucune fonction qui ne soit accompagnée de quelque mouuement du Corps, & n'ayant pour lors aucune Pensée qui ne soit causée & entretenüe par quelque espece Corporelle, ou s'il en a n'y faisant aucune reflexion, se persuade que le Corps auquel il est ioint n'est point different deluy, & qu'ils ne sont tous deux que la mesme chose, & que les Idées qu'il a ne sont point differentes des especes materielles qui les accompagnent inseparablement ; Ce qui arriue, à cause que pour lors il ne peut pas agir par l'Entendement pur, pour les raisons que nous dirons dans la suite, & qu'il ne remarque rien qui le puisse desabuser. Cette erreur fait encore tomber nostre Esprit dans vne autre ; car d'autant que la lumiere naturelle nous dicte que les causes de nos Idées doiuent contenir formellement ou du moins eminemment les qualitez qu'elles representēt, & qu'ainsi elles doiuent estre en quelque maniere semblables aux choses dont elles sont les Idées ; & voyant qu'elles sont tousiours iointes aux especes Corporelles, d'auelquesquelles l'Esprit ne les distingue pas alors, il a crû que ces especes estoient tousiours semblables aux objets, à l'occasion desquels il les a receuës ; & ainsi nous auons peu après formé ce préiugé, que les Esprits Corporels sont entierement conformes aux objets, & que les objets possèdent formellement tout ce qui nous est représenté par les

Idées que nous en auons, quelques confuses qu'elles puissent estre. Cela estant, il me semble qu'un des meilleurs moyens pour nous déliurer de ces préiugez, & reconnoistre la difference de ces especes Corporelles avec les Idées que l'Esprit contemple immédiatement, c'est de monstrier que la plupart des ces especes ne sont point les Images, les Peintures, ny les Tableaux des objets, dont elles nous donnent la Pensée ; & que mesme la ressemblance qui se peut trouuer en quelques-vnes n'est point ce qui nous les fait apercevoir, & partant que les Idées de l'Esprit doiuent estre toute autre chose que les especes Corporelles.

Pour voir cela clairement, prenez garde que l'opinion contraire ne sçauroit se soustenir, à moins qued'establi pour fondement, que les especes n'ont la force de nous faire penser à leurs objets que parce qu'elles les representent à nostre Esprit comme dans vn miroir. Secondement, qu'elles n'auroient pas cette force, si elles n'estoient semblables aux objets qui les produisent, & que c'est à cause de cette ressemblance qu'elles ont la puissance de les représenter. Considérez de plus que l'Ecole dit que ces especes peuuent estre semblables aux objets, *vel in essendo vel in representando*, c'est à dire, selon leur Estre réel ou selon leur Estre intentionel ou representatif. Parlons vn peu plus clairement afin que tout le monde nous entende. Vne chose est dite estre semblable à vne autre réellement, non seulement quand elle

est de mesme espece, comme vn Homme ressemble à vn autre Homme : mais encore lors qu'elle a quelque raport avec elle ou de figure, ou de couleur, ou de quelque autre accident sensible, comme vn tableau en a avec la chose qu'il représente, vn écho avec la voix de celuy qui chante; Et vne chose est dite estre semblable à vne autre, selon son Estre representatif seulement, lors que sans qu'elle ait aucun raport réel, positif, & sensible avec l'autre elle est pourtant capable de nous y faire penser, & de nous en donner le sentiment que nous en auons. Or la question n'est pas entre nous si les objets enuoient quelque chose de solide qui leur soit entierement semblable, comme vn Homme l'est à vn autre Homme, personne n'a iamais dit cela; Et quoy que les especes dont parle Epicure en aprochent, il n'a pas esté suiuy en cela par ses plus grands admirateurs. Nos aduersaires ne peuuent pas dire aussi que les especes qu'enuoient les objets ne sont semblables à ces objets, & aux sentimens que nous en auons, que parce qu'ils ont le pouuoir de les exciter en nous, & non pas par aucun raport sensible & formel qu'elles ayent avec eux : Car de cette façon nous serions d'accord, & ils n'auroient pas droit de conclure comme ils font, qu'il y a dans les objets des qualitez sensibles semblables aux sentimens que nous en formons; s'ils disoient seulement que les impressions qu'ils font sur nos sens, ou si vous voulez, leurs especes, ne leur ressemblent que selon leur

Estre representatif. Il faudroit donc qu'ils établissent pour fondement de leur opinion, que les especes des sens & de l'imagination sont conformes au sentiment que nous en auons, & aux objets qui les enuoient, & que c'est à cause de cette conformité qu'ils ont la force d'exciter en nous ces sentimens; d'où il s'ensuit manifestement, selon leur opinion; qu'aucune espece Corporelle ne peut exciter en nous que la Pensée ou le sentiment qui luy ressemble, & consequemment à l'objet qui l'a enuoyée. Cela estant ainsi supposé, si ie puis faire voir dans vne seule occasion que nous auons des Pensées qui ne peuuent estre en aucune façon semblables, ny à l'espece Corporelle ny à l'objet de qui nous la tenons, leur fondement tombe par terre, & i'auray suffisamment monsté que ce n'est point cette conformité qui rend les especes capables de nous donner les pensées que nous auons à leur occasion, puisque si cela estoit il seroit impossible qu'elles excitassent iamais en nous aucunes Idées que celles qui nous peuuent représenter quelque chose de semblable à elles. Or ie ne pretens pas le faire voir seulement dans vne rencontre, mais presque dans toutes.

Quand les Theologiens parlent de Dieu, comme d'un pur Esprit, Infini, & tres Parfait; quand nous examinons les diuerses pensées de nostre Esprit, ses perceptions & ses volontés, il est impossible que les Idées que nous en formons puissent estre semblables à aucune espece Corporelle

relle. Ce n'est pas que nous n'ayons le pouuoir d'attacher ces mesmes Idées à certains noms & à certains caracteres, auxquels on ne peut pas feindre qu'elles ayent rien de semblable; Et neanmoins on ne scauroit nier qu'apres que nous auons attaché ces Idées à ces noms, ils n'aient le pouuoir d'exciter en nous des pensées de Dieu & de nostre Esprit; Et partant il n'est pas necessaire que les especes Corporelles ressemblent aux Idées qu'elles excitent. Secondement, il est impossible que nostre imagination se puisse représenter toutes les proprieté du Corps, comme son estenduë sans limites, (au moins qui nous soient conuës); sa diuisibilité indefinie; ce grand nombre de formes dont chaque Corps est susceptible; les diuers changemens qui peuuent arriuer à sa superficie; la grandeur du Firmament, la petitesse de certains Corps; la rapidité d'un boulet de canon & la lenteur de l'ombre du stile d'un quadrans; Il est impossible, dis-je, que nous puissions concevoir toutes ces choses par la seule force que nous auons d'imaginer, & cela pour deux raisons; la premiere, d'autant que les organes de nos sens & les filamens de nos nerfs étant d'une grandeur déterminée ne reçoient l'impression que des objets qui leur sont proportionnez: La seconde, parce que toutes les especes Corporelles qui seruent aux sens & à l'imagination sont singulieres & déterminées, aussi bien que les objets qui les enuoient; c'est pourquoy vous deuez encore conclu-

Q.



re qu'il est impossible qu'aucune especé puisse ressembler aux Idées que nous formons, quand nous considerons les proprietéz du Corps indéterminément & en general, ou si elles leur ressemblent, elles ne sçauroient estre conformes aux objets qui les produisent. Personne ne peut ignorer néanmoins que nous pouuons parler & escrire de toutes ces choses; nous pouuons donc aussi lier les Idées que nous en auons avec les especes Corporelles des paroles & des lettres, & faire qu'elles les puissent par apres exciter, bien qu'elles ne leur soient aucunement, conformes. A cela l'on objecte, premierement, que les paroles & l'escriture ne nous donnent point naturellement & directement d'autres pensées que celles qui nous representent quelque chose qui leur est semblable. Secondement, que c'est nostre volonté & non pas la nature, qui leur donne le pouuoir d'exciter en nous d'autres pensées que celles qui les representent; & enfin, qu'il ne s'agit pas tant de cela comme de sçauoir si les especes Corporelles des sens, dans leur Estre Naturel & hors del'usage que nous en pouuons faire, sont semblables aux objets qui les enuoient; & si c'est à cause de cette ressemblance que nous auons des pensées qui nous les font conceuoir, en sorte qu'il soit vray de dire, qu'il y a tousiours quelque chose dans l'objet qui est formellement semblable à l'Idée que nous en auons à l'occasion d'une telle especé.

Le répons à la premiere objection, qu'à la verité

quand nous ne ſçauons pas encore l'vſage & la ſignificatiō des mots, l'impreſſion qu'ils font ſur nos ſens ne nous fait point conceuoir autre choſe que les ſens ou les figures des Lettres ; mais lors que nous l'auons auiſe, & que nous y ſommes accoutumez, ie nie qu'il ſoit touiours vray que cette impreſſion nous donne premierement la penſée qui nous repreſente ces paroles en elles meſmes, & en ſuite celle de la choſe qu'elles ſignifient. Au contraire ie croy qu'un chacun peut obſeruer en luy meſme que tres-ſouuent la premiere Idée qui luy vient ( lors qu'il laiſſe agir ſon Entendement ſans l'obliger de reflechir ſur les lettres ou ſur les mots ) eſt celle de la choſe ſignifiée, & ſouuent ſans meſme eſtre accompagnée de l'Idée naturelle des paroles ou de l'eſcriture.

Le répons à la ſeconde objection, qu'il n'importe pas qui ait fait cette vnion de l'eſpece Corporelle & de l'Idée qu'elle excite ; au contraire ſi noſtre Volonté a bien le pouuoir d'vnir nos penſées à des mouuemens qui ne leur reſſemblent point, peut-on nier que celuy qui a joint noſtre Eſprit & noſtre Corps n'ait pû de meſme vnir toutes les penſées que nous auons à l'occaſion des objets extérieurs, à des mouuemens Corporels qui ne leur fuſſent point ſemblables. Or ſi cela peut eſtre, nous auons lieu de croire qu'il eſt en effet, par la difficulté de conceuoir comment ces petites images ſe pourroient détacher de l'objet, & ne ſe point corrompre les vnes les autres dans l'air ;

Comment elles pourroient estre receuës dans les organes de nos sens ; & enfin comment elles pourroient penetrer iusques au cerueau , & s'y conseruer si long-temps sans perdre leur ressemblance, & aussi par le peu de necessité qu'il y a d'auoir recours à ces Images.

Pour responce à la troisieme objection , ie dis que mesme dans leur Estre naturel ces especes ne sont pas tousiours les tableaux des objects, ny semblables aux choses qu'elles nous representent. Car premierement n'est-il pas vray que les sens nous trompent tres souuent, & que les objects ne sont pas tousiours tels qu'ils nous paroissent? Et quand cela arriue, ne faut il pas, ou que l'espece qu'ils nous enuioient ne leur soit pas semblable, ou si elle l'est, que la pensée qu'elle excite ne luy soit pas conforme? Mais ie vois bien qu'on me va dire que lors que toutes choses sont dans l'estat qu'elles doiuent estre du costé de l'object, du milieu, & de l'organe, pour lors les especes des objects en sont les portraits ou les images & que les sens ne se trompent point. C'est pourquoy ie vous prie de considerer avec moy les Idées que nous auons de l'estenduë, de la figure, de la situation, de la solidité ou de la fluidité, & d'autres semblables qualitez du Corps, & de les comparer avec les sentimens que nous auons des couleurs, des sens, des odeurs, des saveurs, de la chaleur & du froid, du sec & de l'humide, de la douleur & du chatouillement, &c. Et vous recon-

noistrez éuidemment que celles-là sont fort claires & fort distinctes, & que celles-cy sont fort obscures & confuses. Et ne vous trompez pas sur ce que vous reconnoissez tres-clairement que le sentiment de la douleur est tres-different de celuy du chatoüillement, & ainsi des autres : car ce n'est pas à dire pour cela que vous connoissiez éuidemment ce qui vous est représenté par la perception de la douleur ou du chatoüillement ; ny qu'il y ait autant de difference entre la cause de l'un & celle de l'autre, qu'il paroist de diuersité entre les sentimens que nous en auons ; au contraire bien souuent leurs causes ne different que du plus au moins. Cela estant ainsi supposé, ie dis qu'à la verité lors que nous auons des Idées claires & distinctes nous pouuons bien croire qu'il y a quelque chose dans les objects de semblable à ce qu'elles nous representent ; mais que lors que nous n'auons que des perceptions confuses, comme sont celles des sens, nous n'auons aucun lieu de soupçonner qu'il puisse rien y auoir dans l'objet qui leur soit conforme ; Car il est impossible qu'une espee ou image confuse puisse iamais estre semblable à son prototype : Or, suiuant les principes de nos aduersaires, il faut que les especes des sens soient confuses, autrement elles ne seroient pas semblables aux sentimens qu'elles causent en nous, lesquels sont confus, & partant ces especes considerées, en ellesmesmes, ne sçauroient iamais estre semblables à la cause

qui les produit. Est-il possible qu'on se persuade: que lors que nous sommes blesez d'une espée, ou qu'on nous passe vne plume sur les lèvres, il y ait quelque chose dans l'espée ou dans la plume, ou si vous voulez mesme dans la partie blessée ou chatoüillée semblable à la douleur ou au chatoüillement que nous ressentons, & ceux qui se le persuaderoient ne seroient-ils pas ridicules? La figure de l'Espée & le mouvement que luy donne celui qui nous frappe, ont-ils quelque chose de semblable à la douleur qu'elle cause? Et ne devons nous pas nous persuader la mesme chose de tous nos autres sentimens, puis qu'il n'y a pas plus de raison pour les vns que pour les autres: Mais quand toutes ces raisons ne seroient pas suffisantes; ne seroit-ce pas assez pour nous persuader cette verité, de considerer que ces especes Corporelles ne sçauroient estre autre chose que des modes ou des accidens de quelque Corps, lesquels ont ces deux proprietéz; la premiere, de ne pouuoir sortir de leur sujet pour passer dans vn autre; Et la seconde, que quand bien ils en pourroient sortir, ils ne pourroient neanmoins estre receus que dans vn sujet estendu, d'où il s'ensuit manifestement, qu'ils ne sçauroient estre receus dans nostre Esprit; & partant toutes nos connoissances estant des actes qui ne sortent point du dedans de l'Ame, il est impossible que les especes Corporelles puissent estre les formes par la perception immediate desquelles nous auons telles ou telles pensées, d'où il s'ensuit

encore, ou qu'elles ne sont point conformes aux objets, ou si quelques vnes le sont, que ce n'est pas cette conformité qui les rend capables de nous faire apercevoir vne telle chose. Laissons donc-là Fracastor & tous ses Sectateurs, & ne soyons pas si simples que de croire que les objets enuoyent à nos sens de petites images volantes, ou que nostre Esprit n'a pas besoin d'autres idées que de ces especes Corporelles, auxquelles on a iusques icy mal à propos donné le nom d'Images & de Tableaux; Car le plus souuent elles ne sont pas conformes, ny aux objets qui les enuoient, ny aux pensées & sentimens que nous auons à leur occasion, & quand bien elles leur seroient semblables, cette conformité seroit inutile pour produire l'effet qu'on leur attribue.

Mais, dira quelqu'un, qu'est-ce donc que peuuent estre ces especes Corporelles, si ce ne sont pas des Images? Il me semble que le Traité de l'Homme & les autres Escrius de Monsieur Descartes les ont desia suffisamment expliquées; mais néanmoins à cause de l'affinité de la matiere, il ne sera peut estre pas hors de propos que i'en repete icy vn mot en general. Je diray donc que les especes Corporelles ne sont autre chose que le changement que les objets (& les autres causes qui obligent l'Ame de l'Homme à auoir quelque pensée qu'elle n'auroit pas sans cela) aportent au mouuement & à la forme du cours des Esprits qui sortent de la glande pineale, en agissant sur les

fibres des nerfs, & ouurant par leur moyen quelques pores des ventricules du cerueau, d'où elles tirent leur origine, vn peu plus que leurs voisins; ce qui est capable d'obliger les Esprits Animaux à sortir de cette glande d'une autre maniere qu'ils ne faisoient auparauant, & à entrer & passer dans ces pores ainsi ouuerts d'une autre façon qu'ils ne passent par leurs voisins. Or ce qui fait que nous prenons ces changemens pour les especes dont nous parlons, c'est parce que nous auons des raisons qui nous font croire que c'est à eux que les pensées de l'Esprit sont immediatement attachées, ainsi que nous auons desja fait voir dans nos Remarques, & que nous esperons le prouuer en parlant de l'Imagination; Et qu'il est impossible que les objets extérieurs puissent communiquer autre chose aux fibres de nos nerfs que des diuers mouuemens, ny par consequent que les mesmes nerfs puissent porter autre chose à l'organe de l'imagination & du sens commun que les suites du mouuement qui leur a esté communiqué; outre que tous les accidens corporels n'ayant pas plus de rapport les vns que les autres avec les pensées & sentimens de l'Ame, il ne sert de rien d'en inuenter d'autres inconceuable au lieu du mouuement local sans lequel ils seroient mesme tous inutiles. L'on donne encore toutesfois le nom d'espece à l'impression des objets sur l'organe des sens intérieurs, laquelle apporte le changement au cours des Esprits, auquel nous auons dit qu'il appartenoit proprement;

prement; & l'on appelle encore de ce nom les vestiges qui en restent dans la memoire. C'est pourquoy il me semble que pour bien connoître la nature de ces especes, il les faut considerer en quatre lieux differents, sçauoir dans leur origine, dans l'organe du sens exterieur, sur la glande, & enfin dans la partie du cerueau qui sert d'organe à la memoire. Si vous les considerez dans leur origine, ou dans leur cause, ces especes ne sont rien que les diuersitez qui se trouuent dans les Corps qui environnent le nostre, soit dans la figure & l'arrangement de leurs parties, soit dans leur mouuement ou leur repos, à raison desquelles ils peuuent faire quelque impression sur les fibres des nerfs qui se rencontrent dans l'organe de quelqu'un de nos sens exterieurs; si vous les considerez maintenant dans cet organe, ces especes sont toutes les manieres differentes dont ces Corps agitent ces nerfs, & ouurent par leur moyen certains pores des ventricules du cerueau d'une autre maniere que leurs voisins; Sur la glande ces especes ne sont autre chose que la diuersité que l'ouverture de ces pores aporte dans le cours des Esprits, & dans la situation de la glande; Enfin dans le siege de la memoire, ces especes sont la disposition que laisse le cours des Esprits en passant par ces pores qui ont esté ouverts par l'action des objets de dehors, & en trauersant les fibres du cerueau, en tant que cette disposition est capable de retracer vne seconde fois la mesme espece sur la glande.



Auant que de parler des Idées Spirituelles auxquelles ces especes Corporelles sont attachées, il me semble qu'il est nécessaire que i'oste le scrupule qu'on pourroit auoir, que tout ce que ie viens d'auancer ne soit pas conforme à la pensée de Monsieur Descartes, d'autant qu'il parle en quelques endroits de son Traitté de l'Homme, comme si ces especes contenoient exactement la peinture de l'objet; & en d'autres il semble dire que l'Ame contemple immédiatement les Idées qui se tracent sur la glande; c'est ainsi qu'il appelle ces especes corporelles en ces endroits-là.

Pour le premier, il est vray que les especes & les impressions que font les objets sur nos yeux ont plus de ressemblance avec eux que celles qui se font par les autres objets des sens; mais néanmoins il dit en tant d'autres lieux que cette ressemblance ne sert de rien ou presque de rien pour les sentimens, que ceux qui liront les passages que ie m'en vais alleguer ne me pourront pas soupçonner de luy estre opposé en cecy. Et pour les lieux où il a escrit, que l'Ame contemple immédiatement les Idées qui se tracent sur la glande, comme lors qu'il dit qu'il n'appelle point du nom d'Idée les seules especes de l'imagination, entant qu'elles sont dépeintes en la fantaisie Corporelle, (*sed tantum quatenus mentem ipsam in illam cerebri partem conuersam informant*,) mais seulement entant qu'elles informent l'Esprit mesme qui s'applique à cette partie du cerueau; ces expressions

quoy que tres-fortes ne se doiuent pas entendre comme s'il auoit voulu dire, que ces especes Corporelles fussent receües dans la propre substance de l'Esprit, ou que ces Idées lesquelles il contemple immediatement & ces especes Corporelles ne fussent que la mesme chose ; Mais il appelle du nom d'Idée ces especes Corporelles qui se tracent sur la glande, & dit que l'Ame les contemple immediatement, parce que c'est à elles seules que les Idées de l'Ame qui nous representent les objets sont immediatemēt vnies, & qu'à raison del'etroitte vnion qui est entre l'Esprit & le Corps l'on peut en quelque façon dire qu'elles informent l'Esprit mesme, parce qu'il ne fait qu'un mesme tout avec luy. Voicy quelques passages qui confirmeront ce que i'aduance. Il faut outre cela (dit Monsieur Descartes, dans le quatriesme discours de la Dioptrique page 32.) prendre garde à ne pas suposer que pour sentir l'Ame ait besoin de contempler quelques Images qui luy soient enuoyées par les objets iusques au cerueau, ainsi que font communément nos Philosophes ; Ou du moins, il faut conceuoir la Nature de ces Images tout autrement qu'ils ne font ; car d'autant qu'ils ne considerent en elles autre chose, sinon qu'elles doiuent auoir de la ressemblance avec les objets qu'elles representent, il leur est impossible de nous monstrent comment elles peuuent estre formées par les objets, & receuës dans les organes des sens exterieurs, & transmi-

„ les par les nerfs iusques au cerueau ; Et ils n'ont  
„ eu aucune raison de les suposer , sinon que  
„ voiant que nostre pensée peut facilement estre  
„ excitée par vn Tableau à conceuoir l'objet qui y  
„ est peint , il leur a semblé qu'elle deuoit l'estre de  
„ mesme façon , à conceuoir ceux qui touchent  
„ nos sens par quelques petits Tableaux qui se  
„ formassent dans nostre teste. ( Cela est si verita-  
„ ble , que si vous prenez la peine de lire le Liure  
„ de Monsieur Chanet des fonctions de l'Esprit ,  
„ vous verrez qu'il considere les especes de l'ima-  
„ gination , comme des Peintures , les Esprits A-  
„ nimaux comme la Lumiere qui les rend visibles ,  
„ & l'Ame enfin comme le spectateur qui les regar-  
„ de. ) Au lieu que nous deuons considerer qu'il y a  
„ plusieurs autres choses que des Images qui peu-  
„ uent exciter nostre pensée , comme par exemple ,  
„ les signes & les paroles qui ne ressemblent en au-  
„ cune façon aux choses qu'elles signifient. Et si  
„ pour ne nous éloigner que le moins qu'il est pos-  
„ sible des opinions desia receuës , nous aimons  
„ mieux auoüer que les objets que nous sentons  
„ enuoient veritablement leurs Images iusques au  
„ dedans de nostre cerueau ; il faut au moins que  
„ nous remarquions qu'il n'y a aucunes Images  
„ qui doiuent en tout ressembler aux objets qu'el-  
„ les representent ; Car autrement il n'y auroit  
„ point de distinction entre l'objet & son image ;  
„ mais qu'il suffit qu'elles leur ressemblent en peu de  
„ choses ; & souuent mesme que leur perfection

dépend de ce qu'elles ne leur ressemblent pas tant qu'elles pourroient faire. Comme vous voyez que les tailles-douces n'estant faites que d'un peu d'ancre posée çà & là sur du papier nous representent des Forests, des Villes, des Hommes, & mesme des Batailles & des Tempestes, bien que d'une infinité de diuerfes qualitez qu'elles nous font conceuoir en ces objets, il n'y en ait aucune que la figure seule, dont elles ayent proprement la ressemblance; & encore est-ce vne ressemblance fort imparfaite, veu que sur vne superficie toute plate, elles nous representent des Corps diuerfement releuez & enfoncez, & que mesme suiuant les regles de la perspective, souuent elles representent mieux des cercles par des ouales que par d'autres cercles, & des quarez par des lozanges que par d'autres quarez, ainsi de toutes les autres figures; en sorte que souuent pour estre plus parfaite en qualité d'Images, & représenter mieux vn objet, elles doiuent ne luy pas ressembler. Peut on apres cela douter de la pensée de Monsieur Descartes principalement si l'on prend la peine de lire le commencement de son Traitté de la Lumiere qui a esté imprimé de puis peu, où il dit entre autres choses: Encore que chacun se persuade communément, que les Idées que nous auons en nostre pensée sont entièrement semblables aux objets dont elles procedent; ie ne vois point toutesfois de raison qui nous assure que cela soit vray; Mais ie remarque

» aucontraire plusieurs experiences qui nous en  
 » doiuent faire douter. Vous sçauiez bien que les  
 » paroles n'ayant aucune ressemblance avec les cho-  
 » ses qu'elles signifient, ne laissent pas de nous les  
 » faire conceuoir, & mesme c'est souuent sans que  
 » nous prenions garde au son des mots ny à leurs  
 » syllabes, en sorte qu'il peut arriuer, qu'apres  
 » auoir ouy vn discours, dont nous aurons fort  
 » bien compris le sens, nous ne pourrons pas dire  
 » en quelle langue il aura esté prononcé. Or si des  
 » mots qui ne signifient rien que par l'institution  
 » des Hommes, suffisent pour nous faire conceuoir  
 » des choses avec lesquelles ils n'ont aucune res-  
 » semblance: Pourquoi la Nature ne peut elle pas  
 » aussi bien auoir estably vn certain signe qui  
 » nous fasse auoir le sentiment de la lumiere, bien  
 » qu'il n'ait rien en soy de semblable à ce senti-  
 » ment? Et n'est-ce pas ainsi qu'elle a estably les  
 » ris & les larmes, pour nous faire lire la ioye &  
 » la tristesse sur le visage des Hommes? Mais vous  
 » direz peut estre, que nos oreilles ne nous font ve-  
 » ritablement sentir que le son des paroles, ny  
 » nos yeux que la contenance de celuy qui rit ou  
 » qui pleure, & que c'est nostre Esprit, qui ayant  
 » retenu ce que signifient ces paroles & cette con-  
 » tenance, nous le represente en mesme temps; à  
 » celà ie pourois répondre, que c'est nostre Esprit  
 » tout de mesme qui nous represente l'idée de la  
 » lumiere toutes les fois que l'action qui la signi-  
 » fie, touche nostre œil, &c. Monsieur Chanee

qui sans doute auoit leu Monsieur Descartes, quoy qu'il ne le nomme jamais, nonobstant que bien souuent il se serue de ses raisons mot à mot, comme si elles estoient de son crû, répond à cecy, que les Lettres & les Paroles n'excitent en nous l'idée de la chose qu'elles signifient, que parce que les especes qu'elles enuoyent à nos sens, & celles des objets qu'elles signifient se rencontrent ensemble & au mesme lieu dans nostre cerueau, & que ces deux especes s'excitant en mesme temps, donnent lieu à l'Ame de penser à l'objet; lors qu'on lit, ou qu'on entend prononcer son nom.

Pour respondre à Monsieur Chanet, vous remarquerez premierement, que ce qu'il dit ne scauroit auoir lieu que lors que nous parlons des Corps; Car quand nous discourons de Dieu, des Anges, ou de nos pensées, il est impossible que les especes de ces choses puissent estre placées avec celles des Paroles qui les signifient, d'autant qu'elles n'en ont point, du moins qui leur puisse estre semblable. Secondement, il suppose sans fondement que l'Image ou l'espece qui est receüe par l'oreille, par exemple, quand on prononce le nom de quelqu'un, peut se rencontrer dans le mesme lieu que celle qui nous a esté enuoyée par les yeux en le voyant, ce qui non seulement n'est pas vray-semblable, parce que les nerfs qui vont à ces deux sens n'ont pas vne mesme origine: mais encore quand cela seroit, comment pou-

uez-vous concevoir que deux figures puissent subsister en mesme temps dans la mesme particule du cerueau. Il y a encore moins d'apparence que les especes d'une trentaine de mots qui peuvent signifier la mesme chose puissent se rencontrer toutes ensemble dans le mesme endroit du cerueau qu'est l'image de l'objet. En troisieme lieu, lors qu'un Liure nous fait concevoir des choses que nous n'auons iamais ny veuës ny entendues, & auxquelles nous ne penserions peut-estre iamais si nous ne les lisions, peut-on dire que la nature auoit eu soin long-temps auparavant de mettre leurs especes avec celles des mots & des lettres dans le mesme lieu. Et quand nous parlons d'une figure de dix milles angles, nostre imagination n'en forme pas d'autre image que quand nous pensons à une figure de mille angles, bien que nostre entendement en ait des notions fort differentes; il ne sert donc de rien de dire que cette Image confuse que forme nostre imagination est iointe avec l'espece du son des paroles, d'autant que sa confusion l'empesche de ressembler à la figure qu'elle signifie. Enfin vous pouuez auoir experimenté par vous mesme, ainsi qu'il est arriué & arriue tous les iours à plusieurs, que vous auez leu quelquefois & entendu ce que signifioit ce vers de Virgile:

*Titire, tu patula recubans sub tegmine fagi.*

Sans vous imaginer un berger couché sous un arbre.

bre. Il est vray qu'il est difficile de faire cette observation si ce n'est par hazard ; Et que vous ne la ferez iamais quand vous aurez enuie de la faire, d'autant que pour lors vostre imagination ne manquera iamais d'exciter en vous l'Image de l'objet. Je sçay bien que souuent aussi en lisant ce vers on se represente vn Berger couché sous vn arbre : mais il suffit que le contraire arriue quelquefois, pour monstrier que ce n'est pas la ressemblance de l'espece qui est imprimée dans l'organe du sens ou de l'imagination, qui nous fait penser à luy ; car on ne peut pas dire que les lettres de ce vers ressemblent en aucune façon à vn Berger. Dailleurs quand nous regardons vne taille-douce, combien nous fait-elle conceuoir de choses differentes de la simple delineation des objets ? Ne nous semble-il pas que les vns sont enfoncez & les autres releuez, & ne diroit-on pas qu'ils sont animez & qu'ils se remuent ? Fracastor à beau qualifier du nom de sub-notion l'action de l'imagination qui nous fait obseruer toutes ces choses, cela n'oste pas la difficulté, & n'empesche pas que nous n'ayons droit de conclure que l'objet n'enuoye aucune Image qui luy soit semblable, puisque nos yeux ne reçoient l'impression que de la lumiere & de la figure de la Taille-douce, & qu'elle ne sçauroit ressembler à toutes les diuerfes qualitez dont elle excite en nous la pensée. Ya-il rien de plus foible que ce raisonnement de Fracastor, qui dit que les especes

Q



de l'Entendement & de l'Imagination sont les mesmes, dautant que deux especes differentes ne sçauroient représenter ou estre semblables à vn mesme objet ; puisque nous auons veu qu'il n'est pas necessaire que les impressions des objets sur les sens soient semblables aux objets qu'elles représentent. Mais quand bien cela seroit, il y auroit toujours vn paralogisme fort évident ; car il s'enfuit seulement du raisonnement de Fracastor, que deux especes ne sçauroient estre differentes entant qu'elles ont la force de représenter vn mesme objet ; mais cela n'empesche pas qu'elles ne puissent estre fort diuerfes, quand on les considere seulement en elles mesmes ; comme vous voyez que l'Image d'un Tableau & celle d'un Miroir peuvent faire conceuoir le mesme Homme, quoy qu'elles soient tres-differentes entre elles. Apres tout ce que nous venons de dire, il est aisé de voir ce que nous deuons penser de cét axiome vulgaire, qu'il n'y a rien dans l'Entendement qui n'ait esté auparauant dans le sens ; Car non seulement cela n'est pas vray, si vous entendez parler des especes Corporelles, à la maniere que nous les auons definies cy-dessus, & que ie les prens tousiours dans ce Traitté, dautant que ce ne sont que des accidens ou modes du Corps, dont aucun ne peut estre receu dans l'Esprit ; Mais quand bien mesme on ne voudroit dire autre chose par cét axiome, sinon que toutes nos connoissances tirent leur origine de l'observation des sens, cela ne seroit

pas non plus soutenable; car comme dit fort bien Monsieur Descartes dans sa réponse au placart de de Monsieur le Roy; Quiconque a bien compris “ insques où s’étendent nos sens, & ce que ce peut “ estre qui est précisément porté à la faculté que “ nous auons de penser, ne peut ignorer qu’au- “ cunes Idées des choses ne nous sont représentées “ par eux telles que nous les formons par la pen- “ sée; en sorte qu’il n’y a rien dans nos Idées qui “ ne soit naturel à l’Esprit ou à la faculté qu’il a de “ penser, si seulement on en excepte certaines cir- “ constances qui n’appartiennent qu’à l’experien- “ ce; par exemple, c’est la seule experience qui “ fait que nous iugeons que telles ou telles Idées “ que nous auons maintenant présentes à l’Esprit, “ se rapportent à quelques choses qui sont hors de “ nous; Non pas à la verité que ces choses les “ aient transmises en nostre Esprit par les orga- “ nes des sens, telles que nous les sentons; mais “ parce qu’elles y ont transmis quelque cho- “ se, qui a donné occasion à nostre Esprit, par la “ faculté naturelle qu’il en a, de les former en ce “ temps-là plutoſt qu’en vn autre. Car rien ne “ peut venir des objets extérieurs iusques à nostre “ Ame par l’entremise des sens, que quelques “ mouuemens Corporels; mais ny les mouuemens “ mesmes, ny les figures, ne sont point conneuës par “ nous telles qu’elles sont dans les organes des sens “ extérieurs ou intérieurs, d’où il suit que mesme “ les Idées des mouuemens & des figures sont na- “

„ turellement en nous ; & à plus forte raison les  
 „ Idées de la douleur , de la couleur , & de toutes  
 „ les autres choses semblables , nous doiuent estre  
 „ naturelles ; afin que nostre Esprit , à l'occasion  
 „ de certains mouuemens Corporels avec lesquels  
 „ elles n'ont aucune ressemblance se les puisse  
 „ représenter. Mais que peut-on feindre de plus ab-  
 „ surde que de dire que toutes les notions commu-  
 „ nes qui sont dans nostre Esprit, procedent de ces  
 „ mouuemens , & qu'elles ne peuuent estre sans  
 „ eux ? Je voudrois bien que l'on m'apprit quel est  
 „ le mouuement corporel qui peut former en no-  
 „ stre Esprit vne Notion commune ; par exemple,  
 „ celle-cy que les choses qui conuiennent à vne  
 „ troisiéme conuiennent entr'elles : Car tous les  
 „ mouuemens ne sont que particuliers , & les No-  
 „ tions sont vniuerselles , & mesme n'ont aucune  
 „ affinité ny rapport avec le mouuement ; c'est sur  
 „ ce fondement ruineux, sçauoir que *nihil est in in-*  
 „ *tellectu quod prius non fuerit in sensu*, qu'il y en a  
 „ qui soustiennent que l'Idée de Dieu ne vient pas  
 „ de la faculté que nous auons de penser , comme  
 „ vne chose qui luy est naturelle ; mais qu'elle  
 „ vient de la reuelation Diuine , ou de la tradition,  
 „ ou de l'observation des choses : Et pour mieux  
 „ connoistre l'erreur de cette assertion , il faut  
 „ considérer que l'on peut dire en deux façons  
 „ qu'une chose vient d'une autre, sçauoir ou par-  
 „ ce que cette autre en est la cause prochaine &  
 „ principale sans laquelle elle ne peut estre, ou

parce qu'elle en est la cause éloignée & acciden-  
 telle seulement, qui donne occasion à la prin-  
 cipale de produire son effect en vn temps plu-  
 tost qu'en vn autre. C'est ainsi que tous les  
 ouuriers sont les causes prochaines & princi-  
 pales de leurs ouurages, & que ceux qui leur  
 ordonnent de les faire, & qui leur promet-  
 tent quelque recompense s'ils les font, en  
 sont les causes accidentelles & éloignées, dau-  
 tant qu'ils ne les feroient peut-estre point si l'on  
 ne leur commendoit. Or il n'y a point de dou-  
 te que la tradition ou l'observation des cho-  
 ses ne soit souuent la cause éloignée qui fait que  
 nous venons à penser à l'Idée que nous auons de  
 Dieu, & à la rendre presente à nostre Esprit;  
 Mais qu'elle soit la cause prochaine & effecti-  
 ue de cette Idée, cela ne se peut dire que par  
 celui qui croit que nous ne conceuons iamais  
 rien autre chose de Dieu, sinon quel est le  
 nom Dieu, ou quelle est la figure Corporelle  
 sous laquelle il nous est représenté par les Pein-  
 tres; Car de vray si l'observation s'en fait par  
 la veüe, elle ne peut d'elle mesme représenter  
 autre chose à l'Esprit que des Peintures, & mes-  
 me des Peintures dont toute la varieté ne con-  
 siste que dans celle de quelques mouuemens  
 Corporels; Si elle se fait par l'ouïe, elle ne peut  
 représenter que des sons & des paroles; Que si  
 c'est par les autres sens qu'elle se fasse, vne telle  
 observation ne sçauroit rien contenir qui puisse

„estre raporté à Dieu. Et certes c'est vne chose si-  
 „veritable, que la veüe ne represente de soy-  
 „rien autre chose à l'Esprit que des peintures, ny  
 „l'ouïe que des sons & des paroles, que person-  
 „ne ne le reuoke en doute; si bien que tout ce-  
 „que nous conceuons de plus que ces paroles &  
 „ces peintures, comme les choses signifiées par  
 „les signes, doit necessairement nous estre repre-  
 „senté par des Idées qui ne viennent point d'ail-  
 „leurs que de la faculté que nous auons de pen-  
 „ser, & qui par consequent sont naturellement  
 „en elle, & partant ne sont pas venuës par les  
 „sens, mais sont entierement distinctes des especes  
 „de l'imagination, c'est à dire, de ces impressions  
 „que l'action de l'objet extérieur a produites  
 „dans le cerueau. Cecy nous fait encore voir ce  
 que nous deuons penser de cette proposition de  
 l'Ecole d'Aristote, *Intelligentem speculari oportet  
 phantasmata*; Car il n'y a rien de plus faux, si par  
 ces fantosmes il a entendu les especes Corporelles  
 des objects de nos sens; & s'il a voulu dire qu'el-  
 les fussent les seules formes de nos péeses quel'Es-  
 prit contemple immediatement, & a pris ces fan-  
 tosmes pour les Notions de l'Esprit; il leur a don-  
 né vn nom qui ne leur appartient pas, & qui n'est  
 deû qu'aux especes de l'imagination.

Mais c'est assez parlé de ces especes Corporelles,  
 venons maintenant aux Idées de l'Esprit, dont  
 la nature ne nous fera pas difficile à décou-  
 urir si nous auons vne fois bien compris, qu'el-

elles sont tout autre chose que ces especes Corporelles auxquelles quelques-vnes d'elles sont attachées, de la maniere que nous deduirons plus bas en parlant de l'vnion de l'Esprit & du Corps. Or on les peut considerer en deux manieres, ou en elles mesmes, ou dans le raport qu'elles ont avec les choses qu'elles representent, & qu'elles nous font concevoir. Quand on les regarde en elles mesmes, on les peut definir *des formes, modes, ou façons des pensées de l'Esprit, par la perception immediate desquelles nous apercevons la chose qu'elles nous representent, & sommes certains que nous avons vne telle pensée.* Je les appelle des *modes* ou *façons*, parce qu'il n'y en a aucune que ie puisse concevoir sans vne substance qui pense, quoy que ie puisse fort bien concevoir cette Substance sans aucune d'elles en particulier; Et ainsi elles ne different point de la Substance de l'Esprit, ny mesme entre-elles, autrement que comme les modes different de la Substance à laquelle ils appartiennent; ces formes ne sont pas differentes de nos pensées en particulier, ou si elles en sont differentes, c'est seulement de la mesme façon que les figures le sont de l'estenduë particuliere de chaque Corps; mais elles sont réellement distinguées des especes Corporelles, dautant que ie conçois fort clairement les vnes sans les autres, bien que quelques-vnes d'entr'elles se trouuent presque tousiours ensemble.

Pour rendre cecy plus facile à entendre & faire

mieux connoistre la nature de ces formes à ceux qui sont plus accoustumez à se servir de leur imagination que de leur entendement, il faut que ie mette icy l'Esprit en parallele avec le Corps; Car bien que ces deux substances ayent vne essence entierement differente, neanmoins comme les proprietiez qui apartiennent à chacune d'elles leur conuiennent de la mesme façon, il n'y a peut-estre pas de meilleur moyen pour bien conceuoir la nature des Idées, qui sont des modes de l'Esprit, que de les comparer avec les modes du Corps, & d'examiner de quelle façon ces modes leur conuiennent.

Considerons premierement, que comme le Corps est vne substance, l'Esprit en est aussi vne; Et comme celuy-là a vn attribut essentiel, sçauoir l'estenduë, qui le fait estre ce qu'il est, de mesme celuy-cy a la pensée qui le constituë en sa nature d'Esprit. Secondement, tout ainsi que le Corps n'est figuré, mobile, & diuisible que parce qu'il est estendu, de mesme l'Esprit n'auroit pas les facultez de vouloir, d'entendre, de sentir, d'imaginer, de se ressouuenir, de raisonner, s'il n'estoit vne chose qui pense: Troisiësmement, comme chaque Corps en particulier a necessairement pendant chaque instant de sa durée quelque figure qui borne son estenduë, de mesme l'Esprit a tousiours quelque Idée qui luy est presente & qui termine sa pensée; & tout ainsi que l'estendue generale du Corps est indiuisible, le Corps en  
general

general estant inseparable de toutes ses parties, qu'il comprend tousiours toutes en soy, & qu'on ne scauroit mettre hors de luy; & comme on ne peut aussi assigner de bornes ny de figures à son estenduë, de mesme la pensée del'Esprit Souuerain & Infiny ne peut estre diuisée par aucune Idée particuliere; & comme elle est sans bornes & sans limites, elle n'a pas besoin d'estre terminée par aucune de ces formes; mais elle enferme tout ce qui peut estre connu dans vne seule & mesme pensée; de sorte que ceux qui ne veulent pas que l'Esprit de l'Homme ait tousiours quelque Idée particuliere qui limite sa pensée & qui la determine, le rendent sans y penser en quelque façon Infiny. En quatriesme lieu, tout de mesme que les diuerfes figures du Corps ne sont rien sinon des diuerfes façons qui diuersifient & bornent sa superficie, de mesme aussi les Idées, & Notions Spirituelles ne sont rien autre chose que les differentes formes dont les actes de la pensée del'Esprit sont reuestus; limitez & determinez. Enfin comme toutes les figures qui peuuent arriuer à vn Corps sont semblables entre elles, quand on les considere seulement comme les manieres dont la superficie est terminée, & que nonobstant cela elles ne laissent pas d'auoir de fort differentes proprietéz; de mesme les Idées del'Esprit, qu'oy que semblables, quand on les regarde seulement comme les formes de nos pensées, sont neanmoins fort differentes à raison

R.



des diuerſes choſes qu'elles nous representent.

Quand on conſidere ces Idées, non plus en elles meſmes, mais par raport aux objets qu'elles nous font conceuoir; on peut dire que ce ſont les Images, & les portraits de tout ce que nous conceuons, non ſeulement de Corporel, mais encore de Spirituel, & c'eſt ſans doute pour cela que les Grecs & les Latins leur ont donné le nom d'Idée & d'Eſpece. Je ſçay bien qu'on ne manquera pas de me demander icy, comment il eſt poſſible que des choſes Spirituelles, telles que ſont les idées ou les formes de nos penſées, nous puiſſent faire conceuoir le Corps & ſes propriétés, avec leſquelles elles n'ont aucun raport ny reſſemblance. Cela n'eſt pas ſans difficulté; mais neanmoins vous ne deuez pas douter de ce que ie viens de dire, principalement ſi vous prenez garde à deux choſes. La premiere, que l'Eſprit eſtant vne choſe qui penſe, ſa nature eſt neceſſairement telle qu'il peut par ſes propres penſées ſe representer toutes choſes à luy meſme; Et la ſeconde, que noſtre Eſprit eſt *diuina quaſi particula mentis*: Or cét Eſprit Infiny qui connoiſt toutes choſes par luy meſme, ne pourroit pas connoiſtre les Corps, s'il eſtoit impoſſible que ſa penſée, toute Spirituelle qu'elle eſt, les luy pût representer; Il n'y a donc point d'inconuenient de dire, que nos Idées, quoy que Spirituelles, ont le pouuoir de nous faire conceuoir les Corps auſſi bien que les Eſprits; Au contraire, nous deuons

croire que c'est vne suite de l'essence de la pensée, de pouuoir représenter l'objet auquel nous pensons, & d'en estre ainsi l'image & le tableau; Et ie ne pense pas qu'Aristote mesme ait voulu dire autre chose, lors qu'il a dit que, l'entendement, *intelligendo fit omnia.*

Parlons maintenant de la cause de ces Idées, & principalement de celle qui donne cette forme que nous apercevons dans chacune de nos pensées. Il me semble qu'on en peut assigner deux, l'une principale & effectiue, & l'autre éloignée & seulement occasionelle. Pour bien conceuoir l'une & l'autre, il est bon de remarquer premierement que toutes les Idées, quand on les considere par raport aux choses qu'elles représentent, se peuvent reduire à deux Classes. La premiere est de celles qui nous font conceuoir l'estenduë & toutes les propriétés & modes qui la suivent necessairement, ou du moins qui la presuposent: La seconde est de celles qui enferment la pensée dans leur cœception & qui en sont des suites; nous n'auons point d'idée qui ne se raporte à l'une ou à l'autre, c'est à dire, qui ne contienne en soy la Notion de l'estenduë ou de la pensée. Remarquez en second lieu que les vnes & les autres de ces Idées se presentent quelques fois à nostre Esprit parce que nous les y apellons, en apliquant & determinant la puissance que nous auons de connoistre à certains objets, & en la détournant de quelques autres; & d'autres fois elles s'y presentent malgré nous,

ou du moins sans demander le consentement de nostre volonté, comme il arriue dans tous les sentimens que nous auons à l'occasion des objets de nos sens, soit interieurs ou exterieurs, lesquels nous ne pouuons nous empescher d'auoir, pendant qu'ils sont presens, & qu'ils agissent sur leurs organes. Or bien que l'on puisse dire que les Corps qui enuironnent le nostre, & generalement tout ce qui peut nous obliger à penser à des Corps, ou mesme à des Esprits, quand cela ne vient pas de nostre volonté, sont en quelque façon la cause des Idées que nous auons pour lors, parce que nous ne les aurions pas dans toutes les circonstances que nous les auons s'ils n'auoient agi sur nostre Corps; Toutesfois parce que ce sont des substances materielles, dont l'action ne s'estend pas iusqu'à l'Ame; en tant qu'elle est simplement vne chose qui pense: mais en tant qu'elle est vnié à vn Corps de la maniere que nous décrirons cy-apres, ils n'en peuuent estre tout au plus que la cause éloignée & occasionelle, laquelle par le moyen de l'vnion de l'Esprit & du Corps oblige la faculté que nous auons de penser, & la détermine à la production de ces idées dont elle est la cause principale & effectiue.

Quant aux idées que nous formons parce que nous nous déterminons à penser à vne chose plustost qu'à vne autre, elles sont de trois sortes; les vnes, nous representent des objets Corporels particuliers ou quelques vnes de leurs proprietéz; les

autres, nous les font concevoir en general ; & enfin les troisiemes apartiennent aux Natures Spirituelles, comme Dieu, les Anges, & nostre Ame, & nous decouvrent leurs proprieté & leurs operations. Pour les premieres, c'est cette mesme vnion de l'Esprit & du Corps, ( ou du moins son Auteur ) qui en est la cause principale, entant que c'est d'elle que resulte la puissance que nous auons d'imaginer, ainsi que nous expliquerons plus au long en son lieu. Mais c'est le seul pouuoir que nous auons de vouloir & de nous determiner qui est la cause efficiente des idées que nous formons des substances Spirituelles & de leurs proprieté, lors que sans nous arrester à toutes les imaginations des Peintres nous attachons nostre Entendement à les considerer seulement comme des choses qui pensent, & que ce n'est point à l'occasion de quelque objet Corporel, mais par vn simple effet de nostre Volonté, que nous nous portons de nous mesmes à y penser, ou du moins lors que nous ne nous ser-uons pour cela d'aucune espece Corporelle. Pour les Idées des choses Corporelles, considerées en general & indefiniment, elles semblent dépendre en quelque façon de l'imagination, parce que nous nous sommes tellement habituez à former quelque espece Corporelle lors que nous pensons à la Nature du Corps, que lors mesme que nous ne la considerons qu'en general, la faculté que nous auons d'imaginer trace tousiours

quelque espece sur la glande, qui est son instrument, au moyen de laquelle l'Ame ne conçoit pas seulement la Notion generale de la Nature Corporelle; mais se represente confusément quelque chose de Corporel, comme present à ses yeux. Mais ces Idées dépendent bien davantage dans leur production ( lors qu'elles sont claires & distinctes ) d'une autre cause laquelle les dépourville de toutes les conditions qui les rendent particulieres pour en faire des Notions generales.

Afin d'entendre mieux cette verité & d'oster la difficulté qu'on y pourroit rencontrer, considerez ie vous prie avec moy que l'Esprit est une substance qui a la faculté de penser, laquelle a deux branches, qui sont la puissance d'apercevoir, & la volonté. Or cette premiere est en quelque façon une puissance passive & indéterminée, qui ( comme nous auons dit ) n'a point d'autre operation que de connoître & apercevoir sans affirmation ou negation tout ce qui luy est représenté interieurement; Et partant il est necessaire qu'il y ait quelque cause ou au dedans ou au dehors de l'Ame, qui ait le pouuoir de determiner sa pensée, de luy donner une forme, & de luy représenter par ce moyen l'objet que conçoit la faculté d'apercevoir dans toutes les circonstances de sa connoissance. Prenez garde aussi pour ne vous pas tromper, que nous ne cherchons pas icy la cause exemplaire des Idées; car il n'y a point de doute qu'elle ne sçauoit estre autre que l'objet.

qui est représenté, lequel doit posséder formellement ou éminemment tout ce que son Idée nous fait concevoir, lors qu'elle est claire & distincte; Mais la cause que nous cherchons icy c'est l'efficiente, c'est à dire, celle qui donne cette forme à nos pensées, par la perception de laquelle nous sommes certains que nous auons vne telle pensée; Or cette cause est souuent fort differente de la cause exemplaire, qui n'est pas mesme tousiours dans la nature.

Cela estant ainsi supposé, ie dis premierement, que toutes nos Idées considérées en elles mesmes en tant que ce sont seulement des differentes façons de penser, n'ont pas besoin, non plus que toutes nos autres pensées, d'autre cause qui les produise que nostre Esprit. Mais outre cela ie dis, qu'il y a trois causes principales qui déterminent nostre Esprit à produire l'Idée qui nous doit représenter vne telle chose plustost qu'une autre dans vne telle circonstance du temps. La premiere, c'est l'Auteur de l'union de l'Âme & du Corps, pour toutes les Idées que nous auons sans le concours de nostre volonté à l'occasion des especes qui se tracent sur la glande par quelque cause que ce soit; La seconde, c'est nostre volonté, pour toutes les Idées des choses auxquelles nous ne pensons que parce que nous y voulons penser; Et la troisieme, c'est en partie cette union & en partie nostre volonté, pour toutes celles que nous n'auons pas seulement parce que nous

nous y attachons librement , mais encore parce que les espèces Corporelles avec lesquelles la nature ou nostre volonté ont lié ces Idées sont pour lors excitées dans l'organe de l'Imagination.

Mais, dira quelqu'un, il est impossible que ce soit la Volonté qui forme les Idées des choses auxquelles nous voulons penser ; Car il faut de nécessité que j'aye l'idée d'un Cheval, par exemple, auparavant que je puisse avoir la volonté d'y attacher ma pensée ; & il semble qu'il seroit bien plus raisonnable de soutenir que ce sont les premières Idées qui sont les causes des secondes qui les suivent , que non pas nostre Volonté, parce que nous voyons qu'elles s'entre-suivent les vnes les autres, comme si elles estoient enchainées, & qu'elles se poussent, pour ainsi dire, comme les flots de la Mer. Je répons premierement, qu'on peut dire en deux manieres que j'ay l'Idée d'une chose, ou parce que j'y puis penser & en former l'idée toutes les fois qu'il me plaît, & en ce sens-là, il est vray de dire qu'il faut que j'aye l'Idée de cette chose avant que je me puisse déterminer à y penser, c'est à dire, il faut que j'en puisse former l'Idée, avant que ma Volonté se termine à reduire cette puissance en acte.

L'autre maniere selon laquelle on peut dire qu'on a l'idée de quelque chose, c'est lors que l'Esprit n'a pas seulement la puissance de la former, mais mesme qu'elle est actuellement presente à l'Esprit ; & en ce sens il n'est pas toujours vray de dire

dire qu'il faut que i'aye l'Idée de la chose à laquelle ie veux penser, auant que i'en aye la volonté; mais il suffit que dans le mesme temps precisement que la Volonté se determine, & qu'elle applique l'Entendement à penser à vne telle chose il en forme l'Idée. Seconðement, ie répons qu'encore que nos pensées se suiuent les vnes les autres, & que ce soit les objets extérieurs ou les premières pensées qui donnent occasion à la volonté de se déterminer & de former l'Idée des secondes, cela n'empesche pas qu'on ne doiuë dire que c'est elle qui en est la cause prochaine & principale, où bien il faudroit dire que ce sont les objets extérieurs qui produisent les Idées que nous auons d'eux, & non pas l'Esprit; d'autant que c'est leur presence qui luy donne occasion de penser à eux. Je répons en troisieme lieu, que nos premières pensées ne nous obligent pas necessairement à former les Idées des secondes, & nous sentons bien que c'est librement que nous y appliquons nostre Esprit; Ce qui ne seroit pas, s'il n'auoit en luy qu'une faculté passive d'apercevoir, & qu'il n'eust pas aussi vne puissance active de produire les Idées, pour le moins celles des choses auxquelles il s'applique volontairement, & qui ne sont point au dessus de ses forces. Nous ne deuons donc point douter qu'il ne se trouue dans l'Esprit vne puissance active qui produit & forme les idées dont il s'aperçoit volontairement, & nous deuons estre certains que cette puissance



est sa Volonté, tant par ce que nous donnons ce nom au Principe de toutes les operations de l'Esprit qui passent pour des actions, qu'à cause que les fonctions de la Volonté étant reueſtuës de quelque forme particuliere au moyen de laquelle nous nous en apercevons aussi bien que des autres pensées de nostre Esprit, nous ne pouvons pas douter qu'elle n'ait la force de produire des idées; d'autant que leur nature consiste en ce que ce sont des pensées de l'Esprit reueſtuës de quelque forme; & partant nous avons lieu de croire que la volonté qui determine l'Esprit à penser à quelque chose, est aussi bien la cause de l'idée de la chose à laquelle elle l'applique, que de celle de ses propres fonctions; Et vous n'aurez pas de peine à vous persuader cette verité, si vous prenez garde qu'il n'y a que les idées des substances Spirituelles & de leurs proprieté & operations qui puissent quelque fois venir en l'Esprit par la simple determination de la volonté, d'autant qu'il n'y a qu'elles qui n'ayent aucun commerce avec le Corps, & à la production desquelles assez souvent il ne contribuë point.

Bien que toutes nos pensées ou nos idées soient semblables en ce que ce sont des modes ou des différentes façons de penser, que l'on appelle pensées, quand on les regarde simplement comme des operations de l'Esprit, & idées, quand on considere qu'il n'y en a aucune qui ne nous represente & ne nous fasse apercevoir quelque chose; ie trou-

ue néanmoins qu'elles sont bien différentes, quand on les oppose les vnes aux autres, ou selon la maniere de représenter, ou selon les choses qu'elles représentent, ou selon les puissances auxquelles elles seruent, ou selon les causes qui les produisent, ou enfin selon le rapport qu'elles ont avec nostre Esprit. Quand on les considère selon la maniere qu'elles nous représentent les objets, les vnes sont claires & distinctes; les autres obscures & confuses; Monsieur Descartes appelle vne idée claire celle qui est euidente & manifeste à vn Esprit attentif, de mesme que nous disons voir clairement les objets, lors qu'estant présents, ils agissent assez fortement pour estre sentis, & que nos yeux sont disposez pour les regarder; & il appelle distincte celle qui est tellement précise & différente de toutes les autres, qu'elle ne comprend en soy que ce qui paroist manifeste à celuy qui la considère comme il faut. L'Idée obscure est opposée à la claire, & la confuse à la distincte. Or vous remarquerez icy qu'une Idée n'est pas plus distincte pour comprendre peu de choses; mais pour n'en comprendre aucune qui ne soit claire.

La seconde difference des Idées, qui se prend des choses qu'elles représentent, est la plus considerable; & celle qui a le plus grand nombre d'especes; Car les vnes nous font conceuoir l'Estre & la Substance en general, & nous monstrent les proprietéz qui appartiennent à tous

les Estres, & les autres nous font voir à quelque substance particuliere, comme celle de l'Estenduë, ou du Corps, ou celle de la Pensée ou de l'Esprit. Les vnes nous representent des Estres simples, les autres des Estres composez; à raison dequoy les vnes sont dites des Idées simples, & les autres des Idées composées: Et ce que vous devez icy remarquer, c'est que les Idées simples sont tousiours veritables, dautant que la chose qu'elles nous font connoistre, est, ou du moins peut-estre dans la Nature, de la maniere que nous la connoissons; parce qu'une Idée simple ne nous representant iamais qu'un attribut essentiel, ne peut pas manquer d'estre claire & distincte; dautant que l'obscurité & la confusion qui se rencontre quelque fois dans les Idées composées, vient de ce que nous ioignons ensemble des Notions & des proprietétez qui sont incompatibles. Vous remarquerez encore que pour connoistre si une Idée est simple ou composée, il faut prendre garde si l'on ne peut point apercevoir les proprietétez qu'elle renferme les vnes sans les autres; car lors que cela arriue, c'est une marque infailible qu'elle est composée; ainsi l'Idée des Hommes, qui comprend la pensée & l'estenduë est l'Idée d'un Estre composé; dautant que ie puis apercevoir reciproquement l'une de ses proprietétez sans l'autre, & partant elles peuuent estre mises separément.

Il y a encore quelques vnes de nos Idées les-

quelles nous representent seulement les diuers actes de l'entendement ou de la volonté, & les autres nous font de plus conceuoir quelque objet extérieur; enfin il y en a vne qui nous represente vn Estre necessaire, que nous apellons Dieu; les les autres des Estres qui excitent bien actuellement, mais non pas necessairement, & des autres des choses purement possibles. Surquoy il y a encore deux choses à remarquer, la premiere, que toutes les Idées que nous auons des choses enferment la Notion de l'existence actuelle ou possible, mais qu'il n'y a que l'Idée de Dieu dans laquelle l'existence necessaire soit comprise. La seconde, que bien qu'il n'y ait point d'Idée qui contienne tant d'attributs que celle de Dieu, neanmoins parce qu'elle les comprend d'une maniere qui les rend tous inseparables & identifiez, l'on peut assurer qu'il n'y en a point de plus simple qu'elle.

La troisieme opposition des Idées se tire des puissances auxquelles elles seruent: car les vnes apartiennent aux sens, les autres à l'imagination, & les autres enfin à l'entendement pur.

La quatrieme se tire des causes qui contribuent à leur production; car les vnes viennent simplement de l'Esprit, & bien que les autres en procedent aussi, neanmoins c'est à l'occasion de son Corps qu'il les produit.

Enfin, auant que de finir ce Chapitre il faut que je dise vn mot de cette celebre question, sçauoir,

si les Idées de l'Esprit sont nées avec luy, ou si elles sont acquises; ie répons qu'elles sont l'un & l'autre; Elles sont nées avec luy, non seulement parce qu'il ne les a jamais receuës des sens; mais encore parce qu'il est créé avec la faculté de penser & de les former, laquelle en est la cause prochaine & principale; De la mesme façon que l'on dit que les gouttes ou la grauelle sont naturelles à certaines familles, quand les personnes qui y naissent apportent les dispositions prochaines à ces maladies. Mais ces Idées sont acquises, & non pas naturelles, si par ce mot de naturelles on entend qu'elles soient dans la substance de l'Ame comme dans un reservoir, à la maniere qu'on dispose des tableaux dans une galerie, pour les considérer quand on veut; Car il n'y a aucune d'elles en particulier qui exige d'estre actuellement présente à nostre Esprit, qui estant, une Substance qui pense, ne peut rien auoir actuellement présent dont il n'ait connoissance. C'est pourquoy elles ne sont contenuës dans l'Esprit qu'en puissance & non pas en acte, à peu près à la maniere que les figures sont contenuës dans un morceau de cire; en quoy il y a cette difference à remarquer, que dans la cire cette puissance est seulement passive, au lieu que dans l'Esprit elle est aussi active.

Ie conclus donc avec Monsieur Descartes, que l'Esprit n'a pas besoin d'aucunes Idées naturelles qui soient différentes de la faculté qu'il a de pen-

fer; Ce qui me semble si clair, que j'auoüe ingenuëment que ie ne vois pas qu'elle raison Monsieur le Roy peut auoir eu de contredire cette proposition: car vous devez remarquer, que lors que Monsieur Descartes a dit que quelques-vnes des Idées de l'Esprit estoient nées avec luy, ce n'a pas esté son dessein d'auancer que l'Esprit eust besoin d'aucunes Idées qui fussent différentes de sa faculté de penser; mais c'a esté seulement pour distinguer les Idées qui sont les plus familières & naturelles à l'Esprit, d'avec celles qui ont plus de commerce avec les sens. Il semble que Porphyre ait esté dans le mesme sentiment que Monsieur Descartes, lors qu'il a ainsi définy la memoire, *Memoria non est imaginum Custos, sed facultas qua ex rebus mente Conceptis propositum denuo promere potest.* Car en effet, bien que ces Idées soient les tableaux de tout ce que nous conceuons, il ne faut pas se persuader que l'Esprit en apporte aucuns en naissant, ny qu'il reserue ceux qu'il a vne fois formez; Au contraire les premiers s'éuanoüissent lors que les seconds sont produits, tout ainsi que les figures qu'on donne à vn morceau de cire effacent les autres; Et s'il reste quelque chose des premières Idées, c'est seulement qu'elles acquierent vne plus grande familiarité avec l'Esprit, laquelle fait qu'il les reproduit & les conçoit mieux la seconde fois que la première.

*De la volonté.*

CHAP. XI.

**N**OUS n'auons pas seulement la faculté d'apercevoir, qui est vne puissance passive, mais nous en auons encore vne autre active que nous apellons la faculté de vouloir, c'est à dire de choisir ou de nous déterminer de nous mesmes à tout ce à quoy nous nous déterminons, que nous nommons Volonté ou libre Arbitre. Pour bien connoistre cette faculté active nous deuons premierement considerer quelle est sa nature, & en quoy elle consiste; Secondement, que nous auons en nous vne telle puissance; Et enfin, qu'elle ne laisse pas d'estre libre quoy qu'elle dépende de Dieu.

L'essence de cette faculté consiste premièrement en ce que c'est le principe actif de toutes les actions de l'Esprit, qui de luy mesme & par luy mesme, sur ce que l'entendement aperçoit, choisit, & se determine à embrasser, ou à fuir, ou à demeurer suspendu quand la chose n'est pas encore assez clairement aperceüe. Secondement elle consiste en ce qu'elle est telle, que dans le mesme temps precisement que l'Entendement luy propose le vray ou le faux, le bien ou le mal, distinctement & sans obscurité, elle se détermine infailliblement

ment

ment à embrasser l'un & à fuir l'autre; Mais lorsque la vérité ou la fausseté, le bien ou le mal, ne luy est proposé qu'obscurément & confusément; & que l'Esprit s'aperçoit de cette obscurité, & confusion, cette faculté ne luy permet pas de se déterminer, mais elle le tient suspendu autant de temps qu'il remarque cette obscurité. Troisièmement, la nature de cette faculté consiste en ce qu'elle est tellement libre, qu'il y auroit de la contradiction à dire qu'aucun agent extérieur pût tellement violenter sa liberté, qu'il luy pût faire vouloir quelque chose malgré elle. La source de cette liberté vient premièrement de ce que c'est l'Esprit qui se détermine de luy mesme; Et secondement, de ce que notwithstanding qu'il suive & embrasse infailliblement le bien qu'il connoist clairement, toutesfois par le moyen de cette faculté c'est toujours librement qu'il le fait, & il pourroit (absolument parlant) ne le point faire, suivant la manière que nous dirons tantost. Nous apellons donc volonté en tout ce traité, cette Puissance active & élective, par laquelle l'Esprit se détermine librement à faire ou à ne faire pas une telle chose, à affirmer ou nier; & en un mot, cette force qu'il a de produire de luy mesme, & sans y estre violenté, toutes les actions & pensées qui marquent quelque choix & discernement. Ceux qui mettent l'essence de la liberté dans l'indifférence ont pris ce terme dans un sens bien éloigné de celui que



luy donne Monsieur Descartes dans sa 4. Meditation, où il le prend pour cet Estat de l'Ame dans lequel l'Esprit ne voyant rien de clair & de distinct dans son objet n'a pas plus d'inclination à le fuir qu'à l'embrasser. C'est de cette maniere qu'il faut entendre ses paroles, *Neque enim necesse est in utramque partem ferri posse ut sim liber*, c'est à dire, il n'est pas nécessaire que ie ne sente pas plus de pente d'un costé que d'autre pour estre libre.

„ Car, dit-il ensuite, *sed contra, quo magis in unam*  
 „ *partem propendeo, siue quia rationem veri & boni*  
 „ *in ea euidenter intelligo, siue quia Deus intima cogi-*  
 „ *tionis meae ita disponit, tanto liberius illam eligo; nec*  
 „ *sane diuina gratia, nec naturalis cognitio unquam*  
 „ *imminuunt libertatem; sed potius augent, & corro-*  
 „ *borant, indifferentia autem illa quam experior, cum*  
 „ *nulla me ratio in unam partem magis quam in alte-*  
 „ *ram impellit, est infimus gradus libertatis, & nullam*  
 „ *in ea perfectionem, sed tantum modo in cognitione de-*  
 „ *fectum, siue negationem quandam testatur; nam si*  
 „ *semper quid verum & bonum sit clarè viderem, nun-*  
 „ *quam de eo quod esset iudicandum vel eligendum delibe-*  
 „ *rarem; atque ita quamuis planè liber numquam tamen*  
 „ *indifferens esse possem*: C'est à dire, Mais au con-  
 „ traire, plus ie panche vers un costé, soit que  
 „ ie connoisse éuidemment que le bien & le vray  
 „ s'y rencontrent, soit que Dieu dispose ainsi  
 „ l'interieur de ma pensée, d'autant plus libre-  
 „ ment i'en fais choix & ie l'embrasse; & certes  
 „ la grace Diuine & la connoissance naturelle bien

loin de diminuer la liberté, l'augmentent plu-  
 tost & la fortifient. De sorte que cette indiffe-  
 rence que ie sens lors que ie ne suis point empor-  
 té vers vn costé plustost que vers vn autre par le  
 poids d'aucune raison, est le plus bas degré de  
 la liberté, & fait plustost paroistre vn défaut ou  
 vn manquement dans la connoissance, qu'une  
 perfection dans la volonté ; Car si ie voyois  
 toujours clairement ce qui est vray & ce qui est  
 bon, ie ne serois jamais en peine de deliberer  
 quel jugement & quel choix ie deurois faire,  
 & ainsi ie serois entierement libre, sans iamais  
 estre indifférent. C'est donc seulement lors que  
 l'indifférence est prise pour cet estat neutre de  
 l'Ame, dans lequel elle se trouue quand elle ne  
 sçait à quoy se determiner, que Monsieur Des-  
 cartes a aduancé que la liberté ne cōsistoit pas dans  
 l'indifférence : Enquoy certes il y a grande raison ;  
 car qui peut nier qu'il n'y a rien que nous fassions si  
 volontiers & si librement que les choses où nous  
 ne voyons pas la moindre raison de hesiter ou de  
 douter ? Mais il n'a pas nié que ce ne fust dans l'in-  
 différence que la liberté se rencontre, lors que  
 ce terme est pris, comme il est ordinairement  
 dans l'Ecole, pour le pouuoir que nous auons  
 de faire ou de ne faire pas vne mesme chose, &  
 afin que vous n'en doutiez pas, voicy comment  
 il a luy-mesme expliqué la pensée dans la 112. Let-  
 tre du premier Volume. Pour le libre Arbitre, "  
 ie suis entierement d'accord avec le R. R. P, & "

„ pour expliquer encore plus nettement mon opi-  
„ nion , ie desire premierement que l'on remarque  
„ que l'indifference me semble signifier propre-  
„ ment cét estat , dans lequel la Volonté se trou-  
„ ue ; lors qu'elle n'est point portée par la connois-  
„ sance de ce qui est vray , ou de ce qui est bon , à  
„ suiure vn party plustost que l'autre ; Et c'est en  
„ ce sens que ie l'ay prise , quand j'ay dit que le  
„ plus bas degré de la liberté consistoit à se pou-  
„ uoir determiner aux choses auxquelles nous som-  
„ mes tout à fait indifferens. Mais peut estre que  
„ par ce mot d'indifference , il y en a d'autres qui  
„ entendent cette faculté positive que nous auons  
„ de nous determiner à l'un ou à l'autre de deux  
„ contraires , c'est à dire , à poursuiure ou à fuir , à  
„ affirmer ou nier vne mesme chose : Surquoy j'ay  
„ à dire que ie n'ay iamais nié que cette faculté po-  
„ sitive ne se trouuast dans la Volonté ; tant s'en  
„ faut , j'estime qu'elle s'y rencontre , non seule-  
„ ment toutes les fois qu'elle se determine à ces  
„ sortes d'actions , où elle n'est point emportée  
„ par le poids d'aucune raison vers vn costé plu-  
„ tost que vers vn autre ; mais mesme qu'elle se  
„ trouue meslée dans toutes ses autres actions ; en  
„ telle sorte qu'elle ne se determine iamais qu'elle  
„ ne la mette en vſage ; iusques là-mesme que lors  
„ qu'une raison fort évidente nous porte à vne  
„ chose , quoy que moralement parlant il soit dif-  
„ ficile que nous puissions faire le contraire , par-  
„ lant néanmoins absolument nous le pouvons ;

car il nous est tousiours libre de nous empescher  
 de poursuiure vn bien qui nous est clairement  
 connu, ou d'admettre vne verité qui paroist  
 euidente, pourueu seulement que nous pen-  
 sions que c'est vn bien de témoigner par là la li-  
 berté de nostre franc Arbitre. De plus il faut re-  
 marquer que la liberté peut estre considrée  
 dans les actions de la Volonté, ou auant qu'el-  
 les soient exercées, ou au moment mesme qu'on  
 les exerce; Or il est certain qu'estant considrée  
 dans les actions de la Volonté auant qu'elles  
 soient exercées, elle emporte avec soy l'indif-  
 ference prise dans le second sens que ie la viens  
 d'expliquer, & non point dans le premier; c'est  
 à dire, qu'auant que nostre volonté soit deter-  
 minée, elle est tousiours libre, & à la puissance  
 de choisir l'une ou l'autre de deux contraires;  
 mais elle n'est pas tousiours indifferente, prenant  
 ce mot dans le premier sens; au contraire nous  
 ne deliberons iamais que pour nous oster de  
 cet estat où nous ne sçauons quel party prendre  
 ou pour nous empescher d'y tomber. Et bien  
 qu'en oposant nostre propre iugement au com-  
 mandement des autres, nous ayons coustume  
 de dire que nous sommes plus libres à faire les  
 choses dont il ne nous est rien commandé, &  
 où il nous est permis de suiure nostre propre  
 iugement, qu'à faire celles qui nous sont com-  
 mandées ou defenduës; toutesfois en oposant  
 nos iugemens ou nos connoissances les vnes aux

„ autres , nous ne pouuons pas ainſi dire que  
„ nous ſoyons plus libres à faire les choſes qui ne  
„ nous ſemblent ny bonnes ny mauuiſes , ou  
„ dans leſquelles nous voyons autant de mal que  
„ de bien , qu'à faire celles où nous voyons beau-  
„ coup plus de bien que de mal : Car la grandeur  
„ de la liberté conſiſte , ou dans la grande fa-  
„ cilité que l'on a à ſe déterminer , ou dans le  
„ grand vſage de cette puiffance poſitiue que nous  
„ auons de ſuiure le pire , encore que nous connoiſ-  
„ ſions le meilleur. Or eſt-il que ſi nous embras-  
„ ſons les choſes que noſtre raiſon nous perſuade  
„ eſtre bonnes , nous nous déterminons alors avec  
„ beaucoup de facilité , & que ſi nous faiſons le  
„ contraire , nous faiſons alors vn plus grand vſa-  
„ ge de cette puiffance poſitiue ; & ainſi nous pou-  
„ uons touſiours agir avec plus de liberté touchant  
„ les choſes où nous voyons plus de bien que de  
„ mal , que touchant celles que nous apellons in-  
„ différentes. Et en ce ſens-là auſſi , il eſt vray  
„ de dire , que nous faiſons beaucoup moins libre-  
„ ment les choſes qui nous ſont commandées , &  
„ auſquelles ſans cela nous ne nous porterions ia-  
„ mais de nous meſmes que nous ne faiſons celles  
„ qui ne nous ſont point commandées ; d'autant  
„ que le iugement qui nous fait croire que ces  
„ choſes-là ſont difficiles , s'opole à celuy qui nous  
„ dit qu'il eſt bon de faire ce qui nous eſt com-  
„ mandé ; leſquels deux iugemens , d'autant  
„ plus également ils nous meuuent , & plus met-

tent-ils en nous de cette indifférence prise dans  
 le sens que j'ay le premier expliqué, c'est à dire, «  
 qui met la volonté dans vn estat à ne sçauoir à «  
 quoy se determiner. Maintenant la liberté estant «  
 considérée dans les actions de la Volonté au «  
 moment mesme qu'elles sont exercées ; alors «  
 elle ne contient aucune indifférence en quelque «  
 sens qu'on la veuille prendre ; parce que ce qui se «  
 fait , ne peut pas ne se point faire, dans le temps «  
 mesme qu'il se fait ; mais elle consiste seulement «  
 dans la facilité qu'on a d'operer , laquelle à me- «  
 sure qu'elle croist, à mesure la liberté augmente ; «  
 Et alors , faire librement vne chose, ou la faire «  
 volontiers, ou la faire volontairement ne sont «  
 qu'une mesme chose , & c'est en ce sens-là que «  
 j'ay écrit , que ie me portois d'autant plus libre- «  
 ment à vne chose, que ie m'y sentoys poussé par «  
 plus de raisons ; parce qu'il est certain que no- «  
 stre Volonté se meut alors plus facilement , & «  
 avec plus d'impetuosité. «

Il y a encore vn autre endroit dans la 115. Let-  
 tre du premier volume, où il répète presque les  
 mesmes choses, neanmoins parce qu'il me sem-  
 ble qu'il s'y est dauantage expliqué, ie croy qu'il  
 est à propos de l'adjouter icy ; Et l'on ne doit pas  
 trouuer mauuais si ie rapporte ainsi plusieurs pas-  
 sages de Monsieur Descartes , puis que ie ne pre-  
 tends debiter icy que ses pensées, & donner seu-  
 lement vn supplément de ce qu'il auroit dit de la  
 nature de l'Esprit , à la fin du Traitté de l'Hom-

me, si la mort ne l'eust empesché de l'acheuer.

„ Ie vous supplie de remarquer, dit-il, que ie n'ay  
 „ point dit que l'Homme ne fust indifferent que là  
 „ où il manque de connoissance, mais bien qu'il  
 „ estoit d'autant plus indifferent qu'il connoist  
 „ moins de raisons qui le portent à choisir vn par-  
 „ ty plustost que l'autre: ce qui ne peut, ce me  
 „ semble, estre nié de personne; & ie suis d'accord  
 „ avec vous en ce que vous dites qu'on peut sus-  
 „ pendre son iugement; Mais i'ay tasché d'expli-  
 „ quer le moyen par lequel on le peut sus- pendre:  
 „ Car il est ce me semble certain que *ex magna*  
 „ *lucē in intellectu sequitur magna propensio in volun-*  
 „ *tate*; En sorte que voyant tres clairement qu'v-  
 „ ne chose nous est propre, il est tres-mal aisé, &  
 „ mesme comme ie croy impossible, pendant  
 „ qu'on demeure en cette pensée, d'arrester le  
 „ cours de nostre desir. Mais parce que la nature  
 „ de l'Ame est de n'estre quasi qu'un moment at-  
 „ tentiue à vno mesme chose, si-tost que nostre  
 „ attention se détourne des raisons qui nous font  
 „ connoistre que cette chose nous est propre, &  
 „ que nous retenons seulement en nostre memoire  
 „ qu'elle nous a paru desirable, nous pouuons  
 „ représenter à nostre Esprit quelqu'autre raison  
 „ qui nous en fasse douter, & ainsi suspendre no-  
 „ stre iugement, & mesme aussi peut-estre en for-  
 „ mer vn contraire. Ainsi puisque vous ne mettez  
 „ pas la liberté dans l'indifference precisement,  
 „ ( c'est à dire dans cette neutralité ) mais dans

Vne

vne puissance réelle & positive de s'y determi-  
 ner, il n'y a de difference entre nos opinions que  
 pour le nom; Car j'auoüe que cette puissance  
 est dans la volonté; mais parce que ie ne vois  
 point qu'elle soit autre, lors qu'elle est accom-  
 pagnée d'indifference, que vous aduoüez estre  
 vne imperfection, que quand elle n'en est point  
 accompagnée, & qu'il n'y a rien dans l'enten-  
 dement que de la lumiere, comme dans celui  
 des bien-heureux, qui sont confirmez en gra-  
 ce, ie nomme generalement libre tout ce qui  
 est volontaire; & vous voulez restreindre ce  
 nom à la puissance de se determiner qui est ac-  
 compagnée d'indifference; Mais ie ne desire  
 rien tant touchant les noms que de suiure l'usa-  
 ge & l'exemple. Il dit encore vn peu plus bas:  
 Mais ie vous auoüe que par tout où il y a occa-  
 sion de pecher il y a de l'indifference; Et ie ne  
 croy point que pour mal faire il soit besoin  
 de voir clairement que ce que nous faisons est  
 mauvais, il suffit de le voir confusement, ou  
 seulement de se souuenir qu'on a iugé autrefois  
 que cela l'estoit, sans le voir en aucune façon,  
 c'est à dire sans auoir attention aux raisons qui  
 le prouuent: car si nous le voyions claire-  
 ment, il nous seroit (moralelement parlant) im-  
 possible de pecher, pendant le temps que nous  
 le verrions de cette sorte. C'est pourquoy l'on  
 dit que *omnis peccans est ignorans*. Et on ne lais-  
 se pas de meriter, bien que voyant tres-claire-



„ ment ce qu'il faut faire on le fasse infaillible-  
 „ ment, & sans aucune indifférence, comme a  
 „ fait IESVS-CHRIST en cette vie: car l'Homme  
 „ pouuant n'auoir pas tousiours vne parfaite at-  
 „ tention aux choses qu'il doit faire, c'est vne  
 „ bonne action que de l'auoir, & de faire par son  
 „ moyen que nostre volonté suiue tellement la  
 „ lumiere de nostre entendement, qu'elle ne soit  
 „ point du tout indifférente. Au reste, ie n'ay point  
 „ écrit que la grace empeschât entièrement l'in-  
 „ différence; mais seulement qu'elle nous fait  
 „ pencher d'auantage vers vn costé que vers l'au-  
 „ tre, & ainsi qu'elle la diminuë, bien qu'elle ne  
 „ diminuë pas la liberté; D'où il suit ce me sem-  
 „ ble que cette liberté ne consiste pas dans l'indif-  
 „ férence:

Vous pouuez voir par ces passages, que sui-  
 uant la pensée de Monsieur Descartes la volonté  
 „ & la liberté, *Tantum in eo consistit*, comme il dit  
 „ dans la 4. Meditation, *quod idem facere vel non fa-*  
 „ „ cere (*hoc est affirmare vel negare, prosequi, vel fugere*)  
 „ „ possumus; *Vel potius in eo tantum, quod ad id quod*  
 „ „ nobis ab intellectu proponitur, affirmandum vel ne-  
 „ „ gandum, siue prosequendum vel fugiendum ita fero-  
 „ „ mur, *ut à nullâ vi externâ nos ad id determinari sen-*  
 „ „ tiamus: c'est à dire, la volonté ou la liberté du  
 franc Arbitre, consiste seulement en ce que nous  
 pouuons faire vne mesme chose, ou ne la faire  
 pas; par exemple, affirmer ou nier, rechercher  
 ou fuir; ou plustost elle consiste seulement en ce

que pour affirmer ou nier, rechercher ou fuir les choses que l'Entendement nous propose, nous agissons de telle sorte, que nous ne sentons point qu'aucune force extérieure nous y contraigne; & ainsi quand il dit que la liberté ne consiste pas dans l'indifférence, c'est qu'il prend ce nom pour cet état dans lequel l'Esprit ne voit point de raisons qui le portent plus d'un côté que d'autre, & non pas comme on fait dans l'Ecole pour cette puissance positive que nous avons d'agir ou de n'agir pas, qu'il reconnoît que la Volonté met en usage dans toutes ses actions. Vous pouvez voir aussi qu'il dit que lors que l'Entendement est attentif à contempler la bonté ou la vérité d'une chose qui luy paroît si clairement & si distinctement qu'il ne reste dans l'Esprit aucune raison d'en douter; La Volonté s'attache d'elle-même, & se joint infailliblement à cette vérité ou bonté; ce qui est très-vray & conforme à cette maxime de la Morale, que *Voluntas non potest amplecti malum quia malum*, c'est à dire, que la Volonté ne peut embrasser un mal en qualité de mal, & qu'elle reconnoît clairement estre tel à son égard, & partant elle doit s'attacher infailliblement au bien qu'elle reconnoît pour tel sans qu'il luy reste aucun lieu de hésiter. C'est en ce sens que Monsieur Descartes a dit qu'il suffisoit de bien juger pour bien faire; Car si l'Entendement ne représentoit jamais rien à l'Esprit qui ne fust si clair, & si évident qu'il n'en pût douter, la Volonté ne

pourroit iamais manquer en son élection ; Mais dautant que pendant que nostre Esprit est vny au Corps, il ne peut estre long-temps attentif à la mesme chose, & que l'Entendement n'a pas souuent des connoissances claires & distinctes du bien & du mal, & sans aucun mélange d'obscurité & de confusion, & que quand bien il en auroit, la Volonté l'en peut détourner, & l'obliger à considérer l'exercice de sa liberté comme le plus grand de tous ses biens, quoy qu'elle s'atache infailliblement au bien reconnu pour tel ; elle retient pourtant tousiours, absolument parlant, la puissance de luy refuser son consentement, de suspendre son iugement, ou d'en former vn contraire au precedent, & de dire avec Medée, *Video meliora proboque, deteriora sequor*, ce qui n'arriue pourtant presque iamais.

Pour conceuoir en tout cecy comment nostre Volonté se meut, remarquez premierement que lors que l'Esprit aperçoit quelque Idée, la premiere chose qu'il fait, c'est de s'y ioincre par sa Volonté, si cette perception est claire & distincte, c'est à dire, d'y acquiescer & d'y consentir ; mais s'il y reconnoist quelque obscurité, ne pouuant pas y acquiescer pendant ce temps-là, il refuse son consentement, & cela s'appelle iuger, ce qui n'est autre chose que donner ou refuser son consentement aux choses que l'Entendement aperçoit. Or comme la verité consiste dans vn indiuisible, dautant qu'une chose est, ou n'est pas, & qu'il

n'y a point en cela de milieu; la Volonté ne peut pas suspendre son jugement ou refuser son consentement, entre deux propositions contraires ou contradictoires, dont l'une paroît plus claire, autrement qu'en détournant l'entendement, & l'empêchant d'y estre attentif. Apres cette premiere démarche de l'Esprit, si cette Idée contient quelque perfection qui luy soit propre, pour lors la Volonté n'acquiesce pas seulement à cette perception; mais elle s'achemine de plus vers elle, & se joint à son objet par les desirs, les amours & les autres mouvemens; & si cette Idée au contraire luy represente quelque imperfection qui luy puisse nuire & l'offenser, pour lors l'Esprit par sa Volonté se separe de cet objet autant qu'il peut par des mouvemens opposez aux premiers, & n'a pour luy que de la haine & de l'auersion: Mais si on luy propose deux objets, la Volonté se porte infailliblement à celuy qui paroît le meilleur à l'Entendement, pouruëu qu'il soit aperceu clairement, & sans qu'il reste aucun lieu de hesiter, pendant que l'Esprit est attentif à le contempler; Car si tost que son attention se perd, la Volonté peut suspendre ou changer son premier mouvement.

Observez en second lieu, que bien que la volonté & le franc arbitre ne soient réellement que la mesme chose, néanmoins ils sont en quelque façon differens: Car par la volonté nous entendons principalement τὸ ἐφ' ἡμῶν, τὸ αὐτοκίνητον, τὸ ἐκού-

τον & αὐτοξούσιον, c'est à dire ce principe par lequel  
 l'Esprit se determine de luy mesme, & fait tous  
 les mouuemens & toutes les actions que nous  
 sentons venir de nous mesmes; & par le franc  
 arbitre nous entendons τὸ αἰσικὸν, & θεωρητικὸν,  
 c'est à dire, ce mesme principe en tant qu'il a le  
 pouuoir de choisir. C'est à raison de l'un & de  
 l'autre que nous portons principalement l'Image  
 de Dieu; Car considerant toutes nos autres puis-  
 sances, l'entendement, la memoire & l'imagina-  
 tion, nous les trouuons extremement bornées &  
 limitées, & nous formons en mesme temps l'Idée  
 d'autres semblables facultés plus amples, & mes-  
 me infinies, lesquelles nous reconnoissons sans  
 difficulté ne pouuoir appartenir qu'à Dieu; Mais  
 pour nostre volonté, si nous la regardons formel-  
 lement en elle mesme; en tant que c'est cette puis-  
 sance par laquelle nous nous portons de nous mes-  
 me à faire librement vne chose ou ne la pas faire,  
 nous l'experimentons en nous si grande, que nous  
 n'en conceuons point d'autre qui soit plus ample  
 & plus estendue, & ainsi il me semble que nous  
 ne possédons point de faculté qui nous approche  
 dauantage de Dieu, & nous en fasse auoir la res-  
 semblance. Ce n'est pas que la volonté diuine,  
 à la regarder d'un autre costé, ne soit infiniment  
 plus parfaite que la nostre, d'autant qu'elle est ac-  
 compagnée d'une puissance & d'une connoissan-  
 ce infinie, & qu'elle s'estend à bien plus d'ob-  
 jets, outre que nostre volonté presupposant l'a-

tion de l'entendement pour agir, à coustume  
 de pancher du costé qu'elle aperçoit quelque  
 clarté, & quelque bonté, & ainsi n'est iamais  
 indifferente, à proprement parler, que là où elle  
 manque de connoissance; Mais celle de Dieu est  
 souverainement indifferente, parce qu'en Dieu  
 connoistre & vouloir ne sont qu'une mesme cho-  
 se, dont l'une ne presuppose pas l'autre, & de plus  
 qu'il ne veut pas les choses parce qu'elles sont  
 bonnes, mais elles sont bonnes parce qu'il les  
 veut; Car estant le premier de tous les Estres, du-  
 quel toutes choses dépendent, aussi bien dans  
 leur essence que dans leur existence; comme de  
 leur cause principale & en quelque façon totale,  
 qui fait qu'elles sont & ce qu'elles sont, elles ne  
 sont bonnes & vraies, que parce qu'il les a ainsi  
 vouluës, entenduës, & produites. S'il y a quelque  
 difficulté à comprendre cette verité, la connoissan-  
 ce que nous auons que nostre entendement est  
 d'une fort petite estendue, & que la grandeur de  
 Dieu est infinie, la doit adoucir; Principalement  
 si nous prenons garde que l'Idée que nous auons  
 de luy nous enseigne qu'il n'y a en luy qu'une seu-  
 le action toute simple & toute pure, ce que ces  
 mots de Saint Augustin expriment fort bien, *quia*  
*videt, ea sunt*, parce qu'en Dieu *videre* & *velle* ne  
 sont qu'une mesme chose; D'où il s'ensuit, com-  
 me nous venons de dire, que sa volonté a dû  
 estre souverainement indifferente à toutes les cho-  
 ses qui ont esté faites ou qui se feront iamais; puis

qu'elle ne presuppose aucune connoissance de verité ou de bonté dans l'entendement Diuin qui la puisse faire pancher auant qu'elle agisse, mais qu'au contraire, parce que Dieu s'est determiné à faire les choses qui sont au monde, pour cela, comme il est dit dans la Genese, elles sont tres-bonnes, c'est à dire que la raison de leur bonté depend de ce qu'il les a ainsi voulu faire. Mais reuenons à nous pour examiner si nostre Esprit possède veritablement le pouuoir de se determiner librement de luy-mesme.

Est-il possible qu'il y ayt des Hommes assez insensibles pour en douter? Et si le témoignage de leur conscience n'est suffisant, quelle autre preuve peut-on apporter pour les conuaincre? Il faut sans doute qu'ils n'aient iamais fait reflexion sur aucunes de leurs actions. Pour les obliger à en faire quelqu'une, ie voudrois bien leur demander s'ils ne se sont iamais repentis de quoy que ce soit; Je ne pense pas qu'ils l'osent dire; Or s'ils se sont repentis, c'est sans doute de n'auoir pas fait ce qu'ils ont pû & dû faire, ou d'auoir fait le contraire de ce qu'ils deuoient & pouuoient : car on ne scauroit se repentir d'autre chose; Ils doiuent donc reconnoistre qu'ils ont eu le pouuoir de faire autre chose que ce qu'ils ont fait, & ainsi qu'ils ont le pouuoir de choisir, qui est ce que nous apellons la Volonté ou le libre Arbitre. Je ne sçache que deux raisons qui puissent leur donner lieu d'en douter; l'une est, qu'ils ne voient pas comment la

la

la Volonté suit infailliblement la Bonté qui luy est clairement représentée, & qu'elle puisse néanmoins ne la suiure pas si elle veut. Cette difficulté n'est pas bien grande, & s'ils prenoient bien garde à mille choses qui arriuent tous les jours, ils n'y en trouueroient point du tout; N'est-il pas vray qu'un Homme qui est transi de froid, & qui voit près de luy un grand feu, ne manquera pas de s'en approcher s'il le peut, quoy qu'absolument parlant, il pourroit ne le pas faire? l'infailibilité de l'action ne destruit donc pas la puissance d'en faire vne contraire.

Les Sceptiques, qui doutoient de tout, semblent pourtant n'auoir pas reuoké en doute ce pouuoir absolu de la Volonté, puis qu'ils ont voulu qu'on le mist en vſage, en ne choisissant pas ce qui paroist le meilleur, & ne laissant pas de douter & suspendre son iugement sur vne proposition qui paroist claire. Pourriez-vous penser que Sextus Empiricus eust enjoint vne semblable chose à ses Disciples, s'il n'auoit ressenti en luy-mesme qu'il pouuoit suspendre son iugement, lors mesme que la chose qu'on luy proposoit estoit si claire & si évidente, qu'il ne voioit pas comment la pouuoit refoudre: Lors que quelqu'un (c'est ainsi qu'il s'explique dans la 8. Page de son Ouvrage dont ie ne fais icy que traduire les paroles) nous apporte vne raison que nous ne pouuons détruire, nous luy disons qu'auant la naissance de celuy qui a introduit la Secte à laquelle



„ il s'est adonné , la raison que cette Secte luy  
„ fournit ne paroïssoit pas bonne , & toutesfois  
„ cette raison ne laissoit pas d'estre dans la Nature,  
„ quoy qu'elle ne fust pas connuë ; de mesme il  
„ se peut faire que la raison qui peut détruire celle  
„ qu'il apporte , se rencontre dans la Nature , bien  
„ qu'elle ne soit pas encore connuë ; Et partant , il  
„ ne faut pas ceder à la raison qu'il allegue , quel-  
„ que forte qu'elle paroisse dans le temps present.

Y a-il rien de plus ridicule que ce que dit icy  
Sextus Empiricus , Et ne diroit-on pas que c'est  
quelque Rabin qui attend que Elie ou le Messie  
tombent des Nuës pour luy éclaircir les difficul-  
tés de la Bible & du Talmud ? Quoy qu'il en soit,  
vne exemple de cette nature doit empêcher tout  
Homme bien sensé de reuoquer en doute , s'il a  
le pouuoir & la force de donner ou de refuser son  
consentement.

Mais ce n'est pas icy la plus grande difficulté  
qu'aportent ceux qui doutent de leur liberté , ils  
tirent leur plus forte objection de la considéra-  
tion de la grandeur de la toute-Puissance & de la  
prescience de Dieu , de laquelle tous les Estres libres  
& nécessaires dépendent , & de la difficulté qu'il  
y a de concevoir comment nostre Volonté en  
peut dépendre , & demeurer neanmoins libre.  
Monsieur Descartes a si bien parlé de cette que-  
stion que ie ne sçauois la resoudre n'y l'expliquer  
mieux qu'en raportant ce qu'il en dit en diuers en-  
droits de ses ouurages. Dans vne des Lettres qu'il

écrit à la Princesse Elizabeth, qui est la 8. du premier Volume, il met ces paroles : Que toutes les raisons qui prouuent l'existence de Dieu, & qu'il est la cause premiere & immuable de tous les effets qui ne dépendent point du libre arbitre des Hommes, prouuent ce me semble en même façon qu'il est aussi la cause de toutes les actions qui en dépendent. Car on ne sçauroit démonstrer qu'il existe, qu'en le considerant comme vn Estre souuerainement parfait ; Et il ne seroit pas souuerainement parfait, s'il pouvoit arriuer quelque chose dans le monde qui ne vint pas entierement de luy. Il est vray qu'il n'y a que la foy qui nous enseigne ce que c'est que la grace par laquelle Dieu nous esleue à vne beatitude surnaturelle ; Mais la seule Philosophie suffit pour connoistre qu'il ne sçauroit entrer la moindre pensée dans l'Esprit d'un Homme, que Dieu ne veuille, & n'ait voulu de toute Eternité qu'elle y entraist. Et la distinction de l'Ecole entre les causes vniuerselles & particulieres n'a point icy de lieu ; Car ce qui fait que le Soleil, par exemple, estant la cause vniuerselle de toutes les Fleurs, n'est pas cause pour cela que les Tulipes different des Roses, c'est que leur production dépend aussi de quelques autres causes particulieres, qui ne lay sont point subordonnées ; Mais Dieu est tellement la Cause Vniuerselle de tout, qu'il en est en même façon la Cause Totale, & ainsi rien ne

„ peut arriuer sans sa Volonté. l'adiousteray à Monsieur Descartes, que bien que toutes les choses dépendent de Dieu, comme il dit, c'est toutesfois differemment; car dans la production des effets auxquels nostre Volonté, ny celle d'aucun autre Agent libre ne contribuë rien, on peut dire qu'il a seulement eu égard à la sienne propre, par laquelle il s'est absolument déterminé de les produire d'une telle maniere dans vn tel temps; mais pour les effets auxquels nostre Volonté contribuë, il n'a pas seulement considéré la sienne, mais il a aussi enfermé le consentement de la nostre dans son decret, & ce n'est qu'après auoir preuë de qu'elle maniere elle se determineroit dans vne telle circonstance, qu'en consequence il a voulu absolument que tels effets arriuaissent. Il y a vn autre passage presque semblable dans la Lettre suiuiante du mesme Volume. Pour „ ce qui est du libre Arbitre, dit-il, ie confesse „ qu'en ne pensant qu'à nous mesme, nous ne „ pouuons ne le pas estimer independant; mais „ lors que nous pensons à la Puissance Infinie de „ Dieu, nous ne pouuons ne pas croire que toutes „ choses dépendent de luy, & par consequent „ que nostre libre Arbitre n'en est pas exempt; car „ il implique contradiction de dire, que Dieu „ ait créé des Hommes de telle nature que les „ actions de leur Volonté ne dépendent point de „ la sienne, parce que c'est le mesme que si on „ disoit que la Puissance est tout ensemble Fi-

nie & Infinie : Finie puis qu'il y a quelque chose qui n'en dépend point , & Infinie puis qu'il a pû créer cette chose indépendante. Mais commela connoissance de l'existence de Dieu ne nous doit pas empêcher d'estre asseurez de nostre libre Arbitre , parce que nous l'experimentons & le sentons en nous-mêmes , ainsi celle de nostre libre Arbitre ne nous doit pas faire douter de l'existence de Dieu ; car l'indépendance que nous experimentons & sentons en nous , & qui suffit pour rendre nos actions loüables ou blasmables , n'est pas incompatible avec vne dépendance qui est d'une autre nature , selon laquelle toutes choses sont sujettes à Dieu.

Il me semble qu'il a encore expliqué cette question plus clairement dans la premiere partie de ses Principes article 39. à peu près dans ces mêmes termes : Il est si évident que nous auons vne Volonté libre , qui peut donner son consentement , ou ne le pas donner quand bon luy semble , que cela peut estre conté pour vne de nos plus communes Notions ; Nous en auons eu au commencement vne preuue bien claire ; car au même temps que nous doutions de tout , & que nous suposions même que celuy qui nous a créé employoit son pouuoir à nous tromper en toutes façons , nous aperceuions en nous vne liberté si grande , que nous pouuions nous em-

„ pécher de croire ce que nous ne connoissons pas.  
„ encore parfaitement bien. Or ce que nous aper-  
„ ceuions distinctement pendant vne suspension  
„ si generale, & dont nous ne pouuions douter,  
„ est aussi certain qu'aucune autre chose que nous  
„ puissions iamais connoistre. Et deux articles plus bas;  
pour répondre à la difficulté que l'on peut auoir à  
accorder la liberté de nostre Volonté avec l'ordre  
de la Prouidence Eternelle de Dieu, il adjouste ces  
„ mots. Nous n'aurós point du tout de peine à nous  
„ en déliurer, si nous remarquons que nostre pen-  
„ sée est finie, & que la Science & Toute-puissan-  
„ ce de Dieu par laquelle il a non seulement con-  
„ nu de toute Eternité tout ce qui est ou qui peut  
„ estre, mais aussi il l'a voulu, est infinie; ce qui  
„ fait que nous auons bien assez d'intelligence  
„ pour connoistre clairement & distinctement  
„ que cette Puissance & cette Science sont en  
„ Dieu; mais que nous n'en auons pas assez pour  
„ comprendre tellement leur estendue, que nous  
„ puissions sçauoir comment elles laissent les  
„ actions des Hommes entierement libres & inde-  
„ terminées. Toutesfois la Puissance & la Science  
„ de Dieu ne nous doiuent pas empêcher de croire  
„ que nous auons vne Volonté libre; car nous  
„ aurions tort de douter de ce que nous aperce-  
„ uons interieurement, & sçauons par expe-  
„ rience estre en nous, parce que nous ne com-  
„ prenons pas vne autre chose que nous sçauons  
22 estre incomprehensible de sa nature. Monsieur

Descartes aporte vn exemple fort propre pour bien faire entendre cette matiere ; Il est couché dans la 10. Lettre du premier Volume adressée à la Princesse Elizabeth , où il parle ainsi. Si vn Roy qui a deffendu les Duels, & qui sçait “ tres-assurement que deux Gentils-Hommes “ de son Royaume, qui demeurent en diuerfes “ Villes sont en querelle, & tellement animez “ l'un contre l'autre que rien ne les sçauroit em- “ pêcher de se battre, s'ils se rencontrent ; si, dis-je, “ ce Roy donne à l'un d'eux quelque Commission “ pour aller à vn certain jour vers la Ville où est “ l'autre, & qu'il donne aussi Commission à cet “ autre, pour aller au mesme jour vers le lieu où “ est le premier, il sçait bien assurement qu'ils ne “ manqueront pas de se rencontrer, & de se battre, “ & ainsi de contreuenir à sa deffence ; mais il ne “ les y contraint pas pour cela ; & sa connoissance, “ & mesme la volonté qu'il a eüe de les y deter- “ miner en cette façon, n'empêche pas que ce ne “ soit aussi volontairement , & aussi librement “ qu'ils se batent lors qu'ils viennent à se rencon- “ trer, comme ils auroient fait, si ç'auoit esté par “ quelque autre occasion qu'ils se fussent rencon- “ trez, & ils peuuent aussi iustement estre punis, “ parce qu'ils ont contreuenü à sa deffence. Or ce “ qu'un Roy peut faire touchant quelques actions “ libres de ses Subjers , Dieu qui a vne pre- “ Science & vne Puissance Infinie, le fait infail- “ liblement touchant toutes celles des Hommes ;

„ Et auant qu'il nous ait enuoyez en ce monde,  
 „ il a sceu exactement quelles seroient toutes les  
 „ inclinations de nostre volonté, c'est luy mesme  
 „ qui les a mises en nous, c'est luy aussi qui a dis-  
 „ posé toutes les autres choses qui sont hors de  
 „ nous, pour faire que tels ou tels objets se pre-  
 „ sentassent à nos sens, en tel & tel temps, à l'oc-  
 „ casion desquels il a sceu que nostre libre arbitre  
 „ se détermineroit à telle ou telle chose, & il l'a  
 „ ainsi voulu, mais il n'a pas voulu pour ceta l'y  
 „ contraindre. Et comme on peut distinguer en  
 „ ce Roy deux differens degrez de volonté, l'un  
 „ par lequel il a voulu que ces deux gentils-hom-  
 „ mes se battissent, puis qu'il a fait qu'ils se rencon-  
 „ trassent, & l'autre par lequel il ne l'a pas voulu,  
 „ puis qu'il a deffendu les duels; Ainsi les Theolo-  
 „ giens distinguent en Dieu vne Volonté absoluë  
 „ & independante, par laquelle il veut que toutes  
 „ choses se fassent ainsi qu'elles se font, & vne au-  
 „ tre qui est relative, & qui se raporte au merite  
 „ ou démerite des Hommes, par laquelle il veut  
 „ qu'on obeïsse à ses loix.

Il y a mesme bien de la difference entre le de-  
 uoir d'un Roy & le pouuoir absolu de Dieu, d'au-  
 tant que les Roys & les Magistrats sont obligez  
 d'empescher tous les maux dont ils ont connois-  
 sance, quand ils y peuuent donner ordre, en telle  
 sorte qu'ils sont en quelque façon complices de  
 tous les maux qu'ils souffrent qu'on commette,  
 parce que l'autorité qu'ils ont receüe ne leur a  
 esté

esté donnée de Dieu que pour le bien de leurs sujets; Mais celle de Dieu est souveraine & absolument independante, & quoy qu'il preuoye les maux qui doiuent arriuer, il n'est pas obligé de les empescher, c'est assez qu'il ne les commande pas, & que bien loin de nous y contraindre, il nous donne les moyens de les éuiter.

Mais c'est assez parlé del'existence du Libre Arbitre, & de la nature de la volonté considerée en elle mesme; Et quoy que cela pût suffire pour connoistre son essence, toutesfois, afin de rendre tout ce que nous en auons dit plus intelligible, il est bon de la mettre en parallele avec la faculté d'apercevoir, qu'on appelle l'Entendement, quand ce terme est pris generalement. Nous auons desia dit cy-dessus que cette faculté estoit en quelque façon vne puissance passive, parce qu'elle presuppose tousiours l'action de la cause qui a donné la forme aux pensées dont elle s'aperçoit, & que la Volonté estoit vne puissance active, parce que toutes ses operations viennent tellement d'elle mesme, qu'elles ne peuuent proceder d'ailleurs; c'est en ce sens que l'Entendement est comme vn valet qui porte le flambeau pour éclairer sa Maistresse; mais c'est vn Valet infidele qui ne luy obeit pas bien, & qui ne l'éclaire pas tousiours, comme il seroit à souhaiter. Nous auons dit, de plus, qu'il sembloit que la Volonté procedoit plus du fond de l'Esprit, que l'Entendement; d'autant que nous sommes tousiours les Maistres



des operations de nostre Volonté, pour donner ou refuser nostre consentement ; mais nous ne le sommes pas ainsi de l'Entendement, pour apercevoir tout ce que nous voudrions, ou n'apercevoir précisément que ce que nous souhaiterions.

L'on pouroit demander icy, s'il est vray que l'operation de la Volonté presuppose tousiours la perception de l'Entendement, ou si cette derniere ne presupposeroit point quelquefois la premiere ? Pour resoudre cette question, vous remarquerez premierement, que ces deux facultez, quoy qu'elles semblent differentes, quand on les oppose l'une à l'autre, ne sont pourtant rien qu'un mesme Esprit considéré diuersement, selon qu'il patit ou qu'il agit, c'est à dire, qu'il aperçoit ou qu'il veut. Vous remarquerez secondement, que cét Esprit n'aperçoit rien immediatement que les diuerses formes de sa pensée, quelqu'un desquelles luy representent ce qui se passe en luy, & les autres, ce qui se fait au dehors ; & que bien qu'il soit vray que la perception de l'Entendement presuppose tousiours l'action de la cause qui donne la forme à la pensée dont il s'aperçoit, toutesfois, comme il ne se rencontre que rarement pendant cette vie que nostre Volonté soit cette cause, & que cela n'arriue que dans les pensées auxquelles nous nous determinons volontairement, & en celles que nous auons des choses purement Spirituelles, que nous auons pris grand soin de separer de toutes les especes Corporelles ; nous auons lieu

de croire que la perception de l'Entendement ne presuppose jamais, ou du moins fort rarement pendant cette vie; l'action de la Volonté, au contraire comme il est impossible que nous puissions former la volonté d'attacher nostre Entendement à la consideration d'aucune Idée, que nous n'en ayons auparavant quelque connoissance, du moins grossiere & confuse, nous auons lieu de penser que l'operation de la Volonté qui arreste ainsi l'Entendement à la consideration d'un objet, presuppose elle mesme quelque perception precedente dans l'Entendement, qui ait donné occasion à l'Esprit de former cette Volonté. Remarquez en troisieme lieu, qu'il n'est pas necessaire non plus que la perception de l'Entendement precede tousiours l'action de la Volonté, de telle maniere qu'il soit vray de dire que l'Entendement a acheué d'apercevoir auant que la Volonté ait commencé d'agir : Car bien que l'Esprit puisse apercevoir par l'Entendement, sans que la Volonté se determine à nier ou à affirmer, toutesfois, si nous examinons bien sa nature, & si nous considerons qu'un Homme ne trauaille pas moins lors qu'il s'empêche de tomber dans un precipice, & qu'il se retient sur le bord du penchant, que quand il descend ou qu'il monte, nous conceurons que la Volonté n'agit pas moins lors qu'elle delibere & qu'elle suspend son iugement, ou qu'elle oblige l'Entendement à estre attentif à ce qu'il aperçoit, pour distinguer ce qu'il y a de

clair & d'obscur, que lors qu'elle choisit & se determine à l'affirmation ou à la negation de ce que l'Entendement conçoit ; Et nous connoissons que l'Esprit n'aperçoit iamais par l'Entendement, sans qu'il mette en vſage le pouuoir qu'il a d'affirmer, de nier, ou de deliberer, & sans qu'il agisse par la Volonté.

Bien que l'objet de l'Entendement & de la Volonté soient en quelque façon égaux, parce qu'il n'y a rien qui ne soit connoissable, & à l'occasion dequoy nous ne puissions exercer le pouuoir que nous auons de choisir ; neanmoins ces deux facultez considerées dans l'exercice de leurs operations, ne sont pas d'une égale estenduë ; non seulement parce que l'Entendement ne sort point par ses operations hors de l'Esprit, ainsi que fait la Volonté, lors qu'elle meut nos membres comme il luy plaist ; mais encore principalement dautant que la Volonté peut donner son consentement à beaucoup plus de choses que l'Entendement n'en connoist dans le temps qu'elle le donne. Cela est si évident que ie m'estonne comment il se peut trouuer des personnes capables de nier cette Verité ; car qui est celuy qui ne s'est iamais trompé ? & qui par consequent ne doive auoüer que sa Volonté a donné son aprobatation à beaucoup plus de choses que son Entendement n'en connoissoit, & ce dautant que nous ne connoissons proprement que ce que nous apercevons clairement, puisque c'est par la seule évidence que

nous nous asseurons de la verité des choses. Et partant si nous nous trompons, c'est que nous donnons nostre approbation à des choses que nous ne connoissons point, puisque nous ne les apercevons pas évidemment.

Les différentes espèces des perceptions de l'Entendement ne me semblent pas avoir autant de diversité entre elles qu'en ont les actions de la Volonté. Et en effet ne paroist-il pas bien plus de différence entre aimer & hayr, affirmer ou nier, & mesme encore entre juger, & se joindre, ou se separer de volonté, que non pas entre sentir, imaginer, & entendre? Mais toutesfois cette diversité n'est point si grande que celle qui se trouve entre juger & apercevoir: car juger & se joindre de volonté c'est tousiours agir & choisir, donner ou refuser son consentement; Mais apercevoir, (au jugement mesme d'Aristote) c'est pâtre, voila pourquoy Monsieur Descartes a eu raison d'attribuer l'action de juger, non pas à l'Entendement, qui est vn principe passif, mais à la Volonté, qui est le principe de toutes les actions de l'Esprit. Ce n'est pas que la perception de l'Entendement ne se rencontre aussi dans le Jugement, mais comme elle y paroist moins que celle de la Volonté, & que c'est elle qui luy donne sa forme, il est bien plus raisonnable de luy attribuer cette fonction, comme à la plus noble; Que non pas à l'autre. Monsieur Hobbes objecte à cecy, que non seulement sçavoir qu'une chose est vraie, mais

„ aussi la croire ou luy donner son adieu, sont des  
„ choses qui ne dépendent point de la Volonté ;  
„ Car les choses qui nous sont prouuées par de  
„ bons argumens, ou seulement racontées com-  
„ me croyables ; soit que nous le veüillions, ou  
„ non, nous sommes contrains de les croire. A  
„ quoy Monsieur Descartes répond; Que quand  
„ il dit icy ; soit que nous veüillions ou que nous  
„ ne veüillions pas, nous donnons nostre creance  
„ aux choses que nous conceuons clairement,  
„ c'est de mesme que si on disoit, soit que nous  
„ veüillions, ou que nous ne veüillions pas, nous  
„ voulons & désirons les choses bonnes quand  
„ elles nous sont clairement connües ; car cette fa-  
„ çon de parler, soit que nous veüillions ou que  
„ nous ne veüillions pas n'a point de lieu en telle  
„ occasion, parce qu'il y a de la contradiction à  
„ vouloir & ne vouloir pas la mesme chose. Au  
„ reste Monsieur Descartes n'est pas le premier  
„ qui a mis le Iugement entre les choses qui apar-  
„ tiennent à la Volonté ; Car Simplicius, sçauant  
„ Peripateticien, & Epiëtete, semblent estre de  
„ cét auis, lors qu'ils placent l'Opinion entre les  
„ choses qui sont en nostre puissance, & du ressort  
„ de la Volonté : Voicy les paroles de Simplicius  
„ couchées, dans la septiesme page de son Com-  
„ mentaire sur Epiëtete. La Volonté ne peut  
„ estre émeuë par ce qui est au dehors, & bien que  
„ son objet soit externe, toutesfois la Volonté &  
„ son mouuement sont quelque chose d'interieur,

cômmes d'auoir telles ou telles opinions ; par exemple , que les richesses , la mort , ou autres choses sont bonnes , mauuaises ou indifferentes ; Car bien que ce que nous entendons dire aux autres nous puisse obliger à estre d'une telle ou telle opinion ; neanmoins nous n'opinions & ne iugeons pas comme des Perroquets , sans sçauoir ce que nous disons ; ainsi , bien que l'opinion puisse estre prouuée & excitée en nous , elle ne peut neanmoins y estre inserée ny mise , parce que c'est vn des mouuemens interieurs de nostre Esprit.

---

*De l'Esprit, considéré par raport à la durée,  
& au lieu.*

CHAP. XII.

**A**PRES auoir expliqué en quoy consiste la nature de l'Esprit, & auoir montré qu'il pense tousiours, & qu'il est immortel ; apres auoir aussi fait voir en quoy consiste l'essence des deux principales facultez qui composent sa nature, & qui en sont inseparables, l'ordre vouldroit que ie vinsse ensuite à l'explication de toutes les puissances inferieures qui dépendent de ces deux premieres: Mais d'autant que la pluspart ne se trouuent en l'Esprit que pendant qu'il est vny au Corps, ou du moins qu'il n'est pas aisé de les connoistre sans

ſçauoir ce que c'eſt que cette vnion, ( car comment expliquer ſans cela ce que c'eſt que le ſens; l'imagination, la memoire. Corporelle, la puiſſance de mouuoir, de parler, & enfin les paſſions de l'Ame ) & meſme que celles qui ſont les plus détachées du Corps ſe connoiſſent mieux en les comparant avec les autres; il me ſemble que auant que de venir à vne plus particuliere declaration de la maniere dont l'Eſprit exerce toutes ces fonctions; il faut que j'explique quelle eſt la façon dont ces deux ſubſtances. peuuent eſtre aliées. Et d'autant que c'eſt vne eſpece d'vnion que d'eſtre en meſme temps & en meſme lieu, auant que de parler plus expreſſément de cette alliance, ie dois ce me ſemble conſiderer comment la durée & le lieu peuuent conuenir à l'Eſprit.

Pour la durée, il eſt indubitable qu'elle conuient à l'Eſprit & au Corps de là meſme maniere; parce que l'un & l'autre n'eſtant rien de ſoy, & chacun d'eux ayant beſoin que l'Eſtre ſouuerain les produiſe, non ſeulement au premier inſtant de leur creation, mais encore dans tous les momens qu'ils perfeuerent d'eſtre, leur durée ne peut eſtre autre choſe qu'une continuelle reproduction, au moyen de laquelle ils perfeuerent dans leur exiſtence autant de temps qu'il plaiſt au Createur de les conſeruer; Ce qui rend bien le Corps & l'Eſprit capables de l'éternité qu'on appelle poſterieure, c'eſt à dire, de la durée qui ne doit iamais finir, mais non pas de celle qui n'a point eu de commencement.

cement, cela est à mon auis bien clair à ceux qui prennent garde que l'Idée de cette Eternité ne peut conuenir avec celles qu'ils ont de la Creature; Car d'un costé ils verront que la Creature, qui n'est rien de soy-mesme, est tellement imparfaite qu'il faut necessairement que sa durée soit successive, d'autant que la Creature ne sçauroit posseder en mesme temps, tous les atributs, modes, & accidens dont la nature est capable en plusieurs instans separés : Et de fait le Corps ne sçauroit estre en mesme temps rond & quarré, dans le repos & dans le mouuement, ny l'Esprit non plus ne sçauroit dans le mesme temps affirmer & nier la mesme chose, donner ou suspendre son Iugement; & enfin il ne sçauroit par vn seul acte de sa pensée auoir la perception de toutes les choses qu'il est capable de connoistre. D'autre costé, si l'on considere ce que c'est que l'Eternité, l'on connoistra que c'est comme vn centre au tour duquel les temps & les durées passageres roulent sans cesse; & tout de mesme que quelque lieu que vous designiez dans la superficie d'un cercle vous trouuerez tousiours des parties anterieures & posterieures : mais que tout au contraire le centre est indiuisible & immobile; de mesme on ne sçauroit conceuoir le téps sans partie anterieure & posterieure, ny l'Eternité avec elles, puisque c'est vne perfectiō de l'Estre simple de Dieu; & Boëce la définit admirablement bien, quand il dit, que l'Eternité n'est rien autre chose que *interminabilis vita tota simul & per-*



*fecta possessio* ; c'est à dire, la possession entiere, parfaite, & sans succession d'une vie sans fin. Surquoy vous remarquerez que le mot de vie se prend là pour l'existence d'une chose accompagnée de toutes les perfections dont elle est capable ; c'est pourquoy selon cette definition, estre eternal, c'est posséder entierement, parfaitement, & tout à la fois tous les attributs & perfections que la chose qui est dite eternelle peut posséder. Et dans cette definition ces mots de *tota simul*, ne signifient autre chose que posséder en mesme temps toutes ces perfections, & non pas successivement les vnes apres les autres, d'où il s'ensuit manifestement que les Creatures Corporelles & Spirituelles ne sçauroient avoir tousiours esté, d'autant qu'il est impossible qu'elles puissent posséder dans le mesme temps tous les attributs, modes, & qualitez dont elles sont capables ; elles ne sçauroient donc estre eternelles de cette espece d'Eternité.

Je passe à la seconde Question, & ie dis qu'estre dans un lieu, estant une propriété du Corps & de la substance estendueë, elle ne peut en aucune façon convenir à la substance qui pense, laquelle n'a point d'extension en elle mesme, & à qui l'on n'en peut attribuer qu'à raison du Corps auquel elle est unie. La raison en est évidente ; car si on entend parler du lieu interieur, ce n'est autre chose que l'espace qu'occupe chaque Corps, lequel ne differe de son estendueë que selon nostre façon de penser, en ce que nous la considérons dans le

Corps déterminée & singulière ; mais dans l'espace on considère cette étendue en general & indéterminement ; comme pouvant être remplie par tous les Corps qui succèdent à celui qui sort de la place, lesquels nous disons occuper le même espace, lors qu'ils sont de même grandeur & figure, & qu'ils sont dans le même lieu. Et pour lors, quand nous disons qu'ils occupent la même place, cela se doit entendre de la même manière que quand nous disons que c'est la même Rivière qui coule aujourd'hui, que celle qui couloit hier, ou que c'est le même vent qui souffle, ou le même feu qui brûle ; dans toutes ces façons de parler le mot de *même* ne désigne qu'une unité de genre ou d'espèce, & non pas une unité de nombre.

Pour le lieu extérieur, il est manifeste qu'il ne dit rien davantage que l'espace ou le lieu intérieur, sinon que dans celui-cy on considère davantage la figure & la grandeur du Corps qui est placé, & dans celui-là on prend principalement garde à la situation & au rang que tient ce Corps entre les autres. Il s'ensuit clairement de ceci, que l'on ne peut pas dire que l'Esprit puisse être de luy-même en aucun lieu. Il ne peut pas être dans le lieu intérieur ; car n'étant point étendu, le moyen qu'il pût remplir aucun espace ; & s'il n'en remplit aucun, quelle situation & quel rang peut-il avoir de luy-même entre les Corps. Toutesfois,

vn Corps, l'on peut dire qu'il est dans vn lieu plutôt que dans vn autre, à raison de cette vnion; car il n'est pas possible que le Corps auquel il est vny n'occupe quelque espace, & ne tienne quelque rang, & ne garde quelque situation entre les autres Corps; mais quand on dit que l'Esprit est dans vn tel lieu, & non pas dans vn autre, cela ne doit signifier autre chose, sinon que cét Esprit est alié à vn certain Corps, & non pas à vn autre; car hors de cét estat d'vnion, soit qu'il y aye des Corps au monde, ou qu'il n'y en ait point, il n'est pas possible de conceuoir qu'une substance, dont toute l'essence consiste à penser, puisse estre dans vn lieu, *Neque definitiue neque circumscriptiue*, ny que sa pensée luy puisse faire remplir aucun espace, ny donner aucun rang.

Ie sçay bien que l'on ne manquera pas de m'objecter deux choses; la premiere, qu'estre dans vn lieu est vn attribut de l'Estre créé aussi bien que d'estre dans vn certain temps, & ainsi que ce qui n'est en aucun lieu n'est point du tout. La seconde, que l'Esprit est finy, & ne peut pas estre par tout, & partant, que quand il ne seroit ioint à aucun Corps, ou que mesme il n'y en auroit aucun dans le monde, il ne seroit pas moins necessaire que cet Esprit répondit à vne certaine partie déterminée de l'immensité de Dieu, à raison de laquelle il seroit vray de dire qu'il occuperoit vn certain lieu.

Pour réponse à la premiere objection, ie dis

qu'elle n'est appuyée d'aucune raison, & n'a point d'autre fondement que la mauuaise coûtume que nous auons contractée de conceuoir tous les Estres à la maniere des Corps, & de leur attribuer tousiours quelque extension; C'est pourquoy ayant monsté que l'Esprit n'en a point, l'on n'a pas droit d'attribuer à l'Estre en general vne propriété qui ne conuient qu'aux choses estenduës. Le docteur Claubergius dans son Liure *De Cognitione Dei & nostri*, remarque fort bien que c'est le peuple qui a le premier donné cours à cette maxime, que tout ce qui est, occupe vn certain lieu; Aussi obserue-t-il qu'il n'a pas esté en cela suiuy des plus sçauans; Car Platon dans son Timée n'attribuë cette propriété qu'aux choses qui s'engendrent, lesquelles sont toutes Corporelles; Et Porphyre dans le petit liure qu'il a fait des choses qui nous conduisent à la connoissance des natures Spirituelles, dit manifestement, que tout Corps est dans vn lieu, mais qu'aucune chose Spirituelle n'y est; Sainct Augustin dans l'Epistre 57. semble aussi estre de cet auis, lors qu'il dit, *Tolle spatia sua Corporibus nusquam erunt, & quia nusquam erunt, nec erunt.* Vous voyez qu'il restraint cette maxime au seul Corps, & qu'il appuie mesme l'opinion de ceux qui ne distinguent pas l'estenduë de l'espace, de celle du Corps.

La seconde objection est plus considerable, il la faut diuiser pour l'affoiblir, & répondre à la premiere partie, qui dit que l'Esprit estant finy ne

peut pas estre par tout. Il est vray qu'il est finy par son essence & par son operation, mais non pas par sa quantité; Car n'estant point estendu il n'est proprement à cet égard ny finy ny infiny, ny par tout ny dans vn lieu déterminé. C'est la reponse du celebre Monsieur Hereboord sçauant Peripateticien, qui se moque de cette opinion de Scaliger le pere, qui dit que *Quanta sunt intelligentia, haud quantitate predicamentali, sed quantitate intelligibili, ut intellectus in eis intelligat unam partem qua non sit alia.* Et c'est bien avec raison qu'il s'en moque: car s'il estoit vray que l'Idée de l'Esprit nous representast plusieurs parties distinguées les vnes des autres, il seroit vray de dire, que cet Esprit seroit contenu dans le predicament ou la categorie de la quantité; & il ne seroit pas seulement estendu de la quantité qu'il appelle intelligible, mais aussi de la predicamentale, parce que pour lors ce seroit vne marque qu'elles pourroient exister separement; du moins par la toute Puissance de Dieu. Scaliger adjousté encore plus bas, que si les Intelligences ont des bornes, au delà desquelles on ne les peut plus designer, il est nécessaire qu'elles ayent quelque figure; Car la figure n'est pas, dit-il, l'extrémité du Corps, comme ont pensé les Anciens, mais la disposition de cette extrémité; Or tout ce qui est terminé l'est par quelque figure. *In quibus verbis* (dit le sçauant Hereboor) *Scaliger reuera à ianuâ aberrat; confundit, eum terminos essentia cum terminis quantitatis; neque*

*veram figuræ rationem tenet, sed quod formæ proprium  
est figuræ tribuit; Nitens falsissimo principio, nempe  
quod omne terminatum figurâ sit terminatum. Il ad-  
joute plus bas: Hoc eius argumentum sic redigimus  
ad absurdum. Omne terminatum figurâ terminatur;  
Essentia finita, ( præcisâ etiam figurâ ) est terminata;  
Ergo essentia finita ( præcisâ etiam figurâ ) terminatur  
figurâ.* ”

Passons à la seconde Partie de cette objection, qui soutient que l'Esprit doit répondre à vne certaine partie de l'Immensité de Dieu, ce qui est tres-vray, & non seulement l'Esprit, mais mesme toutes les Créatures quelles qu'elles soient sont enfermées & comprises dans cette immensité. Mais il se faut bien garder de la concevoir comme vne estendue infinie; laquelle contienne vne infinité de parties reelles ou virtuelles; Car Dieu n'est point estendu, & cette maniere de regarder l'Immensité de Dieu vient encore de la mauuaise coutume de ne rien concevoir qui ne soit estendu. L'Immensité de Dieu n'est rien autre chose que la Toute-puissance, par laquelle il est present à toutes les Créatures en general, à cause qu'il les produit & les conserue; il est present aux Corps en particulier, parce qu'il les estend & les contient, les arrange, les meût, ou les arreste; & aux Esprits en particulier, dautant qu'il assiste à toutes leurs pensées & concourt à toutes les determinations de leurs volonte. Au reste, quand ic dis qu'il est present à toutes choses par la Toute-puif-

sance, ie ne pretens pas nier qu'il ne le soit aussi par son Essence & par sa Substance, car tout cela n'est qu'une mesme chose en Dieu; mais ie le fais seulement pour expliquer la maniere de sa Presence; C'est en ce sens qu'on peut maintenir que chacune des Creatures n'occupe qu'une partie de son immensité; dautant qu'il n'y en a aucune qui soit capable de remplir la secondeité de sa Toute-puissance; & non pas en considerant son Immensité, comme on a accoustumé de faire les espaces imaginaires.

---

*De la maniere dont l'Esprit & le Corps en general peuuent estre unis.*

C H A P. XIII.

**L'**UNION qui est entre l'Esprit & le Corps est si admirable, que ie ne pense pas que dans l'ordre naturel des choses il y ait rien qui soit plus capable de causer de l'estonnement, & de faire connoître la grandeur de la puissance & de la sagesse de Dieu. Elle semble mesme si difficile à concevoir, que cette seule difficulté a fait tomber dans l'erreur tous ceux qui croyent que leurs Ames sont mortelles & materielles; Il est donc tres-important de la bien faire connoître, non seulement parce que la connoissance en est tres-belle, (à la considerer en elle mesme,) & que c'est le seul moyen

moyen de retirer de l'erreur ceux qui y sont tombez, mais encore parce que sans elle il n'est pas possible de bien comprendre la nature de l'Homme, qui n'est rien autre chose qu'un composé d'un Esprit & d'un Corps, ny de concevoir ce que l'Esprit de l'Homme a de particulier & de différent des autres Esprits, ny enfin de se tirer d'une infinité de difficultez & d'objections que l'on peut faire contre tout ce que nous avons dit jusques icy, auxquelles on ne sçauoit mieux répondre, que par une claire & distincte exposition de la maniere dont l'Esprit & le Corps sont vnies ensemble.

Pour y réussir, ie pretens faire voir dans ce Chapitre & dans les deux suiuaus; premierement, quelles sont les causes qui rendent cette vnion difficile à concevoir, & de quelle façon en general la substance estendue & celle qui pense peuuent contracter alliance ensemble; secondement, quelles sont les choses qui nous font connoistre que l'Esprit de l'Homme est ainsi vny à son Corps, & quelle est la maniere particuliere de son vnion, enquoy elle differe de l'vnion de ce mesme Esprit avec les objets interieurs ou extérieurs, & les Corps differens du sien; quelle difference il y a entre cette vnion & celle qui se trouue entre le Pilote & son Nauire, le Cavalier & son Cheual, le Demon & le Corps d'un Demoniaque; En troisiemeliieu, ie diray quelles sont les causes de cette vnion, quand & comment elle a commencé, combien elle durera, ce qui la peut rompre, enfin



quelles sont les principaux Articles de cette Alliance ; Eten quatrième lieu, j'essayeray de mon-  
strer quelle est la partie que l'on peut soupçonner  
avec le plus de probabilité estre le siege principal  
de l'Esprit de l'Homme ; Et enfin ie réponderay en  
diuers endroits aux plus importantes objections  
que l'on puisse faire, en tâchant principalemēt d'ex-  
pliquer clairement & nettement toutes ces choses.

La difficulté que beaucoup de personnes trou-  
uent à conceuoir l'vnion d'un Esprit & d'un  
Corps, ne vient pas tant de la nature de la chose,  
que d'eux mesmes ; & de la façon que selon les  
Principes de la Philosophie Peripateticienne  
on est obligé de la considerer ; elle vient d'eux-  
mesmes , au moyen des préjuges de l'Enfance,  
lesquels estant fortifiez par vne longue habitude  
leur font trouuer vne si grande difficulté à conce-  
uoir quelque chose qui ne soit pas estenduë, que  
cela leur semble impossible. Mais la Philosophie  
de l'Ecole rend cette vnion aussi difficile à con-  
noistre pour le moins que les prejuges de l'En-  
fance ; car faisant d'un costé consister l'essence de  
l'Esprit à n'estre point estendu, & establisant de  
l'autre la nature de l'vnion de deux substances dans  
la présence locale de l'une à l'autre, elle oste de  
cette façon tous les moyens de conceuoir celle de  
l'Esprit & du Corps ; car comment comprendre  
qu'un Esprit, c'est à dire selon eux, vne substance  
dont la nature est de n'estre point estenduë, puisse  
deuenir estenduë ; & toutesfois il n'y a pas moyen

de concevoir comment il peut estre present localement à vne Substance estendue, si on ne le conçoit luy-mesme estendu. Ils disent pour éviter cette difficulté que l'Esprit n'est pas estendu réellement, mais virtuellement, & que cette estendue virtuelle suffit pour estre coestendu (permettez-moi ce mot) & present localement à vn Corps qui a vne extension réelle. Je ne les accuseray pas icy de n'entendre pas ce qu'il veulent dire, quoy qu'il y ait lieu de croire que cela leur arrive assez souvent; lors qu'ils alleguent de belles paroles auxquelles aucune Idée qu'ils puissent expliquer ne répond dans leur Esprit; Mais accordons leur qu'ils comprennent fort clairement ce que c'est qu'une estendue virtuelle, il faut aussi qu'ils m'accordent qu'on ne sçauoit concevoir aucune. sorte d'extension; sans concevoir en mesme temps plusieurs parties, dont l'une soit hors de l'autre; Or des-qu'on aperçoit qu'une partie. est hors d'une autre; on voit par mesme moyen que ce sont deux parties dont l'une peut estre conceüe sans l'autre, & par consequent exister separément; Et ainsi, c'est vne extension réelle, & ce sont des parties réelles qu'ils attribuent à l'Esprit, lors qu'ils pensent ne luy donner qu'une estendue & des parties virtuelles. Il est donc impossible de comprendre l'union de l'Esprit & du Corps suivant les Principes de la Philosophie de l'Ecole.

Mais dira, quelqu'un, n'est-ce pas aussi le sentiment de Monsieur Descartes, que l'Esprit n'est

point estendu? Je l'auoüe ; Mais il ne dit pas avec l'Ecole que ce soit cela qui le fasse esprit, & qu'il ne le soit que parce qu'il n'a point d'extension ; au contraire il dit, que c'est parce qu'il est esprit, c'est à dire vne chose qui pense, qu'il n'est pas estendu. Or il n'est pas si difficile de conceuoir qu'une chose qui pense & vne autre qui est estendue contractent l'alliance de laquelle elles sont capables, & si vous voulez mesme qu'elles soient presentes localement, l'une à l'autre, pourueu que vous entendiez cela dans vn bon sens, qu'il est difficile de conceuoir qu'une chose dont l'essence consiste à n'auoir point d'extension soit vnie & coetendue à vn Corps, & qu'ainsi les deux Substances soient jointes par cela mesme en quoy elles sont formellement oposées. Il me semble mesme, que tant s'en faut que l'union de l'Esprit & du Corps exige cette presence locale, à la maniere qu'ils l'entendent, que mesme ce n'est pas vne condition necessaire dans l'Union de Corps à Corps ; Car autrement, n'y ayant point de Corps qui puisse estre naturellement dans le mesme lieu qu'un autre, il n'y auroit point de Corps au monde qui peussent estre vnies ensemble. Certainement c'est vne chose admirable que ceux qui conçoient (à ce qu'ils disent) avec tant de facilité les formes Substantielles & les qualitez réelles, comme estant distinguées de leur sujet, & qui croient conceuoir tres facilement comment elles sont vnies à la matiere, bien qu'ils ne leur attribuent aucune extension, autre-

ment il y auroit penetration, ayent neantmoins tant de peine à comprendre que l'Esprit puisse s'unir à vn Corps sans estre en quelque façon estendu. C'est pourquoy Monsieur Descartes a eu bonne raison de dire, qu'il ne conceuoit pas l'vnion de l'Ame & du Corps autrement que l'on conçoit dans l'Ecole celle de la pesanteur & de la matiere; & que d'autant que nous nous estions seruis de la notion de l'vnion de l'Ame & du Corps, pour connoistre celle de la matiere & des qualitez reelles, nous nous estions rendu la connoissance de l'alliance de l'Esprit & du Corps plus difficile, parce que cela nous auoit obligé de chercher vne autre espece d'vnion que celle dont ils sont veritablement vnis.

Il y en a d'autres entre les Disciples mesmes de Monsieur Descartes, qui se persuadent que l'alliance de l'Esprit & du Corps se fait par le moyen d'un certain mode qu'ils appellent vnion, lequel sert comme de lien & de ciment pour ioindre ces deux substances; surquoy i'ay à leur dire, que s'ils ne conçoient pas que ce mode soit quelque chose de distingué de l'Esprit & du Corps, ils ne disent rien qui soit contraire à ce que nous auancerons tantost; car qui est-ce qui ne reconnoist que le Corps & l'Esprit sont d'une autre façon quand ils sont vnis, que quand ils ne le sont pas; & qu'ainsi cette vnion, est vn mode ou vne façon d'estre à l'égard de l'un & de l'autre? Mais cela n'est pas suffisant, à mon auis, pour leuer toutes

les difficultez qui se trouuent dans cette matiere. Que si par cette vnion ils entendent quelque chose qui soit distingué réellement par cette vnion de l'Esprit & du Corps, au moyen dequoy ils se lient & s'assemblent, de la mesme maniere à peu près que quelques autres Philosophes conçoient que la matiere & la forme sont vnies par le moyen d'une vnion qui est differente de l'une & de l'autre; ils me pardonneront si ie leur dis que cette opinion n'est pas moins contraire à Monsieur Descartes qu'à la verité; car qui est celuy, qui ait tant soit peu leu Monsieur Descartes, qui ne sçache qu'il est entierement opposé à ceux qui introduisent ces sortes de qualitez; mais quand cela ne seroit pas, ie voudrois bien leur demander, si cette vnion est vn estre estendu ou vn estre non estendu? lequel que ce soit des deux, elle ne peut pas estre le ciment de l'Esprit & du Corps si elle ne leur est iointe immediatement; Or comment peut elle estre iointe à vn Corps si elle est vn estre non estendu; & si elle est vn estre estendu comment peut elle estre iointe à vn Esprit? Pourquoi trouuent-ils plus de facilité à concevoir que cette qualité puisse estre vnie à vn Corps qu'un Esprit, si ny l'un ny l'autre ne sont estendus? Ou pourquoi trouuent ils plus de difficulté à comprendre la iunction immediate de l'Esprit avec le Corps que non pas avec cette qualité, si elle n'est pas moins estendue que le Corps? C'est donc une chose inutile d'auoir recours à cette pretendue vnion, la-

quelle bien loin d'oster les difficultez en aporte encore de nouuelles.

Si nous desirons nous deliurer des vnes & des autres, & decouurir quelle peut estre l'vnion que l'Esprit & le Corps peuuent contracter ensemble; rejettons premierement l'Idée de toutes sortes de presences locales, ou du moins tâchons de la concevoir sans aucune estenduë réelle ou virtuelle; L'Esprit n'est pas capable de la premiere, & la seconde n'est qu'un beau terme qui cache l'idée confuse d'une chose qu'on ne conçoit point, & qui ne sert de rien pour comprendre cette alliance. Secondement, prenons garde de nous persuader que cette vnion, quelque estroite qu'elle puisse estre, ne fasse qu'une substance simple de ces deux, & que l'Esprit deuienne par là materiel, ou que le Corps se spiritualise; ils demeurent l'un & l'autre apres leur vnion ce qu'ils estoient auparauant, & ce ne sont pas moins deux substances, qui retiennent tout ce qu'elles auoient de different l'une de l'autre selon leur estre absolu. En troisieme lieu, ne pensons pas que cette vnion se fasse par ce en quoy elles sont opposées, & parquoy elles sont absolument ce qu'elles sont; Il y a bien plus d'apparence que ce doit estre par ce en quoy elles ont quelque raport, quelque ressemblance, & quelque dependance l'une de l'autre. Et afin de voir en quoy cette conformité se peut rencontrer, ie vous prie de considerer qu'il ne peut y auoir plus

jetter ces qualitez réelles, quand nous n'aurions point d'autre raison de le faire; mais retournons à nostre sujet.

Nous n'auons l'Idée que de deux sortes de Substances, sçauoir le Corps & l'Esprit, c'est pourquoy nous ne sçaurions conceuoir plus de trois différentes manieres d'vnion; Car ou elle sera entre deux Corps, ou entre deux Esprits, ou entre vn Corps & vn Esprit; & ie pense que nous conceurons mieux cette derniere façon d'vnion, si nous la comparons avec les deux premieres, que si nous la considerons toute seule. C'est pourquoy il me semble qu'il faut remarquer que toute sorte d'vnion dit vn certain rapport, ressemblance, & dépendance, au moyen de laquelle nous considerons deux choses comme n'en faisant qu'une d'une certaine façon. Maintenant vne chose peut auoir rapport à vne autre ou par ses attributs essentiels & absolus, ou par ses attributs relatifs; Or il est manifeste que la ressemblance qui est entre deux choses selon leurs attributs essentiels n'est pas le rapport qui les vnit: Car bien que tous les Corps soient semblables en ce qu'ils sont étendus, figurés & mobiles, ils ne sont pas néanmoins tous vnis. Il faut donc chercher l'vnion de tout ce qui s'vnit; dans les attributs qui sont relatifs ou respectifs; ie n'en trouue point d'autres par lesquels deux Corps, deux Esprits, ou vn Corps & vn Esprit puissent auoir rapport, ressemblance & dépendance, que premierement & en general

l'action & la passion pour toute sorte d'Estres, & en toute sorte d'vnion, parce que de tous les attributs réceptifs il n'y a que ceux-là qui sortent de leur sujet, & qui puissent s'attacher à vn autre: Mais ie trouue de plus la proximité, pour la liaison qui est entre les Corps, laquelle les rend capables d'agir & de pâtir dépendemment l'un de l'autre; L'amour, pour la raison de deux Esprits; & enfin la volonté, pour l'vnion qui est entre l'Esprit & le Corps, en tant que cette volonté sort hors de son sujet par les operations. Et ie ne pense pas qu'on puisse trouuer d'autres attributs que ceux-là, qui soient capables d'assembler deux Substances. Or tout de mesme que deux Corps sont vnis, lors qu'ils sont aussi proches qu'ils peuvent estre pour agir & pâtir dépendemment l'un de l'autre, soit qu'ils agissent ou patissent en mesme temps & de la mesme maniere, soit que quand l'un agit l'autre patisse; Et comme deux Esprits sont en parfaite vnion lors qu'ils s'aiment tellement, qu'ils viennent à ne vouloir plus rien, & à n'auoir plus aucune pensée que l'un pour l'amour de l'autre; nous deuons dire de mesme que le Corps & l'Esprit sont vnis, lors que quelques mouuemens du premier se font dépendemment des pensées du second, & que reciproquement quelques pensées du second dépendent des mouuemens du premier, soit que la cause de cette dépendance vienne de la volonté de l'Esprit qui est vny, soit qu'elle procedé d'une autre volonté



qui est supérieure à la sienne. Et comme nous ne conceuons rien qui assemble les Corps que cette mutuelle proximité & dépendance, ny qui vnisse les Esprits que l'Amour reciproque qu'ils se portent ; de même, nous ne sçaurions rien conceuoir clairement & distinctement qui puisse vnir vn Esprit à vn Corps, ny qui puisse attacher les pensées de l'un au mouvement de l'autre, & les en faire dépendre, que sa volonté propre, ou quelque autre supérieure à la sienne : Et tout ainsi que les Corps qui sont vnis, & qui agissent & patissent dependemment les vns des autres, ne laissent pas de retenir leur propre nature, à raison de laquelle ils sont capables d'agir & de pâtir les vns sans les autres, lors qu'ils seront separés, de même le Corps & l'Esprit qui sont vnis ne laissent pas de conseruer leur essence particulière, & d'être capables d'agir ou de pâtir independemment l'un de l'autre, quoy que pendant le temps de cette vnion, il y ait quelques-unes des pensées de cet Esprit, & quelques-uns des mouuemens de ce Corps, qui dependent tellement les vns des autres, qu'il soit absolument impossible que l'un se puisse faire sans l'autre, & qu'ainsi cette vnion soit aussi étroite que leur nature le sçauoit permettre. Enfin comme l'vnion de deux Esprits durera autant que leur Amour, & que celle de deux Corps ne cessera point que lors qu'ils cesseront d'être proches ; de même l'alliance de l'Esprit & du Corps ne se rompra que lors que celui qui les a vnis, c'est à dire, qui

a fait dépendre les mouuemens de l'un des pensées de l'autre, changera de volonté, ou que le Corps ne sera plus capable de produire les mouuemens auxquels les pensées de l'Esprit sont attachées. Nous disons donc, généralement parlant, que l'union d'un Esprit & d'un Corps consiste dans une mutuelle & reciproque dépendance des pensées de l'un & des mouuemens de l'autre, & dans le commerce mutuel de leurs actions & passions, soit que ce soit la volonté de l'Esprit qui est uny qu'il l'ait obligé à cette dépendance, soit qu'un autre l'y ait astringé.

Je ne voy que deux choses qu'on me puisse objecter ; La première , est que cette dépendance & ce commerce mutuel d'actions & de passions qui est entre l'Esprit & le Corps presuppose qu'ils sont desia unis, n'estant pas possible que l'Esprit puisse auoir aucune pensée, à l'occasion de son Corps, si desia il n'est dans ce Corps & ne luy est joint. Je répons à cela, qu'il n'est pas nécessaire qu'il soit dans le Corps avant qu'il y agisse ; parce que l'Esprit considéré en luy mesme n'est à proprement parler en aucun lieu , ou si l'on peut dire qu'il soit en quelque lieu, c'est seulement à cause de son operation ; Mais comme son existence ne precede point en temps son operation, il n'est pas nécessaire qu'il soit dans le Corps avant qu'il y opere ; au contraire, comme l'Esprit n'a point d'autres operations que ses pensées , & qu'il ne peut pas estre autrement dans un lieu que parce

qu'il y opere, on ne peut pas dire que l'existence ou l'estre d'un Esprit dans un Corps soit autre chose que de penser dans ce Corps, c'est à dire, auoir quelque pensée dépendemment de luy; au moins si nous ne voulons parler sans entendre ce que nous disons.

L'on m'objectera en second lieu, que cette vnion ne seroit pas naturelle, mais seulement morale, parce que ce ne seroit que l'effet de la volonté d'un Esprit libre; A quoy ie répons premierement, que la consequence n'en est pas bonne, si l'on ne veut soustenir, que lors que ie pousselièrement vne boule, le mouuement que ie luy donne, & tous les effets qui s'en ensuiuent, ne sont pas naturels, parce que c'est moy qui les ay causez volontairement & librement. Mais ie veux que cette vnion soit seulement morale, lors que c'est l'Esprit qui est vny qui a attaché luy mesme ses pensées aux mouuemens d'un certain Corps, & qui peut ainsi, quand bon luy semble, rompre ou changer cette vnion; on ne peut pas dire la mesme chose, lors que cette liaison n'est pas en son pouuoir, & qu'il ne dépend pas de luy d'estre vny ou de ne l'estre pas; au contraire, lors que cette vnion est vne suite du decret de Dieu, par lequel il s'est resolu de gouverner toutes ses Creatures, de la maniere que nous voyons qu'elles le font, elle doit passer pour vne chose aussi naturelle qu'aucune autre qui soit au monde: Car qu'est-ce que la Nature (quand on

ne prend pas ce mot pour l'essence particuliere de chaque chose) que cet ordre selon lequel Dieu regit les Creatures ; & consequemment tout ce qui se fait en vertu de cet ordre se fait naturellement.

On pourroit bien m'objecter encore, que si c'est dans cette dépendance reciproque que consiste l'union de l'Esprit & du Corps, si tost que les actes de l'Esprit & du Corps cessent de concourir & de se trouver ensemble, comme on peut croire qu'il arriue dans les lethargies, les extases & les profondes Meditations, il faudroit dire que l'Esprit est separé du Corps, & consequemment que l'Homme meurt toutes les fois qu'il tombe dans ces accidens, &c. Je répons, que c'est pour cette mesme raison que ie ne mets pas l'essence de l'union de ces deux Substances, dans le concours & commerce actuel de leurs operations, (bien que ce soit la pensée du sçauant Clauber-gius) mais dans la dépendance reciproque de l'un & de l'autre, laquelle ne laisse pas de subsister, quoy que le commerce actuel soit interrompu pour peu de temps ; pourueu seulement, comme nous auons dit, que celuy qui les a jointes ensemble ne change point de volonté, & que le Corps ne soit pas incapable d'auoir les mouuemens auxquels les pensées de l'Esprit sont immediatement attachées. Mais cecy paroistra bien plus clairement, lors que j'auray expliqué la maniere particuliere dont l'Esprit de l'Homme est vny a son Corps. Toutesfois auant qu'en venir là, il n'est

pas mal à propos de dire encore vn mot de cette vnion en general, & mesme de retoucher & rebatre quelque chose de ce que j'ay desia auancé, afin que lors que ie parleray de ce qu'il y a icy de particulier pour l'Homme, ie ne presuppose rien qui ne soit suffisamment éclaircy. Toute sorte d'vnion, ainsi que nous auons dit, est vn certain raport qui de deux choses n'en fait qu'une en quelque façon, & nous donne occasion de ne les regarder que comme vne mesme chose; Or comme dit fort bien Monsieur Clauber-  
gius, il n'y a que trois especes generales de relation ou de raport; il apelle la premiere la relation d'affirmation, qui est celle qui se trouue dans la ressemblance que deux choses ont l'une à l'autre; La seconde, de negation, qui se rencontre dans la difference qu'elles peuuent auoir; La troisieme, d'origine, qui est entre l'effet & la cause. Pour la seconde, comme c'est vn raport d'oposition ou de difference fondé sur la diuersité qu'ont les choses qui sont oposées, il est évident qu'il n'est pas capable de les vnir, & que ce n'est pas dans cette espece de raport que nous devons chercher les fondemens del'alliance del'Esprit & du Corps. Il faut donc que ce soit dans l'une des deux autres, ou peut estre dans toutes les deux. La premiere, qui procede de la ressemblance que deux choses ont l'une à l'autre, n'est pas encore capable de les vnir fort étroitement, & ne fait tout au plus que les y disposer, lors qu'elles se

trouuent seulement entre leurs attributs simples, essentiels, & absolus. Ainsi, bien que le Corps & l'Esprit soient semblables en ce que ce sont deux Substances créées, capables d'estre le sujet de diuerfes propriétés, cela n'est pas suffisant pour les allier, & nous faire dire qu'un certain Esprit est joint à un certain Corps. Il faut donc que cette ressemblance, qui doit marier l'Esprit & le Corps, se rencontre entre leurs propriétés respectiues, c'est à dire, dans leurs operations, & en ce qu'ils sont capables d'agir & de pâtir; Car il n'y a que celles-là par le moyen desquelles on puisse dire qu'une Substance puisse se lier à une autre, entrer en elle, ou la receuoir en soy. Or personne ne doute que le Corps & l'Esprit ne soient semblables en ce point, & ne soient tous deux susceptibles d'action & de passion: car le Corps pâtit quand il est meu, & il agit quand il en pousse un autre. Et nous auons desja dit que les perceptions de l'Esprit estoient ses passions, & les déterminations de sa volonté ses actions. Ce doit donc estre dans le rapport ou le concours des actions & passions de l'Esprit & du Corps que consiste la liaison qu'ils ont ensemble. Mais ce n'est pourtant pas encore assez: Car de cette façon on pourroit soustenir qu'un Esprit Angelique seroit vny à tous les Corps, avec le mouuement desquels il arriueroit par hazard que ses pensées viendroient à concourir en mesme temps; Il faut donc de plus pour acheuer cette liaison, que les actions de  
l'Esprit :

l'Esprit & du Corps dépendent mutuellement les vnes des autres, c'est à dire que les actions du Corps fassent pâtir l'Esprit, & que les actions de l'Esprit fassent pâtir le Corps ; & ainsi il ne faut pas seulement que la premiere espece de relation, qui est celle de la ressemblance, mais encore la troisiéme, qui est celle de la cause & de l'effet, se rencontrent, pour former cette vnion. Or entre les causes, les vnes sont vniuoques, quand l'effet ressemble à sa cause, & les autres equiuoques, quand il ne luy ressemble pas ; Et il est manifeste que ce n'est pas en qualité de cause vniuoque que l'Esprit peut agir sur le Corps, en l'obligeant à produire quelque pensée, & que le Corps n'agit pas aussi sur l'Esprit en luy communiquant quelque mouuement, parce que l'Esprit ne peut pas estre meu, ny le Corps penser ; ce doit donc estre comme cause equiuoque que l'Esprit par sa pensée oblige le Corps à se mouuoir ; & que le Corps en se mouuant donne occasion à l'Esprit de produire quelque pensée. Il ne faut pourtant pas conclure que le Corps ne soit pas la cause des pensées qui naissent dans l'Esprit à son occasion, ou que celuy-cy ne soit pas non plus la cause des mouuemens qui se trouuent dans le Corps en suite de ses pensées, parce que ce sont seulement des causes equiuoques ; Car Dieu n'est pas moins Createur de toutes choses, & les ouuriers auteurs de leurs ouurages, quoy que toutes ces choses ne soient que les causes equiuoques.

de ces effets. Mais nous parlerons de cecy plus au long quand nous traiterons de la maniere que l'Esprit & le Corps de l'Homme agissent l'un sur l'autre. Remarquez seulement que comme il n'est pas necessaire qu'un Corps en touche vn autre dans toute sa superficie, pour dire qu'ils sont vnis, pourueu qu'ils se touchent en quelque endroit seulement; de mesme il suffit que quelqu'un des pensées de l'Esprit soient liées avec quelques mouuemens du Corps, pour dire qu'ils sont ioints & vnis ensemble; & il n'est pas necessaire que toutes les pensées de l'Esprit & tous les mouuemens du Corps aient vne dépendance reciproque; Mais comme deux Corps sont d'autant plus attachez l'un à l'autre qu'ils se touchent en plus d'endroits, ainsi la liaison de l'Esprit & du Corps est d'autant plus estroite, qu'il y a plus de pensées & de mouuemens liez ensemble. Or comme nous ne conceuons rien dans la nature du Corps, qui puisse obliger vn Esprit à dépendre de luy en quelques-unes de ses pensées, & que nous n'apercevons rien, ny dans le mouuement & la pensée en general, ny dans les mouuemens & les pensées en particulier, qui puisse attacher necessairement vne telle pensée à vn tel mouuement, & que nous ne voyons aucune affinité ny ressemblance entre ces choses, que celle d'action & de passion que nous auons cy-deuant remarquée; Il faut chercher dans la nature de l'Esprit & dans celle de ses facultez la cause efficiente de cette dépendance, qui se trouue nean-



moins entre vne telle pensée & vn tel mouuement. Ce ne peut pas estre l'entendement qui en soit la cause, d'autant que c'est vne faculté passive, qui ne sort point hors de son sujet ; ce doit donc estre la volonté de l'Esprit qui est vny, ou celle de quelqueautre Esprit qui n'ait pas moins de force que luy sur ses pensées, laquelle en attache quelques-vnes à certains mouuemens du Corps, & qui en determine la maniere & la durée. Mais il est temps de passer à vne explication plus particuliere.

---

*De la maniere dont l'Esprit & le Corps de l'Homme en particulier sont vnis ; & quelles sont les choses qui nous font connoistre leur union.*

#### CHAP. XIV.

COMME nous auons trois notions primitives, par lesquelles nous pouuons connoistre la nature des substances simples & composées, c'est à sçauoir la notion de l'estenduë pour les Corps sous laquelle celle de la figure & du mouuement sont comprises ; la notion de la pensée pour les Esprits ; & enfin la notion de leur vnion pour l'un & l'autre ioints ensemble ; nous auons aussi trois facultez differentes pour les bien conceuoir, sçauoir l'Imagination, l'Entendement pur, & les Sens ; car comme dit Monsieur Des-

cartes en la 30. Lettre du 1. Volume adressée à la  
„ Princeesse Elizabeth ; L'Ame , c'est à dire , la  
„ chose qui pense , ne se peut comprendre que par  
„ l'entendement pur ; & le Corps , c'est à dire , la  
„ chose estenduë avec ses figures & mouuemens  
„ se peuuent bien aussi connoistre par l'entende-  
„ ment seul , mais beaucoup mieux par l'enten-  
„ dement aidé de l'imagination ; Enfin l'vnion de  
„ l'Ame & du Corps & les choses qui luy apar-  
„ tiennent ne se connoissent qu'obscurément  
„ par l'entendement pur , ny mesme par l'en-  
„ tendement aidé de l'imagination ; mais on  
„ les aperçoit tres-clairement par les sens : D'où  
„ vient que ceux qui ne philosophent iamais , &  
„ qui ne se seruent que de leurs sens , ne dou-  
„ tent point. que l'Ame ne meue le Corps , &  
„ que le Corps n'agisse sur l'Ame ; mais ils confi-  
„ derent l'un & l'autre comme vne seule chose ;  
„ c'est à dire ; ils conçoient leur vnion ; car con-  
„ cevoir l'vnion qui est entre deux choses , c'est  
„ les concevoir comme vne seule.

C'est donc par le moyen de nos sens, tant inte-  
rieurs qu'extérieurs, par les émotions de nostre ap-  
petit, & par l'empire que nous auons sur nos mem-  
bres , que nous connoissons tres clairement que  
nous ne sommes pas seulement composez d'un  
Corps ou d'une substance estenduë, mais encore  
d'un Esprit ou d'une substance qui pense , les-  
quels sont tres-estroitement ioints & vnis ense-  
mble. Et comme tout cela ne nous fait rien voir au-

tre chose, sinon qu'il y a vn concours mutuel, vn commerce, & vne dépendance reciproque, de quelques mouuemens de nostre Corps avec quelques pensées de nostre Esprit; nous aprenons aussi beaucoup mieux par là, que c'est en cela seul que consiste l'vnion de l'un & de l'autre, que par toutes les raisons que nous auons cy-dessus alleguées. Il n'y a aussi que les sens qui nous puissent apprendre tout ce qui est propre & particulier à l'Homme dans cette vnion; ce sont les seuls témoins que i'ay ouys, & dont i'ay receu les depositions, & ce doiuent estre aussi les seuls Iuges qu'il faut consulter, pour connoistre la verité de ce que ie vay dire.

Ce qui rend la liaison de l'Esprit & du Corps de l'Homme si admirable, consiste premierement, en ce qu'elle est reciproque; secondement, en ce qu'elle est vniuerselle, & toutesfois en quelque façon particuliere; troisiemement en ce qu'elle est immediate, & qu'en quelque façon elle ne l'est pas; en quatriesme lieu, en ce qu'elle est tres-constante, & neanmoins sujette à quelque sorte de changement; En cinquiesme lieu, parce qu'elle est tres-estroite, mais qu'elle auroit pû l'estre dauantage; Sixiesmement, à cause qu'elle est independante de nostre volonté, & qu'elle en dépend neanmoins en quelque chose; En septiesme lieu, parce qu'elle est tres-forte, & qu'elle se peut pourtant rompre; Et enfin, en ce qu'elle est la plus conuenable, la plus conforme & la plus estendue qu'on puisse s'imaginer entre vn Esprit & vn

Corps sans nuire ny preiudicier à l'un ny à l'autre.  
Reprenons tout cecy.

Je dis donc que cette vnion est reciproque; Car non seulement le Corps peut exciter diuerses pensées en l'Esprit, mais aussi l'Esprit peut causer diuers mouuemens dans le Corps. Elle est vniuerselle, parce que l'Esprit ou l'Ame de l'Homme est veritablement jointe à tout le Corps, & qu'on ne peut pas proprement dire qu'elle soit en quelque vne de ses parties à l'exclusion des autres, à cause que le Corps est vn, & en quelque façon indiuisible, à raison de la disposition de ses organes, qui se rapportent tellement tous l'un à l'autre, que lors que quelque vn d'eux est osté, cela rend tout le Corps defectueux; Et à cause que l'Esprit est d'une telle nature que n'ayant aucun raport avec les dimensions de la matiere, l'vnion qu'il a avec le Corps regarde principalement l'assemblage de ses organes; Mais cette vnion est aussi particuliere, parce que toutes les pensées de l'Esprit ne sont pas dépendantes des mouuemens du Corps, ny tous les mouuemens du Corps ne dépendent pas des pensées de l'Esprit; Et comme le Corps a ses fonctions naturelles & vitales sur lesquelles l'Ame n'a aucun pouuoir, si ce n'est indirectement; l'Esprit a aussi ses pensées intellectuelles, & les inclinations de la volonté qui les suivent lesquelles ne dépendent point du Corps, si ce n'est aussi indirectement. Cette vnion est immediate; car comme il n'y a que les mouuemens propres.

de nostre Corps qui se fassent sentir & apercevoir par l'Ame ; l'Ame de son costé n'employe aussi que ses propres volontez pour faire agir & mouvoir le Corps. Elle est encore immediate, d'autant que les mouvemens du Corps portent en vn instant leur sentiment à l'Ame, & que l'Ame meut le Corps si tost qu'elle en forme la volonté. C'est pour cela que l'union de l'Ame & du Corps differe de celle que l'Esprit peut avoir avec ses objets ; Car si par le mot d'objets vous entendez les Idées que l'Esprit aperçoit, ce n'est pas proprement vne union, l'Idée & l'Esprit n'estant pas deux choses ; & si vous entendez les causes exemplaires de ces Idées, l'union qu'elles peuvent avoir avec l'Esprit ne scauroit estre mutuelle, nostre volonté le plus souvent n'ayant sur elles aucun pouvoir ; Que si par le mot d'objets vous entendez les Corps qui nous environnent, lesquels faisant impression sur le nostre nous donnent occasion d'avoir diuerses pensées, il est manifeste que la liaison que nostre Esprit a avec eux n'est pas immediate, & que ce n'est que par l'entremise de nostre Corps qu'ils agissent sur nostre Esprit : mais nous apporterons tantost encore vne autre raison, qui fera paroistre davanrage cette difference. Cette union toutes-fois n'est pas également immediate en toutes les parties de nostre Corps ; Car nous ferons voir aussi cy-aprés qu'il y en doit avoir vne, à laquelle l'Esprit est plus particulièrement vny qu'à aucune autre. En quatriesme lieu, cette union est tres-con-

stante, & nous aprenons de l'experience iournaliere, que depuis que la nature, ou le hazard, ou nostre volonte ont ioint quelqu'une de nos pensees à quelqu'un des mouvemens de nostre Corps, qui sont particulierement destinez pour exciter des pensees en l'Ame, le mesme mouvement ne reuient plus, sans que la mesme pensee ne se represente de nouveau à l'Esprit. Comme aussi la mesme pensee ne peut plus se presenter à l'Ame, sans qu'aussi-tost le mesme mouvement auquel elle est liee ne le reproduise dans le Corps, principalement quand c'est la nature qui les a joints la premiere fois l'un à l'autre. C'est pour cette raison que les objets de mesme espee nous donnent les mesmes pensees, parce qu'ils excitent la mesme sorte de mouvement dans nos nerfs; Et c'est aussi pour la mesme raison que les vestiges de la memoire nous obligent à repenser une seconde fois à la mesme chose, lors qu'ils donnent occasion aux Esprits animaux de sortir de la glande sous la mesme forme qu'ils auoient la premiere fois que cette chose s'est presentee à nous (car j'espere prouuer cy-apres que c'est à ces formes & aux diuers mouvemens de la glande que les pensees de l'Ame sont plus particulierement jointes; Et pour cette raison, ie vous auertis icy, comme i'ay desja fait, que ie les apelleray tousiours du nom d'espees materielles, afin de reseruer celuy d'idée pour les seules formes de nos pensees). C'est encore pour cela que quand la volonte applique l'imagination à pen-

ser

ser à quelque chose, l'idée qui la représente s'offre à l'Esprit, aussi tost que l'espece materielle, à laquelle elle estoit vnice la premiere fois se retrace sur la glande. Ainsi, parce que la premiere fois que nous auons pris medecine, nous en auons conceu vne fort grande auersion, & que nous auons ioint alors ces pensées de haine à l'espece que la medecine excitoit sur la glande, nous ne pouuons plus voir vne medecine ny mesme en entendre parler, que la mesme auersion ne reuienne en l'Esprit; en suite dequoy les Esprits Animaux venant à fortir de la glande, de la mesme façon qu'ils ont fait lors que nous auons pris la premiere fois medecine, nous croyons encore ressentir la même amertume. Mais cette constante vnion n'est pas sans quelque inconstance; & nous remarquons que nostre volonté a le pouuoir de ioindre nos pensées à d'autres mouuemens que ceux auxquels elles ont esté iointes la premiere fois.

En cinquiemesme lieu, cette vnion est tres-étroite, d'autât premierement qu'elle n'est pas fort souuent interrompuë par les letargies & les extazes, & autres semblables rauissemens; & que quand cela arriue, ce n'est que pour fort peu de temps. Secondement, parce que le commerce de l'Esprit & du Corps ne s'exerce pas dans vne ou deux actions seulement, mais dans vn tres-grand nombre, plusieurs desquelles se trouvent assez souuent ensemble. Troisiemesme, parce que les pensées de l'Âme, qui sont principalement vnies aux mouue-

mens du Corps ne sont pas tant les perceptions claires & distinctes de l'Entendement, ny les inclinations de la Volonté qui les suivent, lesquelles rendroient cette alliance moins serrée, que les perceptions confuses des Sens, la Faim, la Soif, la Douleur, le Chatouillement & les émotions de l'appetit, lesquelles la serrent & l'étraignent bien davantage. Et enfin, parce que cette vnion n'est pas volontaire, au moins pour la plus grande partie; car il n'y a point de doute que si l'Esprit de l'Homme estoit seulement vny au Corps par sa volonté, & qu'il luy fût libre des'y vnir ou des'en separer quand bon luy sembleroit, de la mesme sorte qu'un Pilote est joint à son Nauire; Si nostre Esprit aperceuoit clairement tout ce qui chatouille ou blesse son Corps, de la mesme façon que le Pilote connoist ce qui fait du bien ou du mal à son Vaisseau; si nous ne sentions point autrement la secheresse de la gorge, qu'il fait celle de ses voiles; & si nous ressentions la morsure de la liqueur acide qui cause la faim, ainsi qu'il void la Carie qui ronge son Vaisseau, il n'y a point de doute, dis-je, que cet Esprit auroit bien plus de sujet de se considerer comme vne chose entierement separée d'intérêt & distinguée de son Corps, que non pas à present qu'il y est vny dès le premier moment de sa creation, sans qu'il s'en puisse separer, sans qu'il l'ait voulu, ny qu'il ait peut-estre iamais eu de pensée qu'à l'occasion de son Corps; à present, dis-je, que les sentimens de la faim, de



la soif, de la douleur, du chatouillement, & de toutes les autres passions, l'obligent de regarder comme son propre, tout le bien & tout le mal qui arriue au Corps auquel il est ioint. Cela est si vray, que d'autant plus que l'Esprit se dégage des pensées confuses des Sens, & qu'il se considere comme vne substance qui se peut passer du Corps, d'autant moins trouue-t'il sujet de l'aimer & de l'estimer. Mais cette vnion quoy que tres-estroite, auroit encore pû l'estre dauantage, si, comme nous voyons dans les plus jeunes Enfans, Dieu auoit tellement assuiecty toutes les pensées de l'Esprit aux mouuemens du Corps, qu'il n'en eût jamais aucune, qui ne luy vint des Sens, ou qui luy pût faire connoistre la noblesse de son extraction, & qu'il est distingué de son Corps; mais il n'estoit pas expedient ny à l'Homme ny à son Esprit, & cela auroit porté trop de preiudice à sa liberté.

En sixiesme lieu, cette vnion dépend si peu de nostre Volonté, qu'on ne peut presque pas dire qu'elle y contribuë aucune chose; en effet elle n'en dépend point, ny quant au sujet auquel l'Esprit est vny, ny quant à la maniere, ny quant à la durée; & il est certain que l'Esprit de l'Homme ne choisit, ny son Corps, ny les mouuemens, ny le temps, ny celles de ses pensées qui doiuent se ioindre à vn Corps; il ne peut pas non plus le quitter, ny changer, ny luy en associer vn autre, ny apporter aucun changement à la maniere dont ils ont accoustumé d'agir l'un sur l'autre; ny s'em-

pécher d'apercevoir les objets qui agissent assez fort sur les Sens , pour en porter le contre-coup iusques à son siege , ny les apercevoir d'une autre maniere ; sa Volonté ne peut pas non plus s'empêcher d'estre émue par les pensées qui viennent dans l'Esprit à l'occasion du Corps , tout ce qu'elle peut faire en cette rencontre, c'est de n'y pas consentir. Et néanmoins la Sagesse du Createur a esté si grande , qu'il a fait que nostre Esprit n'a pas sujet de se plaindre de cette vnion , tant par ce qu'il est redeuable à son Corps d'un grand nombre de connoissances qu'il a par son moyen , que parce que sans luy il ne seroit pas susceptible de ces plaisirs qui luy viennent par son entremise ; Et bien que cette vnion luy donne quelque fois occasion de se tromper , cela ne luy fait pas néanmoins haïr son Corps , à cause qu'il luy reste tousiours assez de lumiere pour se preserver de l'erreur. Si l'vnion de l'Esprit & du Corps peut en ce sens estre appellée volontaire, puis qu'il l'agréé , & qu'il en apprehende la separation ; elle peut encore , à plus iuste tiltre , estre appellée de ce nom , puis que sa volonté a le pouuoir d'vnir quelques-vnes de ses pensées à des mouuemens du Corps , auxquels elles ne l'estoient pas auparauant , & d'en separer quelques autres auxquels elles l'étoient , pour en substituer d'autres en leur place ; le premier se remarque lors que nous parlons , ou instituons quelque signe pour exprimer nos pensées , & le second , lors que nous surmontons

quelqu'un des ces inclinations naturelles qui dépendent du Corps ; car cela ne se peut faire qu'en separant un mouuement corporel de la pensée à laquelle il estoit ioint auparauant ; & en luy en substituant un autre.

Enfin il n'y a pas moyen d'imaginer une autre maniere d'union plus capable de lier un Esprit & un Corps, ny plus conuenable à la nature de l'un & de l'autre, que celle que nous sentons estre entre nostre Esprit & nostre Corps, à moins de faire trop de preiudice à l'un ou à l'autre : car si l'Esprit dépendoit moins du Corps il auroit moins de sujet de l'aymer, & s'il en dépendoit dauantage, il perdrait quelque chose de sa liberté, & ny l'un ny l'autre ne rendroit l'Homme plus parfait.

Pour faire connoître encore dauantage la maniere de cette union, il faut que ie vous die un peu plus en détail quels mouuemens du Corps & quelles perceptions & volonte de l'Esprit sont unies ensemble. Tous les mouuemens qui se font dans nostre Corps n'ont pas le pouuoir de donner une nouuelle pensée à l'Esprit, & ne sont pas soumis à sa volonté : Car l'experience nous fait connoître que nous n'aperceuons que ceux qui estant communiquez aux nerfs sont portez iusques au cerueau ; Et qu'il n'y a que les parties, où les tuyaux des nerfs conduisent quelques Esprits animaux, qui soient sujettes à sa volonté. Or comme les nerfs ne versent pas les Esprits animaux seulement dans les muscles, mais encore dans plusieurs au-

tres parties, ainsi que l'anatomie nous apprend; & qu'il est malaisé de concevoir que ces Esprits, qui sont des Corps, ayent pû descendre en quelque partie, sans s'y estre fait des conduits semblables ou aprochans de ceux que nous auons dit dans nos Remarques sur le Traitté de l'Homme se rencontrer dans les muscles, & sans y exciter quelque mouuement sensible ou insensible; de mesme nostre volonté n'a pas seulement pouuoir sur les muscles, mais encore sur toutes les parties où aboutissent quelques tuyaux des nerfs; Avec cette difference toutefois, qu'elle a le pouuoir de mouuoir nos membres directement en les voulant mouuoir; Mais que ce n'est qu'indirectement qu'elle cause quelque mouuement dans les autres parties; Car l'experience fait voir que la volonté n'a pas la puissance d'ouurir & de resserrer les orifices du cœur, en voulant simplement les ouurir ou les resserrer, mais en excitant en elle mesme les passions auxquelles ces sortes de mouuemens sont joints; comme aussi elle n'a pas la puissance d'exciter vne passion en la voulant auoir, mais en apliquant l'imagination à penser aux objets qui peuuent causer cette émotion: Car pour lors l'Idée Spirituelle est tousiours accompagnée de l'espece corporelle, qui détermine les Esprits pour aller dans les lieux par l'ouuerture desquels les mouuemens qui excitent cette passion sont produits, ainsi que le precedent Traitté a fait voir. Tout cecy vient de ce que rien ne

peut agir sur l'Esprit, non pas mesme sa volonté, soit pour luy donner vne nouvelle pensée, soit pour l'émouuoir, que par la voye de l'entendement, en l'apliquant aux Idées qui le peuuent faire apercevoir d'une chose, & en suite l'émouuoir, comme si l'entendement estoit l'vnique porte pour entrer dans l'Esprit, de mesme que rien n'en peut sortir que par la voye de la Volonté.

Mais passons outre. Mille diuerses experiences & maladies nous font connoistre, que quand les mouuemens de nos Membres ne sont pas portez iusques au cerueau, nous ne pouuons pas les apercevoir, & que nous ne sçaurions mouuoir aucun membre, lors que les esprits Animaux n'en peuuent descendre; de sorte que, generalement parlant, on peut asseurer que ce sont les mouuemens de quelques parties interieures du cerueau qui sont ioints immediatement aux pensées de l'Esprit.

Voyons maintenant quelles sont les pensées qui leur répondent. Je trouue qu'elles sont de deux sortes, conformément aux deux puissances que nous auons remarquées estre en l'Ame. Et premierement pour les perceptions de l'entendement, il n'y a, à proprement parler, que ces pensées confuses des sens, de l'imagination, & de la memoire, & ces sentimens obscurs qui se trouuent dans la faim, la soif, & les autres apetits naturels, & dans les passions, qui soient attachées à quelque mouuement du Corps, & non pas ces notions claires & distinctes qui luy seruent de

fondement pour iuger de la verité. Or ces pensées sont confuses, & à l'égard des choses qu'elles représentent, & à l'égard de la maniere de les représenter; car bien qu'elles soient seulement iointes aux formes sous lesquelles les Esprits sortent de la glande; elles ne nous font apercevoir, ny ces formes, ny les objets qui les causent, comme étant dans le cerueau; mais elles nous représentent l'action de l'objet, ou comme dans l'objet mesme, & hors de nostre Corps, ou du moins dans l'extrémité de quelqu'un de nos Membres. De là vient que nous auons attribué la faculté de sentir aux parties de nostre Corps, ou du moins nous auons crû que l'Ame l'exerçoit dans les organes extérieurs, d'autant que les pensées des Sens nous représentent l'action des objets, comme dans nos Membres extérieurs, & non pas comme dans le cerueau; ce qui n'arriue pas seulement aux perceptions des Sens, mais encore aux operations de l'Imagination & de la Memoire, lesquelles nous représentent les objets comme presens à nos sens, bien qu'il ne se passe rien alors que dans le cerueau.

L'autre forte de confusion, qui se rencontre dans la connoissance des sens, à l'égard des choses qu'ils représentent, est vn peu trop longue à déduire; C'est pourquoy ie remets ce que j'en deurois dire icy au Chapitre où ie dois parler particulièrement des sens. Admirons cependant l'immuabilité & la sagesse de Dieu; son immuabilité

tabilité en ce qu'agissant tousiours de la mesme forte, il continuë d'vnir ensemble les pensées & les mouuemens qui se font vne fois vnīs, faisant par ce moyen qu'ils ne se presentent plus les vns sans les autres; Et sa sagesse, en ce que pouuant ioindre à chaque espece materielle, c'est à dire à chaque forme que prend le cours des esprits animaux en sortant de la glande, telle pensée qu'il luy auroit plû, il a voulu que ce fust celle qui nous represente la cause la plus ordinaire qui luy fait prendre cette forme; Car y ayant plusieurs causes qui peuuent obliger les esprits animaux à sortir de cette glande de la mesme façon, & sous la mesme forme, ainsi que vous auez pû voir dans le Traitté de l'Homme, il arriue neanmoins bien plus souuent, que c'est par le moyen du mouuement que les objets extérieurs impriment aux fibres des nerfs, qu'ils prennent cette forme que non pas par aucune autre cause; Et bien que le mesme mouuement puisse estre aussi quelquefois communiqué aux fibres des nerfs quand on les touche dans les parties du milieu, que quand on touche leurs extremités, neanmoins d'autant qu'il arriue plus souuent qu'un certain mouuement soit excité par l'impression que fait vn objet sur l'extremité de quelque nerf, que non pas autrement; il estoit plus conuenable, & cela nous deuoit donner moins de sujet de nous tromper, que la pensée qui deuoit estre jointe à ce mouuement, fust celle qui

Ee.

nous represente la plus ordinaire, à sçavoir l'objet present deuant nos Sens, que quelqu'autre que ce pût estre; & bien que cette maniere d'vnion ne soit pas tout à fait exemte d'erreur, toutesfois nous auons sujet de louer la Bonté de Dieu, d'auoir choisi la plus conuenable de toutes, & de nous auoir donné les moyens de corriger son defect.

L'autre espece des pensées de l'Esprit ce sont les inclinations & determinations de la Volonté, entre lesquelles celles qui partent d'une claire & distincte connoissance ne sont pas celles qui ont le plus de commerce avec le Corps, & le plus de pouuoir de l'ébranler; mais celles qui tirant leur origine des connoissances confuses des Sens sont vnies aux mouuemens du Corps; car ces pensées confuses representant à l'Esprit le bien ou le mal du Corps comme luy appartenant, le portent & l'incitent à consentir confusément, & comme en trouble à toutes les actions auxquelles le mouuement des esprits animaux, l'action des objets, & les autres circonstances disposent en mesme temps le Corps auquel il est vny; car l'Esprit est de telle nature qu'il ne peut auoir aucune perception claire ou confuse, qui ne l'émeue en quelque sorte, & souuent mesmes les plus confuses l'agitent bien dauantage que les plus claires.

De plus toute sorte de mouuement n'est pas joint indifferemment à toute sorte d'inclination de la Volonté; car, par exemple, le mouuement



des Esprits Animaux qui sous vne certaine forme seroit capable de nous faire imaginer vne telle chose, ou exciter vne telle passion, ou bien mouuoir vn tel membre, n'est pas iointe avec la volonté de mouuoir la glande d'vne telle maniere, de pousser les Esprits Animaux d'vne telle façon, ny de les enuoyer par tels tuyaux en tels muscles, &c. Mais ce. mouuement est ioint immédiatement avec la volonté de penser à vne telle chose, ou avec la pensée qui peut exciter vne telle passion, ou avec le dessein de mouuoir vn tel membre ; & bien que de cette volonté de penser à vne telle chose, il ne s'ensuiue rien autre chose précisément, sinon que la glande se tourne de diuers costez, iusques à ce qu'elle vienne à rencontrer certains pores, par l'ouuerture desquels l'espece Corporelle à laquelle l'Idée d'vne telle chose est attachée, peut estre reproduite ; & que de la volonté de mouuoir vn tel membre, il ne s'ensuiue aussi rien autre chose précisément, sinon qu'elle fait sortir les Esprits Animaux de la maniere propre à les porter dans les muscles qui le peuuent mouuoir, ainsi que les Paralyties nous montrent clairement ; Toutesfois nous aurions beau auoir la volonté de faire mouuoir çà & là cette glande, ou de pousser les Esprits Animaux de la façon nécessaire pour faire mouuoir quelque membre, l'expérience fait voir que cela seroit absolument inutile.

Voilà quelle est la maniere particuliere de l'v

E c ij

nion qui est entre l'Esprit & le Corps laquelle est propre à la nature de l'Homme: Or toutes les autres sortes d'vnions que nous pouuons conceuoir, comme celle d'un Pilote avec son Nauire, d'un Escuyer avec son Cheual, de nous mesmes avec les autres Corps que le nostre, & autres semblables sont fort differentes de celle là; Car premierement, le Pilote pour l'ordinaire est vny volontairement à son Nauire, Secondement, il connoist clairement de bien ou le mal qui luy arriue; Troisièmement, la joye & la tristesse qu'il en ressent est bien autre que le sentiment de la faim, de la soif, de la douleur & du chatouillement, que l'Esprit de l'Homme a à l'occasion de son Corps; Et enfin, ce n'est pas simplement en voulant mouuoir les diuerses parties de son Vaisseau qu'il a la puissance de le faire auancer, & d'en changer la situation; mais c'est par vne connoissance distincte qu'il a des instrumens dont il se doit seruir, & par l'employ qu'il en fait; au lieu que l'Esprit de l'Homme n'a de sa nature aucune connoissance des moyens necessaires pour mouuoir son Corps; & quand mesme il l'auroit, elle luy seroit inutile: La seule Volonté qu'il en a estant suffisante pour cet effet.

Vous pouuez voir de cecy que les Mechaniques & l'Anatomie, dont la science est tres-vtile pour connoistre comment le Corps a la puissance de se mouuoir, sont tres-inutiles pour conceuoir comment la pensée de l'Homme a le pouuoir de

le faire ; & qu'ainſi c'eſt vne choſe non ſeulement inutile , mais meſme ridicule, de vouloir expliquer par elle le mouvement des membres des Beſtes ; car ſi leur Ame n'a vne connoiſſance plus grande que la noſtre, celle qu'on leur attribue leur eſt auſſi peu auantageuſe pour l'effet qu'on en pretend, que le ſeroit à vn Pilote la connoiſſance de la Mer, des Vents & des Ports, ſ'il ne connoiſſoit pas les Inſtrumens de ſon Vaiſſeau, & ſ'il ne ſçauoit pas l'art de ſ'en ſeruir.

Mais retournons à noſtre vnion. Il y a de l'apparence qu'elle commence dès auſſi toſt que le Corps peut donner occaſion à l'Eſprit d'auoir quelque penſée, & l'Eſprit exciter quelque mouvement dans le Corps ; & qu'elle finit ſi-toſt que le Corps ne peut plus entretenir ce commerce : Car comme cette vnion , conſiſte dans la dépendance qu'ils ont l'un de l'autre, à raiſon de quelques vnes de leurs actions & paſſions, elle ne peut commencer plus toſt ny finir plus tard. Pour parler plus clairement , la durée de cette vnion commence dès l'inſtant que le cœur, le cerueau, les nerfs , & les muſcles ſont ſuffiſamment ébauchez pour faire que l'action des objets puiſſe eſtre portée iuſques au ſiege de l'ame, & que les Eſprits animaux puiſſent aller dans les muſcles ; Et elle finit lors que quelque partie du Corps venant à manquer, le cœur ne peut plus faire monter ſes Eſprits au cerueau , ny le cerueau enuoyer ſes ſiens dans les nerfs & dans

les muscles , pour mouuoir les vns & tenir les autres en estat. Vous voyez par là que l'Esprit ne donne iamais sujet au Corps de rompre cette alliance, mais que la cause en vient tousiours du costé du Corps ; Et si vous m'en demandez la raison, ie vous diray que l'Esprit estant incorruptible ne peut manquer de son costé que par le defect de sa volonté ; mais comme cette vnion n'en dépend pas , ce defect aussi ne sçauroit rompre cette alliance ; & partant la cause de cette rupture ne peut venir que de la partie du Corps : car elle ne peut pas venir du costé de Dieu , d'autant qu'il est immuable.

---

*Des Causes & des Articles de cette Vnion, & de son Siege principal.*

CHAP. XV.

**P**OUR parler des Causes generales & particulieres de cette alliance, & de la maniere qu'elle est en chaque Homme, comme cela dépend des articles de l'Vnion de l'Esprit & du Corps, il faut que ie tâche de les expliquer auparauant. Certes il estoit bien raisonnable que ces deux Substances si contraires conuinssent, pour ainsi dire, de quelques articles auant que de s'allier, & que Dieu qui s'est prescrit de certaines Loya dans le gouuernement du grand Monde, fist aussi quel-

ques constitutions particulieres pour la conduite du petit , lequel il a estably comme l'abregé du plus grand.

Le premier article de cette Alliance est , que chaque mouuement des Esprits Animaux , ou pour mieux dire , chaque forme particuliere de leur cours , lors qu'ils viendront à sortir de la glande d'une autre façon qu'ils n'ont accoustumé de faire , sera accompagnée d'une certaine Idée qui fera auoir une certaine pensée à l'Esprit.

Le second, que chacune de ces formes ne sera vnue naturellement qu'à une seule Idée ou à une seule pensée , qui l'accompagnera tousiours.

Le troisiéme , que cette pensée sera conforme à l'estat du Corps , c'est à dire gaye ou triste , confuse ou distincte , selon la disposition où il s'est trouué la premiere fois , & qu'il se trouue ordinairement , quand la forme à laquelle cette pensée est attachée s'excite sur la glande.

Le quatriéme , que l'Ame n'aura pas le pouuoir de separer cette pensée de la forme du mouuement des Esprits à laquelle elle est naturellement iointe ; ie dis naturellement iointe , afin de distinguer l'vnion des pensées que l'habitude ou la volonté de l'Ame iointes dans quelques Hommes à certains mouuemens particuliers , laquelle l'Ame peut rompre , d'avec l'vnion des pensées que la nature a vnies à certains mouuemens dans tous les Hommes , laquelle l'Ame ne scauroit oster.

Le cinquiesme , que réciproquement les pen-

sées de l'Esprit, qui ont le Corps pour objet, seront accompagnées de la forme & de la maniere du cours des Esprits animaux au sortir de la glande qui est le plus conuenable pour l'exécution de ses desseins.

Le sixiesme, que le mouuement qui aura vne fois accompagné vne pensée, l'accompagnera tousiours, en sorte qu'ils ne se quitteront plus, si l'ame elle mesme n'en changel'habitude.

Le dernier article, que cette alliance durera autant de temps que le cœur pourra enuoyer ses Esprits vers la glande, & celle-cy les renuoyer par les nerfs dans les muscles.

Tous ces articles sont tellement prouuez par l'experience, qu'il n'est pas besoin que ie les démontre icy dauantage. Ce que nous dirons tantost du siege de l'Ame prouuera le premier. Le second & troisieme seront prouuez par la Soif des hydropiques; Et par l'exemple de cette fille qui ne laissoit pas de sentir de tres grandes douleurs dans le poulce, quoy que les Chirurgiens le luy eussent coupé quelques jours auparauant: Car pour quelle raison vn hydropique, qui n'a pas besoin de boire, auroit-il soif, si ce n'est que la secheresse de sa gorge, agitant les nerfs qui y aboutissent, de la mesme façon qu'ils le font quand nous auons besoin de boire, cela excite le sentiment de la soif & l'enuie de boire, à cause que la mesme pensée est tousiours vnice au mesme mouuement; Et bien qu'elle soit nuisible pour  
lors.

lors à l'Hydropique, c'est toutesfois la plus convenable pensée qui puisse estre jointe à ce mouvement, d'aurant qu'il est bien plus souuent excité quand il est bon de boire, que non pas quand cela est préjudiciable.

Pour preuve du quatrième, ie n'ay qu'à dire, que par les pensées, qui sont naturellement vnies à certaines formes du cours des Esprits, que la volonté de l'Ame ne sçauroit separer, i'entens seulement ces sentimens confus qui sont causez par l'action des objets sur nos sens, lesquels il est manifeste que l'Ame ne peut ny oster ny changer; mais elle a bien le pouuoir d'en faire des signes de ses pensées, en y attachant de plus vne idée laquelle ne leur appartient pas naturellement. Et quand Monsieur Descartes a dit en quelque endroit, que nous pouuions separer certaines pensées du mouvement auquel elles estoient vnies naturellement; il n'a pas entendu parler de celles-là, mais des autres.

L'Article cinquième est assez clair, puisque c'est en cela seul que consiste la faculté que nous auons d'imaginer, de nous ressouuenir, & de mouuoir nos membres. Au reste ie me suis restrainct dans cét Article aux seules pensées qui ont le Corps pour objet, à cause que les idées des choses Spirituelles ne peuuent estre excitées dans l'Esprit par les Sens, l'Imagination, & la Memoire, si ce n'est en tant qu'il les a luy-mesme volontairement attachées à certains noms, ou autres si-

gnes Corporels, par le moyen desquels elles peuvent auoir place entre les especes de l'Imagination, & de la Memoire.

La preuue de cét Article, qui consiste dans cette mutuelle liaison des mesmes pensees aux mesmes mouuemens, se tire de l'Immutabilité de Dieu, qui a donné la force à chaque chose de se conseruer dans l'estat où elle est; iusques à ce qu'elle en soit chassée par vn autre. Nous parlerons de cecy plus au long, quand noustraiterons des auersions & inclinations naturelles, qui n'ont pour cause que le Corps.

Enfin le dernier Article est suffisamment prouué par ce que nous auons dit cy-dessus.

Les causes del'alliance del'Esprit de l'Homme avec son Corps, sont generales ou particulieres: La cause generale de cette vnion ne scauroit estre autre que la Volonté Diuine: car bien que nous conuenions que le Corps de l'Homme n'a rien en soy qui resiste à l'vnion, & qu'ainsi naturellement il soit capable d'estre vny à quelqn'autre chose, neanmoins nous ne reconnoissons rien en luy, qui puisse estre la cause efficiente del'vnion qu'il a avec son Ame. Il faut donc la chercher entre les Substances Spirituelles: Or l'Esprit de l'Homme n'a que sa Volonté par laquelle il puisse sortir de luy-mesme, & se ioinde à quelque autre chose, & cette Volonté peut bien estre la cause efficiente de toutes les choses que nous remarquons dans cette alliance dépendre immediatement d'elle;



mais elle ne le peut pas estre d'une infinité d'autres qui n'en dépendent point; il faut donc que cela dépende de la volonté d'un autre Esprit. Je sçay bien qu'il n'est pas impossible que Dieu ait employé la Volonté d'un Esprit Angelique pour faire cette vnion; Mais parce que d'un costé nous n'auons aucune raison qui nous persuade que cela soit, & que de l'autre nous sçauons que la Volonté de l'Ange toute seule n'est pas suffisante, si celle de Dieu n'y concourt & n'y interuient, nous ne sçaurions, sans courir hazard de nous tromper, assigner d'autre cause generale de cette vnion, de la maniere qu'elle se trouue vniuersellement en tous les Hommes indépendamment de leur Volonté, que la Volonté de Dieu mesme. Et un Philosophe ne doit pas auoir plus de honte de reconnoistre Dieu pour estre l'Autheur de cette Vnion, que pour l'estre de la Creation de l'Ame, & de son Infusion dans le Corps; car en effet l'Infusion & l'Vnion ne sont qu'une mesme chose. Dieu est donc la Cause totale & prochaine de l'Vnion des pensées qui se rencontrent dans tous les Hommes vnies aux mesmes mouuemens.

Mais pour les conditions particulieres de cette vnion, & s'il faut ainsi parler, indiuiduelles à chaque Homme, elles ont deux causes particulieres, dont l'une est Corporelle & l'autre Spirituelle; La premiere se prend de toutes les conditions singulieres qui se rencontrent dans le Corps de chaque Homme, soit à raison de son tempe-

ramment, de la conformation de ses parties, du mouvement des humeurs, du sang, & des Esprits; soit à raison du changement, que le Pere, la Mere, & les autres Corps estrangers y peuuent apporter. Cette cause a le pouuoir de déterminer Dieu à marier vne telle pensée avec vn tel mouuement dans vn tel Homme, suiuant l'Article troisième, qui veut que la pensée qui sera iointe à chaque mouuement, sera conforme à l'estat du Corps selon la disposition où il s'est trouué la premiere fois, & qu'il se rencontre le plus souuent, lors que les esprits animaux sortent de cette maniere de la glande. Voila vne des sources des plus considerables de la diuersité des mœurs & des inclinations des Hommes. Pour la bien expliquer il faudroit faire des Liures entiers; c'est pourquoy le dessein de ce Traitté n'estant que de parler de l'Esprit de l'Homme en general, & non pas de la difference des Esprits en particulier, ie n'en diray pas dauantage; peut estre qu'vn jour ie le feray plus au long.

L'autre cause particuliere & Spirituelle de cette vnion, c'est la volonté de l'Esprit de l'Homme, à laquelle nous ne pouuons dénier le pouuoir d'vnir certaines pensées à certains mouuemens de la glande & des Esprits, auxquels elles n'estoient point jointes, auant qu'elle les eust vnies elle mesme; Car c'est en cela seul que consiste la faculté que nous auons de faire connoistre nos pensées. Il est vray que d'abord cette liaison est

tres foible, d'autant qu'ordinairement la nature a joint vne autre idée au mouuement dont la volonté se veut seruir, laquelle empesche au commencement l'Esprit de penser à la seconde Idée que la volonté y veut adjoûter; Mais à la longue, la perseuerance l'emporte tellement par vne forte habitude, qu'on ne s'aperçoit presque plus que de la signification des paroles, sans prendre garde au son des sillabes, ou aux figures des lettres.

Il ne me reste plus pour acheuer d'expliquer entièrement la maniere de cette vnion, qu'à vous faire connoître quel est le siege principal de l'Esprit de l'Homme, où il exerce immédiatement ses fonctions; Et bien que j'en aye desja assez dit dans mes Remarques, & dans les choses que j'ay auancées iusques icy, pour faire voir quelle est ma pensée sur ce sujet, toutesfois ie pense qu'il n'est pas mal à propos que j'en dise encore icy quelque chose, pour conuaincre dauantage les Esprits, & pour répondre en mesme temps à deux ou trois objections qui ne sont pas moins importantes que celles auxquelles j'ay tâché de satisfaire dans mes Remarques.

Afin que vous sçachiez quel est l'estat de la question, ie vous auertis, que par le siege principal de l'Ame, i'entens cette partie du Corps humain, au mouuement de laquelle les pensées sont tellement attachées, qu'il est impossible que l'une se puisse trouuer sans l'autre; C'est à dire

j'entens cette partie laquelle ne peut estre meue d'une façon qui n'est pas ordinaire, (car les mouvemens ordinaires ne donnent aucune pensée à l'Esprit, en quelques parties qu'ils soient receus) sans que l'Ame s'en aperçoive, ny elle avoir la volonté de mouvoir quelqu'un de ses membres, sans que cette partie se meue. Il est manifeste qu'il doit y avoir une ou plusieurs parties du Corps Humain, auxquelles l'Esprit soit ainsi uny, puisque son union avec le Corps ne consiste que dans ce concours & dans cette dépendance mutuelle de la pensée de l'un & du mouvement de l'autre.

Je remarque en second lieu, qu'il est évident que l'Ame n'est pas jointe de cette manière à tout le Corps; Car nous ne pouvons douter, que nous ne nous apercevions d'aucune chose, soit du dedans du Corps, soit de dehors, que de ce qui a le pouvoir d'agiter & d'ébranler les fibres de nos nerfs; Et bien que nous ayons cy-devant dit que l'Esprit ou l'Ame estoit unie à tout le Corps immédiatement, cela se doit entendre seulement par rapport à l'union qu'elle a avec nostre Corps, en comparaison de celle qu'elle a quelque fois par son entremise avec les autres, & non par rapport à toutes les parties de nostre Corps entre elles, qui bien qu'elles soient toutes unies à l'Ame, ne le sont pourtant pas également.

Je dis en troisième lieu, que les Paralyties, les Apoplexies, les Lethargies, les Meditations profondes, & mille autres rencontres, font voir manifeste-

Itémement que ce n'est pas assez pour causer quelque pensée ou sentiment en l'Ame, que les parties de nostre Corps soient meües, & mesme que nos nerfs soient agitez, si l'impression n'en est portée iusques au cerueau; comme aussi l'Ame ne peut causer aucun mouuement dans les membres, si ce n'est en faisant descendre du cerueau les esprits animaux. Et ainsi il est évident que ce siege principal de l'Ame, & cette partie à laquelle elle est plus étroitement vnüe ne sçauroit estre hors du cerueau; mais que ce doit estre ou tout le cerueau, ou bien quelques-vnes de ses parties. Ce qui, à mon auis, ne peut estre contesté par aucun de ceux qui ne prennent l'Ame de l'Homme que pour le principe de toutes ses pensées, & ne luy attribuent point d'autres operations que celles que les Medecins appellent animales.

Je dis en quatriefme lieu, que ce ne peut estre le cerueau tout entier; Car personne ne doute que tout le cerueau, ou du moins vne bonne partie, ne soit l'organe de la Memoire, c'est à dire le lieu où les vestiges des mouuemens des objets extérieurs ou intérieurs sont receus: Or le cerueau estant mol comme il est, ces vestiges ne sçauroient quasi estre sans quelque mouuement dont l'Ame déueroit s'apercevoir, & par consequent auoir quasi continuellement presens deuant elle, & penser actuellement à tous les objets dont elle a la faculté de se ressouuenir, s'il estoit vray qu'elle fust jointe immédiatement & étroitement à tout

le cerueau, il faut donc que ce soit seulement à quelques-vnes de ses parties qu'elle soit ainfi vnice.

Je ne vois que deux choses qui nous puissent decouurir quelle est cette partie, la premiere desquelles se prend du Corps, & la seconde de l'Esprit; Et de plus il est necessaire qu'elles se rencontrent toutes deux dans la meisme partie, à moins dequoy elle ne pourroit estre le siege principal de l'ame.

Celle qui se prend du costé du Corps, consiste en ce qu'il faut que quelque part que soit porté le mouuement qu'imprime l'objet par son action dans le nerf, il paruienne enfin à vn lieu d'où il puisse obliger les esprits animaux à descendre dans les muscles qui doiuent mouuoir les membres, en la maniere qu'ils le sont apres vne telle action, lors que nous les mouuons sans en auoir le dessein. Cela ce me semble ne se peut contester; Autrement pourquoy est-ce que telles actions seroient suiues de tels mouuemens. Il faut donc que ce mouuement soit porté par les nerfs iusques à la source des Esprits, & que par ce moyen fermant quelques pores, & en ouurant d'autres, ou mesme en les ébranlant quelque peu, ils soient obligez de descendre vers certains muscles plustost que vers d'autres. Et l'on ne peut douter non plus qu'il ne faille que le siege de l'Ame soit dans la partie la plus proche de cette source, afin qu'elle puisse aussi mouuoir nos membres quand elle  
veut,

veut, & auoir la pensée, qui est vnice à ce mouuement, que les nerfs y portent.

L'autre condition qui vient de l'Esprit, est, qu'il est necessaire que cette partie soit simple & vnique; car tous les organes des Sens estant doubles, il n'y a pas de raison pourquoy l'Ame n'aperçoit pas deux objets au lieu d'un, quand vn objet vient à faire impression en mesme temps sur les deux organes du mesme Sens, si ce n'est que les deux impressions sont portées iusques à vne certaine partie qui est simple & vnique, laquelle les reunit en vne. De plus, il est necessaire qu'elle soit mobile, afin que l'Ame la faisant mouuoir immediatement, puisse pousser les Esprits animaux vers certains muscles plustost que vers les autres. Concluons donc que le siege principal de l'Ame doit estre vne partie simple, vnique & mobile, & enfin la plus proche qu'il est possible de la source des esprits animaux. Tâchons de trouuer premierement cette source, c'est à dire le lieu où s'engendrent les esprits animaux, & puis nous chercherons quelle est la partie, de toutes celles qui sont à l'entour d'elle, à laquelle les conditions que nous venons d'alleguer puissent conuenir.

Les anciens Medecins ont crû tous vnaniment que les ventricules du cerueau estoient le lieu où les esprits animaux s'engendroient; les nouueaux le nient, à cause que l'on trouue quelque-fois quelque serosité dans ces ventricules. Nous auons répondu à cette objection dans nos

Remarques; c'est pourquoy ie n'en diray rien icy dauantage. Je les prieray seulement de considerer, premierement, qu'il n'y a aucunes veines ny arteres répandues dans la substance du cerueau, où ils veulent que cette generation se fasse; secondement, que de tous les rameaux des arteres carotides & autres, il n'y en a aucun qui ne s'atache à quelque partie du cerueau, à la reserve de ceux qui composent le lassis choroïde, lequel apres auoir enuironné la petite glande apellée conarion, nage librement dans les ventricules du cerueau sans se ioindre à aucune partie. Et partant, s'il y a quelque artere dans tout le cerueau, à laquelle on puisse attribuer vn autre vsage que celuy de le nourrir, ou pour mieux dire, s'il y en a quelqu'une que l'on puisse soupçonner de n'estre pas destinée pour cet vsage, ce doiuent estre les arteres du lassis choroïde, veu qu'il est impossible qu'elles nourrissent aucune partie estant séparées presque de toutes: Mais si cet vsage leur manque, quel autre leur donnera-t-on plus probablement, que celuy de répandre cette flame tres-subtile, qu'on apelle les esprits animaux; & quelle autre artere sera plus capable qu'elles de cette fonction? Le tres-sçauant & tres-expert Anatomiste Vvilis dans son Anatomie du cerueau, semble tomber d'accord de cette verité, lors qu'il dit, que l'vsage de ces petites arteres n'est pas de nourrir quelque partie, mais bien de seruir de réchaut, pour ainsi dire, au reste de la substance du cerueau; car se-



lon ses Principes elles ne seroient pas capables d'un tel effet, si elles ne remplissoient toute cette cavité d'esprits. Je ne pretens pourtant pas nier que les esprits animaux en passant par les pores des ventricules, n'acheuent de se purifier & de se perfectionner en se demêlant des autres parties plus grossieres qui sont sorties avec elles des pores des arteres; ny qu'entre les parties fibreuses que versent les arteres, qui sont dans la superficie extérieure du cerueau, pour la nourriture de la substance, il n'y en puisse auoir de plus subtiles, qui se mêlant avec les esprits qui viennent des ventricules, & coulant avec eux le long des fibres dans les nerfs & dans les muscles, prennent la forme de l'esprit animal; mais ie soustiens que la principale, la plus considerable, & la première source est à l'entour de cette petite glande appelée conarion, à cause que c'est autour d'elle que la plus-part des arteres du lassis choroïde sont répandues; & que c'est en elle que la plus subtile partie du sang qu'elles versent, commence en passant au trauers de ses pores, à prendre la forme de l'esprit animal.

Ceux qui soustiennent l'opinion contraire répondent à cela, premierement, qu'il n'y a point de ventricules dans le cerueau; secondement, que cette cavité, à laquelle on a donné ce nom, n'a pas esté faite par aucun dessein de la nature, mais seulement par hazard; & parce que les parties du cerueau ne pouuoient se ioindre, sans laisser

entre elles cette cavité. A quoy ie répons, qu'il importe peu si l'on appelle cette cavité vn ou plusieurs ventricules, ou mesme qu'on luy oste entierement ce nom, pourueu que l'on tombe d'accord qu'il y a vne cavité au milieu du cerueau, ce que personne ne sçauroit nier; & quand ils disent que la nature n'a pas eu intention de la former, ie voudrois bien leur demander ce qu'ils veulent dire; car s'ils entendent parler de la nature particuliere du Corps de l'Homme, en tant qu'elle est separée de l'Esprit, elle est auetugle, & n'agit point avec dessein; mais s'ils parlent de la Nature Vniuerselle, c'est à dire, de Dieu; il est ridicule de dire qu'il fasse quelque chose sans dessein; ce qu'ils disent aussi que cette cavité s'est formée par hazard, & parce que les diuerses parties du cerueau ne peuuent pas s'apuyer ny replier les vnes sur les autres, sans laisser entre-elles quelque espace, ne peut estre veritable, qu'en suposant que dès le temps de la premiere formation de ces parties, elles n'ont pas esté moins solides qu'elles le sont dans vn âge plus auancé; mais tant s'en faut que cela ait esté ainsi, qu'au contraire elles estoient alors tout à fait molles, & comme fluides; Qu'est-ce donc qui les auroit empesché en ce temps là d'aller remplir cet espace vuide, s'il n'y auoit eu alors vn Corps assez fort pour les en chasser? Mais quel a pû estre ce Corps, sinon les Esprits qui montoient du cœur au cerueau par des arteres du plexus choroïde, ou autres? Car il n'y a pas d'apparence que ç'ait pû estre les excre-

mens du cerueau qui n'estoit pas encore formé; Or s'il est vray qu'on doive attribuer cet effet à la force des Esprits, n'y a-t-il pas bien de l'apparence que ce sont eux encore qui remplissent cette cavitée, & en chassent autant qu'ils peuuent tous les autres Corps, & partant que ce doit estre là le lieu de leur premiere & principale origine?

Voyons maintenant si nous pouuons trouuer aupres de cette source, quelque partie simple, vnique, & mobile, laquelle puisse reünir la double impression que font en mesme temps les objets qui frappent les deux organes d'un mesme sens. Je ne pense pas qu'on en puisse trouuer d'autre que cette petite glande appellée conarion; Car toutes les autres parties du cerueau sont doubles, ou ne sont pas aupres de cette source, C'est donc là la seule partie que nous pouuons le plus raisonnablement prendre pour le siege principal de l'Ame, non seulement parce qu'elle est simple & vnique, au lieu que tous les organes des sens sont doubles, mais aussi parce qu'elle est mobile, & qu'elle est enuironnée de toutes pars des arteres du lassis choïde; Ce qui fait qu'elle est au milieu de la source des Esprits, ou pour mieux dire qu'elle est elle mesme cette source, puis que c'est en elle que la plus pure portion du sang arterial prend la forme de l'Esprit animal, en se dégageant des autres parties plus grossieres.

Il ne reste plus qu'une chose pour faire voir que cette petite glande est le siege principal de l'Ame,

c'est à ſçauoir de monſtrer comment elle reünit l'aſſion des objets, & de quelle ſorte les fibres de tous les nerfs peuuent agir ſur elle; Mais cela a deſia eſté expliqué, ſi au long dans le Traitté de l'Homme. qu'il n'eſt pas neceſſaire que i'en parle icy dauantage; Et ceux qui deſireront en eſtre plus amplement éclaircis prendront la peine de le lire pour s'en inſtruire. Je ne puis toutesſois m'empêcher de répondre à quelques objections importantes qui m'ont eſté faites depuis. L'on dit que cette petite glande ne peut ſeruir à l'vſage que nous luy donnons, premierement, parce qu'elle n'eſt pas vnique; Secondement, parce qu'elle n'eſt pas dans les Ventricules; Troiſièmement, parce qu'elle ne ſe peut mouuoir; Et enfin, parce qu'elle n'eſt pas dans la ſource des eſprits animaux. Je réponds premierement, qu'encore qu'il ſe rencontre quelquefois d'autres glandes, & dans le laſſis choïroïde, & ailleurs dans le cerueau, toutesſois elle ne laiſſe pas d'eſtre vnique, ny en ayant point d'autre qu'elle, qui ſoit attachée à cette partie du cerueau qu'on appelle le tronc medullaire, duquel au iugement des plus doctes Anatomiſtes, ſortent generalement tous les nerfs; outre que les autres glandes qui ſe rencontrent quelquefois dans ce laſſis, doiuent pluſtoſt paſſer pour des maladies, ou du moins pour des parties excrementeuſes (comme ſeroit vn ſixième doigt) parce qu'on ne les y trouue pas touſiours, qu'elles ne doiuent eſtre miſes dans le rang de noſtre glande, qui eſt vne

partie permanante, & qui occupe tousiours la mesme place, non seulement dans l'Homme, mais encore dans tous les animaux parfaits.

Je dis en second lieu, que ceux qui nient qu'elle soit dans les Ventricules, prennent plaisir à se tromper : car enfin elle n'est ny sur la superficie externe du cerueau, ny au dedans de sa substance, il faut donc qu'elle soit comprise sous sa superficie interne, c'est à dire, dans les ventricules. Mais le sujet de la tromperie vient premierement, de ce que les diuerfes chambres de ces ventricules ( si ie puis parler ainsi ) ne sont pas toutes situées dans vn mesme plan, au contraire, chacune à le sien à part, bien qu'elles aient toutes quelque communication. Secondement, cela vient de ce que cette glande est située justement à l'extremité du troisieme ventricule, au dessus du quatrieme ; d'où il arriue que lors qu'on a leué d'autour du cerueau toute cette membrane qu'on nomme la dure mere, si on leue ses extremités qui sont couchées sur le cerucler, & qu'on les eleue vn peu en haut, on découure, sans donner le moindre coup de rasoir, la pointe de nostre petite glande, laquelle paroist pour lors estre hors de toutes les ventricules, d'autant que le troisieme, qui est derriere elle, ne paroist pas encore, & que le quatrieme, qui descend dans le cerucler, ne peut estre veu dans cette situation. Mais quel moyen y a-t-il de nier que cette glande appartienne aux ventricules, puisque tous les Anatomistes

tombent d'accord qu'elle naît de deux ligamens nerveux de la superficie du tronc medullaire, qui fait vne partie de celle du troisiéme ventricule.

En troisiéme lieu, sur ce qu'ils objectent que cette glande ne se peut mouvoir, ie répons, que s'ils nous pouuoient persuader que toutes les parties du cerueau d'un animal viuant, sont aussi pressées que celles de la teste d'un veau mort; l'objection qu'il nous font pourroit estre receuable, & peut-estre y donnerions nous les mains; mais il n'y a aucun lieu de croire que cela soit pendant la vie de l'animal, ny que les Esprits animaux n'ayent pas assez de force pour élever & écarter les parties qui sont autour de cette glande; car nous voyons mesme qu'apres la mort, en soufflant dans les tuyaux des apophyses mammillaires, on fait enfler toute la masse du cerueau, ainsi que Monsieur Vvillisa fort bien remarqué.

Enfin, ie répons qu'on ne doit pas nier que cette glande soit située dans la source des esprits animaux; de ce qu'on obserue peut estre quelque veine entre les arteres du lassis choroïde; car au contraire, le mélange de ces deux sortes de vaisseaux est vne marque de quelque élaboration particuliere, & montre qu'en cét endroit il se fait quelque separation des plus grossieres parties du sang d'avec les plus subtiles.

Il n'y a donc rien qui empesche que nostre petite glande ne puisse estre le siege principal de l'Âme; Tant s'en faut, ie suis certain qu'on ne sçauroit  
trouuer

trouver en tout le cerueau, aucune autre partie qui ait toutes les conditions necessaires pour le pouuoir estre. Toutesfois, ie suis obligé d'auertir icy le Lecteur, que le reste des choses que j'ay auancées touchant l'vnion de l'Esprit & du Corps, & l'alliance des pensées de l'un avec les mouuemens de l'autre, ne dépend point de la verité de cette opinion ; & que quand bien elle seroit fausse, ce que j'en ay dit ne laisseroit pas d'estre veritable: C'est pourquoy, s'il fait difficulté de receuoir cette opinion comme vne verité constante, qu'il me permette au moins de m'en seruir comme de l'hypothese la plus probable & la plus intelligible de toutes celles qu'on a iusques icy apportées pour expliquer toutes les fonctions animales; Et cependant s'il est dans quelque autre opinion, il la peut retenir si bon luy semble, pourueu seulement qu'il attribue au mouuement de la partie, qu'il prend pour le siege principal de l'Ame, tout ce que ie diray de ceux de la glande. Mais ie suis presque assuré qu'il reconnoistra éuidemment, qu'il n'y a aucune autre opinion qui explique toutes ces choses si clairement que la nostre, & dans laquelle il ne se trouue de plus grandes difficultez.

*Comment l'Esprit & le Corps agissent l'un sur  
l'autre ; Et comment vn Corps en  
mouue vn autre.*

C H A P. XVI.

**S**I ie disois qu'il n'est pas plus difficile de concevoir comment l'Esprit de l'Homme sans estre estendu , peut mouuoir le Corps , & comment le Corps , sans estre vne chose Spirituelle , peut agir sur l'Esprit , que de concevoir comment vn Corps a la puissance de se mouuoir , & de communiquer son mouuement à vn autre Corps ; ie ne pense pas que ie trouuasse creance dans l'Esprit de beaucoup de gens , cependant il n'y a rien de plus veritable , & c'est ce que i'entreprends de faire voir dans ce Chapitre. Mais , quoy , me dira-t-on , n'est-ce pas vne chose claire & évidente , que les choses pesantes se meuuent en en bas , que les legeres montent en haut , & que les Corps se communiquent leur mouuement l'un à l'autre ? Ie l'auouë , mais il y a bien de la difference entre l'évidence de l'effet , & celle de sa cause ; l'effet est icy fort clair ; Car qu'est-ce que nos sens nous montrent plus manifestement que les diuers mouuemens des Corps ? Mais nous font-ils voir quelle est la cause qui porte les choses pesantes en bas , & les legeres en haut , & comment vn Corps a la puissance d'en mouuoir vn autre ? Nos Sens



nous apprennent-ils comment le mouvement peut passer d'un Corps dans un autre ? Pourquoi il n'y en passe qu'une partie, & pourquoi un Corps ne peut communiquer son mouvement, de même qu'un Maître communique sa science, sans rien perdre de ce qu'il donne ? Ce n'est donc pas une chose si évidente qu'on pourroit bien penser, que la cause du mouvement des Corps ; & c'est la raison pourquoi j'ay dit au commencement qu'il n'estoit pas plus difficile de concevoir comment l'Esprit meut le Corps, que de sçavoir comment un Corps en meut un autre ; car en effet dans l'un & dans l'autre il faut recourir à la même cause universelle ; & comme c'est le point le plus important, il est nécessaire icy d'en parler, pour ôter de l'Esprit de plusieurs cette malheureuse prévention, de croire que si leur Ame n'étoit Corporelle, elle n'auroit pas la force de mouvoir le Corps, parce, disent-ils, qu'elle ne le sçauroit faire sans le toucher, & que selon le dire du Poëte, *Tangere nec tangi nisi Corpus nulla potest res.* Comme si le mouvement ne se pouvoit communiquer que par le moyen de l'attouchement, ou comme s'il estoit aussi aisé d'apercevoir comment un Corps en meut un autre, qu'il est facile de voir comment il le touche.

Il n'y a rien de plus fréquent dans la bouche de quelques personnes, & même de ceux qui admettent des substances immatérielles, que de dire que nous ne conceuons rien que de Corporel, ou

du moins que sous vne forme & representation Corporelle ; & neanmoins ces personnes-là doiuent auoüer, ou qu'ils ne connoissent rien dans la plus-part des choses naturelles, & qu'ils ne sçauent ce qu'ils disent lors qu'ils les expliquent par les Principes de l'Ecole, ou du moins qu'ils se les représentent d'une maniere & sous vne idée tout à fait Spirituelle. Vous diriez qu'ils ont pris plaisir à renuerfer l'ordre des choses ; & que comme ils veulent opiniastrement employer leur imagination à conceuoir les choses Spirituelles ; ils ne veulent aussi se seruir que de leur entendement pour comprendre la maniere dont les Corps agissent les vns sur les autres. Ils deuroient toutesfois auoir remarqué, que comme nous ne connoissons rien, à proprement parler, que ce dont nous auons des idées claires & distinctes, de mesme aussi nous ne comprenons rien en matiere de Corps, & n'en pouuons rien sçauoir, que ce qui peut tomber sous l'imagination, & dont cette faculté nous peut fournir vne idée claire & manifeste. D'où il s'en suit, que tous ceux qui aportent pour principes prochains des Corps & des changemens qui leur arriuent, des causes que leur imagination ne peut conceuoir, sont des aueugles qui en veulent conduire d'autres : Car quand mesme nous sçaurions par reuelation que ces causes seroient les veritables principes de la Nature, leur obscurité neanmoins les rendroit entierement inutiles. Or il ne pense pas que qui que ce soit puisse nier, qu'entre tou-

tes les idées de l'imagination, il n'y a qu'à celles de l'étendue, de la grandeur, de la figure, du mouvement & du repos, de la situation & de la liaison des parties, que nous conceuons évidemment; car pour celles de la chaleur, de la douleur, de la lumière, & autres semblables, elles sont si obscures & si confuses que par la seule connoissance des Sens & de l'Imagination, on ne sçauroit découvrir ce que c'est. Concluons donc que dans la nature Corporelle nous ne connoissons rien que les choses auxquelles appartiennent les premières Idées; & partant que tous ceux que nous supposons de plus dans les Corps outre les propriétés, comme par exemple, cette qualité que l'Ecole appelle pesanteur, ou celle qu'elle appelle qualité *impreſſe*, qui a la force de mouuoir les Corps, nous ne le conceuons point du tout, d'autant que nous ne sçaurions imaginer ce que c'est, & qu'en matiere de Corps, nous ne comprenons que ce que nostre imagination est capable de conceuoir.

L'Eſcriture Sainte nous apprend qu'un Ange porta un Prophete d'une Prouince dans une autre; nous voyons tous les iours que les Corps pesans tombent en bas, & que la qualité qu'une raquette imprime dans une balle (pour parler en Parapeticien) l'a porte fort loin. Je voudrois bien que quelqu'un de ceux qui introduisent dans la nature des qualitez réelles, voulust m'expliquer la façon dont chacune de ces trois causes, l'Ange, la pesanteur, & cette qualité *impreſſe*, a agy sur le

Corps qu'ellea meu : car estant toutes trois fort différentes, l'une Spirituelle & les deux autres Corporelles; mais dont l'une est naturelle & l'autre estrangere, il faut qu'elles ayent des façons d'agir fort diuerfes. Et ceux qui appellent les dernières à leur secours, doiuent expliquer comment elles agissent, d'une maniere qui puisse estre imaginée, ou bien ils doiuent confesser qu'ils ont tort de les auoir introduites pour rendre raison du mouuement des Corps, puis qu'elles ne seruent de rien pour expliquer comment ils se meuuent. Mais ie les presse vn peu trop; ie me contenteray s'ils me peuuent seulement dire ce que sont ces qualités, & pourquoy ils trouuent tant de difficulté à conceuoir de quelle façon vne substance non étendue peut estre vnice & agir sur vn Corps, veu qu'ils n'en trouuent point à comprendre comment ces qualitez qui sont des estres non estendus, sont jointes à des Corps, & ont la puissance de les mouuoir.

Mais pour voir cecy encore plus clairement, & decouurir si nous pouuons la cause de tous les mouuemens que nous remarquons dans les Corps, nous deuons distinguer le mouuement d'avec sa détermination, & la cause du mouuement d'avec la cause qui le détermine, parce que l'une est souvent différente de l'autre, de mesme que le mouuement & la force qui fait mouuoir; Car le mouuement considéré dans le Corps qui est meu, n'est rien autre chose que *le transport d'un Corps du voisinage de ceux qui le touchent immédia-*

vement, & que l'on considere comme, en repos, dans le voisinage de quelques autres; De cette façon le mouuement n'est autre chose qu'un mode, lequel n'est point distingué du Corps auquel il appartient, & qui ne peut non plus passer d'un sujet dans un autre, que les autres modes de la matiere, ny conuenir aussi à une substance Spirituelle. Mais la force de mouuoir, c'est à dire la force qui transporte un Corps d'un voisinage dans un autre, & qui l'applique successiuellement aux diuerses parties des Corps qu'il abandonne, laquelle est aussi appellée quelquefois *Mouuement*, est non seulement distinguée de cette application, mais encore du Corps qu'elle applique & qu'elle meut, comme Aristote a reconnu luy-mesme dans le septième Liure de la Physique. Or si la force qui meut est distinguée de la chose qui est meüe, & si rien ne peut estre meü que ce qui est Corps, il s'ensuit manifestement que nul Corps ne peut auoir la force de se mouuoir de luy-mesme; Car si cela estoit, cette force ne seroit pas distinguée du Corps, puisque tout attribut ou propriété n'est point distinguée de la chose à laquelle elle appartient. Que si un Corps ne peut pas se mouuoir, il est à mon auis évident qu'il n'en sçauroit mouuoir un autre; Et ainsi il faut que tout Corps qui est dans le mouuement, soit poussé par une chose entierement distinguée de luy, laquelle ne soit pas Corps.

On medira peut-estre que c'est sans raison que

ie suppose que la force qui meût doit estre differente de la chose qui est meüe, mais il m'est aisé de le faire voir, d'autant que si cette force qui transporte, & qui applique ainsi les Corps les vns aux autres, leur pouuoit conuenir de telle sorte, que la chose qui seroit meüe fust elle mesme le principe de son mouuement; & que cette force ne fust qu'une mesme chose avec elle, il faudroit que la notion de cette force enfermast dans son concept l'Idée de l'estenduë, comme font les autres modes du Corps; Ce qui n'est pas; & ainsi nous auons lieu de croire, que la force qui meut n'est pas moins distinguée réellement de la matiere, que la pensée, & qu'elle appartient aussi bien qu'elle à vne substance incorporelle.

Mais posons si vous voulez que cette force soit le mode d'un Corps, elle ne pourra donc pas estre distinguée de luy, ny par consequent passer d'un Corps dans un autre; Que si vous la conceuez à la maniere que l'on conçoit dans l'Ecole les qualitez réelles, & si vous pensez qu'elle ne laisse pas d'estre l'accident d'un Corps, bien qu'elle en soit distinguée, il faut ou que vous conceuiez qu'elle se diuise lors qu'un Corps en meut un autre, & qu'il luy donne vne partie de son mouuement, & partant qu'elle soit un Corps, dans le temps que vous supposez qu'elle est distinguée de la nature Corporelle: car tout ce qui est diuisible, & qui a des parties qui peuuent exister les vnes sans les autres, est Corps; où il faut que vous di-

siez

fiez qu'elle ne se diuise pas, mais que le Corps où elle est en produit vne semblable dans celuy qui le touche lors qu'il le pousse ; & par là vous donnez au Corps la puissance de créer ; car si la force de mouuoir est distinguée du Corps, c'est vne veritable substance, quoy que vous luy donniez le nom d'accident, dont l'entité (s'il m'est permis d'vser de ce mot) n'estant point tirée d'aucune autre par diuision, ne peut estre produite que par creation. De plus, que deuient la premiere force de mouuoir, lors qu'il ne reste aucun mouuement dans le Corps qui estoit meu ? Direz-vous qu'elle est aneantie ?

Pour rendre cecy encore plus intelligible, supposons que Dieu fait cesser entierement le mouuement qui est dans toutes les parties de l'Vniuers, & qu'il reduit par ce moyen toute la Nature dans vn chaos, de sorte qu'elle n'est plus qu'une masse informe sans aucune distinction ; ce que vous ne deuez pas faire difficulté d'auouer ; principalement si vous considerez que toute la nature Corporelle n'est qu'un assemblage de diuers Corps, diuersement agitez, figurez & diuisez, & que vous ne sçauriez conceuoir distinctement d'autre difference entre ces Corps, que celle qui procedé de la grosseur, du mouuement, du repos, de la situation, & de la liaison de ces Corps les vns avec les autres, & des parties qui les composent entr'elles ; Car bien que vous voulussiez dire qu'ils sont encore differens, en ce que les vns sont jaunes, & les autres rouges, si vous n'expliquez en quoy con-

ste la difference du jaune & du rouge ; vous n'avancez pas davantage que si vous ne disiez rien ; & si vous voulez soutenir qu'ils different par leur forme, vous ne dites rien non plus, si vous ne declarez ce que c'est que la forme particuliere de chaque espee de Corps, d'une maniere qu'on puisse imaginer ce que vous direz ; ce que ie suis certain que ceux qui les defendent ne feront jamais. Or si nous ne pouvons imaginer d'autres diversitez entre les Corps que celles que ie viens de dire, il est à mon avis manifeste, que si le mouvement estoit osté de la nature nous ne pourrions plus concevoir de distinction entre les Corps, d'autant que c'est luy qui fait naistre toutes ces diversitez.

Suposant donc que Dieu a osté tout le mouvement, considerons maintenant la Nature dans ce chaos indéfiniment estendu, & voyons si entre toutes les parties de cette masse informe, il y en a quelqu'une qui se puisse mouvoir d'elle mesme, ou mouvoir la voisine. Il est aisé de iuger que non ; parce que l'estenduë en quoy consiste la nature du Corps en general, & qui est la seule qualité qui luy reste en cet estat, n'est point active ; & quand bien elle le seroit, qui sera la partie qui se remuera la premiere, & vers quel costé devra-elle aller ? Il n'y a, sans doute, pas plus de raison de le croire de l'une que de l'autre, & ainsi pas une ne se remuera. Mais peut estre que cette grosse masse pourroit se mouvoir toute entiere ; cela est égale-



mënt impossible : car où iroit-elle? elle qui est indefiniment estenduë ; Et de plus, c'est vne Creature, c'est à dire, vne estre qui n'est rien de luy-mesme, & qui ne subsiste que quand, & comment, & autant qu'il plaist à celuy qui l'a créé : Suposons donc, par exemple, que dans le premier instant de sa Creation, il a esté produit dans le repos, si cela est, comme Dieu est immuable, & qu'il agit d'une façon qu'il ne change iamais, le moyen de croire que cette masse informe, laquelle n'a pas seulement la puissance de continuer d'estre par elle mesme vn seul moment, puisse dans le second instant se mouvoir toute entiere par sa propre force, ou obliger quelqu'une de ses parties à changer de place. Mais non seulement elle ne peut pas d'elle mesme changer de situation : Je soustiens encore qu'il n'y a point de Creature Spirituelle ou Corporelle, qui luy en puisse faire changer, ny à aucune de ses parties, dans le second instant de leur Creation, si le Createur ne le fait luy-mesme; car comme c'est luy qui a produit cette partie de la matiere dans le lieu A. Par exemple, non seulement il faut qu'il continue à la produire, s'il veut qu'elle perseuere d'estre; mais encore, comme il ne peut pas la creer par tout, ny hors de tout lieu, il faut qu'il la mette luy-mesme dans le lieu B. s'il veut qu'elle y soit; car s'il la mettoit par tout ailleurs, il n'y a point de force qui fust capable de l'en oster.

Pensons mesmes que si Dieu donnoit à ce

Corps A, pris en particulier, toute la force du mouvement qu'il employe maintenant à mouvoir toute la Nature, elle ne seroit pas suffisante avec tout cela pour luy faire changer de place, tant à cause qu'elle ne pourroit surpasser la résistance du reste de la matiere, que nous supposons estre dans le repos; que parce que pour faire que le Corps A, pût quitter sa place pour entrer dans celle d'un autre, il faudroit que dans le mesme instant que le Corps A, commenceroit à se mouvoir, cet autre commençast aussi à changer de lieu, estant impossible que le premier puisse entrer dans la place du second, si dans le mesme temps qu'il fait effort, le second ne la quite & n'entre dans celle du troisiéme, & le troisiéme dans celle du quatriéme, & ainsi de suite; Or le moyen que cela se pût faire où tout est en repos; Et partant quelque force que Dieu donnast au Corps A, pour se mouvoir, elle seroit inutile. C'est pourquoy quand Dieu a resolu de mouvoir diuersement la matiere, il a dû employer la force qu'il a voulu y metre, sur plusieurs de ses parties tout à la fois, afin qu'elles pussent ceder leur place les vnes aux autres dâs le mesme instant, sans quoy aucun mouvement n'auroit pû estre produit, & faire aussi que cette force passast successiuement d'un Corps à l'autre, c'est à dire, s'appliquast successiuement aux diuerses parties de la matiere pour satisfaire aux Loix qu'il s'est luy-mesme prescrites.

Concluons donc de tout cecy, premierement,

qu'il est impossible qu'un Corps puisse auoir de soy la puissance de se mouuoir, n'y d'en pousser vn autre; Car soit que vous suposiez la Nature dans le chaos dont nous venons de parler, soit que vous la suposiez telle qu'elle est, vn Corps ne scauroit iamais en mouuoir vn autre s'il n'est meü luy mesme le premier, & s'il n'a la force de mouuoir vn cercle tout entier de Corps, à cause que naturellement deux Corps ne se peuuent pas penetrer; Or il ne peut pas se remuer le premier auant que les autres se remuent, pour la raison que ie viens de dire, & il ne peut pas non plus auoir la puissance de mouuoir vn cercle tout entier de Corps, d'autant que quelque grand qu'il soit il ne le fera iamais tant que le cercle qu'il doit mouuoir. Et si l'on dit que cela seroit bon si toutes les parties de ce cercle estoient dans le repos, Ie répons que si elles sont desja dans le mouuement ce n'est donc pas luy qui les meut, mais qu'il détermine seulement leur mouuement. Vous voyez donc par là qu'aucun Corps n'a la puissance de se mouuoir, mais que la force qui le meut doit appartenir à quelque autre substance.

Concluons secondement, que c'est Dieu qui est la cause premiere, vniuerselle, & totale du mouuement; & que comme il a esté nécessaire qu'il employast sa parole toute Puissante pour tirer du neant toute la Nature, c'est aussi par le moyen de cette parole qu'il a tiré cette mesme Nature du chaos, en produisant en elle le mou-

uement ; Et comme elle retourneroit dans son neant s'il cessoit de l'en tirer à chaque instant qu'il la conserue, elle s'en iroit de mesme dans sa premiere confusion s'il n'entretenoit le mouuement qu'il a produit ; Et enfin comme ce seroit en quelque façon l'accuser d'inconstance que de croire qu'il ne conserue pas la mesme quantité de matiere qu'il a creée au premier moment, il n'y auroit pas moins de temerité à croire qu'il augmente ou diminue la quantité du mouuement qu'il a produit, c'est à dire, de cette force avec laquelle il a d'abord agité les diuerses parties de la matiere. Or quoy que cette force ne soit autre chose que Dieu, puisque tout ce qui est en Dieu est Dieu mesme, & qu'à la regarder de ce costé-là elle soit indiuisible, & ne puisse croistre ny diminuer, toutesfois à raison de la maniere & des diuers sujets sur lesquels il l'applique, il semble qu'elle se diuise ; Et bien qu'elle n'augmente & ne diminue iamais dans toute la nature, elle augmente pourtant & diminue eu égard aux diuers Corps sur lesquels il l'exerce.

Et bien que de cette façon Dieu soit la cause vniuerselle de tous les mouuemens qui se font au monde, ie ne laisse pourtant pas de reconnoistre les Corps & les Esprits pour les causes particulieres de ces mesmes mouuemens, non pas à la verité en produisant aucune qualité *impressée*, de la maniere quel'Ecole l'explique, mais en déterminant & obligeant la cause premiere à appliquer sa

force & la vertu motrice sur des Corps sur qui il n'en auroit pas exercée sans eux, suiuant la maniere dont elle s'est resoluë de se gouverner avec les Corps & les Esprits, c'est à dire pour les Corps, suiuant les loix du mouuement, lesquelles sont si bien expliquées dans le second Liure des Principes de Monsieur Descartes ; & pour les Esprits suiuant l'estendue du pouuoir qu'il a voulu accorder à leur Volonté ; c'est en cela seul que consiste la vertu que les Corps & les Esprits ont de mouuoir ; Et partant il n'est pas plus difficile de comprendre comment vn Esprit peut agir sur vn Corps & le mouuoir, que de conceuoir comment vn Corps en pousse vn autre.

Venons maintenant à ce qu'il peut y auoir icy de particulier pour le Corps & l'Esprit de l'Homme : Mais il me semble qu'il ne sera pas hors de propos de faire voir auparauant que tout ce que ie viens de dire est conforme à la pensée de Monsieur Descartes, d'autant que ie connois quelques vns de ses Disciples qui se sont trompezourdement dans la maniere dont ils conçoient ce qu'il dit de la force qui meut la matiere, à cause qu'il a escrit que Dieu conseruoit en l'Vniuers la mesme quantité de mouuement qu'il y en a mis d'abord en le creant : Car ils se sont imaginez cette force comme vn accident ou vne qualité reelle, à la façon de l'Ecole, laquelle ils conçoient entièrement distinguée, & de Dieu qui meut, & du Corps qui est mû, ce qui est manifestement faux ;

car comme nous auons dit , ce seroit vne substance à laquelle ils donneroient le nom d'accident ; & mesme vne substance Corporelle , laquelle se pourroit diuiser , & qui auroit la puissance de se mouuoir elle mesme en mouuant les autres ; ce qu'ils ne peuvent pas auancer ny reconnoistre que cette force soit distinguée de la cause motrice , sans s'écarter des Principes de Monsieur Descartes , dont la pensée est que Dieu conserue la mesme quantité de mouuement dans toute la Nature , parce qu'il se sert tousiours de la mesme force , sans l'augmenter ny diminuer ; & que cette force passe d'un Corps à vn autre , parce que Dieu l'applique successiuelement aux diuerses parties de la matiere. Voyez comme il parle luy-mesme dans l'article 36. de la seconde partie des Principes :

„ Apres auoir examiné la nature du mouue-  
 „ ment , il faut que nous en considerions la cause ,  
 „ & par ce qu'elle peut-estre prise en deux façons ,  
 „ nous commencerons par la premiere & plus  
 „ vniuerselle ; laquelle produit generally tous  
 „ les mouuemens qui sont au monde. (*Remarquez  
 „ bien ces mots*) . . . . Pour ce qui est de la pre-  
 „ miere , il me semble qu'il est évident qu'il n'y  
 „ en a point d'autre que Dieu , qui par sa Toute-  
 „ Puissance a créé la matiere avec le mouuement  
 „ & le repos , de ses parties ; & qui conserue  
 „ maintenant dans l'uniuers par son concours  
 „ ordinaire autant de mouuement & de repos  
 „ qu'il

qu'il y en a mis en le creant, &c. Et afin qu'on ne puisse pas douter du sens de ces paroles, voicy comme il les interprete luy-mesme dans vne des lettres qu'il écrit à Monsieur More, qui est la 72. du premier Volume. *Translatio illa, quam motum voco, non est minoris entitatis quam sit figura, nempe est modus in Corpore; Vis autem mouens potest esse vel ipsius Dei conseruantis tantumdem translationis in materiâ, quantum à primo creationis momento in eâ posuit, vel etiam substantia creata, vt mentis nostra, vel cuiuslibet alterius rei, cui dederit vim corpus mouendi; Et quidem illa vis in substantiâ creatâ est eius modus, non autem in Deo.*

*Rectè aduertis motum, quatenus est modus corporis, non posse transire ab vno subiecto in aliud; sed neque etiam hoc scripsi: quin-imo puto motum, quatenus est talis modus, assidue mutari. Alius est enim modus in primo puncto corporis A, quod à primo puncto corporis B, separetur, & alius quod separetur à secundo puncto, & alius quod à tertio &c. Cum autem dixi tantumdem motus in materiâ semper manere, hoc intellexi de vi eius partes impellente, qua vis nunc ad vnas partes materiae, nunc ad alias se applicat, &c. C'est à dire, ce transport d'une partie de la matiere, que j'appelle mouuement de cette partie, n'a pas moins d'entité que la figure, estant comme elle vn mode du Corps. Mais la force qui meut peut estre considerée ou comme appartenant à Dieu, lequel conserue dans les parties de la matiere autant de transport ou*

„ de mouuement qu'il y en a mis en la creant (*Sçauoir, en continuant de les mouuoir avec vne égale force,*) ou comme appartenant à vne substance  
 „ créée, par exemple, à nostre Ame, ou à telle autre chose que ce puisse estre, à qui Dieu a donné la  
 „ force de mouuoir le Corps (*non pas en produisant vn nouveau mouuement dans l'Vniuers; mais en terminant seulement la premiere cause à exercer sa force sur vn tel sujet;*) Et de vray cette force dans  
 „ vne substance créée est vn mode de cette substance, mais il n'en est pas de mesme dans Dieu.  
 Et vn peu plusbas il adioute:

„ Vous remarquez fort bien que le mouuement  
 „ en tant que c'est vn mode du Corps, ne sçauroit passer d'vn sujet dans vn autre; mais aussi  
 „ ie n'ay iamais auancé cela; au contraire, i'estime que le mouuement, considéré comme estant  
 „ vn tel mode, change continuellement. Car dans  
 „ le Corps A, c'est vn autre mode de ce qu'une de  
 „ ses parties se separe du premier point du Corps B,  
 „ & vn autre de ce qu'elle se separe du second, & du  
 „ troisiéme, &c. Mais quand i'ay dit qu'il y  
 „ auoit tousiours autant de mouuement dans la  
 „ matiere, i'ay entendu parler de la force qui fait  
 „ mouuoir ses parties, laquelle s'applique tãtost aux  
 „ vnes & tantost aux autres. Ie ne croy pas que ces  
 „ passages permettent de douter, que ce que i'ay  
 „ dit de la cause du mouuement & de sa nature, ne  
 „ soit conforme à la pensée de Monsieur Descartes,  
 C'est pourquoy il faut passer outre, & voir de



quelle maniere le Corps & l'Esprit de l'Homme ont la puissance d'agir l'un sur l'autre.

Toutes les proprieté qui conuiennent à l'Ame de l'Homme, luy appartiennent, ou en tant qu'elle est vne chose qui pense, ou en tant qu'elle est vnée à vn Corps, de la maniere que nous auons cy-deuant décrite : Et tout de mesme que nous ne nous sommes seruis que de la notion de la pensée pour decouurir tout ce qui luy conuient en qualité d'Esprit, de mesme nous deuons tâcher de tirer de la notion de son vnion toutes les proprieté qui luy appartiennent en tant qu'elle est iointe à vn Corps, qui a les organes conuenables pour les fonctions auxquelles il est destiné; & par ce moien nous verrons que la force qu'à l'Esprit de mouuoir le Corps, & celle qu'à le Corps d'exciter en l'Esprit diuerses pensées, sont des suites necessaires de cette vnion. Car apres auoir montré que cette vnion consistoit dans ce commerce, & cette dépendance reciproque des mouuemens du Corps & des pensées de l'Esprit, il est aisé de voir que celui qui a voulu les vnir de cette sorte a dû se resoudre en mesme temps de donner à l'Esprit les pensées que nous remarquons qui luy viennent à l'ocasion des mouuemens de son Corps, & de déterminer les mouuemens de son Corps de la maniere qu'ils doiuent estre pour estre soumis à la volonté de l'Esprit.

Vous ne deuez pas neanmoins dire que c'est Dieu qui fait tout, & que le Corps & l'Esprit

n'agissent pas véritablement l'un sur l'autre: Car si le Corps n'auoit eu vn tel mouuement, iamais l'Esprit n'auroit eu vne telle pensée, & si l'Esprit n'auoit eu vne telle pensée, peut estre aussi que le Corps n'auoit iamais eu vn tel mouuement.

Vous deuez sçauoir de plus, que comme toutes les parties de nostre Corps n'ont aucun pouuoir d'agir sur l'Esprit que par l'entremise de la glande, de mesme l'Ame n'a aucun pouuoir de mouuoir les membres du Corps que par son entremise, en déterminant le mouuement de la glande & le cours des esprits animaux vers le costé des ventricules du cerueau par où ils doiuent sortir pour descendre dans la partie qu'elle veut mouuoir; car vous vous souuenez bien que cette glande est le siege principal de l'Ame, & le terme où commence & aboutit leur mutuelle communication. Il n'est pas necessaire que j'explique icy de quelle maniere toutes les parties de nostre Corps peuuent agir sur cette glande, ny de quelle façon tout ce qui peut apporter quelque changement dans sa situation & dans son mouuement a le pouuoir ensuite de mouuoir nos membres, & d'exciter diuerses passions, cela a esté expliqué si au long dans le Traitté de l'Homme, que ie ne doute point que ceux qui l'ont veu n'ont pas besoin d'une plus ample explication.

Ie passe donc plus outre, & vous prie de remarquer en troisieme lieu, que le Corps agit directement sur l'Entendement & indirectement

seulement sur la Volonté; car ce n'est que par le moyen des perceptions & des idées que ces mouemens font naître dans l'Esprit, qu'il a la force d'incliner & d'inciter la Volonté à consentir & à vouloir ce à quoy le mouuement qui a donné cette pensée à l'entendement a en mesme temps disposé le Corps; car comme nous auons desia dit plusieurs fois, l'Esprit est de telle nature qu'il ne scauroit auoir aucune pensée, qui dans le mesme temps que l'entendement l'aperçoit, n'ébranle aussi la Volonté, & ne la porte à chercher le bien, ou à fuir le mal qu'elle luy monstre à proportion de la clarté & de l'évidence avec laquelle elle le luy représente. C'est pourquoy il ne faut pas s'estonner si les pensées confuses qui naissent dans l'Ame par l'action des objets de dehors, ne luy faisant voir que confusément le bien & le mal du Corps comme luy appartenant en tant qu'elle est vnie avec luy, ne la poussent aussi que confusément à condescendre à tous les mouemens nécessaires pour obtenir ce bien ou éviter ce mal.

La quatrième chose qu'il faut icy remarquer, c'est que l'Ame n'a pas la puissance d'augmenter ny de diminuer le mouuement des Esprits qui sortent de la glande, mais seulement de les déterminer, c'est à dire, de les fléchir vers le costé où il est nécessaire qu'ils aillent pour executer sa Volonté. Cela paroist clairement en ce que nous auons desia dit que Dieu conseruoit la mesme

quantité de mouuement qu'il a mis dans la Nature, sans l'augmenter ny diminuer ; & aussi en ce que si la Volonté auoit le pouuoir d'augmenter, ou de diminuer le mouuement des esprits animaux selon son gré, nous ne serions pas soumis comme nous sommes à vne infinité d'accidens auxquels nous sommes sujets ; car par exemple, nous pourrions veiller & dormir quand bon nous sembleroit, & nous deliurer par ce moyen d'une infinité de fâcheuses maladies.

Remarquez en cinquième lieu, qu'il y a certains mouuemens du Corps qui dépendent directement de l'Âme, & dont elle est absolument la maistresse quand le Corps n'est pas bien disposé, tels que sont les mouuemens qu'on appelle volontaires ; car l'expérience nous apprend qu'il suffit de vouloir remuer le pied pour le mouuoir quand les chemins ne sont point bouchés. Mais il y en a d'autres qui n'en dépendent pas directement, tels que sont ces formes du Cours des Esprits, auxquelles nos idées sont attachées, & celles qui peuvent causer en nous les passions : car l'expérience fait voir, que ce n'est pas directement en voulant que les Esprits sortent d'une telle manière, que nostre volonté a le pouuoir de les faire sortir, mais indirectement, en appliquant l'Esprit à penser aux idées auxquelles telles formes du cours des Esprits sont attachées. Et mesmes cette volonté ne suffit pas pour faire venir ces pensées dans l'Esprit, s'il n'en est resté quelques vestiges.

dans la memoire, vers lesquels l'Ame tournant la glande, puisse obliger les esprits animaux à prendre la forme du cours qui est requise pour auoir vne telle pensée. Et lors que j'ay dit cy-dessus qu'il suffisoit d'auoir la volonté de remuer le pied pour le mouuoir, cela ne doit pas estre entendu comme s'il suffisoit que l'Esprit formast l'acte de cette Volonté d'une maniere que l'on peut appeller intellectuelle, mais il faut que par cet acte la Volonté tende à l'action, & sorte, pour ainsi dire, d'elle mesme comme pour l'exécution de ses ordres, quoy que cependant par cette sortie elle ne fasse rien autre chose que se determiner à l'action.

Enfin, la dernière chose que vous devez remarquer est que l'Ame n'est maîtresse de son attention & de ses pensées, que lors que le mouuement de la glande est soumis à sa Volonté, ce qui n'arriue pas tousiours, ainsi que j'expliqueray plus au long en parlant de l'Imagination.

---

*De la Nature & diuersité des Sentimens  
de l'Ame.*

CHAP. XVII.

**A**PREs ce que j'ay dit iusques icy de la nature de l'Esprit en general & en particulier, & de la maniere dont celuy de l'Homme est

vny au Corps, il me semble que ie puis donner vne definition qui explique nettement son essence, en disant que *l'Esprit de l'Homme est vne substance qui pense, capable, estant vnie au Corps de l'Homme de la maniere qui conuient à sa nature, d'agir & de sentir avec le Corps, & d'estre ainsi la forme ou l'Ame de l'Homme, c'est à dire le principe de toutes les actions & passions qui le distinguent de tout ce qui ne l'est pas.* Nous apellons cet Esprit *vne substance qui pense*, parce que comme nous auons dit au commencement de ce Traitté, nous entendons par le mot d'Esprit le Principe de la pensée, & le sujet dans lequel toutes les pensées en particulier sont receuës; Et nous disons qu'il est *capable d'estre vny au Corps de l'Homme*; Car d'un costé, qui le peut empescher d'auoir vne certaine pensée, dans le mesme temps que le Corps à vn tel mouuement? Et d'ailleurs, qui peut aussi empescher que le Corps ne soit meu, dans le mesme temps que l'Esprit a vne certaine pensée, & que tout cela se fasse avec dependance l'un de l'autre, de la maniere que nous auons décrite, & qui est particuliere à la nature de l'Homme. Nous apellons cet Esprit *la forme de l'Homme*, d'autant que c'est la pensée (dont il est le principe & le sujet) qui fait differer l'Homme de tous les autres animaux qui n'en ont point; Et qu'au moyen de l'vnion qu'il a avec le Corps, & de la façon dont elle est faite, l'Homme est distingué de toutes sortes de substances,

stances, non seulement de celles qui sont purement Corporelles, ou purement Spirituelles; mais encore de celles où le Corps & l'Esprit, se pouroient trouver joints d'une façon différente de la sienne.

L'on m'objectera icy sans doute, que la forme de l'Homme ne doit pas estre seulement le principe de sa pensée, mais aussi de toutes ses fonctions vitales & naturelles, c'est à dire, de toutes les fonctions par lesquelles les autres animaux different des plantes; & les plantes des Corps inanimez: Je répons, que cela n'est pas nécessaire, puisqu'Aristote même & tous ses sectateurs définissent la forme de chaque chose, *ὅτι τὸ εἶναι*: C'est à dire, comme ils l'interpretent eux-mêmes, *Forma est id quod facit ut materia sit hoc tale*: la forme est ce qui fait que la matiere est une telle chose; Par exemple, la forme de l'or est ce qui fait que l'or est or: Mais ce qui fait que l'or est or, n'est pas ce qui le rend simplement vn métal, d'autant qu'il le pouroit estre sans estre or; mais c'est ce qui le fait differer de tous les autres métaux; c'est à sçavoir le Principe de toutes les proprieté qui luy sont particulieres en qualité d'or: De même la forme des Bestes & des Plantes ne doit pas estre le Principe de ces fonctions qu'elles ont semblables les vnes aux autres, mais seulement la source & l'origine de toute la diversité qui se remarque entre elles. Et partant suivant la Doctrine même d'Aristote, afin que l'Esprit de l'Homme

la forme & son Ame, il n'est pas necessaire qu'il soit le Principe de la vegetation, de la nutrition, & de la generation, ny mesme de tout ce qui appartient purement au Corps dans les fonctions animales, il suffit qu'il soit la cause prochaine de tout ce en quoy l'Homme differe de tous les animaux, & de tout ce qui n'est point Homme. Aussi l'experience nous fait elle voir que toutes les fonctions vegetatiues ne dependent point, si ce n'est par accident, de la pensée, dans laquelle toutesfois l'essence de l'Esprit consiste; Et on ne scauroit luy atribuer avec raison pas vne de ces actions qui se font en nous sans que nous nous en aperceuiions, & qui dans leur notion n'enferment aucune pensée; Or toutes les sortes de fonctions qui se trouvent en l'Homme, à la reserve des perceptions de son Entendement, & des determinations de sa Volonté, ont esté expliquées si nettement dans le Traitté de l'Homme, sans y employer aucune pensée, qu'il n'est pas besoin que i'adjouste icy rien dauantage pour fortifier mon sentiment; Et partant il suffit que l'Esprit de l'Homme soit le Principe & la Cause des operations qui enferment en elles la pensée pour estre la forme de l'Homme; C'est pourquoy passons outre, & considerons maintenant quelles sont les fonctions de l'Esprit entant qu'il est vny au Corps.

Elles se peuuent reduire à deux chefs, les vnes sont ses perceptions, & les autres sont les émotions de sa volonté; & il me semble que ie dois premie-



rement parler de toutes les différentes manieres dont l'Esprit se sert pour apercevoir quelque chose pendant qu'il est dans le Corps, avant que d'expliquer les fonctions de sa Volonté, parce qu'il est necessaire que l'Esprit aperçoive avant qu'il se determine.

Si nous examinons la diuersité de nos perceptions suivant la diuersité des causes qui obligent l'Esprit à apercevoir quelque chose, nous trouuons qu'il y en peut auoir de deux sortes, les vnes dépendent principalement de la Volonté, comme lors que l'esprit aperçoit ses propres actions, car il est impossible de vouloir quelque chose, sans s'apercevoir qu'on a cette volonté, quoy que peut estre vn moment apres on ne se souuiene pas de l'auoir eue; & quand on dit quelquefois qu'on ne sçait ce que l'on veut, cela ne signifie rien autre chose sinon que l'Esprit est irresolu, & ne sçait pas encore ce qu'il doit vouloir. Il faut encore rapporter à cette premiere sorte de perception celle des choses purement intelligibles, non seulement lors que c'est l'Esprit qui se determine de luy-mesme à y penser, mais encore quand il y est obligé par les paroles qu'il entend prononcer, d'autant qu'il n'y en a aucune qui luy en pût donner la pensée, si sa Volonté ne les y auoit attachées, ou du moins si elle n'auoit consenty à la signification qu'on leur a donnée. Mettez encore dans le mesme rang la perception des choses sensibles & imaginables, lors que l'Esprit, sans y estre incité par la pre-

sence des objets, ou par les vestiges de la memoire, se porte de luy-mesme à contempler vne chose qui n'est point, comme vne chimere ou vn palais enchanté, ou à se ressouvenir de quelque objet qui ne luy reuiendrait pas en memoire si luy-mesme ne le cherchoit. La seconde sorte de nos perceptions est de celles qui sont excitées principalement par le Corps, sans le consentement de la volonté, & souuent mesme lors qu'il y repugne, comme sont premierement toutes les perceptions des sens, & secondement toutes nos réueries, nos songes, & generalement toutes nos imaginations que nous n'excitons pas volontairement.

Pour expliquer toutes ces sortes de perceptions par ordre, il est à propos de vous dire d'abord qu'elle est la nature de nos sens, d'autant que ce sont eux qu'un chacun experimente plus facilement en soy-mesme.

Le mot de sens se peut prendre en trois façons, ou pour le simple mouuement que l'objet imprime sur les nerfs, ou pour la perception qui est attachée à ce mouuement, lors que l'impression est portée, iusques au siege de l'Ame, ou pour le iugement qui suit cette perception. Ces trois degrez du sens se suivent de si près que la plupart du monde ne les distingue point; Ils sont pourtant tres differens; Car les bestes ne sont capables, que du premier, & nous ne voyons rien en elles qui nous puisse persuader qu'elles sentent, si l'on prend ce mot pour autre chose que pour l'impres-

tion de l'objet extérieur sur l'organe de leurs sens; Mais aussi nous sommes très certains que cette impression est portée par les fibres des nerfs iusques à la glande; Puis que c'est l'impression que ressent la glande qui est la cause de tous les mouvemens que les objets leur font faire à chacune suivant son espece, & selon la disposition qui se trouve pour lors dans le Corps de la beste. Le premier & le second degré ne sont iamais separés dans l'Homme, lors que cette impression est portée iusques sur la glande, mais le second & le troisieme ne se trouvent pas tousiours ensemble, principalement dans les plus sages, qui ayant remarqué que leurs sens les trompent souuent, s'accoustument à ne porter pas si viste leur iugement de toutes les choses que les sens leur font apercevoir. Le premier degré est vne chose purement Corporelle, c'est pourquoy ie n'en diray rien icy, non plus que de la maniere dont les objets extérieurs ébranlent les nerfs, cela n'est pas de mon sujet, & ie suppose que le Lecteur a déjà veu le Traitté de l'Homme où cela est amplement décrit; ou si i'en dis quelque chose, ce ne sera qu'autant que ie le jugeray nécessaire pour l'intelligence des choses que j'auanceray. Je ne parleray pas non plus du troisieme degré, c'est à dire du iugement qui suit la perception des sens, mais ie m'arrestteray seulement à parler du second, qui est cette perception confuse qui accompagne tousiours l'émotion des fibres des nerfs, quand elle est portée iusqu'à la glande.

Vous remarquerez premierement que sentir, dans cette signification, n'est rien autre chose qu'avoir cette perception confuse, laquelle est attachée à chaque émotion dont les fibres des nerfs sont ébranlées, quelle que puisse estre la cause qui les agite; Et qu'ainsi la maniere d'apercevoir de l'Esprit, qui est propre à tous les sens en general, consiste dans cette confusion qui se rencontre dans la perception, & en ce qu'elle doit estre causée par l'action de quelque objet extérieur; Car bien que dans les songes & les délires on croye sentir beaucoup de choses, & que mesme elles ne nous paroissent pas autrement que si nous les sentions, neanmoins quand aucun objet extérieur ne touche les sens, on n'a point accoustumé d'appeller cela sentir, mais on prend cela pour vne tromperie de l'imagination.

Or pour bien concevoir quelle est cette confusion qui se trouve dans la perception du sens, il faut prendre garde que l'on peut dire que la connoissance des sens, selon la differente maniere de la considérer, est tout ensemble tres-claire, & qu'elle est aussi tres-confuse; Car d'un costé, le sens ne nous fait-il pas voir clairement que quelque chose agit contre nostre Corps? qu'il est touché d'une certaine maniere differente de toutes les autres; Et ne nous apprend-il pas si la chose qui le touche luy est nuisible ou profitable, avec tant de certitude qu'il n'arriue que fort rarement que nous nous y trompions.

Mais d'un autre costé, à considérer la chose autrement, il est constant que la connoissance des sens est tres confuse, & que ceux qui n'ont point d'autres guides qu'eux dans leur Philosophie, sont sujets à faire de grands Paralogismes. Cette confusion consiste en quatre choses. La premiere, vient de la maniere dont ils nous representent les qualités que nous apercevons par leur moyen, lesquelles ils nous font concevoir comme dans nos membres, ou dans les objets qui les touchent, bien que la pensée par laquelle l'Ame les sent, soit seulement attachée à la forme du cours des Esprits au sortir de la glande, qui est excitée par l'action de leur objet.

La seconde, consiste en ce qu'au lieu de nous représenter cette action de l'objet, ou telle qu'elle est en luy, ou telle qu'il la communique à l'organe du sens, ou telle enfin qu'elle est portée sur la glande, ils excitent en nous les Idées ou les sentimens de la chaleur, de la lumiere, & des autres qualités sensibles, qui n'ont nul rapport à tout cela, & qui ressemblent aussi peu au mouvement & à la figure des objets qui les excitent, que le Ciel ressemble à la Terre; Et néanmoins il est impossible d'imaginer que les objets puissent agir autrement sur les nerfs, qu'en imprimant en eux diuers mouvemens; ny que cette diuersité de mouvemens puisse venir d'ailleurs que de la difference qui se trouve dans le mouvement, le repos, la figure, & la grosseur de leurs

parties; ny que rien autre chose puisse estre portée iusques sur la glande, ny reserüée dans la memoire, que le contrecoup ou les vestiges des mouuemens que les objets ont communiqué.

La troisiéme chose dans laquelle consiste cette obscurité des perceptions des sens, est, qu'entre les Idées qui nous viennent à leur occasion, celles-là mesmes qui sont les plus claires, comme celles de la grandeur, de la figure, du mouuement, & de toutes les autres semblables proprietez de la matiere, & qui à les regarder simplement en elles mesmes sont tres éuidentes, ne nous sont toutes-fois presque iamais représentées précisément de la maniere dont elles se trouuent dans l'objet, & cela est si vray qu'il faudroit qu'un Homme n'eust iamais rien veu pour en pouuoir douter.

La quatrième & derniere, qui est celle à raison de laquelle nous disons principalement que les perceptions des sens sont confuses, consiste dans les Idées que nous auons à l'occasion des objets particuliers des sens, c'est à sçauoir de la lumiere & des couleurs pour la veüe, des sens pour l'ouïe; des odeurs pour l'odorat, des saueurs pour le goust, de la chaleur, du froid, du sec, de l'humide; de la douleur & du chatouillement pour le toucher; & enfin tous les sentimens qui accompagnent la faim, la soif, & les passions, lesquels sont tous si obscurs & confus, qu'il n'y a personne qui puisse dire, ce qu'il y a dans l'objet, que chacun d'eux representent en particulier, & en quoy l'un  
differe

differe de l'autre. Je sçay bien qu'Aristote & Monsieur Descartes ont tasché d'expliquer la nature des qualitez de l'objet qui excitoient en nous ces sentimens & ces Idées confuses, & qu'Aristote a dit, par exemple, que la chaleur estoit vne qualité qui assembloit les choses homogenes & qui separoit les heterogenes; Et que Monsieur Descartes a dit que les Corps qui auoient le pouuoir d'ébranler les petites fibres des nerfs destinez pour le toucher, de telle sorte qu'ils augmentassent le mouuement qui leur est naturel ou ordinaire nous deuoient paroistre chauds, & que ceux qui faisoient le contraire nous deuoient paroistre froids; Mais sans examiner icy lequel a le mieux rencontré, ie ne pense pas qu'aucun des sectateurs de l'un ny de l'autre fassent difficulté d'auouer, que le sentiment qu'excitent en luy les Corps chauds ou froids, & l'Idée qu'il en a, ne luy represente rien de tout cela. Et ce que ie dis icy du froid & de la chaleur peut estre appliqué de mesme à proportion aux autres idées que les autres sens nous fôt apercevoir.

Ie dis bien plus, personne n'est assuré qu'un autre sente la chaleur & les autres qualités de mesme façon que luy, ny que la mesme idée luy en vienne par les sens, si ce n'est parce que comme tous les Hommes se ressemblent nous nous persuadons facilement que tous ceux qui sont de mesme nature sentent les choses de la mesme façon. Mais il n'en est pas ainsi de ces autres qualitez, que nous conceurons clairement apar-

tenir à la matiere ; car ie suis tres-certain que tous ceux qui entendent la signification de ces mots, rond & quarré, ont la même idée que moy de la figure ronde & de la quarrée ; la raison de cette difference vient de ce que nous pouuons tous fort bien dire ce que nous represente l'idée du rond & du quarré ; mais nous ne sçaurions ainsi expliquer ce que l'idée de la chaleur ou de quelque autre qualité sensible nous fait apercevoir.

L'on me peut faire icy deux questions auxquelles il est necessaire que ie réponde pour l'intelligence de cette matiere ; On demande premiere-ment pourquoy il a falu que les idées des sens fussent confuses ; & secondement , s'il est impossible, qu'outre le mouuement & la figure , & les autres proprieté de la matiere , il y ait dans les objets des qualitez semblables aux idées que nous auons de la chaleur & de la froideur , & autres qualitez sensibles, veu que les idées que nous auons des vnes & des autres sont fort differentes entre-elles.

Ie répons à la premiere question, qu'il est impossible, eù égard à la Nature de nostre Corps, & à la maniere dont il est vny à nostre Esprit, que les perceptions des Sens ne soient pas confuses ; Car premierement pour ce qui est du Corps, quelques petites & delicates que les fibres de ses nerfs ayent pû estre, elles ne peuuent toutesfois l'estre tellement qu'il ne se trouue dans la Nature des Corps plus petits qu'elles ; chacun des-



quels par consequent n'a pas esté capable de les émonuoir tout seul, ny consequemment d'estre aperceu en son particulier, & donner occasion à l'Esprit d'en connoistre le mouuement, la grosseur & la figure; mais plusieurs de ces petits Corps ont pû se trouuans ensemble auoir assez de force pour ébranler quelqu'vnes des fibres de nos nerfs, ce qui est suffisant pour donner occasion à l'Ame d'apercevoir fort euidentement que quelque chose frappe son Corps, mais non pas assez pour luy faire découurir entierement la maniere de cette action, d'autant que ce que chacun de ces petits Corps y contribüe, quand on le regarde séparément, ne produit aucun effet qui puisse estre sensible; Et ainsi le Corps contribüe à la confusion de la perception des sens parce qu'il ne sçauroit rapporter l'action de tous les Corps qui le touchent.

La seconde cause de cette confusion se prend de la maniere dont le Corps & l'Esprit sont vnies ensemble, selon les sept articles de leur alliance, que nous auons raportez cy-dessus, dont le principal est que la mesme pensée doit estre tousiours jointe au mesme mouuement, par quelque cause qu'il puisse estre produit; D'où il suit manifestement que si l'Idée qui est jointe au mouuement de la glande ne faisoit iamais conceuoir à l'Ame que ce mesme mouuement, cela rendroit cette vnion moins étroite, & luy donneroit occasion de mépriser les autres parties de son Corps; Et secondement, si sa pensée luy representoit claire-

ment & éuidentment tout ce qui arriue à son Corps, l'Ame comprendroit aussi fort certainement que cela ne luy peut faire ny bien ny mal, & ne luy donneroit pas grand sujet d'y prendre beaucoup d'intérêt, non plus qu'un Pilote fort riche ne s'affligeroit pas beaucoup de la perte d'un vaisseau, s'il considéroit que bien loin de le faire perir, cela le déliureroit de captiuité; Il en seroit de mesme de l'Ame, si ces pensées confuses des sens qui luy représentent le bien & le mal du Corps comme son propre bien & son propre mal, ne luy donnoient pas occasion de se regarder comme ne faisant qu'un mesme tout & vne mesme chose avec luy. De plus, la mesme pensée estant toujours jointe au mesme mouuement, quelle qu'en soit la cause, ce que l'exemple que nous auons apporté de cette fille fait voir, l'Ame doit se tromper lors que la cause qui renouuelle & reitere ce mouuement n'est pas la mesme que celle qui l'a excitée la premiere fois.

Venons à la seconde question, par laquelle on demande si outre le mouuement, le repos, la situation, la grandeur & la figure, il ne peut pas y auoir d'autres qualités dans les objets semblables aux idées confuses que nous auons de la chaleur, de la lumiere, & des autres qualitez sensibles. Je répons premierement que non; Car s'il pouuoit y auoir vne qualité semblable à l'idée que nous auons de la chaleur, par exemple, cette Idée seroit aussi semblable à cette qualité, & par

consequēt ne seroit pas confuse, dautant que tout ce qui existe est distinctement ce qu'il est, & ainsi l'idée qui le représenteroit tel qu'il est ne pourroit estre confuse; Et partant il ne peut pas y auoir aucune qualité dans les objets, semblables aux Idées confuses que nous en auons. Secondement, s'il y auoit dans le Corps que ie touche, quelque qualité semblable à l'Idée de la chaleur qu'il me donne quand iele sens chaud, il y auroit aussi quelque chose de semblable à l'Idée de la froideur lors qu'il paroistroit froid à vn autre, & ainsi il faudroit dire que le mesme Corps seroit chaud & froid, absolument parlant, & en luy-mesme, puisque les sentimens qu'il causeroit le représenteroient & le feroient paroistre tel, ce qui est ridicule. De plus, n'aurois-je pas aussi bonne raison de croire qu'il y a dans l'épée qui me blesse quelque chose de semblable à la douleur qu'elle me cause, & dans la plume quelque chose de semblable au chatouillement qu'elle excite en moy, quand on la passe délicatement sur mes lèvres, ou qu'il y a dans l'estomach & dans le gosier quelque chose de semblable au sentiment que i'ay de la faim & de la soif, qu'ils pensent en auoir de croire qu'il y a dans le feu quelque chose de semblable au sentiment de chaleur que i'ay à son occasion. Mais c'est assez parlé de ces choses, il est temps de passer outre.

Ce seroit icy le lieu de parler du nombre des Sens & de leur difference, & de faire voir com-

ment entre nos sentimens nous raportons les vns aux objets de dehors qui frapent nos Sens, les autres à nostre Corps ou à quelques vnes de ses parties, & enfin les autres à nostre Ame; & que ceux-cy luy sont si proehes & si interieurs, que nous pouuons bien estre trompez touchant les sentimens que nous raportons aux objets qui sont hors de nous, ou mesme touchant ceux que nous raportons à quelques parties de nostre Corps, mais que nous ne pouuons pas l'estre touchant ceux que nous raportons à nostre Ame, à cause qu'ils la touchent de si prés, qu'il est impossible qu'elle en soit touchée, sans qu'ils soient veritablement tels qu'elle les sent; Mais parce que ie serois obligé de ne faire icy autre chose que repeter ce que Monsieur Descartes en a desia luy-mesme enseigné à la fin de ses Principes de Philosophie, & dans le Traitté qu'il a fait des Passions, & que ie ne pourrois pas mesme le dire si bien qu'il a fait, ie prie le Lecteur de trouuer bon que ie le renuoye icy au Maistre.

*De l'Imagination.*

CHAP. XVIII.

**L'**IMAGINATION se prend quelquefois pour la puissance que nous auons d'imaginer, & quelquefois aussi pour l'acte & la fonction de

cette puissance ; & en ce sens il me semble qu'on peut appeler de ce nom toutes les pensées de l'Esprit qui luy representent vn objet comme present deuant ses yeux ou deuant ses autres Sens, & qui ne sont point excitées en luy & ne dépendent point de la presence ny de l'action des objets extérieurs. Pour expliquer cecy nettement, ie dois premierement vous monstrier quelle difference il y a entre les perceptions de nostre Imagination, & les autres perceptions de l'Esprit ; Secondement, ce que c'est, & en quoy consiste la faculté que nous auons d'imaginer, & iusques où elle s'étend ; & enfin quelle est la cause & la source des erreurs de l'Imagination de ceux qui resuent en dormant, des Phrenetiques, & des autres especes de folie.

Toutes les perceptions de l'Esprit se peuuent reduire à trois especes generales, sçauoir, à celles des Sens, à celles de l'Imagination, & à celles de l'entendement pur, lesquelles different entre elles, non seulement dans la maniere dont les Idées qui seruent à chacune d'elles sont excitées dans l'esprit, mais aussi dans la façon dont il les aperçoit ; l'entendement pur differe encore des deux autres, en ce qu'il peut conceuoir des objets qui ne peuuent tomber ny sous les Sens ny sous l'Imagination. L'Entendement & l'Imagination sont fort differens quant à la maniere d'apercevoir, mais non pas tant ( du moins en cette vie ) quant à la façon dont chacune de ces facultés a

acquis les Idées qui luy sont propres ; & au contraire l'Imagination & les Sens different beaucoup dans la maniere dont les Idées de chacune d'elles sont excitées, mais non pas dans la maniere d'apercevoir. Ce qui vous paroitra clairement, si vous vous souvenez de ce que vous avez leu dans le Traitté de l'Homme, c'est à sçavoir que ces formes particulieres du cours des esprits animaux, & ces agitations de la glande, que Monsieur Descartes appelle du nom d'Idées, à cause des pensées de l'Ame qui y sont immediatement attachées, mais que j'ay mieux aimé nommer especes Corporelles, afin de reserver le nom d'Idée aux seules formes de nos pensées ; Ces formes dis-je, ou ces especes peuvent estre excitées par quatre causes differentes, sçavoir par l'action des sens, par les vestiges de la memoire, par l'action des esprits animaux qui montent du cœur au cerveau, & par la force de l'Ame.

Pour ce qui regardel'action des sens qui excite ces especes, ie croy que vous vous ressouvenez bien que nous avons dit que quand vn objet frappe quelqu'un de nos sens, il frappe en mesme temps plusieurs des fibres du nerf qui aboutit à l'organe de ce sens, & les tirant & ébranlant tant soit peu, il ouvre & dilate les pores de la superficie interieure des ventricules du cerveau où ces fibres se terminent. ( Car bien que les nouveaux Anatomistes remarquent que toutes les cordes des nerfs ne viennent point d'ailleurs que de cette partie  
du :

du cerueau qu'ils appellent le tronc medullaire, toutesfois ce n'est pas à dire que les fibres dont elles sont composées ne tirent leur origine que de la superficie des parties qui appartiennent particulièrement à ce tronc, & qu'elles n'aboutissent pas aux ventricules, puis que nous voyons qu'elles sont toutes continuës) au moyen dequoy les esprits animaux qui sont dans cette cavitè sortent vn peu plus viste par ces pores qui sont plus ouuerts, ou du moins d'une autre maniere, qu'ils ne faisoient auparauant, & qu'ils ne s'écoulent par les pores voisins; Et comme les Esprits qui en sont les plus proches s'écoulent les premiers, ceux qui sont derriere eux les suivent de mesme, & ainsi de suite iusques à ceux que la glande verse par celles de ses ouuertures qui sont oposées aux pores que l'action de l'objet à ouuerts dans la superficie interieure des ventricules du cerueau; Et ainsi les esprits animaux s'écoulant de la glande d'une nouvelle maniere la font pancher vers ce costé-là. Et c'est ce panchement de la glande, & cette forme que prend pour lors le cours des Esprits, que nous appellons du nom d'espece, non pas à cause de la ressemblance qu'elle à quelquefois avec l'objet qui l'excite, mais à cause de l'Idée & de la pensée de l'Ame qui y est attachée, laquelle represente ordinairement l'objet qui la cause.

Pour ce qui est des vestiges de la memoire, si on se ressouuiet encore de ce qui a esté dit dans

le meſme Traitté l'on verra qu'ils ne conſiſtent en autre choſe, qu'en la facilité que les pores qui ont deſia eſté ouuerts par l'action des objets ou par quelque autre cauſe que ce puiſſe eſtre, ont à ſe rouvrir encore de nouveau ; ou pour mieux dire , ce ſont les traces que le cours des eſprits animaux a laiſſez entre les fibres du cerueau ; par où ils ont paſſé la premiere fois , leſquels ſont capables d'attirer & de déterminer les Eſprits à fortir vne ſeconde fois par ces meſmes pores , de la meſme façon qu'ils ont fait la premiere ; ce qui eſt ſuffiſant de reproduire de nouveau la meſme eſpece ſur la glande.

L'action des eſprits animaux qui monte du cœur au cerueau , que nous auons assignée pour la troiſième cauſe de ces eſpeces, dépend de la diuerſité qui ſe trouue dans la groſſeur , figure & mouuement des parties dont ils ſont compoſez, comme auſſi de la maniere dont le cœur les enuoye, ce qui les oblige aſſez ſouuent de fortir de cette glande d'une certaine maniere particuliere, & de tendre à ouurir certains pores pluſtoſt que d'autres, & à couler vers certains tuyaux des nerfs pluſtoſt que vers les autres ; & par ce moyen de donner à l'Ame la penſée qui eſt iointe à cette forme de leurs cours.

La quatrième cauſe eſt la force de l'Ame , de laquelle ie ne diray rien à preſent, me reſeruant à en parler plus au long cy-apres. Ie vous feray ſeulement remarquer icy que lors qu'il ne ſe trace



aucune espece sur la glande, les Esprits n'estans pas portez à sortir d'un costé plutost que d'un autre, le Corps pour lors n'a aucune de ses parties en mouvement, (i'entens de celles qui se remuent par le moyen des muscles, & dont le mouvement n'est pas ordinaire & réglé comme est celuy des parties qui seruent à la respiration,) & de mesme l'Esprit ne pense alors à rien, il ne sent rien, il n'imagine rien, il n'a memoire de rien qui soit corporel; Mais si tost que le cours des esprits animaux prend vne autre forme que l'ordinaire, la pensée qui est jointe à cette forme, naist aussi-tost dans l'Esprit, & il ne scauroit s'empescher d'y estre attentif, tout autant de temps que les Esprits gardent cette forme en sortant de la glande.

Vous remarquerez aussi qu'entre toutes les manieres dont ces formes ou ces especes peuvent estre excitées, il n'y a que celles qui dépendent de la presence & de l'action des objets qui apartiennent aux Sens, toutes les autres, soit que la volonté, la memoire, ou l'action des esprits animaux les produise, sont du ressort de l'Imagination.

Or avant que de passer outre, & de considerer la difference qui se rencontre entre les Sens & l'Imagination dans la maniere dont chacune de ces facultez aperçoit ses objets, il n'est pas hors de propos d'examiner & de comparer icy ces especes corporelles les vnes avec les autres; d'autant que nous remarquons, que conformément aux loix de l'union de l'Ame & du Corps, les Idées qu'elles

nous donnent des choses sensibles & imaginables, sont confuses ou distinctes à proportion de ce qu'elles le sont.

Vous observerez donc premierement que les especes qui sont causées par l'action que les objets extérieurs impriment sur les fibres des nerfs, doivent estre ordinairement les plus distinctes de toutes, lors principalement que rien ne manque de la part de l'objet, du milieu, & de l'organe du Sens, & que l'Imagination n'estant point diuertie ailleurs, rien n'empesche que l'espece du Sens ne soit tracée le plus exactement qu'il est possible. Apres ces sortes d'especes, celles que la Volonté excite sur la glande, lors que l'Esprit s'applique de luy-mesme à penser à quelque chose de corporel & de particulier, sont les plus nettes & les plus distinctes, pourueu que de la part des Sens, de la Memoire, & des esprits animaux, rien ne l'empesche d'estre attentif à l'idée qui luy est pour lors presente, & qu'il perseuere quelque temps dans cette volonté. Apres celles-cy, les especes que les vestiges de la memoire reproduisent, sont les plus distinctes, soit que les pores qui conseruent ces vestiges viennent à se rouvrir d'eux mesmes, ainsi qu'un Liure se rouure de luy-mesme à l'endroit où il a esté souuent ouuert, ou que ce soit la grande facilité qu'ils ont à s'ouuir qui détermine les esprits animaux à repasser par ces mesmes pores plutost que par leurs voisins; & il n'importe que cela arriue pendant le sommeil ou pen-

dant la veille. Et ainsi vous voyez que les especes les plus confuses de toutes, sont celles qui ne dépendent que de l'action & du cours fortuit des esprits animaux : Car il est sans doute que ces especes là doivent estre d'autant plus distinctes, & les pensées de l'Esprit qui en dépendent d'autant plus nettes, plus claires, & plus évidentes que la cause qui les trace sur la glande agit plus régulièrement & plus constamment, quand d'ailleurs il ne se trouve point d'autre cause qui ébranle desia la glande, & qui l'empêche de suivre ses mouvemens. Or il est certain qu'entre les quatre causes que nous avons dit pouvoir exciter ces especes, le cours des esprits animaux est la plus irreguliere, la moins vniforme, & la plus inconstante de toutes, d'autant qu'il dépend de plusieurs causes lesquelles changent à tous momens. Ce n'est pas que quelquefois la maniere de ce cours ne soit trop constante à couler de la mesme sorte & à entretenir la mesme espece sur la glande, mais cela n'arrive que rarement quand on est en santé, & quand cela a perseveré quelque temps, on tombe dans quelque espece de folie.

Je serois trompé, si quelqu'un ne m'objectoit icy, que puisque nous croyons que ces especes corporelles ne sont pas d'ordinaire semblables aux objets qui les excitent, ny aux idées que nous avons à leur occasion, & que ce n'est pas la ressemblance que quelques vnes ont avec les lineamens des objets, qui nous en donne la pensée, c'est

mal à propos & sans raison que nous en reconnoissons de plus distinctes & de plus confuses les unes que les autres. Il est aisé de répondre que nous apellons ces especes distinctes ou confuses, non pas par rapport au plus ou moins de ressemblance qu'elles peuvent auoir avec l'objet qui les excite, mais à l'égard de la netteté ou confusion qui se trouue dans les Idées qu'elles font naistre dans l'Esprit; mais quand cela ne seroit pas, on pourroit néanmoins dire, qu'entre ces especes, celles-là sont les plus distinctes, qui aprochent dauantage de la forme du cours des Esprits, à laquelle la nature a ioint la pensée claire & évidente d'un certain objet, & que les autres sont d'autant plus confuses, qu'elles s'éloignent dauantage de cette forme; Car l'expérience journaliere fait voir qu'en certain cas & en certaines circonstances nous aperceurons mieux les mesmes objets, que non pas en d'autres; ce qui ne seroit pas, si les especes qu'ils excitent n'estoient quelquefois plus distinctes, & quelquefois moins.

L'on m'accusera aussi peut-estre de détruire icy ce que j'ay estably dans le Chapitre precedent, sçauoir que les perceptions des sens sont tres confuses; Aquoy il est aisé de répondre, que quand j'ay dit cy-dessus que les perceptions des sens estoient confuses, c'a esté seulement en les comparant avec d'autres perceptions plus claires; par exemple en comparant l'Idée de la blancheur avec celle que j'ay de l'estendue & de la figure; Mais quand ie

disicy que les especes des sens sont les plus distinctes de toutes , c'est en comparant ces especes , c'est à dire ces formes du cours des Esprits , lors qu'elles sont excitées par les objets des sens , avec les mesmes formes , quand elles sont de nouveau reproduites par l'action de la Memoire, ou des Esprits , ou mesme de l'Ame : Et ie ne vois pas qu'il puisse y auoir de la contradiction , à dire que l'espece & la perception de la blancheur que ie vois , soit plus distincte que l'Idée & la pereeption de la mesme blancheur , quand ie l'imagine seulement sans la voir , quoy que neanmoins la perception de la blancheur soit plus confuse & moins distincte que celle de la figure

On peut encore comparer ces especes entr'elles , selon la force avec laquelle elles sont tracées sur la glande ; Car c'est à proportion de cette force qu'elles agissent sur l'Ame ; Et il n'y a pas de doute , que celles qui sont composées par le cours d'un plus grand nombre d'Esprits qui sortent tout à la fois , doiuent estre les plus fortes de toutes , & qu'elles attirent apres soy dauantage la glande , supposé qu'elles durent aussi long - temps que les autres ; Et si pendant qu'une espece agit ainsi fortement sur la glande , il se trouuoit en mesme temps vn autre objet present à nos sens , il ne pouroit pas pour lors y exciter son espece , ny empescher nostre Esprit d'estre attentif à celle-là , s'il n'agissoit plus fortement qu'à l'ordinaire.

Vous remarquerez aussi que les plus fortes de ces especes ne sont pas tousiours les plus distinctes; Et tout ainsi que nous voyons que l'espece qui est reflexie à nos yeux par vn miroir plat, ne les frappe pas quelquefois si fortement que celle qu'ils reçoient d'un miroir concaue, quoy que neanmoins celle-cy ne soit pas si distincte que l'autre, de mesme vous ne vous estonnerez pas, si les especes des sens qui sont les plus distinctes ne sont pas neanmoins tousiours les plus fortes. Car il est à remarquer que les plus distinctes sont ordinairement celles qui ont coustume d'estre excitées pendant la veille; Et cependant, quand nous veillons, les Esprits qui sortent en foule de tous les trous de la glande, & qui remplissent abondamment tous les interuales qui sont entre les fibres du cerueau, estant employez en mesme temps à plusieurs diuers vsages, ne peuuent pas alors couler en aussi grand nombre pour composer quelque espece, ny chaque objet qui frappe nos sens faire vne aussi grande ouuerture dans la superficie interieure des ventricules du cerueau; ny ses fibres s'écarter autant les vnes des autres que pendant le temps du sommeil: Car alors il n'y a que peu ou mesme point du tout d'objets exterieurs qui agissent sur les nerfs, & les esprits animaux estant moins abondans, & ne remplissant pas tant les fibres du cerueau, leur permettent de s'écarter & de s'éloigner davantage les vnes des autres; Et ainsi, bien que  
les

les vestiges & les traces que les Esprits laissent dans ces fibres en y passant, ne soient que la peinture & l'image, ou si vous voulez, que l'ombre de l'espece qui s'est tracée la premiere fois sur la glande; toutesfois durant le sommeil, si le cours des Esprits vient à se porter vers quelques-vns de ces vestiges, il peut les rouvrir bien dauantage qu'ils ne l'ont esté par l'action des sens, à cause que les fibres voisines ne sont pas si pressées; Et cela peut quelquefois exciter sur la glande vne espece plus forte, & faire que les Esprits aillent plus abondamment vers le trou qui est dans les ventricules, qu'ils n'ont fait la premiere fois, quoy qu'il n'y ait pas alors tant d'Esprits dans le cerueau qu'il s'en rencontroit lors que l'objet estoit present aux Sens; dont la raison est que tous les Esprits, ou du moins la plus-part de ceux qui se trouuent alors dans la glande, n'estant point diuertis par aucune autre action, peuuent s'acheminer vers cet endroit-là.

Toutesfois pendant que le Corps est sain, les seuls vestiges de la memoire ne scauroient retracer, ny pendant le sommeil ny pendant la veille, vne espece qui soit plus abondante en Esprits, ny mesme qui le soit autant, que celle que l'action des objets a produite; dautant qu'il est impossible que les pores qui sont entre les fibres où ces vestiges sont restez, se puissent iamais d'eux-mesmes ouvrir dauantage qu'ils l'ont esté la premiere fois par l'action des objets; lors que le

cours des Esprits n'y contribué point ; & ne se porte pas de luy-mesme à sortir dans le mesme temps par les trous de la glande qui sont oposez aux pores des ventricules qui se rouurent. Outre que pendant le sommeil, comme il monte moins d'Esprits au cerueau, les especes que les seuls vestiges de la Memoire reproduisent, ne sçauroient estre aussi pleines d'Esprits qu'elles l'ont esté dans le temps de l'action des objects sur les sens. Et mesme pendant que nous veillons, si nous sommes en santé, ny l'action des esprits animaux, ny celle de l'Ame ou de la Memoire, ne peuvent tracer d'especes qui soient plus abondantes en Esprits, que celles qui viennent des Sens ; dautant que pour lors il est presque impossible qu'il n'arriue beaucoup de choses qui partagent & diuisent le cours des Esprits qui sortent de la glande. C'est pour cela que j'ay dit dans mes Remarques que les Idées, car ie n'auois pas encore changé leur nom en celuy d'especes,) qui se forment par la seule force des vestiges de la Memoire, qui se rouurent & attirent le cours des Esprits, doiuent estre plus viues & plus expresses dans les songes du sommeil que dans les resueries de la veille. Mais que ny les vnes ny les autres ne le sçauroient estre tant que le sont les idées ou les especes de la veille qui ont produit ces vestiges. Et cela est tousiours veritable, comme j'ay dit, dans le temps de la veille, quand on est en santé, & mesme pendant le sommeil, quand il ne se



rencontre rien dans le Corps qui determine le cours des Esprits à couler abondamment du costé que ces vestiges sont situez.

Mais si par ce moyen ces secondes especes de la veille & du sommeil sont moins fortes que les premières especes des Sens ; elles peuuent par vne autre raison agir bien plus fortement sur la glande que les autres ; car si pendant la veille quelque objet frappe les nerfs vn peu violamment , cela ne dure guere , & son action ne peut pas continuer long-temps ; à cause que la machine du corps de tous les animaux est faite de telle sorte qu'ils ne manquent pas de se détourner d'eux-mêmes de cet objet. Mais quand les causes de ces especes sont interieures , nous ne pouuons pas ainsi nous en détourner , & il s'en trouue quelquefois de si opiniâtres , qu'elles durent presque tousiours ; & pour lors il est évident qu'elles doiuent agir plus fortement sur la glande , quoy que peut-estre elles soient moins fournies d'esprits que les autres , qui en sont plus remplies , mais qui ne font que passer.

Pour bien entendre ce que j'ay dit icy de la force & de la foiblesse de ces especes , il ne faut pas comparer toutes les especes des Sens avec toutes celles de l'Imagination ; car de cette façon , j'auouë que , soit pendant le sommeil , soit durant la veille , il s'en peut trouuer quelques vnes de l'Imagination , ou mesme de la Mémoire , qui seront plus fortes que quelques vnes de celles que

l'action des objets excite ; mais il faut comparer les especes qui sont causées par la presence des objets , par exemple l'espece qu'imprime le feu par son action avec la mesme espece , lors que nous nous en ressouvenons , ou que nous y appliquons volontairement nostre pensée.

Reuenons maintenant à l'explication de la difference qui se trouue entre le Sens & l'Imagination , selon la maniere d'apercevoir qui leur est propre , laquelle consiste en cela seul que les especes des Sens nous representent les objets comme presens deuant nous , & celles de l'Imagination nous en font seulement concevoir l'image , comme presente aux yeux de nostre Esprit : Car lors que nous imaginons quelque chose , l'Esprit se tourne , pour ainsi dire , vers le Corps , pour y contempler l'image ou la peinture de la chose qu'il conçoit comme presente interieurement à sa pensée , & il se sert de cette image pour mieux comprendre les proprietétez de son objet ; mais lors que nous sentons , nous apercevons que l'objet est reellement present deuant nous , & que c'est luy qui est cause du sentiment que nous auons. Or cette difference n'est pas bien grande , & ne dépend le plus souuent que de l'attention de l'Esprit , & de la force ou de l'opiniatreté de la cause qui produit cette espece ; en sorte que souuent la mesme espece qui nous a donné occasion de croire , lors que nous dormions , ou que nous n'estions pas bien attentifs , que nous sen-

tions ; vn objet nous le fera seulement imaginer dans vn autre temps.

Il y a bien plus de difference entre l'imagination & l'entendement, qu'il n'y en a entre l'imagination & le sens; Car l'imagination ne differe pas seulement de l'entendement dans la maniere d'apercevoir son objet, & dans la façon dont les Idées qui sont propres à chacune de ces facultez sont excitées en l'Esprit, mais aussi en ce que l'objet de l'entendement est bien plus noble & plus estendu que celui de l'imagination. Car premierement, nous ne sçaurions rien imaginer qui ne soit Corporel, particulier, & déterminé, & dont nous ne puissions nous représenter la grandeur, & la figure; Mais l'entendement peut non seulement concevoir toutes ces choses, mais encore beaucoup d'autres, dont il ne se trace aucune espece dans l'organe de l'imagination; Comme par exemple, lors que nous nous appliquons à penser aux substances Spirituelles, & que nous faisons diuerses reflexions sur leurs pensées, leurs puissances, & leurs proprietéz, toutes lesquelles choses ne sçauroient auoir place dans l'imagination; par ce que leur Idée n'enferme pas la notion de l'estenduë; Et neanmoins puis que nous en discouurons, & que nous entendons ce que nous disons, nous ne pouuons pas nier que nous ne les conceuions, & n'en ayons l'Idée. Secondement, nous aperceurons par l'entendement plusieurs proprietéz des Corps, par exemple cellès

qu'ils ont d'estre capables de recevoir vne infinité de varietez dans leur mouvement, grandeur, ou figure, que nous ne scaurions imaginer, parce que l'imagination ne nous represente rien que sous quelque image & figure particuliere & déterminée, & qu'elle ne les scauroit toutes parcourir. De plus nostre entendement nous fait comprendre que le Soleil est plusieurs fois plus grand que toute la Terre, & neanmoins nostre imagination ne scauroit en former vne image qui nous le represente avec cette grandeur. Il en est de mesme de la delicatesse de certains Corps; Car par exemple, nous ne scaurions rien imaginer de plus petit qu'un ciron, & nous conceuons neanmoins qu'il y a des Corps dans la nature mille fois plus petits. Tout cecy fait voir que dans les Corps mesme, il y a vne infinité de choses que nous entendons, lesquelles nous ne scaurions imaginer. Et Monsieur Gassendy luy mesme, qui s'estoit opposé si fortement à la distinction que Monsieur Descartes mettoit entre l'Entendement & l'Imagination, a reconnu cette verité, par des raisons semblables aux nostres, dans la 140. page, & dans la 463. du second Volume de ses Oeuures; Et il la prouue si vigoureusement & si doctement, que ie veux bien m'en tenir à ce qu'il en a dit; ce qui doit faire penser à ses Sectateurs, que tout ce qu'il a auancé au contraire dans les Instances qu'il a fait imprimer, n'est pas qu'il doutast de cette verité, ny mesme de la bonté ou de

la force des raisons de Monsieur Descartes, puis qu'il se sert des mesmes ou de semblables, mais que cela est venu de ce qu'il estoit vn peu piqué au jeu.

Pour la maniere dont l'entendement aperçoit ses objets, elle est aussi fort differente de celle de l'Imagination & des Sens; car ceux-cy ne nous representent pas seulement les impressions des objets extérieurs, mais encore ces objets mesmes, comme estant veritablement deuant nos Sens, & font que nous leur attribuons toutes les qualitez que nous apercevons par leur moyen, à cause que nous experimentons que nous n'auons pas le pouuoir d'en exciter les sentimens.

Il n'en va pas de mesme dans la maniere d'apercevoir de l'Imagination; car à cause que nous sentons que ses especes ne sont pas si fortes, ny pour l'ordinaire si distinctes que celles des Sens, & que nous auons le pouuoir de les exciter hors de la presence de l'objet, nous ne iugeons pas qu'il soit necessaire que cet objet soit dans la nature pour estre imaginé, comme il est necessaire qu'il y soit, & mesme present à nos Sens, pour estre senty. Mais neanmoins quand nous imaginons, nous considerons touïours la peinture de l'objet comme presente à nos yeux pour en mieux connoistre la nature. De façon qu'il semble que quand nous sentons, l'Esprit se tourne vers l'objet pour le considerer, & que lors que nous imaginons, il se tourne vers le corps, comme pour y contempler

la peinture & l'image de son objet. Mais dans les actes de l'entendement, l'Esprit se retire en quelque façon en luy mesme, ou s'il s'applique à quelque chose, c'est seulement à considérer la notion de son objet, laquelle il a en luy. Par exemple, lors que nous voyons vn triangle, nous n'en contemplons pas seulement la figure, mais encore nous le considérons comme present reellement à nos yeux; & quand nous l'imaginons, nous ne conceuons pas simplement que c'est vne figure à trois angles, mais encore nous nous en figurons les trois angles, les trois costez, & l'espace qu'ils renferment, & nous nous seruons de cette figure pour conceuoir que le plus grand costé est opposé au plus grand angle; mais quand nous apercevons quelque operation de nostre Volonté, ou que nous pensons à la nature de nostre Esprit, nous conceuons simplement que nostre Volonté se determine, ou que nostre Ame est vne chose qui a la puissance d'apercevoir & de vouloir; & nostre Esprit ne se figure rien en cela, mais il se tourne simplement vers la notion qu'il a en luy, & non pas vers l'objet mesme ou vers sa peinture. Il est vray que dans l'exemple du triangle, la difference de l'acte de l'Entendement d'avec celuy de l'Imagination ne paroist pas si bien, à cause que la facilité que nous auons d'imaginer vn triangle, fait que l'action de l'Entendement n'est presque iamais sans celle de l'Imagination; mais on ne doit pas pour cela douter qu'elle ne soit telle que

que ie viens de dire ; car si nous montons par degrez du triangle au quarré, & de celuy-cy au pentagone, & enfin à la figure de cent, ou de mille angles, nous reconnoissons sensiblement, qu'encore que nous entendions également bien ce que sont toutes ces figures, toutesfois à mesure que le nombre des costez & des angles croist, nous auons aussi plus de peine à les imaginer ; & bien qu'en parlant d'un chiliogone ou d'une figure de mille angles nous imaginions en mesme temps vne figure à plusieurs angles & plusieurs costez à cause que nous sommes accoustumez à nous seruir de nostre Imagination, en toute rencontre, nous reconnoissons pourtant bien que ce que nous nous figurons alors n'est pas la representation d'un chiliogone, parce que cela ne differe pas de ce que nous imaginons lors que nous pensons à un myriogone, ou à vne figure de dix mil angles, & ne nous sert de rien pour conceuoir les proprietétez del'vne ny de l'autre de ces figures.

Cecy nous fait connoistre éuidemment la façon d'agir de l'entendement, & fait voir la grande difference qu'il y a entre la façon d'agir & celle de l'imagination ; Mais la difference qui se trouue dans la maniere dont les perceptions del'vne & de l'autre de ces facultez sont excitées en l'Esprit n'est pas si considerable ; Car elle consiste seulement en ce que l'union qui est entre les Idées des choses purement sensibles & imaginables & les especes que ces choses tracent sur la glande, ne

dépend point de nostre volonté, mais vient immédiatement de la nature. Et au contraire, la liaison qui se rencontre entre les especes qui sont excitées sur la glande, & les pensées ou les Idées des choses qui sont du ressort de l'entendement, est un effet de nostre volonté, qui les a attachées à certaines paroles, ou autres signes Corporels, ou du moins a consenty à la volonté de ceux qui les y auoient auparauant attachées, & ne vient point du tout de la nature. Mais hors cela, toutes les mesmes causes qui peuuent nous obliger à penser à des Corps, peuuent aussi recueillir en nous la pensée des choses intelligibles; Car tout ainsi que nous auons l'Idée d'un Cheual presente à nostre Esprit, au mesme moment que l'espece à laquelle cette Idée est jointe est excitée dans l'imagination, quelle que soit la cause qui l'y excite, soit que ce soient les sens, ou la memoire, ou les esprits animaux, ou bien la force de l'Ame; de mesme depuis que nostre volonté à vny l'Idée d'une chose Spirituelle à une espece Corporelle, par exemple, celle d'un Estre tout parfait à l'espece Corporelle de ce mot-là Dieu, son espece en excite necessairement l'Idée; Et toutes les causes qui peuuent reproduire cette espece ont aussi le pouuoir de recueillir l'Idée que nous y auons jointe, quand on s'y est une fois habitué. Or c'est iustement dans ces mesmes choses que se trouue la faculté que nous auons d'imaginer, c'est à dire, qu'elles ont aussi pouuoir



de nous faire concevoir les images des objets & d'en reproduire les especes. Et d'autant qu'entre ces causes, il n'y a que la force que l'Esprit a sur le mouvement de la glande & des esprits animaux qui soit Spirituelle, & que les deux autres, sçavoir les vestiges de la memoire & l'action des esprits animaux, sont Corporelles, & que l'organe mesme de l'Imagination est vn Corps, vous iugerez bien que la faculté que nous auons d'imaginer est vne faculté mixte, qui tient du Corps & de l'Esprit, mais pourtant plus de l'vn que de l'autre; Et ainsi vous ne vous estonnerez pas, si elle n'est pas égale en tous les Hommes, bien que peut-estre tous les Esprits soient égaux dans leur nature, & que la volonté soit égale en tous; Et vous ne serez pas non plus surpris de ce que nous ne pouuons pas toujours imaginer aussi promptement & aussi distinctement que nous souhaiterions, à cause du trouble qui arrive souuent dans quelqu'une des causes dont cette faculté dépend. Vous remarquerez mesme qu'il n'y a que la partie de cette faculté qui est purement Corporelle qui se trouue dans les bestes; & que celle qui est spirituelle ne se rencontrera pas apres la mort dans l'Esprit de l'Homme, quand il sera separé de son Corps, d'autant que cette faculté d'imaginer est manifestement vne suite de l'union qu'il a avec luy.

Mais auant que i'explique iusques où s'étend cette force qu'a l'Esprit sur l'Imagination, il est

à propos que ie parle de celle que le Corps a sur elle.

Vous remarquerez donc en second lieu, que tous nos songes, & toutes les refuerics d'un Homme qui veille, & qui laisse errer nonchalemment sa pensée; en un mot, toutes les Imaginations qui ne dépendent point de la Volonté, laquelle applique l'Esprit à penser à ce qui luy plaist, se rapportent toutes aux vestiges de la Memoire, ou à l'action des esprits animaux, & quelquefois à tous les deux ensemble.

Ie ne diray rien de la maniere dont ces vestiges sont produits, parce que cela est clair; mais ie vous feray remarquer en troisiéme lieu, que ces deux causes n'ont pas seulement la puissance de retracer ces especes, mais encore d'en composer de nouvelles, qui ne sont point venuës des Sens de la maniere qu'elles sont sur la glande, ce qu'elles font en diminuant, augmentant, ou composant les especes qui sont premierement venuës par les Sens; car il est manifeste, suiuant les articles de l'alliance que nous auons posée que l'Esprit doit auoir la mesme pensée, quand la mesme espece se retrace exactement de la mesme sorte sur la glande; c'est pourquoy lors que quelques pores des ventricules du cerueau, où ont esté empraintes les traces qu'un objet a imprimées viendront à se r'ouuir d'eux-mesmes un peu plus ou moins que la premiere fois, & à renouueller ainsi la premiere espece qui auoit esté formée un peu plus

grande ou plus petite, l'idée que cette espee excitera dans l'Esprit luy representera la chose vn peu plus ou moins grande à proportion de cette espee; & par la mesme raison, lors que deux especes se traceront si prés l'vne de l'autre qu'elles viendront à se mesler, la pensée de l'Esprit qui sera iointe à cette espee totale, luy representant ces deux choses comme vne, luy fera imaginer des hypogrifes & autres chymeres.

Mais on pourroit me demander icy avec raison, si dans les maladies, ou dans quelque autre agitation violente, les esprits animaux ne pourroient pas quelquefois sortir d'vne maniere tout à fait differente de celle qui a esté causée par l'action des objets sur les Sens, & nous donner ainsi la pensée d'vne chose differente de tout ce que nous aurions iamais veu, ou senty. Je répons icy hardiment, que cela n'est pas absolument impossible, ny selon nostre Philosophie, ny mesme selon quelque opinion que ce soit, de ceux qui croient l'Âme Spirituelle, & qui reconnoissent que les objets extérieurs ne peuuent rien enuoyer autre chose au cerueau que la suite des mouuemens qu'ils excitent dans les organes des Sens. Mais neanmoins ie ne croy pas que cela soit iamais arriué, & peut estre mesme que cela ne se rencontrera iamais; En voicy la raison.

Comme les objets extérieurs ont laissé dans les pores des ventricules du cerueau, qu'ils ont ouverts, & par lesquels les esprits animaux sont sortis

plus abondamment qu'à l'ordinaire ; vne plus grande facilité à se rouvrir de nouveau, que dans ceux par où ils n'ont point encore passé ; de mesme les trous de la glande par où ces Esprits se sont écoulés, ont acquis vne plus grande disposition à se rouvrir que ceux où il n'est rien arriué de semblable. Or il est impossible qu'il n'y ait vn tres-grand nombre de trous dans la glande qui ont retenu cette facilité, laquelle est suffisante pour attirer & déterminer le cours des esprits animaux, & les porter dans les pores qui s'oposcront le moins à leur determination ; quoy que peut-estre ils ne s'y fussent iamais adressez si tous les trous de la glande n'eussent pas esté plus ouuerts les vns que les autres.

On pouroit encore répondre, & non sans raison, que la nature n'a pas joint les pensées de l'Esprit à toutes les formes que le cours des esprits animaux pouroit prendre de luy-mesme, mais seulement à celles qui seroient excitées par les sens, ou qui auroient quelque ressemblance & proportion avec elles ; Et ainsi quoy qu'il ne soit peut-estre pas impossible, que le mouuement des Esprits qui montent du cœur, leur puisse faire prendre vne forme entierement differente de toutes celles qui sont venuës par les sens ; Neanmoins, parce que quand ils sont arriuez dans la glande, ils trouuent des trous de tous costez qui ont esté ouuerts par l'action des sens, vers lesquels il leur est plus aisé d'aller en se détournant vn peu, que

d'en percevoir d'autres, il n'arrive jamais qu'ils prennent une forme tout à fait différente de celles qui sont excitées par les Sens. Et mesme quand ils en prendroient une, on peut dire que nous n'aurions point pour cela de pensée qui nous représentast quelque chose que nous n'aurions jamais sentie d'autant que la nature n'a point vny de pensée à cette forme.

C'est pour ces raisons qu'il est vray de dire, non pas que *Nihil est in intellectu quod prius non fuerit in sensu*, mais qu'il ne se trace aucune espeece sur l'organe de l'Imagination qui ne tire son origine de quelques unes de celles qui sont venues par l'action des Sens; mais remarquez, s'il vous plaist, que ie ne parle que des espees Corporelles, & non pas des Idées de l'Esprit.

Vous remarquerez en quatrième lieu, que l'inegalité qui se trouve dans la force imaginative des Hommes, vient de la disposition plus ou moins avantageuse de l'organe de l'Imagination; & ie trouve quatre qualitez qui contribuent à la bonté, & en suite à la perfection de l'Esprit; c'est à sçavoir la promptitude, la netteté, la force & la délicatesse; Car en effet ceux qui imaginent ce qu'ils ont à dire ou à faire le plus promptement, le plus nettement, & le plus fortement, & qui outre cela remarquent iusques aux moindres circonstances, qui est ce que j'appelle délicatesse d'Imagination, doivent passer pour avoir l'Esprit le meilleur; Il me semble mesme que la promptitude

& la delicateſſe s'accordent aſſez bien enſemble; d'autant que pour auoir l'Eſprit delicat, il faut que l'organe de l'Imagination ſoit ſi aisé à mouuoir que peu de choſes ſuffiſe pour l'ébranler; & l'expérience fait voir que ceux qui ſont ainſi diſpoſez ont auſſi l'Imagination tres-prompte. Ces deux qualitez dépendent de deux autres choſes, ſçauoir, de la promptitude de la glande à ſe mouuoir, & de la facilité des pores des ventricules à s'ouuoir. Et ces deux dépendent de trois autres. La première eſt la petiteſſe de la glande ſuiuant la nature de l'Animal; car il eſt éuident qu'un petit Corps eſt plus aisé à mouuoir qu'un grand; c'eſt pourquoy nous voyons que l'Homme, qui a les autres parties du cerueau plus groſſes que les autres animaux à proportion du reſte de ſon Corps, a cette partie-là plus petite, & nous ne deuons pas douter que ce ne ſoit en partie ce qui rend le Corps de l'Homme capable de beaucoup plus de ſortes de mouuement qu'aucun de ceux des Beſtes, entre leſquelles le Singe qui approche dauantage du Corps de l'Homme eſt auſſi vne des plus agiles; & ſans doute que cette petiteſſe de la glande ne contribuoit pas peu à faire auoir aux anciens Pantomimes cette agilité qui les rendoit ſi admirables.

La ſeconde choſe qui contribué à la facilité & promptitude du mouuement de la glande, eſt l'abondance des eſprits animaux, lors qu'il n'y a rien de violent ny de trop inégal, ſoit dans la maniere de leur cours, ſoit dans la groſſeur de leurs parties;

car

car comme vn balon est plus aisé à mouuoir quand il est plein d'air , ainsi la glande est bien plus aysément portée de tous les costez , & il faut beaucoup moins de force pour l'ébranler , lorsqu'elle est autant pleine d'Esprits qu'elle en peut contenir naturellement , que lors qu'elle en a moins ; car quand elle en a moins son mouuement doit estre fort lent , & ne faire , pour ainsi dire , que remper & se coucher le long des paroïs des ventricules.

La troisieme , est la facilité & la promptitude avec laquelle les pores des ventricules du cerueau s'ouurent , de laquelle la delicateſſe de l'imagination , dont ie parle , procede principalement. Or cette facilité se rencontre dauantage dans ceux dont les fibres des nerfs ont vne secheresse mediocre , & sont aussi delicates & subtiles que la Nature de l'Homme le peut souffrir ; Et de plus , cette facilité s'acquiert par habitude , lors que ces pores sont souvent ouuerts , & que les organes des sens sont fort exercez ; Aussi voyons nous que nous conceuons bien plus facilement & plus promptement les choses que nous auons desja veues & pratiquées , que non pas les autres ; Et que de mesme chaque artisan aperçoit bien mieux & plus facilement toutes les particularitez d'vne chose qui regarde son mestier que ne fera vn autre Homme qui aura peut-estre d'ailleurs plus d'Esprit que luy.

La force de l'imagination ne dépend que de deux conditions ; dont la premiere est la vehé-

mence & la durée de l'action qui produit l'espece qui est pour lors sur la glande , soit que cette action procedé des Sens ou des Esprits; La seconde, est l'abondance & l'égalité du cours & des parties des Esprits qui composent cette espece; cette force paroît principalemēt dans les grands & extraordinaires mouuemens , & dans celles de nos actions qui partent d'une forte resolution & attention, telle que nous en voyons dans les danseurs de corde.

La netteté est la meilleure & la plus avantageuse de toutes les qualitez de l'Imagination; Et il n'y en a point qui contribuēt tant au raisonnement & à l'éloquence: Car quoy que nous ayons l'avantage d'avoir la conception prompte , nous ne sçaurions pourtant iamais , ny nous bien exprimer , ny bien raisonner , si nous ne conceuons nettement les choses dont nous voulons discourir. Cette qualité fait les Orateurs , quand elle se rencontre avec la promptitude , comme elle fait les Sçauans , quand elle se trouue avec la force; Enfin elle fait les grands Peintres , les Architectes , & les Ingenieurs , quand avec une promptitude mediocre , la force & la delicateſſe se trouuent iointes. Cette qualité si auantageuse & si desirable demande une certaine mediocrité de toutes les circonstances qui perfectionnent les autres , mais elle veut de plus de l'habitude & de l'attention ; car il est certain que nous conceuons plus nettement les mesmes choses la seconde fois que la premiere , & quand nous sommes atten-



tifs que quand nous laissons errer nonchalamment nostre pensée. Les autres qualitez, sçavoir, la promptitude, la force & la delicatesse ne s'accordent pas si bien avec le iugement; car elles empeschent le plus souuent que l'Ame ne soit maîtresse de son attention; & par leur moyen les especes ne faisant que passer sur la glande, les pensées de l'Ame qui les imitent luy font faire plusieurs iugemens legers & precipitez, dans lesquels ce n'est pas merueille si souuent elle se trompe. Elle ne sçauroit mesme éuiter, qu'en arrestant ou détournant le mouuement de la glande, ce qui n'est pas tousiours en son pouuoir. Or dautant que ce n'est pas tant la puissance que nous auons d'apercevoir les Idées des choses Corporelles, que les diuers mouuemens des Esprits font naistre dans l'Ame, que ie prens pour la faculté d'imaginer, comme ce pouuoir & cette force que l'Esprit a sur le mouuement de la glande, & sur les formes du cours des Esprits, par laquelle il peut faire naistre ou détruire les idées des choses imaginables, en excitant ou détruisant sur la glande les especes Corporelles auxquelles ces idées sont attachées; Il me semble que ie dois presentement dire en quoy consiste ce pouuoir, & iusques où il s'étend, & nous decouurirons par mesme moyen la source de toutes les fausses imaginations de ceux qui dorment, ou qui sont en delire.

Cette force & ce pouuoir de l'Ame, qui est assurément la plus noble de toutes celles de nos fa-

cultez qui regardent le Corps, ne consiste pas dans vn indiuifible, & n'est pas égale dans tous les Hommes, ny dans le meſme Homme, conſideré en diuers temps, & en différentes circonſtances. Je ne ſçauois vous faire voir cela clairement, ſans repeter quelque choſe de ce que i'ay dit cy-deſſus du pouuoir de l'Eſprit ou de l'Ame de l'Homme ſur le Corps; mais cette matiere eſt ſi belle que i'oſe eſperer que la repetition n'en ſera pas ennuieufe.

Il me ſemble que tous les mouuemens de noſtre Corps, & meſme pluſieurs autres, auroient auſſi bien pû dépendre de noſtre volonté que ceux que nous voyons qui luy ſont ſoumis : car ie ne vois point qu'elle ait plus de raport avec les vns qu'avec les autres; Et à proprement parler, il n'y en a aucun entre les actes de noſtre volonté & les mouuemens de noſtre Corps, que celui que Dieu y a mis, de la maniere que i'ay cy-deuant décrite. C'eſt pourquoy puis qu'il ne nous a point reuelé quels eſtoient les mouuemens qu'il vouloit eſtre ſoumis à noſtre volonté, il n'y a que l'experience ſeule qui nous puiſſe apprendre ceux qui en dépendent, & la maniere de cette dépendance. Auſſi eſt-ce par elle que nous auons appris que nous n'aperceuiſſions les actions des objets extérieurs, ny le mouuement des parties de noſtre Corps, que quand il ſe fait quelque impreſſion ſur nos nerfs, & que cette impreſſion eſt portée iuſques à vne certaine partie du cerueau, que nous auons montré deuoir eſtre la

glande pincale ; dans laquelle elle ne peut-estre receüe sans que l'Ame s'en aperçoive, & sans qu'elle soit attentive à l'idée qui est jointe à l'espece Corporelle, qui est pour lors sur la glande, autant de temps qu'elle y demeure, quelle que puisse estre la cause qui l'y a produite. Secondement, la mesme experience nous monstre que le pouvoir de l'Ame sur le Corps ne s'étend pas au delà du cerueau, c'est à dire, comme i'ay desia dit, au delà de la glande & des esprits animaux qui en sortent; car c'est là son siege principal, c'est à cette partie qu'elle est plus immédiatement vnüe, & par qui ses volonteé & ses ordres sont portez par tout le reste du Corps. Elle nous apprend encore que ce pouvoir qu'a l'Ame sur les esprits animaux n'est pas absolu, puis qu'il ne va pas iusques à pouoir augmenter ou diminuer leur mouuement; car si cela estoit la veille & le sommeil dépendroient de nostre Volonté; Il ne s'étend pas aussi iusques à les pousser hors de la glande de la maniere qu'ils le deuroient estre pour retracer l'espece Corporelle de la chose à laquelle nous voulons penser; car si cela estoit nous ne sentirions iamais aucune peine à imaginer tout ce que nous voudrions, ny à nous en ressouuenir; mais cette faculté de l'Ame consiste seulement dans le pouoir qu'elle a de diriger & de terminer le mouuement de la glande, & par son moyen le cours des esprits animaux, autant que les deux liens qui l'attachent au tronc medullaire luy peuuent

permettre, ce qui est cause que les esprits animaux venant à rencontrer les vestiges de la Memoire ou les pores par l'ouuerture desquels l'espece de la chose à laquelle on veut penser a esté tracée la premiere fois, ils les rouurent, & reprenant ainsi leur premiere forme, ils donnent à l'Ame la pensée qu'elle vouloit auoir, à laquelle elle peut s'arrester autant de temps qu'elle est maistresse de son attention.

Or vous deuez sçauoir qu'elle n'est maistresse de son attention, & qu'il ne luy est libre d'estre attentive & de s'appliquer à la pensée qu'elle veut, que dans le temps que le mouuement de la glande luy est soumis; Car il est évident que sans cela, elle ne peut pas la détourner du lieu d'où luy viennent les especes qui sont sur elle, ny l'Ame s'empescher alors d'y estre attentive, ny changer sa disposition & la porter vers les lieux qui luy en pouroient faire auoir d'autres.

Sachez de plus que dans cet estat où ses pensées ne sont pas libres, elle n'est aussi gueres capable de resonnement, de reflexion mentale, ny d'aucune des operations de l'Entendement pur; D'autant que pour discourir & raisonner, & pour produire les actes de l'Entendement pur, il faut qu'elle gouverne elle mesme ses pensées, qu'elle les arreste, qu'elle les estende, & qu'elle s'applique à tel objet qu'il luy plaist; Ce qu'elle ne sçauroit faire pendant qu'il n'est pas en son pouuoir de détourner la glande des lieux d'où luy viennent ces

especes, ny de s'empescher d'y estre attentive, suivant les loix de son vnion avec le Corps. Et partant il est manifeste que toutes les causes qui tirent la glande hors du pouuoir de l'Ame, diminuent aussi la faculté d'entendre & de raisonner que nous auons (du moins quant à l'exercice) à proportion de ce qu'elles la retirent hors de sa puissance.

Ces causes sont, ou les objets extérieurs, ou la glande mesme, ou les esprits animaux; car nous experimentons que quand quelque objet agit fortement sur nos sens, ou d'une façon nouvelle, ou en des lieux qui ne sont pas frappez ordinairement, & qu'ils ouurent par ce moyen beaucoup davantage que de coustume quelques pores des ventricules du cerueau, il ne nous est pas possible d'empescher que la glande ne panche vers eux, & que nous ne nous aperceuiions de cette impression, si ce n'est en détournant le Corps de l'objet qui nous blesse; & s'il agit violemment, il est presque impossible de penser ny de raisonner que des moyens qui nous en peuuent éloigner. Toutes-fois une Ame forte peut à la longue effacer ou du moins obscurcir l'impression des Sens, en s'appliquant à penser à d'autres choses, & faisant ainsi détourner quelque peu la glande du lieu d'où luy vient l'espece des Sens; mais cela n'arriue que rarement, & par le moyen d'une longue & pénible contention.

Les autres causes, sçauoir le vice de la glande &

des esprits animaux, nuisent bien dauantage aux fonctions intellectuelles de l'Esprit, & à cette force d'Ame dont nous parlons, que ne font les objets par la violence de leurs actions. Et pour bien entendre cecy, il faut sçauoir que l'Ame n'a vn pouuoir entier sur l'Imagination, que lors que les esprits animaux ont assez de force pour empêcher la glande de s'affaïsser & de ramper le long des parois des ventricules, & pour la remplir & souleuer de telle sorte qu'estant comme en equilibrium, elle soit indifferemment mobile de tous costez; & à mesure qu'elle sort de cét estat, soit par défaut, soit par abondance d'Esprits, à mesure aussi son pouuoir diminue; car nous experimenterons que nous ne pouuons arrester nostre Imagination, ny l'empêcher de s'atacher à quelque objet, lors que le cours des Esprits estant plus rapide ou plus inégal que la santé de l'Homme ne le permet, l'emporte malgré elle; dont la raison est que la violence des Esprits entraîne quelquefois la glande vers vn certain costé, & attache ainsi l'Imagination à vne certaine Idée; ou bien l'inegalité de leurs cours iointe à leur violence luy fait prendre toutes sortes de formes; & alors cela rend l'Imagination vagabonde: Il en va de mesme lors que tout au contraire la glande n'est pas assez agitée, ou du moins n'est pas assez également agitée pour estre à peu près dans l'équilibre, soit pour estre trop humide & pesante, soit pour n'estre pas suffisamment remplie d'Esprits; car

pour

pour lors l'Ame n'a pas la puissance de détourner la glande du lieu où son poids la fait pancher; parce que son pouuoir ne s'étend pas à augmenter ou diminuer son mouuement, mais seulement à diriger celuy que les Esprits luy donnent.

Je ne sçauois vous donner d'exemple qui vous fasse mieux conceuoir cecy, que celuy d'un balon, que j'ay déjà cy-deuant apporté. Lors qu'il est enflé nous le pouffons fort aisément de tous costez; Mais quand il ne l'est pas, il nous faut autant de force pour le jeter à quatre pas de nous, qu'il en falloit auparauant pour l'éleuer vne pique au dessus de nostre teste. Il en est de mesme de la glande à l'égard de l'Ame; Lors que la glande est dans l'équilibre, & qu'il n'y a point de disposition dans le reste du cerueau, ny dans les Esprits, qui les oblige à couler avec rapidité & opiniastrété vers certains pores, elle obéit alors à son premier commandement; Mais lors que le cours des Esprits l'oste de cet équilibre, & qu'il est plus rapide ou plus inégal que nostre nature ne le requiert, la volonté, qui ne peut pas diminuer leur mouuement, ny les empescher d'entrer alors dans la glande de la maniere que leur agitation les y porte, ne peut pas la détourner, ou luy faire changer la forme qu'ils luy font prendre. Et de mesme aussi lors que les Esprits ne sont pas suffisans pour la souleuer, elle ne peut pas non plus la retirer du costé où son poids la fait pancher: car, comme j'ay dit, son pouuoir ne consiste pas à

la mouuoir, mais seulement à diriger son mouuement. Ainsi vous voyez que nostre Ame ne peut pas dans cet estat se debarasser de l'espece qui se trace sur la glande, ny en détourner son attention, soit en y introduisant vne autre espece, soit en voulant estre attentiuë aux seules Idées de l'entendement pur. Mais aussi quand vne fois nostre Esprit est dans cet estat heureux auquel la glande est parfaitement soumise à sa volonté, il est pour lors maistre absolu de ses pensées, & il les employe comme il luy plaist, soit aux operations de l'Entendement, soit à celles de l'Imagination.

Ie n'ay rien à dire dauantage de la maniere dont l'Ame se sert de ce pouuoir, ayant assez de fois dit cy-dessus, que ce n'estoit pas directement en voulant faire sortir les Esprits de la glande d'une certaine façon, qu'elle auoit le pouuoir de les en faire sortir, mais indirectement, en s'apliquant à penser à telle ou telle chose, ou en voulant mouuoir vn tel membre; En suite dequoy, quand le Corps est bien disposé, & qu'il n'y a aucun empeschement, la glande se tourne de tous costez, iusques à ce qu'elle ait rencontré les vestiges de la Memoire, par l'ouuerture desquels l'espece de la chose à quoy nous voulons penser ne manque pas de se tracer sur elle.

Ily a seulement vne chose à remarquer, dont il n'est pas hors de propos de rendre icy raison; sçauoir, pourquoy lors qu'il n'y a aucun vice ny



dans les chemins , ny dans les Esprits , ny dans  
 les organes , nous remuons alors nos membres  
 dans le mesme instant que nous en formons la  
 volonté ; mais que nous ne pouuons pas ainsi  
 avec autant de facilité & de promptitude imaginer  
 ou nous ressouuenir de ce que nous voulons. Et il  
 me semble que la raison en est, parce que le mouue-  
 ment de nos muscles dépend de la maniere du  
 cours des Esprits qui sortent de la glande , laquelle  
 maniere est iointe immediatement avec l'acte de  
 la volonté par lequel l'Esprit se determine à mou-  
 uoir vn tel membre ; & comme cét acte dépend  
 entierement de luy , rien ne le peut empescher de  
 le former quand il luy plaist , lors mesme que le  
 Corps est malade. Mais pour auoir l'idée de la  
 chose qu'il veut imaginer , ou dont il veut se res-  
 souuenir , cela ne dépend pas simplement de luy ;  
 Il faut que l'espece à laquelle cette idée est vnie se  
 trace sur la glande , ce qui ne se peut pas tousiours  
 faire au mesme temps qu'il en forme le desir ; soit  
 parce que le cours des Esprits ne s'y accorde pas ,  
 ou que la glande est panchée vers vn costé opposé à  
 celuy où sont les pores , par l'ouuerture desquels  
 cette espece peut estre excitée ; ou enfin parce que  
 ces vestiges sont trop legers , ou ne s'ouurent pas  
 assez promptement & facilement

Je ne diray rien aussi de la diuersité des opera-  
 tions de l'Imagination , laquelle retrace quelque  
 fois la mesme espece qui luy est venuë des Sens , &  
 quelquefois aussi en forme vne nouuelle , en com-

posant, augmentant, ou diminuant les premières qu'elle a receuës. Je n'adjousteray pas non plus quelles sont les causes naturelles & morales qui peuvent afoiblir cette force d'Ame, ny comment la Medecine & la Philosophie la peuvent fortifier; Mais ie finiray ce Chapitre en disant en peu de mots quelle est la cause des erreurs de nos songes, & des delires des mélancoliques; Car c'est vne chose admirable & déplorable tout ensemble, qu'une Substance aussi diuine qu'est l'Ame de l'Homme, ne se puisse pas empêcher de se tromper en ces sortes d'occasions. Au reste ie ne veux pas parler icy des erreurs que nous commettons dans nos raisonnemens, ny mesmes des tromperies de nos Sens qui dépendent de leurs organes, ou de quelque condition de leur objet, ou du milieu au trauers duquel il agit sur eux; mais seulement des erreurs de nos songes, & des delires des Phrenetiques & des Melancoliques. Je les diuise en quatre especes; la première est de celles qui arriuent lors qu'on pense faire ou sentir quelque chose, qu'on ne fait & qu'on ne sent pas. La seconde est de celles où l'on pense auoir fait ou dit quelque chose qu'on n'a point faite ny dite. La troisième comprend toutes les paroles & toutes les actions des fous, lesquelles ne sont pas à propos. Et la quatrième est lors qu'on se prend soy-mesme pour quelque autre chose que ce quel'on est, comme l'erreur de ce fou qui se figuroit estre vn Coq.

La cause generale de toutes ces erreurs

vient de ce que toutes les idées qui sont jointes aux especes de la glande ( à la réserve de celles des passions, qui ont en cecy quelque chose de particulier ) ne donnent pas lieu à l'Esprit de prendre garde qu'il n'aperçoit que l'Image des objets, qui n'enuoyent rien iusqu'au cerueau & à la glande que la suite de quelques mouuemens; au contraire elles luy representent des objets, comme estant hors de nous, & presens à nos sens, auxquels, ou du moins à nos membres extérieurs, il raporte toutes les qualitez qui luy sont représentées par les Idées qu'il a pour lors; Et toutesfois entre les especes qui peuuent estre excitées par les quatre différentes causes dont i'ay parlé, il n'y a que celles qui viennent de l'action des objets extérieurs sur nos sens où cela se puisse trouver veritable. C'est pourquoy l'Esprit de l'Homme se trompera tousiours, tandis qu'il ne pourra pas reconnoistre, si c'est par les Sens plustost que par l'action de la Memoire, ou des esprits animaux, ou de sa propre volonté, que l'espece qui excite l'idée qu'il a luy est venue.

Il est vray que lors que c'est l'Esprit qui produit cette espece, en s'apliquant à penser à la chose à laquelle elle appartient, il ne peut iamais croire qu'elle vienne des objets, d'autant qu'il ne peut pas agir sans s'apercevoir de l'action par laquelle il s'applique; Mais si cette espece est excitée par la Memoire ou par les Esprits, il ne scauroit decouvrir qu'elle ne vient pas des objets, que lors

qu'elle est notablement plus legere & confuse que n'ont accoustumé d'estre celles qui procedent d'eux

Or il me semble que dans ces trois circonstances l'Esprit ne peut pas reconnoistre cette confusion ou legereté; Premièrement, lors que l'action des Esprits & de la Memoire concourent ensemble à produire vne espece aussi forte que celle des sens; Secondement, lors qu'il n'en vient aucune des objets extérieurs avec laquelle il la puisse comparer; Et enfin, lors que l'Esprit n'estant pas maistre du mouvement de la glande, il ne l'est pas aussi de son attention: Car pour comparer ces Idées les vnes avec les autres, il faut qu'il produise vn acte d'entendement, & qu'il use d'une reflexion mentale, à cause que quand les vnes sont sur la glande les autres n'y sont plus; Ce qu'il ne scauroit faire quand le mouvement de la glande n'est pas soumis à sa volonté; & ainsi il est necessaire qu'il se trompe.

L'on ne peut pas m'objecter icy qu'on raisonne quelquefois pendant qu'on songe, & qu'ainsi l'Esprit est pour lors capable d'une reflexion mentale; Car il est aisé de répondre, que les raisonnemens qu'on fait alors ne sont que d'un moment, & que quand ils durent davantage ils nous réueillent; ou bien qu'on peut à la verité raisonner sur quelque chose de Corporel, sans qu'on soit capable néanmoins de produire vn acte d'entendement; ou enfin que si quelquefois

dans nos songes nous pensons à quelque chose de Spirituel, ce ne peut estre en reflechissant sur la force ou legereté des especes de l'Imagination, d'autant qu'il ne sçauoit rien venir pour lors qui nous y puisse obliger, sans nous éveiller. Et si l'on ajoute que nous doutons quelquefois si nous dormons, ie répons que cela ne dure pas long-temps, & que si nous faisons quelque petite reflexion, ce n'est pas de celles qui peuuent nous détromper. Cecy paroistra encore dauantage, en expliquant en particulier les causes des diuerses especes de ces erreurs.

La premiere espece est, lors que nous pensons faire ou sentir quelque chose, quoy qu'en effet nous ne fassions ny ne sentions rien. La cause de cela est que les especes qui se tracent alors sur la glande, par le moyen des vestiges de la Memoire, ou par le cours des Esprits, ne sont pas moins viues ny moins fortes que celles qui procedent des sens; Et ainsi l'Ame ne peut pas deuiner qu'elles n'en viennent point; Comme il arriue dans les delires, dans des fièvres, dans quelques songes, & generalement dans toutes les occasions où les esprits animaux estant beaucoup plus forts & plus agitez que la santé ne le demande, concourent avec les vestiges de la Memoire à la production de quelque espece. La cause de ces erreurs vient encore, de ce que les objets ne font alors aucune impression sur la glande, avec laquelle l'Ame puisse comparer les especes que la Memoire ou les Es-

prits y reproduisent; Et c'est la cause ordinaire des erreurs de nos songes; Car quand l'Ame n'excite pas elle mesme ces especes, elle n'a que ce seul moyen pour reconnoître celles qui apartiennent aux Sens, & les distinguer d'avec les autres. Adjoûtez à cecy, que pendant le sommeil, ordinairement l'Ame n'est pas maîtresse du mouvement de la glande, qui n'est pas pour lors assez pleine d'Esprits, pour estre dans cet équilibre necessaire à l'Ame qui veut user de reflexion; outre que quand elle en auroit la puissance, & qu'elle pourroit bien s'en servir pour quelque autre sujet, elle n'en useroit pourtant pas en cette occasion, où elle n'aperçoit rien qui la puisse faire soupçonner qu'elle se trompe.

La seconde espece d'erreur est, comme nous auons dit, quand on croit auoir fait ou dit quelque chose qu'on n'a point faite ny dite; Ce qui arrive quand ayant résolu ou du moins serieusement proposé de faire vne chose, il se trouue néanmoins que par quelque rencontre impreuë, ou par quelque subit & léger emportement on ne l'a pas executée; car alors la volonté qui tendoit & se dispoit desjà à l'action, a deû causer quelque pente & inclination dans le cours des Esprits, qui les a disposez à executer ce que la volonté se propoisoit de faire; & bien que cette inclination soit tres-legere, quand on n'en est pas venu à l'execution, elle ne laisse pas néanmoins d'auoir pu faire quelque impression dans les fibres du cerveau,

veau, laquelle est capable de retracer la même forme sur la glande, lors qu'on vient à penser ou à parler de la chose qu'on auoit eu dessein de faire; Ce qui doit donner lieu de croire qu'on l'a faite à ceux qui ne sont pas assez attentifs à ce qu'ils font, & qui ne sont pas assez de reflexion sur leurs actions.

Pour ce qui concerne la troisième espece d'erreur, sçauoir les paroles & les actions des foux, lesquelles se disent & se font hors de propos, il me semble qu'elles ne nous paroissent telles, que parce que nous ignorons ce qui se passe alors dans leur cerueau, & que nous nous persuadons qu'ils doivent agir & parler conformément à ce que nous leur disons; Ce qui leur est impossible, ou parce qu'ils ne nous entendent pas, leur imagination étant trop occupée d'une autre espece, pour pouuoir recevoir celles de nos paroles; ou parce que s'ils nous entendent, le trouble qui est dans leurs esprits animaux, ne permet pas que l'impression de nos paroles reste plus d'un moment sur la glande; sur laquelle, la première espece qui l'occupoit retournant aussi tost que nous cessons de parler, ils ne peuuent pas répondre conformément à ce que nous leur auons dit, parce qu'ils ne l'aperçoient plus; Mais seulement conformément à l'Idée qui est pour lors présente à leur Esprit. Je croy que ceux de cette categorie ne sont foux, que parce que le mouuement de la glande n'est pas soumis à leur Ane, soit à cause de la violence & de l'iné-

galité du cours des Esprits, qui l'emporte sans règle & sans mesure, & y trace vne infinité d'especes qui n'y durent qu'un moment ; ou bien à cause que ce cours l'atache opiniâtement à quelques vns des vestiges de la Memoire, & excite tousiours la mesme espee, dont l'Ame ne se scauroit débarasser. L'on peut dire dans l'un & dans l'autre cas, que cette pauvre Ame iuge selon ce que les Idées qui sont iointes à ces especes luy representent, & qu'elle agit selon ce qu'elle iuge, sans qu'elle puisse s'en empescher ; Car elle ne peut pas s'abstenir de iuger & d'agir conformément à ce qui luy paroist, quand elle ne voit aucune raison de douter ; Et elle n'en peut auoir aucune dans cet estat, n'estant pas alors maistresse de ses pensées, mais estant contrainte d'estre attentiu aux especes du Corps.

La quatrième & la plus grande des tromperies de l'Imagination, est, lors que nous nous prenons pour quelque autre chose que nous ne sommes ; Ce n'est quasi qu'un excès de la troisième ; Car si par quelque disposition opiniâtre des Esprits & de la Memoire, la glande vient à estre tournée du costé du cerueau où se trouuent les pores par l'ouerture desquels l'espee d'un Coq, par exemple, peut estre retracée, & qu'elle le soit sans interruption, l'Ame vient à la fin à se considerer comme estant vnue, non pas à l'espee d'un Coq ( Car les especes ne se representent pas elles-mesmes ), mais à un Coq, & comme ne faisant



qu'un tout avec luy, de la mesme façon qu'elle est vnüe & ne fait qu'un tout avec son Corps; Ensuite dequoy la volonté est portée à imiter autant qu'elle peut le chant & toutes les autres actions d'un Coq. Ce qu'il y a de plus admirable en tout cecy, c'est que ces miserables sont quelquefois fort sages en toute autre chose qu'en ce qui regarde le sujet de leur folie; Mais quand cela arriue, & qu'ils raisonnent iuste, l'on peut dire que c'est que le cours des Esprits qui entraînoit auparavant leur glande a cessé pour lors dans le cerueau; Et que quand on ne leur dit rien qui le puisse exciter de nouveau, ils doiuent estre fort sages, iusques à ce que leur paroxisme & accèz reuienne, à la maniere de celuy des fièvres.

*De la Memoire, & de la Reminiscence.*

CHAP. XIX.

**M**ONSIEUR Descartes a admirablement bien expliqué la pluspart des choses qui se passent entre le Corps & l'Esprit, lors que dans le Traitté de l'Homme il a comparé le Corps à vne de ces machines hydrauliques dont l'eau fait mouuoir differemment plusieurs diuerses figures, selon la diuerse disposition des tuyaux qui la conduisent; & qu'il a dit que nostre Esprit estoit semblable au fontenier, qui est sans cesse occupé

dans le regard où les eaux s'assemblent, a observer les diuers cours qu'elles prennent, ou a en changer, empescher, ou exciter les mouuemens. A quoy l'on peut ajouter, pour rendre la comparaison plus entiere, qu'auprès de cette machine il y a vn moulin qui enuoye & chasse l'eau qui fait jouïr tous ses ressorts, & que tantost il luy en fournit dauantage & tantost moins; Et qu'au milieu de ce regard, où est la plus considerable décharge, il y a vne petite nacelle, tellement située que selon l'impulsion de l'eau qui vient du moulin, ou selon le branle que luy donne le fontenier (que ie supose couché dedans, & tellement attaché qu'il ne peut leuer la teste au dessus des bors) elle pousse les eaux dans quelques-uns des tuyaux qui aboutissent à ce regard, & fait par ce moyen mouuoïr les figures dans lesquelles ils se vont rendre. De plus, il faut suposer que ces tuyaux au lieu d'estre de bois, de plomb, ou de terre, sont faits d'un cuir qui peut s'élargir à proportion de l'eau qui y entre; Et l'on connoïtra aisément que ce fontenier, ainsi couché dans cette nacelle, qui panche tantost d'un costé tantost de l'autre, selon le branle que luy donne l'eau qui vient du moulin, ou celuy que luy font prendre les tuyaux qui viennent à s'ouïr, doit s'apercevoir de quatre choses fort considerables. La premiere de ces choses, est l'action de ceux qui entrant dans les grottes où aboutissent les tuyaux de cette machine, causent eux mesmes quelquefois

fansy penser les mouuemens qui s'y font en leur presence; Et cela respond à l'action des objets extérieurs, qui par leur seule presence agissent contre les organes des sens; La seconde, sont les diuerses impulsions que ce fontenier donnera luy-mesme à sa nacelle, & cela peut-estre comparé à la force que nous auons d'imaginer; La troisième, est le branle que luy donnera l'eau qui est fournie par le moulin; A laquelle ce que nous auons dit de l'action des Esprits qui montent du cœur au cerueau est conforme; Et enfin la dernière chose de laquelle il s'aperceura, ce sera de la facilité que les tuyaux qui auront desja esté ouuerts retiendront pour s'ouuir vne seconde fois; Car bien que l'action de ceux qui sont dans les grottes cesse, ils ne pourront pourtant pas se refermer si bien que le sont ceux qui n'ont iamais esté ouuerts, & ils se rouvriront plus aisément que s'ils ne l'auoient iamais esté; Ce qui est tout à fait semblable aux vestiges qui restent dans la Memoire.

Remarquez mesme que toutes ces choses ne laisseroient pas d'arrriuer; que cette nacelle auroit tousiours les mesmes mouuemens & inclinations; & que toutes les autres actions de cette machine ne laisseroient pas de se faire, quand bien il n'y auroit aucun Fontenier capable de s'apercevoir de tous les changemens qui arriuent à cette nacelle.

Appliquez maintenant les diuerses façons dont ce Fontenier aperçoit ce qui arriue à cette nacelle,


aux diuerſes perceptions de l'Ame, & vous comprendrez que c'eſt à peu près de la meſme maniere que l'Ame ſent, qu'elle imagine, & qu'elle ſe reſſouuient ; Et pour vous expliquer cette derniere operation, ainſi que j'ay fait les deux autres, il faut que ie vous diſe en quoy conſiſte la Memoire Corporelle, ce que c'eſt que la Reminiſcence, & enfin que ie vous parle d'une certaine Memoire toute Spirituelle, qui eſt à l'égard de l'Eſprit la meſme choſe à peu près que la Memoire Corporelle eſt à l'égard du Corps.

Par la Memoire Corporelle, ie n'entens icy rien autre choſe, ſinon vne certaine facilité à ſe r'ouuir qui demeure dans les pores des ventricules du cerueau, qui ont deſia eſté ouuerts par les Eſprits, & dans les fibres par où ils ont paſſé, quelle que ſoit la cauſe qui a fait cette ouuerture : D'autant qu'au moyen de cette facilité, ces pores ſe reuuant quelquefois d'eux meſmes de la meſme maniere qu'ils l'ont eſté la premiere fois, & ne reſiſtant pas tant aux Eſprits qui coulent vers eux que font les autres, cela eſt capable de faire que la meſme eſpece ſe retraçant ſur la glande, la meſme Idée reuienne auſſi dans l'Eſprit.


Mais quoy que de cette façon la Memoire ne ſoit pas vne choſe fort agiſſante, & que cette facilité & ces veſtiges que les Eſprits laiſſent dans les fibres par où ils ont paſſé, ne paroiſſent pas capables de grande choſe ; ie veux bien toutesfois que vous ſçachiez, que c'eſt la cauſe principale de

tous ces effets surprenans qu'on remarque dans les Bestes, & qui obligent la pluspart du monde à leur attribuer quelque pensée, & mesme d'une grande partie des actions que nous faisons sans dessein. C'est pourquoy bien que i'en aye desjà parlé assez au long dans mes Remarques, néanmoins ie croy qu'il n'est pas hors de propos que i'explique encore icy la nature de ces vestiges.

Pensez donc que quelle que puisse auoir esté la figure quel'objet A B C a imprimée dans les fibres du nerf optique qu'il a ébranlées dans la superficie de la retine 1. 3. 5. Il s'en doit tracer vne autre toute semblable dans la superficie intérieure des ventricules du cerueau 2. 4. 6. où ses fibres aboutissent; Ensuite dequoy les esprits animaux qui sont dás la glande H, doiuent sortir plus viste par les trous qui leur répondent, qu'ils ne faisoient auparauant, & mesme en doiuent sortir sous la mesme forme ou figure de l'ouuerture 2. 4. 6. Et ainsi leurs cours



en trace encore vne autre semblable sur la glande, qui est cette forme à laquelle les pensées de l'Ame, qui dépendent du Corps sont immédiatement attachées. Apres cela les Esprits qui sortent par l'ouverture 2. 4. 6. ont la force d'élargir quelque peu les interuales des fibres entre lesquelles ils s'écoulent, & de plier & disposer diuersement les petites brâches, que nous auons dit dans ces Remarques s'esleuer sur le Corps de ces fibres, selon la diuersité de leurs mouuemens, & la forme ou figure de l'ouverture par laquelle ils sont sortis; De sorte qu'ils impriment aussi sur les fibres, qui sont dans l'espaisseur du cerueau, des figures semblables ou rapportantes aux impressions des objets; Non pas toutesfois parfaitement du premier coup; mais peu à peu de mieux en mieux, selon la force de leur cours, & selon qu'ils reïterent plus souuent la mesme façon de couler, ou que leur action dure plus long-temps, & enfin selon que ces fibres sont plus ou moins aisées à plier; Ce qui est cause aussi que ces figures s'y conseruent plus ou moins, & que ces passages demeurent quelque peu entr'ouuerts; Ou s'ils se referment, ils retiennent tousiours vne plus grande facilité à estre ouuerts, que leurs voisins qui ne l'ont point encore esté. Tout de mesme que si on passoit plusieurs aiguilles au trauers de la toile A. les trous qu'elles y feroient demeureroient entr'ouuerts apres leur sortie; Ou s'ils se refermoient, elles laisseroient du moins dans les lieux par où elles



elles auroient passé vne grande facilité à s'ouvrir par vne semblable action. Et vous remarquerez que si on en r'ouvroit seulement quelques-vns comme *a*, & *b*, cela seroit suffisant pour faire que les autres comme *c*, & *d*, se r'ouvrirent aussi dans le mesme temps, principalement si tous cestroux auoient esté plusieurs fois ouuerts ensemble, & n'auoient pas coustume de l'estre les vns sans les autres. La mesme chose arriue encore plus facilement dans les pores de la superficie interieure des ventricules du cerueau que dans vne toile; Car quand les Esprits ouurent vne seconde fois quelques vns de ces pores, ceux qui les environnent prennent aussi quelque peu ce chemin-là, ( ainsi

Tt

que nous voyons que l'air suit le cours des Rivières, ) & rouurent de cette façon les pores qui sont auprès d'eux, à cause de la facilité qu'ils y rencontrent.

Vous ne devez pas seulement considerer ces vestiges dans la superficie des ventricules & dans l'épaisseur du cerueau, mais encore dans tous les lieux & chemins par lesquels les Esprits ont passé; Car toutes les parties où ils ont laissé quelque marque de la maniere de leurs cours, capable de retracer la mesme espece, & de nous redonner la mesme pensée, doivent passer pour l'organe de la Memoire, aussi bien que le cerueau; Il en faut pourtant excepter la petite glande, du moins dans les meilleurs Esprits, à cause de sa petitesse & de la fluidité de ses parties.

Je ne vous diray point que le temperament de l'organe de la Memoire est de n'estre ny trop sec ny trop humide, afin que n'estant ny trop dur ny trop mol, il ne refuse pas les impressions qu'on luy veut donner, ou qu'il ne les laisse pas échaper apres les auoir receuës. Je ne vous diray pas non plus que le cours des Esprits est ce qui forme ces vestiges, & que l'action des objets ou de l'Ame y contribue seulement en les determinant du costé qu'ils doivent aller. Mais ie vous prieray de prendre garde, premierement, qu'apres que les vestiges de la Memoire ont ainsi retracé la premiere espece sur la glande, les Esprits repassant de la mesme façon par les mesmes pores coulent dans



les mesmes muscles, & disposent ainsi nostre Corps à recommencer les mesmes actions qu'il a faites à l'occasion de l'objet qui la excité la premiere fois; Et que cela ne manque iamais d'arriver dans les Bestes, & mesme dans l'Homme; quand la force de leur Ame ne l'empesche point. Secondement, lors que deux objets ont tracé ensemble leurs especes, & que les deux cours des Esprits qui les ont composées se sont ioints quelque part dans l'épaisseur du cerueau, de la façon que j'ay dit dans mes Remarques, il suffit bien souvent que l'une des deux soit retracée sur la glande, ( quand mesme ce ne seroit que la plus foible, & celle qui ne seroit pas capable sans cette conjunction de faire aucun effet considerable, ou qui deuroit mesme en produire vn contraire, ) pour reproduire par apres toutes les mesmes actions qui procedoient auparavant des deux ensemble.

Ainsi il arrive ordinairement que la premiere-fois qu'on se presente devant quelque Chien d'attache, il s'approche de nous pour nous mordre; Mais si prenant vn baston on le frappe, & on le contraint de s'enfuir, quand par apres on vient à se représenter à luy, quoy que sans baston, il ne manque pas de prendre la fuite; Car par le moyen des coups qu'on luy a donnés, on a joint le cours des Esprits qu'excitoit nostre presence, avec celuy que caufoient les coups de baston; Et les routes qu'on a pris ces deux cours s'estant rencontrées quelque

part dans l'épaisseur du cerueau , & s'estant confondus en vne , il n'importe presque pas laquelle des deux se rouure par apres dans les ventricules du cerueau , pour conduire les Esprits dans les mesmes muscles , & causer les mesmes actions qui procedoient auparauant des deux. Et ie m'assure que si vous comprenez bien cecy , vous n'aurez aucune peine à expliquer la plus-part des actions des Bestes , dont les plus admirables viennent de ces vestiges qui leur sont restez dans le cerueau ; ny à comprendre comment elles sont capables de discipline ; & pourquoy elles retiennent si bien les chemins par où elles ont passé , sans qu'il soit besoin que vous leur attribuiez pour cela aucune connoissance. Mais ie vous auertis qu'il y faut garder quelque ordre , & commencer par les actions les plus simples & les plus aisées à connoistre & à expliquer.

Lors que quelque espece retourne sur la glande , c'est tousiours vn effet de la Memoire , quand ce retour ne dépend pas entierement de l'objet ; Mais , ce n'en est pas tousiours vn de la Reminiscence ; Car pour se ressouuenir , il ne suffit pas d'apercevoir simplement l'espece qui retourne , si l'on ne connoist de plus ce retour , & que ce n'est pas la premiere-fois qu'on a eu cette pensée. Ainsi la Reminiscence , ou le pouuoir que nous auons de nous ressouuenir , consiste dans la faculté que nous auons de rapeller les premieres especes sur la glande , & de nous apercevoir que ce n'est pas la

premiere-fois qu'elles nous ont donné la pensée qui est pour lors présente à nostre Esprit. C'est pourquoy quand nous ne nous seruons de cette faculté, que pour rapeller les pensées des choses purement intellectuelles, elle ne semble pas differer de l'entendement, dans la maniere de les apercevoir, si ce n'est seulement, qu'outre la perception de l'idée, elle nous donne encore celle de son retour. Et quand nous l'apliquons à des choses materielles & imaginables, elle n'est differente de la faculté d'imaginer, qu'en ce qu'elle ioint à l'operation de l'Imagination, par laquelle nous apercevons l'objet dont nous nous ressouuenons, vn acte del'Entendement, qui nous fait apercevoir que nous l'auions desia auparauant imaginé; Car pour se ressouuenir de quoy que ce soit, il faut obseruer qu'on l'a desia aperceu; Ce qui seroit impossible, si la premiere-fois qu'un objet s'est présenté à nos Sens, nous n'auions remarqué qu'il estoit nouueau, & que nous ne l'auions pas connu ny aperceu auparauant. Or il me semble que cela surpasse les forces de l'Imagination, qui peut bien à la verité apercevoir vne chose nouuelle, mais non pas l'obseruer comme telle; Dautant que l'idée & la notion de la nouueauté ne contient rien en soy de materiel ou d'estendu; Et partant ne peut pas auoir lieu entre les choses imaginables, non plus que les notions de l'ordre, du nombre, de la durée, & generalement de tous les attributs qui conuiennent à tous les Estres. C'est pourquoy

lors qu'une persône observe qu'il a déjà eû, ou qu'il n'a iamais eû une pensée qu'il a dâs l'Esprit, & qu'il remarque quelque ordre entre ses Idées, on peut dire qu'il use en cela de reflexion, & d'une conception toute pure, sans le mélange d'aucune Imagination. Toutesfois quand on ne regarde pas tant la maniere d'apercevoir, qui est particuliere à la Reminiscence, que la force qu'elle a de s'appeler les especes des choses Corporelles sur la glande, elle n'est pas differente en ce point de l'Imagination, & elle n'agit pas d'une autre maniere; Car lors quel'Esprit veut se ressouvenir de quelque chose, dont il est resté quelque trace dans l'organe de la Memoire, cette volonté fait que la glande se tourne successivement de divers costez, iusques à ce que les Esprits qui en sortent, venant à rencontrer les pores qui ont retenu ces vestiges, les rouvrent & reprennent la forme à laquelle l'Idée de la chose dont on veut se ressouvenir est iointe, de la même maniere que cela arrive quand on veut imaginer quelque chose; Et la raison pour laquelle c'est ordinairement l'Idée que l'on cherche qui se presente la premiere, c'est que d'ordinaire la volonté de la trouver est iointe avec le mouvement de la glande qu'il faut pour cela; Et l'on n'y manque gueres, pourveu que cette volonté soit ferme, & que l'Esprit soit attentif à ce qu'il fait, quand les traces de la Memoire sont unies & bien empreintes.

Il n'est pas mal aisé ensuite de cecy d'expliquer

commét se font les quatre especes de Reminiscence dont parle Monsieur Chanet dans son Traitté des Fonctions de l'Esprit ; La premiere desquelles, est lors que nous nous ressouvenons d'auoir veu vn Homme en le voyant vne seconde fois ; Cela vient de ce que plus les mesmes passages ont esté ouuerts , & plus facilement ils se rouurent encore par apres ; Et c'est cette facilité qui donne occasion à l'Âme de reflexir sur ses pensées, & de remarquer qu'elle auoit desja veu cet Homme vne autrefois.

La seconde est, dit-il, lors que nous nous en souuenons pour voir seulement quelque chose qui luy appartient, & que nous auons souuent remarquée avec luy, comme seroit par exemple son habit. Cecy doit estre expliqué par ce que nous auons dit cy-dessus des pores des ventricules, qui sont voisins, & qui n'ont pas coustume d'estre ouuerts les vns sans les autres ; C'est à sçauoir, qu'il suffisoit d'en ouurir seulement quelques - vns, pour faire que les autres s'ouurissent en mesme temps : Car de là vous pouuez penser, que les pores où il est resté quelques traces du vilage de cet Homme, estant proche de ceux où il est aussi resté quelques vestiges du reste de sa personne, il suffit que les premiers se r'ouurent, pour obliger les autres à s'élargir aussi, & a retracer ainsi tous ensemble l'espece entiere de cet Homme, & par ce moyen nous en faite ressouuenir. C'est cette action de la Reminiscence que Fracastor appelle *subnotion*.

La troisiéme est, lors que nous ne pouuons nous souuenir de cet Homme quand nous voulons, mais que neanmoins, apres que nous n'y pensons plus, son Idée se presente à nous; Ce qui se peut faire en plusieurs façons; Ou parceque la glande ne se porte pas du costé où sont les traces de cet Homme; Ou parceque ces traces ne sont pas assez expressiues, & que les pores dans lesquels elles sont empreintes, ne sont pas souuent ouuerts; D'où il arriue que l'Ame ne les pouuant pas rencontrer, s'ennuye de les chercher; ce qui arriue principalement aux brouillons & inquiets; Et ainsi changeant de volonté, elle détourne la glande auant qu'elle les ait trouuez, où que les Esprits ayent peu les ouurir; Ensuite de quoy il peut arriuer que ces pores s'ouurant d'eux melmes, ou que les Esprits s'y portant fortuitement, l'espece que nous cherchions se retracera sur la glande, quand nous n'y penserons plus. Or la raison qui fait que l'Ame ne peut pas tousiours se souuenir de l'objet qu'elle cherche, c'est ou parceque les vestiges de la Memoire sont presque effacez, ou confus & meslez avec quantité d'autres; Ou parce qu'aupres des pores qu'elle cherche, il y en a d'autres beaucoup plus ouuerts qu'eux, qui attirent le cours des Esprits; Ou enfin, parce qu'elle se trompe en les cherchant, à cause qu'elle rencontre quelque espece qui aproche de celle dont elle veut se souuenir, & s'amusant à la chercher autour d'elle, elle

elle perd ainsi le moyen de la trouver; Comme par exemple, si l'Ame cherche le nom de Dorothee, & qu'elle rencontre celui de Theodore, & puis celui d'Artemidore & de Cleodore, l'esperance-qu'elle a d'y trouver aussi celui qu'elle cherche, luy fera arrester la glande de ce costé-là, & ainsi elle se trompera, s'il ne s'y rencontre pas.

La quatriesme espece de Reminiscence se fait lors que l'Entendement reconnoissant que l'Imagination va trop viste, l'oblige de recommencer, & d'examiner davantage les traces qu'elle cherche, & de ne pas errer sans cesse côme elle fait. On peut encore rapporter à cette espece, ce qui arrive lors que l'Entendement se souvenant seulement des choses en general, comme par exemple, qu'une femme avoit un habit blanc, oblige l'Imagination à parcourir toutes les Idées qu'il a de la blancheur, pour se ressouvenir quelle estoit celle qu'il cherche; Cette espece de Reminiscence est purement Spirituelle, & ne dépend que du pouvoir que l'Esprit a sur le Corps.

Les exemples icy alleguez sont à mon avis suffisans pour expliquer tous les problèmes de Monsieur Chanet, sans que je dise rien davantage; Mais il me semble que je ne dois pas passer ainsi sous silence une objection que j'ay laissée indecise dans le Chapitre sixiesme, où j'ay tâché de prouver que l'Esprit pensoit tousiours pendant qu'il existe, puisque j'ay promis de la résoudre en celui-cy,

L'on demande donc pourquoy nous ne nous ressouuenons pas des pensées que nous auons eües dans le ventre de nostre mere, s'il est vray que l'Esprit ne soit iamais vn moment sans penser. A cela ie répons premicrement, que c'est vne mauuaise conséquence que celle-là ; Nous ne nous ressouuenons point des pensées que nous auons eües dans le ventre de nostre mere, donc nous n'y auons eu aucune pensée : Car qui est celuy qui pourroit rapporter, s'il estoit pris au pied leué, ie ne dis pas toutes les pensées qu'il a eües depuis trente ans, mais mesme celles qui luy sont venües depuis vne heure ? Et neanmois nous ne doutons pas que nous n'ayons eu plusieurs pensées pendant ce temps-là, quoy que nous n'en ayons pas gardé le souuenir. La raison de cecy est que nous ne sçaurions nous ressouuenir que des choses dont les especes ont laissé quelques vestiges dans le cerueau ; Or nous remarquons que dans le temps de l'enfance, & mesme dans vn âge plus auancé, il y a plusieurs de ces especes qui sont si legeres, & qui passent si promptement, qu'elles ne laissent aucunes traces, ou si elles en laissent, elles s'effacent fort promptement.

Ie répons en second lieu, que tous les vestiges qu'elles laissent, ne sont pas capables d'obliger l'Ame à produire vn acte de Reminiscence, laquelle n'accompagne pas tousiours le retour des especes ; Parce qu'autre chose est d'apercevoir vne chose vne seconde fois, & autre chose de remar-



quer que c'est pour la seconde fois qu'on l'aperçoit. Ainsi, bien que les Idées de la veille retournent souvent dans nos songes, ce seroit pourtant parler fort improprement, que de dire que nous nous en ressouvenons; Car si nous estions capables de cette reflexi<sup>o</sup>n nous ne dormirions pas. C'est ainsi qu'il arriue quelquesfois que des Vers nous reuiennent en la pensée, sans que nous nous ressouuenions de les auoir iamais leus; Et neanmoins si cela n'estoit, & si nous n'auions aussi veu les objets de nos songes, & s'ils n'auoient mesme laissé d'eux quelques vestiges, les especes n'en pourroient pas estre retracées vne seconde fois.

Cela monstre éuidemment que toutes sortes de vestiges ne sont pas propres pour exciter vn acte de Reminiscence, & que la Reminiscence n'accompagne pas tousiours la reproduction des especes; Il me semble qu'il n'y a que les vestiges qui prouiennent d'une espece assez forte & assez distincte pour obliger l'Ame à y estre attentive, & à remarquer que c'est la premiere fois qu'elle se presente, qui puissent luy donner occasion de produire vn acte de Reminiscence, lors qu'ils viendront à retracer cette espece; Et mesme, quelque forte & distincte que soit cette espece, les vestiges qu'elle laisse ne sont pas capables de cet effet, si lors qu'elle s'est présentée la premiere fois, ou lors qu'elle retourne la seconde, l'Ame n'est pas en estat d'agir par l'entendement pur, soit à cause que son attention est occupée par quelque autre

cause plus forte, ou parce qu'elle n'est pas maîtresse du mouvement de la glande, ( comme j'ay expliqué dans le Chapitre precedent ) ainsi qu'il arriue ordinairement dans le sommeil, & mesme quelque fois durant la veille, & qu'il est toujours arriué pendant que nous auons esté dans le ventre de nostre Mere.

C'est pourquoy quand Monsieur Descartes a escrit que les pensées des Enfans dans le ventre de leurs Meres, ou mesme peu apres leur naissance, ne laissoient aucunes traces dans le cerueau, cela ne se doit pas entendre, côme s'il auoit voulu dire, que les especes qui se forment pour lors n'impriment aucunes traces; au contraire elles y en impriment & y en laissent de tres-fortes, qui dans le reste de la vie ont souuent des effets tres-considerables; Mais il a seulement entendu parler, ( comme il s'explique luy-mesme dans la 29. page du 2. Volume des Lettres, ) des traces qui sont necessaires pour le souuenir, c'est à dire, de celles que l'Esprit par vne conception pure a aperceu estre nouvelles, lors qu'elles s'imprimoient; En mesme façon que nous disons que dans vne plaine sablonneuse il n'y a aucun vestige d'Homme, lors que nous n'y remarquons la figure d'aucun pied d'Homme.

Les raisons pour lesquelles l'Ame n'est pas maîtresse de son attention auant la naissance, & mesme quelque temps apres, & ne peut pas reconnoistre que les vestiges qui se tracent pour lors

dans le cerueau sont nouveaux, se peuvent reduire à trois ; La premiere, parce ce que les esprits animaux vont presque avec vne égale facilité par tout ; C'est pourquoy l'Ame n'a rien qui luy puisse faire prendre garde qu'un objet est nouveau. La seconde est, que la tiffure des fibres du cerueau d'un Enfant est beaucoup plus rare & moins serrée que celle d'un Homme adulte, & que neanmoins l'interualle qui est entre elles est moins libre & plus estroit, à cause que les Esprits n'ont pas eû encore le loisir de presser leurs parties, de rabatre leurs petits poils, & de dissiper toutes les parties trop humides qui n'appartiennent point à leur composition.

De sorte qu'un Enfant ne peut auoir que des sensations fort confuses ; lesquelles neanmoins (& c'est icy la troisiéme raison) à cause de la delicatesse & de la mobilité des fibres qui les excitent, ne laissent pas d'agir avec beaucoup de force, ce qui l'empesche de pouuoir en détourner sa pensée, pour auoir des conceptions pures. Car, comme dit fort bien Monsieur Descartes, l'Ame ne peut en aucune façon, pendant qu'elle est vnüe au Corps, se détacher des impressions que les Sens font sur la glande, lors qu'elle est touchée avec beaucoup de force par leurs objets, soit extérieurs, soit intérieurs, comme il arriue pour l'ordinaire lors qu'elle est jointe à un cerueau trop humide ou trop mol, tel qu'il est dans les Enfans, ou à un cerueau dont le temperament est autre-

ment mal affecté, tel qu'il est dans les Lethargiques, les Apopletiques & les Phrenetiques; ou mesme tel qu'il a coûtume d'estre en nous, lors que nous sommes enseuelis dans vn profond sommeil; Car toutes les fois que nous songeons à quelque chose, dont nous nous ressouuenons par apres, nous ne faisons que sommeiller. Tout cecy arriue conformement aux loix de l'vnion de l'Esprit & du Corps, qui veulent que les especes de la glande ne soient pas accompagnées de toutes sortes d'Idées ou de pensées, mais seulement de celles qui leur ressemblent, c'est à dire, de celles qui sont confuses, quand les autres le sont, & qui sont claires, quand elles sont distinctes.

Il ne faut donc pas s'estonner si nous ne nous ressouuenons pas de toutes les pensées que nous auons eües dans le ventre de nostre Mere, puisque ce n'estoit pour lors que des sensations fort confuses, auxquelles l'Esprit ne pouuoit pas empêcher d'estre attentif, pour laisser agir l'entendement, quand mesmes elles auroient tracé de ces sortes de vestiges que nous auons dit estre necessaires pour la Reminiscence.

Outre ces deux facultez, c'est à sçauoir la Memoire Corporelle, qui conserue les vestiges des especes qui ont esté imprimées sur la glâde & dans les Esprits, & la Reminiscence, qui s'aperçoit de leur retour, il est fort probable que l'Esprit a encore vne Memoire Spirituelle, non pas pour conseruer les vestiges des Idées qu'il a vne fois aper-

ceſſes, mais pour luy donner occaſion, du moins lors qu'il ſera ſeparé du Corps, de reconnoiſtre ſi la penſée à laquelle il ſ'occupera, ſoit volontairement ou autrement, eſt vn objet nouveau, ou ſ'il en auoit deſja eu quelque connoiſſance. Et il y a bien del'aparence, que comme les pores du cerueau ayant eſté vne fois ouuerts, ont plus de facilité à ſe r'ouuir vne ſeconde fois; De meſme auſſi lors que l'Eſprit a vne fois aperceu vne Idée, il luy reſte plus de facilité à conceuoir vne autre fois la meſme Idée; Et cette facilité peut donner occaſion à l'Eſprit, de remarquer qu'il auoit déjà aperceu l'Idée qui ſe preſente à luy de nouveau; Mais ne vous imaginez pas que cette facilité conſienne ou conſerue quelque reſſemblance de cette Idée, & de ce qu'elle repreſente, comme les veſtiges de la Mémoire ſont celle des eſpeces de la glande.

Pour moy il me ſemble que cette ſorte de Mémoire Spirituelle ſuit ſi naturellement de l'eſſence d'vne choſe qui penſe, que ie ne verrois pas le moindre lieu de douter qu'elle ne ſe rencontraſt dans noſtre Eſprit, n'eſtoit qu'on peut ſans cela ſuffiſamment rendre raiſon de la facilité que nous ſentons à conceuoir vne ſeconde fois les choſes Corporelles ou Spirituelles que nous auons deſja auparavant aperçues; Car cela peut venir de la facilité qui reſte dans le cerueau & dans la glande, à recevoir les meſmes eſpeces, ou à obéir à la volonté, lors qu'on en a vne fois contracté l'habi-

tude: Car bien que les Idées & les notions des choses Spirituelles ne soient pas iointes naturellement à aucune espece Corporelle, toutesfois la peine que nous sentons à suspendre nostre imagination, & la volonté que nous auons de communiquer nos pensées, nous oblige de les y joindre; Et lors que nous nous y sommes accoustumez, il en reste necessairement quelques vestiges, qui font que nous auons vne plus grande facilité qu'auparauant à suspendre nostre imagination, & à nous occuper dans la Meditation des choses Spirituelles. Et ainsi cette sorte de Memoire n'est peut-estre pas d'un fort grand vſage durant cette vie; Mais cela ne nous doit pas empêcher de reconnoistre qu'elle est vne des suites & des dépendances de nostre nature. Et il seroit à mon auis ridicule, de penser que quand l'Esprit sera separé du Corps, & qu'il ne pourra plus se seruir de la Memoire Corporelle, il ne luy restât aucun moyen par lequel il pût se ressouuenir des pensées qu'il aura eues pendant cette vie, ou de celles qu'il aura dans l'autre.

Mais ie passe plus outre, & ie dis hardiment que nous auons en nous vne Memoire Intellectuelle; Car, comme il n'y a rien qui nous puisse mieux prouuer si nostre Esprit est capable ou non de quelque faculté, que l'experience mesme, & l'vſage que nous en faisons, i'estime que nous auons assez d'experience pour nous en conuaincre, & en estre tres-persuadez. Car puis qu'il est  
vray

vray que nostre Esprit peut concevoir vne infinité de choses qui ne sont point imaginables ; Il est vray aussi qu'il peut se ressouvenir de ses conceptions sans l'ayde de l'Imagination ; Et mesme si cela n'estoit, nous ne pourrions raisonner comme nous faisons des choses Spirituelles ou Incorporelles ; dautant que tout raisonnement estant composé d'une suite de plusieurs conceptions , nous ne pourrions comprendre la liaison qui est entre elles, si lors que nous formons les secondes, nous ne nous ressouvenions des premieres ; Cependant il ne demeure de ces premieres aucuns vestiges dans le cerueau , puisque ce sont de pures conceptions, & non pas des imaginations. Il est donc constant que nous auons en nous vne Memoire intellectuelle , puisque nostre Esprit peut se ressouvenir de quelques-vnes de ses pensées , sans qu'il en soit resté aucuns vestiges dans le cerueau. Mais parce que la plus-part ne se contentent pas de sçauoir par experience qu'ils ont en eux cette faculté, mais qu'outre cela ils veulent sçauoir comment elle agit, & de quels vestiges elle se sert , de là vient qu'ils doutent s'ils en ont vne, à cause qu'ils ne sçauoient se figurer ses vestiges, ny se représenter la maniere dont elle agit ; Mais ils ne prennent pas garde, que c'est vouloir voir des sons, & ouïr des couleurs, que de vouloir imaginer ce qui n'est point imaginable.

---

*De l'Entendement, du Raisonnement, &  
de la Parole.*

CHAP. XX.

**I**E n'ay pas deſſein d'éclaircir icy toutes les queſtions qu'on pourroit propoſer ſur ces trois facultez, mais ſeulement de dire quelle eſt leur nature, autant qu'il eſt neceſſaire pour la connoiſſance de l'Eſprit de l'Homme ; Car ie m'aſſeure qu'il n'y en a aucunes ſi difficiles, qu'on ne puiſſe aiſément reſoudre par les choſes que j'ay dites juſques icy ; Outre que nous auons deſia aſſez parlé de l'Entendement, pour connoiſtre ce que c'eſt, & ſçauoir qu'il differe de l'Imagination, comme vn mode ou vne maniere d'apercevoir de l'Eſprit differe d'un autre mode. Nous ne ſçaurions toutesfois nier que la maniere d'apercevoir, qui eſt propre à l'Entendement, n'appartienne bien plus particulièrement à la nature de l'Eſprit que celle de l'Imagination ; Car celle-cy dépend du Corps, mais l'autre en eſt indépendante ; Et de plus, ſoit que vous preniez l'Entendement pour cette faculté generale que l'Eſprit a d'apercevoir quoy que ce ſoit, & de quelque maniere que ce ſoit, ſoit que vous le preniez pour cette faculté particuliere qu'il a d'entendre & de concevoir d'une maniere differente de celle de



l'Imagination, vous verrez qu'il est vny inseparablement à l'Esprit.

Or la veritable & essentielle difference qui est entre l'Imagination & l'Entendement consiste, comme nous auons desia dit, en ce que l'Esprit pour imaginer se tourne vers le Corps, pour considerer les changemens qui y ariuent, ou qu'il y aporte; & que pour entendre, ou conceuoir, il s'arreste simplement à contempler les Notions qu'il trouue en luy-mesme; C'est pourquoy pour entendre il n'a pas besoin d'organes, & l'Entendement est vne faculté independante du Corps, aussi bien que la Volonté; Et comme nous n'auons pas besoin d'aucun de nos membres pour vouloir simplement, quoy que nous nous en seruions pour executer nos volontez, nous n'en employons aussi aucun pour entendre & conceuoir les choses qui ne sont point du ressort de l'Imagination; si ce n'est peut estre en suspendant ses fonctions, & en detournant la glande de tous les lieux d'où il, luy pouroit venir quelque espee Corporelle; ou du moins en ne permettant pas qu'il s'y en trace aucune autre que celle des noms ausquels nous auons attaché la pensée des choses Spirituelles ausquelles nous nous occupons.

L'objet de l'Entendement est, comme nous auons aussi dit, beaucoup plus estendu que celuy de l'Imagination; Car non seulement il comprend tout ce que nous conceuons de la Nature des Esprits, & tout ce que nous sçauons de la Nature

du Corps en general ; Mais encore plusieurs proprietez de diuers Corps particuliers, qui estant imperceptibles aux sens, sont aussi hors du pouuoir de l'Imagination, & ne peuuent estre compris que par l'Entendement.

L'Entendement a encore cette prerogatiue au dessus de l'Imagination, qu'il ne peut estre blessé ny dépraué dans ses operations ; Ce qui ne vient pas de ce que ses perceptions ne sont, à proprement parler, que des passions, ny mesme, de ce qu'elles ne sortent point hors de luy, & n'ont aucun commerce avec le Corps, ainsi qu'en ont les autres facultez ; Mais parce qu'elles cessent tout à fait, si-tost que le Corps est vn peu considerablement malade ; & parce aussi que l'on peut dire que toutes nos intellections ( permettez moy de me seruir de ce mot ) sont toutes vrayes, puis qu'il est vray que nous n'entendons rien proprement, que ce que nous conceuons & aperceuons clairement & distinctement par l'Entendement pur, lequel ne peut estre faux, ainsi que nous monsturons cy-apres.

Je ne repeteray point icy tout ce que j'ay dit de la Nature des Idées ou Notions qui seruent à cette faculté ; Mais ie vous feray seulement remarquer, qu'entre les Notions qui nous representent des Estres, nous n'en auons que trois principales & primitives, que nous pouuons apeller *Innées*, non pas que nous croyons qu'il y en ait aucune qui soit dans l'Esprit lors qu'il n'y pense

pas, mais parce que nous naissons avec la faculté de les produire quand nous voulons ; pourueu que les prejuges de l'enfance n'esteignent point la lumiere naturelle de nostre Esprit.

Lapremiere de ces Notions est celle d'une substance qui pense ; La seconde est celle d'une substance estendue ; Et la troisieme est celle de l'union de ces deux substances, c'est à dire, del'union del'Ame & du Corps; Et bien que nostre Entendement estant finy, ces Notions ne luy representent peut-estre pas toutes les proprietes que Dieu a mises dans l'objet auquel elles appartiennent, elles ne peuuent toutesfois luy en faire concevoir aucune qui ne conuienne à son objet, ny qui puisse estre contraire aux autres que peut estre il peut auoir, & que ces Notions ne nous decouurent pas ; Car si cela estoit, elles n'en seroient pas les Notions ou les Idées, & quoy que tres-claires & tres-distinctes, elles ne seroient pourtant pas veritables ; ce qui est impossible. Mais nous nous trompons assez souuent dans le mauvais usage que nous faisons de ces Notions, en les attribuant à des choses à qui elles ne peuuent conuenir ; comme font ceux qui croient que Dieu est Corporel, que les Esprits sont estendus, & que les Corps sont capables de pensée ; Et il n'y a rien de plus vray que ce que Monsieur Descartes a remarqué, sçauoir, que la plus-part attribuent aux qualitez reelles l'Idée qu'ils ont de leur Esprit, & de la maniere dont il agit sur le Corps.

C'est pourquoy pour nous garder de nous

tromper, il faut considerer chacune de ces notions en particulier, & examiner ce qu'elles nous representent de clair, & estre attentif à tout ce qu'elles contiennent, afin de remarquer les veritez particulieres qui tirent leur naissance de ces notions primitives, ce qui s'appelle raisonner: Car raisonner n'est rien autre chose que decouvrir vne verité cachée, par le moyen d'une autre qui est connue. En effet, il en est des Veritez comme des Estres, elles dependent toutes les vnes des autres, & sont toutes jointes, ou comme des effets à leurs causes, ou comme des causes à leurs effets, ou comme des proprieté à leur essence; Ainsi elles se decouvrent les vnes les autres; Et celuy qui les sçait le mieux discerner, est celuy qui juge, qui raisonne, & qui discourt de meilleur sens.

Cette puissance est le plus noble apanage de la faculté d'apercevoir de l'Esprit creé, c'est vne suite de la faculté de penser; Car la lumiere naturelle estant bornée, elle ne peut pas apercevoir tout par vn seul acte; Mais les veritez estant toutes enchainées les vnes aux autres, elle n'en decouvre iamais aucune, qu'elle ne luy serue comme d'un échelon pour monter à la connoissance d'une autre. C'est là le seul moyen que nous ayons pour perfectionner nostre Lumiere Naturelle, & augmenter nos connoissances, & ainsi pour nous rendre les plus parfaits que nous puissions estre par les forces de nostre Nature.

Mais comme nostre vie est extremement court

ce, & qu'il n'y a que fort peu de choses sur lesquelles vn chacun de nous puisse faire reflexion, nostre science n'auanceroit pas beaucoup, & nous ne ferions pas de grands progresz, si nous n'auions le pouuoir de communiquer nos pensées, qui est ce que nous apellons parler; Car parler n'est pas seulement prononcer des mots avec intention de signifier quelque chose, quoy que l'vsage commun ne prenne la parole que pour cela seul; mais nous la prenons icy pour tous les signes par lesquels nous pouuons faire entendre aux autres nostre pensée. Or le pouuoir que l'Esprit a de se faire entendre, pendant qu'il est vny au Corps, est manifestement vne suite de la puissance qu'il a d'attacher ses pensées à certains mouuemens du Corps, ausquels elles ne sont point jointes naturellement, & par ce moyen d'instituer ces mouuemens pour estre les signes de ses pensées. Et il me semble que ces signes ne scauroient estre bien propres à decouurir nos sentimens, ny à nous apprendre ceux des autres, s'ils ne sont de telle nature, & s'ils ne se font de telle maniere, que rarement il arriue que nous les fassions sans y penser. C'est pourquoy ces signes qui accompagnent & qui decouurent ordinairement nos passions, ny tous les mouuemens naturels de nos membres, ne sont pas des signes infallibles de nos pensées, d'autant que souuent ils se font en nous sans que nous y pensions. Aussi voyons nous que dans l'Homme, & dans les animaux qui sont d'une mesme espece,

les signes des passions, & les mouuemens naturels des membres ne changent point, ou fort peu, selon les diuers Climats; quoy qu'il y ait vne si grande diuersité de langage, non seulement entre les Europeans & les Asiatiques, mais mesme entre les Habitans d'un mesme Royaume. Nous voyons aussi que tous les Muets ne choisissent pas les mesmes signes pour se faire entendre, bien qu'ils ayent les caracteres & les mouuemens naturels des passions semblables; Mais afin que ces sons, ces caracteres, & ces mouuemens soient des signes de nos pensées, il faut que nous les déterminions volontairement à ce que nous desirons qu'ils désignent, ou que du moins nous consentions à ce que d'autres en ont déterminé.

Il s'en suit euidentement de tout cecy, que toutes les langues sont d'institution, & qu'il doit y auoir vne notable difference entre les Hommes & les autres animaux, puis qu'il n'y a point d'Hommes si hebetes & si stupides, sans en excepter mesme les foux & insensez, qui ne soient capables d'inuenter quelques signes pour faire entendre leurs pensées, & que la plus sage de toutes les Bestes n'est pas capable de rien faire de semblable, & ainsi nous n'auons aucune raison de croire qu'elles ayent la moindre pensée; Et si l'on voit que quelques vnes obeyssent assez fidellement à nos paroles, ou autres signes que nous leur faisons, & mesme, à ce qu'il semble, aux voix & aux accens de leurs semblables; l'on peut dire premierement, que leur Corps est  
tellement

tellement disposé, que lors que le bruit & l'accent de quelqu'une de leurs semblables, frappe leurs oreilles, cela conduit les esprits animaux dans les muscles, qui les font agir comme nous voyons qu'elles font ; d'autant qu'il n'y a pour l'ordinaire que les animaux d'une même espèce qui suivent cet accent, & que les autres qui sont dans le même lieu n'en remuent pas, quoy que, du moins par usage, ils auroient pu apprendre ce qu'il signifie, s'ils avoient quelque connoissance. Secondement, on peut dire que bien que les Bêtes obéissent quelquefois aux signes que nous leur faisons, nous ne devons pas pour cela leur attribuer quelque pensée ; parce que si nous leur en faisons d'autres, dans une matière même plus aisée, mais qui ne fust pas selon leur naturel, elles n'y obéiroient pas : Par exemple, si nous commandions à un Chien d'aller quérir une Perdrix dans un endroit où il y auroit long-temps que nous n'aurions passé, ainsi qu'on luy commande quelquefois d'aller chercher un gan au lieu où l'on le jette, il ira bien chercher ce gan & non pas la Perdrix ; Ce qui fait voir que ce n'est pas parce qu'il entend ce qu'on luy dit, qu'il fait ce qu'on luy commande, mais parce que la peine qu'on a pris à l'instruire, a tellement disposé toute la machine de son Corps, qu'aussi-tôt qu'on luy fait un tel signe, les esprits animaux sont portez dans les muscles qui le luy font faire ; Et ainsi ce n'est pas merueille si jettant un gan devant un Chien

celle le fait courir apres , & le prendre dans sa gueule, & si en suite il s'acoûtume à le rapporter. Que si ie voulois instruire vn jeune levrier à se ietter dans l'eau , ou vn barbet à chasser de veuë, ie n'en viendrois peut-estre iamais à bout ; Au lieu qu'il n'y a point de Topinambour , qui estant petit, n'apprenne le François aussi bien que nous, si on l'ameine jeune en France, & qui estant adulte ne demande ses necessitez dès la premiere journée ; Pourquoy la mesme chose n'arriueroit-elle pas aux Bestes, si elles auoient quelque pensée ? veu qu'elles ont le cerueau, la langue, & les autres parties qui seruent à la parole, peu differentes des nostres, & qu'il y en a mesme plusieurs qui prononcent fort aisément toutes sortes de langues ; C'est pourquoy leurs cris, leurs voix, & leurs accens, deuoient aussi changer selon les diuers climats, si c'estoient des paroles, aussi bien que les nostres. Il est donc plus raisonnable de croire que toutes les choses que nous leur voyons faire, mesme les plus surprenantes, sont des suites de leurs passions, & des mouuemens auxquels nous les accoûtumons & atachons par l'assiduité & le soin que nous aportons à les instruire.



*Des Emotions de la Volonté.*

## CHAP. XXI.

L'UNION de l'Esprit & du Corps n'apporte pas moins de changement dans la seconde branche de nospensées, qui sont les Emotions de la Volonté, que nous en avons remarqué dans la premiere, qui sont les perceptions de l'Entendement; Et comme nous avons veu qu'outre la maniere d'apercevoir de l'Entendement pur, qui est celle qui est essentielle & inseparable de l'Esprit, son vnion avec le Corps luy en a encore fait auoir d'autres; l'experience nous fait aussi remarquer, qu'outre les Emotions de la Volonté, qui naissent d'une connoissance claire & distincte, & qui sont les seules qui appartiennent proprement à l'Esprit, cette mesme vnion le rend sujet à quantité d'autres, qui sont des suites des connoissances confuses des Sens. C'est pourquoy ayant parlé assez amplement des differentes manieres d'apercevoir, qui prennent leur origine de cette vnion, ie dois maintenant expliquer en quoy consiste la nature des Emotions de la Volonté qui sont excitées à l'occasion du Corps. Mais comme Monsieur Descartes en 'a parlé fort au long dans le Traitté des Passions, & dans celuy de l'Homme, i'en'en diray icy. que peu de choses.

Y y. ij

Je prefupofe que vous vous fouvenez de tout ce que j'ay dit de la Liberté & de la Volonté ; & que nous prenons cette faculté pour le principe de toutes nos déterminations & iugemens , & generalement de tout ce qu'il y a d'actif dans les opérations de l'Esprit ; En forte que nous ne referuons rien à l'Entendement, que la fimple perception de l'objet. Vous vous fouvenez bien auffi que nous auons dit que cette faculté eftoit de telle nature, qu'il n'y a aucune de nos connoiffances qui ne l'emeue en quelque façon , & qui ne l'incite à agir conformément à ce qu'elle représente, c'eft à dire, qui ne la porte à affirmer ou à nier, fi l'Esprit confidere l'objet en luy-mefme, ou bien à le rechercher ou à le fuir, s'il le regarde par le rapport qu'il peut auoir avec luy. De là vient que la Volonté eft fujette à deux differentes fortes d'émotions, dont les vnes ne dépendent que de l'Esprit, & les autres font excitées par la difpofition qui fe trouue dans le Corps. Elles s'accordent toutes deux en cela, que ce ne font que des differentes façons de vouloir, & qu'elles font toutes excitées par quelques perceptions de l'Esprit, foit de celles aufquelles l'Ame s'applique volontairement, foit de celles qui tirent leur origine des Sens.

La premiere forte de ces émotions fe pourroit rencontrer dans l'Esprit, quand mefme il ne feroit pas vny au Corps, dautant que ce ne font rien autre chofe que les mouuemens qui fuiuent natu-

réellement des connoissances claires & distinctes qu'il a du bien & du mal, que l'objet qui luy est représenté luy peut apporter. Ainsi par exemple, si nostre Esprit n'estoit point vny au Corps, & qu'il aperceust néanmoins qu'il y a beaucoup de choses à connoistre dans la nature qui sont fort belles, sa volonté ne laisseroit pas de se porter à aimer cette connoissance, c'est à dire à la considérer comme vn bien qui luy appartient, (puisque sa nature est de connoistre) & à s'vnir avec elle, en se regardant avec cette connoissance comme vn tout dont il fait vne partie, & cette perfection l'autre. Et s'il remarquoit avec cela qu'il eust cette connoissance, & qu'il la possédast non seulement de volonté, mais réellement & de fait, le mouvement de sa volonté qui accompagneroit la connoissance qu'il auroit que ce luy seroit vn bien, seroit sa joye; Mais s'il reconnoissoit qu'il en fust priué, le mouvement qui suiuroit, seroit sa tristesse; que s'il considéroit en suite qu'il luy seroit bon de l'acquérir, il en auroit du desir; Et s'il se croyoit en danger de la perdre, il en auroit de la crainte; Enfin s'il se sentoît assez fort pour l'acquérir, sa volonté en conceuroit de l'esperance; Comme aussi il ne manqueroit pas d'auoir de la haine, de la colere, ou de l'indignation, s'il aperceuoit que quelque chose fût capable d'en retarder, ou de luy en faire perdre la possession. Et ainsi l'Esprit pourroit auoir dans cet estat de separation tous les mesmes mouuemens de la volonté qui

accompagnent les passions, sans qu'on pût dire: pour cela qu'il eust aucune passion; D'autant qu'il n'y a rien dans tous ces mouuemens de sa volonté qui luy fût obscur, & dont il n'eust vne tres-parfaite connoissance, pourueu qu'il fist reflexion sur ses pensées.

Mais pendant que nostre Esprit est vny au Corps, les mouuemens de nostre volonté se trouvent aussi joints, avec de certains mouuemens des esprits animaux, qui l'incitent & le disposent à auoir ces autres pensées claires, dans lesquelles consiste la nature des émotions raisonnables de la volonté, lesquelles sont obscurcies par ce sentiment confus qui se rencontre dans les passions; & sont presque confonduës avec luy. Car tout de mesme que dans la soif, outre le desir de boire; on a vn certain sentiment de la secheresse de la gorge, qui est vne pensée confuse qui excite le desir de boire, mais qui n'est pas ce desir mesme; De mesme dans la passion d'Amour, outre ce mouuement de la volonté par lequel l'Ame s'vnit à son objet, on sent ie ne sçay quelle chaleur autour du cœur, & vne grande abondance de sang dans les poulmons; Et bien que ce sentiment incline l'Ame à se joindre de volonté avec l'objet qui est pour lors present à sa pensée, il ne laisse pas pourtant d'estre different de la pensée par laquelle elles s'vnit à cet objet. Or comme il arriue quelque-fois que la gorge est seche sans que l'on ait enuie de boire, & que d'autresfois on a desir de

boire sans auoir cette secheressé; De mesme, on a quelque fois ce sentiment qui accompagne l'Amour, sans que la volonté se porte à rien aimer, parce qu'il ne se presente rien pour lors à nostre Esprit que nous pensions en estre digne; & quelque-fois au contraire, il se peut rencontrer que nous connoissions vn objet qui merite d'estre aimé, sans que nous soyons touchez de la passion d'Amour, parceque le Corps pour lors n'y est pas disposé. Mais pour l'ordinaire ces deux pensées se trouuent ensemble, aussi bien que la secheresse de la gorge avec le desir de boire, à cause de l'estroite vnion de l'Ame & du Corps, qui fait que lors que nous jugeons vn objet estre aimable, cela dispose incontinent les esprits animaux & le cœur au mouuement qui excite la passion d'Amour; Et que lors que le Corps est disposé à cette passion, l'Esprit imagine aussi-tost des qualitez aymables dans vn sujet où sans cela il ne verroit peut-estre que des defauts. Ce que ie dis icy del'Amour doit estre apliqué par proportion aux autres passions.

Vous voyez donc la difference qu'il y a entre ces deux sortes d'Emotions de la Volonté, dont les vnes sont intellectuelles ou raisonnables, & les autres sensuelles ou des passions, en ce que celles-là sont produites, par la connoissance claire & distincte que l'Esprit a d'une chose qu'il regarde comme son bien, & que les autres au contraire sont excitées par ces sentimens confus que le mou-

uement des Esprits & des nerfs qui accompagnent les passions fait naistre en l'Ame. C'est pourquoy Monsieur Descartes a eu bonne raison de les définir *Des Perceptions, ou des Sentimens, ou des Emotions de l'Ame, qu'on raporte particulièrement a elle, & qui sont causées, entretenues, & fortifiées par quelque mouuement des Esprits*; Ce sont des perceptions, d'autant que nous donnons ce nom à toutes les pensées de nostre Ame, qui nous découurent quelque chose; Ce sont des sentimens, parce que ce sont des connoissances que l'estroite liaison qui est entre le Corps & l'Esprit rend confuses & obscures, & qu'elles ne sont pas autrement excitées dans l'Ame que les autres sentimens, ny autrement conuës par elle. Enfin ce sont des Emotions de l'Ame, nostre propre experience nous faisant connoistre que nous n'auons point de pensées qui l'agitent & l'ébranlent si fort que sont ces passions. Il adjoûte dans cette définition, que nous les rapportons particulièrement à l'Ame, afin de les distinguer de nos autres sentimens, que nous rapportons ou aux objets extérieurs, ou à nostre Corps. Enfin il conclud qu'elles sont causées, entretenues, & fortifiées par quelque mouuement particulier des Esprits, tant pour expliquer leur dernière & plus prochaine cause, que pour les distinguer encore d'auantage des autres sentimens, qui ne sont pas ainsi entretenus & fortifiés par vn mouuement particulier des Esprits, & mesme pour les distinguer aussi des Emotions raisonnables de la Volonté,

lonté, qu'on pourroit bien aussi définir des émotions de l'Ame, qui se raportent à elle, mais qui sont causées par elle mesme.

Mais afin de comprendre le mieux qu'il nous sera possible, de quelle maniere ces passions s'engendrent, & quel est le pouuoir de la Volonté sur elles, il faut considerer premierement que suivant les loix de l'vnion dont nous auons cy-deuant parlé, les mouuemens de l'Ame qui sont ioints avec les sentimens des passions, sont ceux qui sont les plus propres & les plus conuenables pour porter l'Ame à consentir aux choses auxquelles le Corps est disposé; De sorte que, par exemple, quand nostre Corps a de la disposition à l'Amour, l'Esprit se laisse aussi-tost aller à des pensées qui le peuuent inciter à cette passion; Et d'autre costé lors que l'Ame est saisie de tristesse, le Corps prend vne disposition qui sert à l'entretenir. Considerez en second lieu, que suivant les mesmes loix, les premieres pensées qui ont accoustumé d'accompagner certains mouuemens, continuent tousiours à les suivre; & de mesme les mouuemens qui ont suivi certaines pensées, la premiere fois qu'elles sont venues dans l'Esprit, les accompagnent aussi presque tousiours, bien que ces mouuemens & ces pensées viennent de différentes causes que celles qui les ont produites la premiere-fois.

L'experience montre cela tres-clairement; Car pour commencer par l'exemple de la soif, dont nous nous sommes desia seruis, de ce que

la premièrè-fois que nous auons eu soif, ou que nous auons senty de la secheresse à la gorge, nous auons eu ensuite enuie de boire, le boire nous estant alors vtile; quand la mesme secheresse de gorge se rencontrera, soit que le boire nous soit vtile ou non, l'enuie de boire ne manquera pas de suiure le mouuement des nerfs de la gorge qui nous donnera le sentiment de la soif. Et au contraire, quoy que le boire nous fust vtile, à cause du feu qui regne par tout le Corps, & qui le desseche, nous n'en auons toutesfois aucun desir, si quelque chose empesche que ce feu & cette secheresse ne se communique à la gorge, & n'excite ainsi en nous le sentiment de la soif, quoy que nous aperceuiions assez d'ailleurs la necessité que nous auons de boire.

Nous experimentons aussi, que lors que nous auons vne fois joint quelque pensée de l'Esprit à quelque mouuement du Corps, apres cela ils n'ont gueres coustume de se rencontrer l'un sans l'autre; Car nous voyons que lors qu'estant malades, nous auons eu de l'aersion pour quelque viande, nous ne pouuons par apres rien manger qui aproche du goust de cette viande, sans que nous ayons la mesme aersion; Et de mesme nous ne sçaurions penser à l'aersion que nous auons eüe pour cette viande, sans que le mesme goust ne nous reuienne à la bouche.

Enfin vn chacun de nous peut auoir obser-



né; que quand on a vne fois attaché quelqu'une de ses Idées à vn certain nom, comme par exemple, l'Idée que nous auons d'un Esprit infiny, à ce nom-là *Dieu*, on ne sçauoit plus par apres l'entendre prononcer, sans que l'Idée que nous y auons jointe ne reuienne dans l'Esprit; & de mesme aussi quand cette Idée s'y represento, on se ressouient en mesme temps du nom qu'on y'a attaché.

Or si estant adultes nous auons bien la force de lier nos pensées à certains mouuemens, & de faire par ce moyen que les vns & les autres s'entre-suiuent; sans se quitter presque jamais, ie ne pense pas qu'il y ait lieu de douter que les premieres pensées que nous auons eues, deuant nostre Naissance & vn peu apres, ne doiuent estre bien plus vnies aux mouuemens qui les ont excitées, & à l'occasion desquels nous les auons eues la premiere fois, & que les premiers mouuemens qui ont alors suiuy & accompagné nos pensées, ne leur doiuent aussi estre bien plus vnies; Car pour lors nostre cerueau estoit, s'il faut ainsi dire, tout nouf, & nostre Esprit n'y rencontroit aucunes dispositions qui peussent empêcher les esprits animaux de prendre la forme qui estoit requise pour obeir à ses volonte; ou du moins il n'y en trouuoit pas tant, que lors que le cerueau estant & plus grand, & plus sec, est presque tout remply des traces que les objets de dehors y ont laissées. Outre que le cerueau

estant pour lors extremement mol, les chemins que les esprits animaux s'y sont faits peu de temps apres sa formation, sont sans doute bien plus ouuerts, mieux grauez, & plus libres, que ne sont ceux qu'ils ont fait longtemps apres, lors qu'il est deuenu plus ferme & moins humide. Aussi remarquons nous qu'il ne suffit pas tousiours, à present que nous sommes plus âgés, qu'un tel mouuement suive vne fois ou deux vne telle pensée, pour faire qu'il ne la quitte plus; Mais qu'il faut par vne longue habitude, & vne perséuerance dans le mesme dessein, pousser les Esprits vers le mesme endroit du cerueau, pour les obliger à se faire un chemin facile, & estre ainsi obeyssants aux commandemens de la Volonté.

Après auoir bien considéré tout ce cy, Pensons que nous n'auons pas esté Philosophes dans le ventre de nostre mere; mais que toutes les pensées que nous y auons eues ont esté des sentimens fort confus, lesquels, de mesme que les passions que nous auons aussi ressenties alors, n'ont point eu d'autres objets, que les choses qui faisoient du bien ou du mal à nostre Corps, & qui dispoisoient ainsi nostre Ame à s'y vnir ou à s'en separer, à cause de son vnion avec le Corps, & consequemment à mouuoir les membres qui pouuoient satisfaire l'inclination de sa volonté. Ce qui a esté cause que le mesme mouuement des esprits animaux qui a auerty l'Ame

de la presence de cet objet agreable, ou desagreable, a esté suiuy immediatement de celuy qui executoit le dessein où l'inclinoit sa passion; & il s'y est tellement vny, que lors qu'il se presente encore à present quelque chose d'agreable ou de desagreable, quoy que d'une nature totalement differente de ce premier objet, le premier mouuement des Esprits qui compose l'espece de cet agrément, ou de cette auersion, & qui nous en fait apercevoir, est incontinent suiuy du second, par lequel les esprits animaux qui forment cette espece, sont portez dans les parties qui ont seruy autrefois à nous vnir au premier objet agreable, ou à nous separer du premier sujet de nostre auersion. C'est pourquoy nous voyons que ce n'est pas en voulant auoir telles ou telles passions, mais en excitant ce premier mouuement, & en nous representant quelque chose d'agreable, ou de desagreable, que nous auons le pouuoir d'exciter le second, dans lequel consiste la passion que nous voulons auoir; d'autant que le mouuement des Esprits, que la simple Volonté d'auoir vne passion fait sortir de la glande, n'est pas celuy auquel la perception de la chose agreable ou desagreable est attachée, qui est pourtant le seul qui a le pouuoir de faire naistre cette passion, parce que c'est à luy seul que la nature la jointe dès le ventre de nostre mere.

Bien que nous n'ayons pas dessein de traiter

icy des Passions en particulier, Monsieur Descartes l'ayant desja fait tres doctement, toutesfois pour connoistre mieux la Nature de l'Esprit de l'Homme, il est à propos d'observer icy comment les principales de nos passions ont pû estre excitées en nous avant nostre naissance; Ce qui nous fera aussi connoistre quelle est leur Nature en general, & la maniere dont les Esprits sont meus en chaque passion. Je ne sçay pas si la joye a esté la premiere de nos passions, comme Monsieur Descartes a écrit à Monsieur Chanut dans vne de ses lettres: Car il me semble que l'Esprit de l'Homme a pû estre vny à son Corps, dès aussitost qu'entre le cœur, le cerueau, & les muscles; il y a pû auoir vne communication suffisante pour entretenir le commerce des pensées de l'un & des mouuements de l'autre; Et ie croy de mesme que cette vnion est rompuë, si tost que cette communication cesse, & ne se peut plus entretenir, soit que les autres parties soient saines ou malades; l'estime pourtant que cela arriue ordinairement comme le dit Monsieur Descartes. Quoy qu'il en soit, le Corps tout au moins a deu estre assez bien disposé pour n'empescher pas cette communication; Et ie penserois bien qu'il n'a voulu dire autre chose sinon que cette bonne disposition a sans doute esté le premier sujet de joye que l'Ame a peu auoir dans cet estat; C'est pourquoy le mouuement des Esprits qui a suiuy cette pensée, les a portez vers les branches des nerfs.

de la sixiesme conjugaison qui vont au cœur, afin qu'en dilatant ses orifices, cette communication fut encore plus facile. Aussi remarquons nous que quand le Corps est ainsi bien disposé, nous auons de la joye, & que lors que nous sentons cette passion ( quoy que peut-estre par quelqu'autre motif ) le cœur se dilate dauantage; Et d'autant qu'en se dilatant il enuoye beaucoup plus d'esprits au cerueau, ils doiuent se répandre plus abondamment dans tous les nerfs, mais principalement dans ceux qui vont dans les muscles, parce que ce sont les plus gros de tous; Et en les agitant ils obligent le sang qui est dans les veines à couler vers le cœur, plustost que celuy des visceres, dautant que leurs nerfs ne sont pas si gros, & ne reçoient pas aussi tant d'Esprits, & qu'il ne leur est pas si aisé d'enfler & d'agiter les visceres que les muscles; Ce qui sert encore à augmenter la dilatation du cœur.

L'amour dans ce temps-là a suiuy de près la joye; D'autant que le premier sujet que l'Ame en a eu, ayant esté la bonne disposition de son Corps, elle n'a peu subsister tant soit peu, sans qu'il y ait eu fort proche du cœur vn aliment propre à entretenir sa chaleur Naturelle, & a reparer la perte des parties de nostre Corps, qui s'écoulent sans cesse; C'est pourquoy apres cette premiere complaisance, qui a fait la joye de l'Ame, elle s'est jointe de volonté à cet aliment,

c'est à dire l'a aymé; & en mesme temps les esprits animaux ont coulé du cerueau dans les nerfs & dans les parties dont l'agitation peut obliger cét aliment à venir plus promptement vers le cœur. Mais comme cét aliment n'est pas le sang, patce qu'ayant desia beaucoup de fois passé dans le cœur, il n'est pas si propre à nourrir la chaleur, mais bien le suc nouveau qui vient des intestins, aussi sentons nous que c'est de ce costé-là que coulent les Esprits dans l'Amour; d'où vient que nous sentons vne plus grande chaleur dans les poulmons & dans le cœur que nous ne faisons auparavant, à cause que les parties de ce suc sont plus grossieres que celles du sang.

Je vous prie de remarquer en suite, que la fermentation qui se fait de ce suc dans le cœur, est cause qu'il agite les petits nerfs qui y vont, & qu'il ébranle aussi en passant ceux qui sont autour des poulmons, vn peu plus fort qu'à l'ordinaire, mais agreablement neantmoins, parce que ce mouuement est égal & vniforme; Ce qui donne occasion à l'Ame de perseuerer dans la mesme Passion; dans laquelle elle est encore confirmée par l'arriuéee des Esprits qui s'engendrent de ce nouveau suc; lesquels trouuant la glande plus disposée à les laisser sortir du costé des nerfs de la sixième conjugaison qui ont fait cette impression agreable, dont nous venons de parler, que par ailleurs, ils y coulent fort promptement, & entretiennent par ce moyen, & mesme fortifient & perfectionnent

perfectionnent l'espece qu'ils trouuent sur la glande, & obligent ainsi l'Ame à s'occuper de son Amour.

La mesme chose arriue dans les autres passions, chacune suiuant sa maniere, parce que les humeurs qui abordent dans le cœur pendant qu'elles durent, secoüent les fibres des nerfs du cœur, chacune selon sa nature, & selon la differente façon qu'elles s'y fermentent, & forment ou conseruent par ce moyen la mesme espece sur la glande; par les trous de laquelle les esprits animaux qui sont produits de ces humeurs sortent plus aisément que par les autres; à cause que ces Esprits retiennent quelque chose de la Nature & de la maniere de se mouuoir des humeurs dont ils ont esté premierement engendrez, & qui ont formé cette espece sur la glande, en secoüant les petits nerfs qui vont au cœur & aux autres visceres, d'une certaine maniere qui est propre à chaque passion & à chaque humeur; Ce qui est cause que l'Ame perseuere dans sa premiere pensée.

Nostre premiere tristesse est venuë apparemment de ce que nostre Corps manquoit d'aliment; & pour lors l'Ame s'en est aperceüe, parce que les orifices du Cœur se sont retrecis, & ce manque d'aliment a fait que les Esprits se sont portez du costé de la rate, à cause qu'elle est comme le dernier reservoir du sang, qui sert à en fournir au cœur, lors qu'il ne luy en vient pas assez d'ailleurs; Et c'est encore ce mouuement qui accom-

pagne la tristesse que nous ressentons dans vn âge plus auancé, bien que ce ne soit plus le mesme sujet qui en soit la cause.

Mais lors qu'il est venu vers le cœur quelque suc estranger qui n'estoit pas propre à entretenir sa chaleur, ou mesme qui la pouuoit esteindre, l'Ames'en estant aperceüe, s'en est separée de uolonté, c'est à dire, a eü pour luy de la hayne; Et en mesme temps. quelques Esprits sont coulez du cerueau vers la rate & vers les petites veines du foye, pour obliger le sang qu'elles contiennent à venir dans le cœur prendre la place de ce suc estranger, & d'autres sont allez vers les parties qui pouuoient l'empescher d'y entrer, ou mesme qui pouuoient obliger l'estomach à le vomir. Et ce sont-là les mouuemens du sang & des Esprits que nous remarquons encore à present dans la passion de la hayne.

Je ne diray rien icy des autres passions, ny mesmes des moyens dont Monsieur Descartes s'est seruy pour decouurir le mouuement des humeurs dans chaque passion, quand on la considere seule, & sans le mélange des autres, parce que cela regarde plus le Corps que l'Esprit; à l'égard duquel toutes les pensées confuses qui suiuent ou accompagnent les passions estant excitées de la mesme façon, il suffit d'en auoir expliqué vne, pour connoistre la naissance de toutes les autres. Mais ie ne feindray point de repeter icy ce que i'ay desia dit, sçauoir, que ce sont ces mesmes mouuemens des Es-



prits & des humeurs, qui ont pris leur origine de nos passions enfantines, qui les suivent encore à présent que nous sommes adultes, quoy qu'elles soient excitées par d'autres causes, avec lesquelles ces mouvemens n'ont pas le mesme raport qu'ils auoient avec les premières. C'est ainsi qu'en parle fort bien M. Descar. écrivant à Monsieur Chanut au sujet des quatre passions que ie viens de décrire. Voyla, dit il, les quatre passions que ie croy auoir esté en nous les premières, & les seules que nous auons eûes auant nostre naissance; Et ie croy aussi qu'elles n'ont esté alors que dès sentimens ou des pensées fort confuses; Parce que l'Ame estoit tellement attachée à la matiere, qu'elle ne pouuoit encore vaquer à autre chose, qu'à en recevoir les diuerses impressions; Et bien que quelques années après, elle ait commencé à auoir d'autres joyes, & d'autres Amours, que celles qui ne dépendent que de la bonne constitution & conuenable nourriture du Corps; Toutesfois ce qu'il y'a eû d'intellectuel dans ses Joyes & dans ses Amours, a tousiours esté depuis accompagné des premiers sentimens qu'elle en auoit eû; Et mesmes aussi des mouvemens ou fonctions naturelles qui estoient alors dans le Corps. En sorte que d'autant que l'Amour n'estoit causée auant la naissance que par vn aliment conuenable; qui entrant abondamment dans le foye, dans le cœur, & dans le poulmon, y excitoit

» plus de chaleur que de coûtume; De là vient que  
» maintenant cette chaleur accompagne tou-  
» jours l'Amour, encore qu'elle vienne d'autres  
» causes fort differentes.

De tout cecy, nous deuons ce me semble con-  
clure trois choses; La premiere, que presente-  
ment les passions peuuent estre excitées en nous,  
non seulement par les Emotions raisonnables  
de l'Esprit, qui connoist clairement ce qu'il doit  
aimer ou haïr, mais encore par ces premieres dis-  
positions du Corps, qui font naistre en nous  
ces sentimens confus du bien ou du mal qui  
luy arriue. La seconde, que l'effet formel &  
principal des passions est d'inciter l'Ame à vouloir  
les choses auxquelles elles preparent & disposent  
en mesme temps le Corps; Comme par exem-  
ple, la crainte, qui pousse les esprits animaux  
dans les nerfs qui vont dans les muscles qui  
seruent à la fuite, incite en mesme temps l'Ame  
à vouloir fuir. La raison de cela est que les Es-  
prits qui montent du cœur au cerueau, retra-  
cent de nouveau l'espece de la passion qu'ils  
trouuent sur la glande, tout autant de temps  
que dure leur Emotion; & ainsi fortifient, en-  
tretiennent, & confirment l'Ame dans sa pre-  
miere pensée, en l'obligeant à la considerer avec  
attention. La troisieme chose que nous deuons  
conclure est, que tout l'empire de la volonté sur  
les passions, consiste à appliquer l'Esprit, & a le  
tenir fortement arresté à considerer les choses

qui peuuent exciter en l'Ame la passion que nous voulons auoir, ou qui peuuent la defaire de celle que nous voulons chasser. Car tout ainsi que Sceuole n'auoit point d'autre moyen pour s'empescher de sentir le feu qui brusloit sa main, que de l'en retirer; De mesme nous n'auons point d'autre moyen d'apaiser nostre colere, ou nos autres passions, qu'en détournant la glande du lieu d'où luy vient l'espece qui la cause; Ce que nous faisons quand nous nous apliquons à penser à d'autres choses.

---

*De l'Origine des Inclinations & Auerfions Naturelles, qui n'ont pour cause que le Corps.*

CHAP. XXII.

**I**E mets ce Chapitre immediatement apres le precedent, parce que ces sortes d'Inclinations & Auerfions sont de veritables passions; qu'elles ont vne mesme Origine; & qu'elles ne sont pas autrement excitées ny aperceûes de l'Ame.

I'appelle Inclinations ou Auerfions Naturelles, qui n'ont pour cause que le Corps, celles dont nous ne pounons rendre aucune raison valable, pourquoy nous aimons ou haïssons certaines choses.

Il me semble que les vnes & les autres ne viennent point d'ailleurs que des impressions qui restent dans l'organe de la Memoire, soit que ces impressions ayent esté faites pendant que nous auons esté dans le ventre de nostre mere, soit apres que nous en sommes sortis. Il faut seulement remarquer que ces impressions doiuent estre fortes, & qu'elles doiuent auoir esté imprimées dans vn temps où l'Ame n'vsoit point encore de Reminiscence, ou du moins dans vn temps où elle n'a point aperceu ny fait réflexion sur la premiere cause de ses auersions & Inclinations: Car pour lors, si la chose qui a agy sur nos sens nous a esté beaucoup nuisible, l'espece qui s'en est tracée sur la glande, a esté tellement suiuiue du mouuement des Esprits qui excite la haine, que quand par apres cette mesme espece y est retracée par quelque cause que ce soit, encore que nous ne nous souuenions point de l'auoir autrefois aperceüe, le mesme mouuement des Esprits qui l'a suiuiue la premiere fois, continuë à l'accompagner (& nous fait par consequent ressentir la mesme passion de haine) parce que les Esprits qui forment cette seconde espece, trouuent le cours qui excite cette passion plus ayse à suiure que tout autre. Ce qui est cause que quelquefois ils le reprennent mesme malgré qu'on en ait; & malgré le soin qu'on aporte de les en detourner par vne volonté contraire. Ce n'est pas qu'à la longue on n'en

puisse venir à bout, en s'apliquant fortement à considerer que cét objet n'est pas nuisible, & prenant vne resolution ferme & oposée à nostre auersion; Mais il faut pour cela de l'aplication & de la resistance, dont la plus-part ne se veulent pas donner la peine; C'est pourquoy il ne faut pas s'estonner, si ces sortes d'auersions Naturelles durent toute la vie. Mais ce qui est bien plus funeste, c'est que nous laissons vieillir avec nous ces mauuaises Inclinations où nous disposent nos humeurs, lesquelles pour l'ordinaire nous accompagnent iusqu'au tombeau; Ce qui ne vient que de nostre lascheté & negligence, & de ce malheureux plaisir que nous prenons à contenter nostre chair, en suiuant nos apetits; au lieu que nous n'en deuions prendre qu'à perfectionner nostre Ame, en la rendant maîtresse de tous les mouuemens du Corps qui peuuent dépendre d'elle, & en accoustumant ainsi nostre chair à suiure malgré elle la loy de l'Esprit.

Mais d'autant que l'on pouroit peut-estre trouuer quelque obscurité en ce que ie viens de dire, que l'espece de l'objet nuisible qui a esté tracée sur la glande, & le mouuement des Esprits qui l'a suiui, ne se separent quasi jamais, il faut icy que ie m'explique; Car il sembleroit peut-estre que ie n'ay pris le mot d'espece que pour cette forme particuliere du mouuement des esprits animaux, que l'action des objets extérieurs leur fait prendre; Et qu'ainsi l'espece

Corporelle & le mouuement des Esprits qui s'écoulent de la glande, n'estant que la mesme chose, sont tousiours joints ensemble.

A cela, ie répons, qu'il faut remarquer premierement, que cette espee ne consiste pas simplement dans la forme extérieure que prend le cours des Esprits pour entrer dans les pores que l'objet a ouuerts; Mais encore dans la vitesse, & dans la force du cours des Esprits, dans la situation que cette espee a sur la glande, & dans tous les changemens & toutes les variations qui peuuent se trouuer dans tout le cours des Esprits; Toutes lesquelles choses ne dépendent pas seulement de la différente maniere de l'action de l'objet, mais encore de la constitution dans laquelle la glande, les Esprits, & le cerueau se trouuent pour lors; De sorte qu'encore qu'on puisse dire qu'un objet qui agit tousiours de la mesme façon, excite tousiours formellement la même espee, parce que celle qu'il excite nous donne tousiours la pensée de la mesme chose, toutesfois ce n'est pas tousiours matériellement la mesme, si quelqu'une des autres conditions qui y contribuent a changé; Et l'on ne doit pas dire qu'elle soit tousiours précisément jointe au mesme mouuement des Esprits, ny qu'elle doie tousiours produire le mesme effet.

Remarquez en second lieu, que quand mesme il n'arriuerait rien, ny de la part de l'objet, ny des nerfs, ny de la glande, qui pût empêcher que ce ne fust exactement la mesme espee iointe au  
mesme

mesme mouuement des Esprits, à ne la considérer que depuis la glande iusques à l'ouuerture que l'objet a faite dans les ventricules du cerueau; Neanmoins à la regarder depuis cette ouuerture iusques dans les parties où les Esprits sont portez, il peut arriuer tant de choses, soit de la part des Esprits, soit de la part du cerueau & des autres lieux par où ils passent, qui peuuent leur faire changer leur premiere maniere de descendre dans les nerfs, qu'on ne peut pas dire que la mesme espee soit tousiours accompagnée du mesme mouuement.

Concluons donc de tout cecy, qu'une espee que nous apellons la mesme, parce qu'elle nous donne la mesme pensée, n'est pas tousiours iointe au mouuement des Esprits qui les porte vers les mesmes parties, soit à cause de la différente maniere d'agir du mesme objet, soit à cause de la disposition qui se trouue alors dans les Esprits, dans la glande, & dans tout le reste du cerueau; ainsi que j'ay expliqué fort au long dans mes Remarques sur le Traitté de l'Homme de Monsieur Descartes.

Vous voyez donc que la mesme espee peut estre quelquefois suiuiue du mouuement qui excite la haine, & quelquefois de celui qui excitera une autre passion.

Mais pour reuenir à mon sujet, quelque sorte de mouuement qui puisse accompagner une espee, il est à mon auis éuident que lors que les

Esprits qui la composent se font vne fois tracé & frayé vn chemin entre les filamens dont la substance du cerueau est composée, il ne faut pas vne aussi grande force pour les obliger à le reprendre vne seconde fois, qu'il en a fallu la premiere; Et que quand il se formera sur la glande vne espece semblable, ou seulement approchant de la premiere, la seule facilité qu'ils trouveront à passer par leur premier chemin sera suffisante pour leur faire prendre. C'est en cette facilité que consistent toutes nos habitudes Corporelles, & le pouuoir de toutes nos inclinations, qui sont d'autant plus fortes que ce premier chemin est plus battu & plus ouuert. Voyla pourquoy le seul moyen que l'Esprit a de les corriger, c'est de penser à quelque autre chose qui soit ordinairement suiuiue d'autres mouumens, & de prendre en mesme temps la resolution d'arrester les premiers par vne volonté opposée: Car de cette façon, ils s'excite vne nouuelle espece sur la glande, qui porte les Esprits autre part, & les détourne de la route qu'ils auoient coûtume de prendre, ce qui leur en fait perdre insensiblement l'habitude, par la facilité qu'ils s'ouurent ailleurs; Mais ils reprendroient bien-tost leur premiere route, si nous ne perseuerions long-temps dans le dessein de nous y opposer.

Le docte & subtil Cheualier d'Igby, dans le Traitté qu'il a fait de la Poudre de Sympathie, apporte vn exemple fort remarquable de ces sor-



tés d'auctions, dans la personne du Roy Jacques de la Grand-Bretagne, qui auoit vne telle auersion pour les espèces-nuës, qu'il ne les pouuoit voir sans vne extrême frayeur. Il dit mesme que l'origine de cette auersion venoit de ce que la Reine sa Mere estant grosse deluy, fut extrêmement épouuantée du meurtre d'un de ses Officiers, qui fut tué dans sa chambre en sa presence. S'il est vray que ce soit là la veritable cause de sa crainte, il est assez difficile d'expliquer comment l'espece de la chose nuisible a pû se tracer sur la glande de l'Enfant, qui n'a pû l'apercevoir que par les yeux ou par les oreilles de sa Mere, pendant qu'il estoit dans son ventre. Il seroit plus aisé de rendre raison d'une pareille chose, si c'auoit esté l'odeur ou le goust qui eust incommodé l'Enfant; Car pour l'odeur elle peut penetrer au trauers des pores de la Mere; Et pour l'aliment qui a vn mauuais goust, comme il passe de la Mere à l'Enfant, il s'en peut rencontrer quelque partie dans le sang dont il est nourry. L'on conçoit aussi fort aisement qu'il n'est pas tousiours necessaire que la Mere s'aperçoive de cette mauuaise odeur, ou de ce mauuais goust, parce que le cerueau de son Enfant estant plus tendre que le sien, il peut en estre blessé sans qu'elle s'en resente.

L'on peut toutesfois oster la difficulté qui se trouue dans l'exemple allegué par Monsieur d'Igby, & voir comment la chose se fait, si l'on considere que ce n'est pas tant la qualité de l'ob-

jet qui se présente pour lors aux yeux ou aux oreilles de la mere, qui nuit à l'enfant, que la surprise avec laquelle il se presente; Laquelle apporte vn tres notable changement dans les esprits animaux de la mere; ce qui peut incommoder l'enfant qu'elle porte dans ses entrailles, à cause de la grande correspondance qu'il a alors avec elle.

Pour comprendre cecy, ie vous prie de prendre garde, que le principal effet de cette surprise, estant d'arrester la glande sur le lieu d'où luy vient l'espece qui la cause, (ainsi qu'a fort bien Remarqué Monsieur Descartes lors qu'il a parlé de l'admiration), & de porter tellement les Esprits de ce costé-là, qu'ils sont detournez de tous les autres, cette espece n'est pas seulement tracée sur la glande de la mere, mais aussi sur celle de l'enfant, (ainsi que j'ay expliqué fort au long dans mes Remarques page 335. & suivantes), & mesme plus fortement que sur celle de la mere, d'autât que celle de l'enfant est plus tendre & plus capable d'en estre incommodée; C'est pourquoy, quand après la naissance de l'enfant, quelque cause vient à retracer la mesme espece sur sa glande, elle produit les mesmes effets, & cause vne de ces auersions dont nous ne pouuons rendre raison, & beaucoup d'autres choses que j'ay expliquées dans mes Remarques. Il y a mesme icy vne chose fort considerable à obseruer, qui est que ces sortes d'impressions sont quelque-fois si fortes, qu'il

n'est pas tousiours neccessaire quel'objet qui a coutume de réueiller en nous vne certaine passion soit present à nos sens, pour faire qu'elle se réueille, c'est assez bien souuent qu'on se l'imagine; Ainsi qu'il arriua vn iour à vn de mes amis, qui auoit vne telle auersion pour de l'ail; qu'il n'en pouuoit manger sans vomir; Car comme vn iour il eust mangé d'une fausse dans laquelle on n'en auoit point mis à cause de luy, & qu'il auoit trouuée fort bonne, vne personne de la compagnie luy ayant dit apres par raillerie qu'il y auoit de l'ail dans cette fausse, il reuomit tout ce qu'il auoit mangé.

Il y en a d'autres au contraire qu'on pouroit facilement guerir de leur auersion, lors qu'ils ne haïssent certaines choses que parce qu'ils se sont faussement persuadez qu'elles estoient mauuaises, ou pour l'auoir ouy dire seulement, ou pour les auoir veües mal aprestées, ou pour n'auoir pas esté en goust lors qu'ils en ont mangé, si on les trompoit en leur en faisant manger sans qu'ils le sceussent; Mais aussi quelquefois cela ne suffiroit pas pour les guerir, s'ils auoient le cerueau fort tendre, & que l'impression fust vicille, de quelque maniere qu'elle eust esté produitte.

Au reste, ie ne pense pas qu'il soit neccessaire que ces sortes d'impressions, d'où naissent toutes nos auersions & inclinations, ayent esté faites auant nostre naissance, par les choses qui ont

bleffé ou chatoüillé nostre cerueau ; Car comme il arriue fouuent que nous remarquons les causes de quelques-vnes de nos auersions , ainsi qu'il arriue lors que nous nous ressouuenons d'auoir commencé à haïr vne telle viande , parce que dans vne telle occasion nous l'auons trouuée de mauuais goust , ou bien qu'elle nous a incommodé ; De mesme il arriue aussi assez fouuent que l'auersion demeure , bien que nous perdions le souuenir de la cause particuliere qui nous a fait auoir de la haine ; Et nous deuons penser alors , qu'il n'y a eû que l'espece de la hayne en elle mesme qui ait agy fortement sur le cerueau , & qu'ayant seulement pris garde au general de l'objet que nous haïssions , nous n'auons fait alors aucune reflexion sur la cause particuliere de nostre hayne ; soit parce que nous estions encore trop jeunes , ou que pour lors nous estions diuertis par quelque autre chose. Il suffit mesme quelque-fois d'entendre parler du sujet de nostre auersion pour faire qu'elle se reueille , ainsi qu'il arriue à ceux qui ne sçauoient entendre parler de Medecine ; sans en ressentir incontinent l'amertume à la bouche , & l'auersion au cœur ; Ce qui vient de ce que l'objet , de l'horreur qu'ils ont , est si bien imprimé dans leur Memoire , que lors que les esprits animaux sont obligez de tendre vers le lieu de cette impression ; Ils y trouuent des passages si aisez à ouurir , qu'ils ne le seroient pas d'auantage s'ils auoient la Medecine dans la

bouche ; Et ainsi son espee estant aussi bien tracée par l'effet de la Memoire la seconde-fois, qu'elle l'a esté la premiere par l'action de l'objet, cela donne lieu à l'Esprit de croire qu'il est present, & d'en concevoir del'aersion.

Il n'est pas non plus tousiours necessaire, que ce qui est present à nos sens soit entierement semblable au premier objet de nostre aersion, ou inclination ; Il suffit bien souuent qu'il ait seulement quelque leger raport avec luy, encore mesme que nous n'aperceuiens pas que c'est pour cela que nous sommes portez à l'aimer ou à le haïr : Car lors que plusieurs pores, qui seruent à tracer vne mesme espee, ont esté souuent ouuerts ensemble, & n'ont pas accoustumé de l'estre separément, il n'est pas aisé par apres qu'ils le soient l'un sans l'autre ; Et bien qu'il arriue quelque-fois que les Esprits ne soient particulièrement poussez que contre certains pores, les autres ne laisseront pas de se'ouurir ; dautant que les Esprits qui sont autour d'eux, suiuaus le mouuement des premiers, ainsi que l'air suit celuy de l'eau d'une riuere, trouuent vne si grande facilité à passer dans les autres pores voisins, qu'ils ne manquent iamais d'y couler, & d'acheuer ainsi de former la premiere espee, & de récueiller par ce moyen nostre premiere passion.

Je diray de plus, que quand il n'y auroit que quelques-vns des pores qui ont formé la premie-

re espece qui s'ouvroient , & que les autres demeureroyent fermez , neanmoins si l'objet qui l'a formée a fait vne forte impression, soit tout d'un coup, ou par plusieurs reprises, les Esprits qui ont souuent passé par ces pores , & ensuite coulé dans les nerfs de la sixiesme conjugaison, de la maniere qu'il est necessaire pour exciter l'Amour ou la haine, ont rendu ces chemins-là si faciles , que c'est assez qu'ils entrent dans quelques-uns de ces pores, pour descendre dans les memes nerfs , de la mesme façon que la premiere-fois.

Or ce qui fait que nous ne nous apercevons pas du rapport & de la ressemblance que ces objets pour qui nous avons de l'inclination ou de l'aersion ont avec ceux que nous avons les premiers aimez ou haïs, vient de ce que les premieres passions, dont ces secondes tirent leur origine, ont esté extrêmement confuses, comme étant les premieres de nostre enfance, ou du moins n'ayant esté accompagnées d'aucune reflexion; & qu'elles ont esté de celles dont nous avons aimé ou haï l'objet, sans en examiner les raisons, & sans prendre garde à ce qu'il auoit d'aymable ou d'odieux; C'est pourquoy les secondes participent aussi à l'obscurité & à la confusion des premieres, & nous obligent souuent de dire avec le Poëte :

*Non amo te, Labidi, nec possum dicere quare;*

*Hoc tantum possum dicere, non amo te.*

Voicy

Voicy ce que Monsieur Descartes en dit dans la 36. Lettre du premier Volume qu'il adresse à Monsieur Chanut. La cause qui nous incite souuent à aymer vne personne plustost qu'une autre, auant que nous en connoissions le merite, consiste dans la disposition des parties de nostre cerueau, soit que cette disposition ait esté mise en luy par les objets des sens, soit par quelque autre cause; Car les objets qui touchent nos sens, meuuent par l'entremise des nerfs quelques parties de nostre cerueau, & y font comme certains plis; qui se défont lors que l'objet cesse d'agir; Mais la partie où ils ont esté, demeure par apres disposée a estre pliée de rechef de la mesme façon, par vn autre objet qui ressemble en quelque chose au precedent, encore qu'il ne luy ressemble pas en tout. Par exemple, lors que j'estois enfant; j'aymois vne fille de mon âge, qui estoit vn peu louche; au moyen dequoy l'impression qui se faisoit par la veüe dans mon cerueau, quand ie regardois ses yeux égarrez, se joignoit tellement à celle qui s'y faisoit aussi pour émouuoir en moy la passion d'amour, que long temps apres en voyant des personnes louches, ie me sentoie plus enclin à les aymer, qu'à en aymer d'autres, pour cela seul qu'elles auoient ce defect, & ie ne scauois pas neanmoins que ce fust pour cela; Au contraire, depuis que i'y ay fait reflexion, &

„ que j'ay reconnu que c'estoit vn defect, ie n'en  
 „ ay plus esté émeu. Et ainsi, lors que nous som-  
 „ mes portez à aymer quelqu'un sans que nous  
 „ en sçachions la cause, nous pouvons croire  
 „ que cela vient de ce qu'il y a quelque chose en  
 „ luy de semblable à ce qui a esté dans vn autre  
 „ objet que nous auons aymé auparauant, encore  
 „ que nous ne sçachions pas ce que c'est.

Voila, à mon auis, la cause la plus veritable  
 qu'on puisse apporter de ces sortes d'auersions &  
 inclinations naturelles ; Et il me semble qu'on  
 ne doit pas nous preferer ceux qui ayment mieux  
 recourir à la Sympathie ou à l'Antipatie, qui  
 sont des termes obscurs qui ne signifient rien, &  
 qui ne sont bons qu'à déguiser nostre ignorance  
 sous le masque de quelques mots empoulez, sui-  
 uant le stile ordinaire de la Philosophie Peripa-  
 teticienne.

On peut me demander icy si l'inclination se-  
 crette que nous ressentons quelquefois à fauoriser  
 plustost vn joueur qu'un autre, encore qu'ils nous  
 soient tous deux également inconnus, vient tou-  
 jours des vestiges de nos inclinations, & du rapport  
 qu'ils ont avec les premiers objets de nos passions.  
 Je répons, qu'elle en procede assez souuent, mais  
 non pastouliours ; comme quand cette inclination  
 ne dure pas dauantage que leur jeu ; Car pour  
 lors la raison de cette pente legere que nous res-  
 sentons, peut venir de ce que nostre Volonté  
 n'aymant pas à estre indéterminée, & trou-



uant vne occasion de prendre party, bien que l'Esprit ne voye aucune raison évidenté qui le porte plustost d'un costé que d'autre, se laisse alors emporter vers l'objet qui frappe le plus doucement le cerueau, selon la disposition presente où il est.

Au reste, bien que ie ne me sois proposé pour but de parler que des causes de nos secretes inclinations qui se trouuent dans le Corps; le diray pourtant icy en passant, qu'il y en a aussi qui dépendent des connoissances de l'Esprit, comme sont les bonnes qualités que nous connoissons dans la personne pour qui nous auons quelque bonne volonté, principalement si nous considerons qu'elles nous peuuent estre communiquées par son moyen, ou autrement, sans qu'elle cesse pour cela de les posséder; Car comme nous venons à l'estimer, à cause qu'elle les possède, voyant d'ailleurs qu'elle nous peut aider à les acquérir, nous nous ioignons insensiblement de volonté à cette personne, & nous nous sentons portez à l'aymer.

La difference de ces deux sortes d'inclinations est fort grande: Car de l'une, la cause en est obscure & difficile à découurir, sçauoir celle dont la cause est dans le Corps; Mais pour celle dont la cause est dans l'Esprit, elle est claire & facile à connoistre; puis qu'elle nous decouure le sujet qui excite nostre passion; Elle ne peut mesme gueres souuent manquer d'estre reciproque, lors que celuy pour qui nous auons de l'inclination sçait l'estime &

l'Amour que nous auons pour luy, & le desir que nous auons de l'imiter.

---

*De la partie Superieure, & Inferieure de  
l'Âme; ou l'Esprit de l'Homme.*

CHAP. XXIII.

C'EST vne chose admirable, que la mesme vnion qui fait que l'Esprit & le Corps semblent n'estre qu'une mesme chose, diuise & separe, pour ainsi dire, l'Esprit de l'Homme en deux patties, & fait, que bien que de sa nature il n'en ait aucune, & soit indiuisible, à cause qu'estant seulement vne chose qui pense, il n'est pas capable d'extension ny de diuision; Neanmoins, parce qu'il est joint à vn Corps, & qu'il se trouue en luy deux sortes de pensées, on a aussi imaginé en luy deux differentes parties, l'une qu'on nomme Superieure, & l'autre Inferieure. Et de vray, tout ainsi qu'il y a plusieurs diuers mouuemens dans nostre Corps, quelques-vns desquels ne sont pas aperceus de l'Âme, & sur qui nostre Volonté n'a aucun empire, comme sont les mouuemens du cœur, du chyle, du sang, & plusieurs autres; Et qu'il y en a d'autres dont l'Âme s'aperçoit, & qu'elle a le pouuoir d'exciter, comme sont les mouuemens de nos membres; De mesme aussi il y a dans nostre Esprit

diverses sortes de pensées, quelques-unes desquelles ne dépendent pas directement de nostre Ame, mais de l'union qu'elle a avec le Corps, comme sont toutes les perceptions des Sens, & des Passions; & d'autres qui en dépendent, comme sont toutes les perceptions de nos Volontez, lors que nous nous appliquons volontairement à penser à quelque chose; principalement si cette chose est au dessus des Sens & de l'Imagination.

Or ce sont ces premières pensées, avec les jugemens & les mouvemens de nostre Volonté qui les accompagnent, qu'on attribue à la partie Inferieure de l'Ame; Les autres appartiennent à cette plus haute partie qu'on a toujours regardée comme la maîtresse de l'autre, & comme celle à laquelle celle-là doit être d'autant plus soumise, que toutes ses connoissances (& tous les jugemens & les appetits qui les suivent) sont obscures & confuses, comme dépendant du mélange de l'Esprit & du Corps; Là où toutes celles de la partie Superieure, & toutes les determinations de la Volonté qui en dépendent, sont claires & évidentes, comme ne venant que de l'Esprit, & des Notions naturelles qui sont en luy.

Ces deux parties ne sont pourtant que la même Ame, ou le même Esprit, dans lequel les unes & les autres de ces pensées sont reçues, & qui les aperçoit par une même faculté; Les unes obscurément & dépendamment des mouvemens

de son Corps, & les autres plus clairement, parce qu'elles procedent de luy-mesme. Ce n'est aussi en luy que la mesme Volonté, qui s'appelle Appetit sensitif, quand elle est poussée par les jugemens qui se forment en consequence des perceptions des Sens; & qui se nomme Appetit raisonnable, quand ce sont les jugemens que l'Esprit forme sur ses propres Idées, indépendamment des pensées confuses des Sens, qui causent ses Inclinations.

Et il n'est pas plus difficile de comprendre comment le mesme Appetit peut estre poussé presqu'en mesme temps à desirer deux choses opposées, en suite de deux jugemens differens, fondés sur deux diuerses perceptions; que de concevoir que le mesme Corps qui tend en bas, parce qu'il est pesant, peut tendre aussi en mesme temps en haut, parce qu'il y est poussé. Mais comme il est impossible qu'un Corps aille en mesme temps de deux diuers costez, la Volonté ne peut pas non plus dans le mesme moment vouloir deux choses opposées.

Ce qui a donné occasion de prendre ces deux differentes pentes de la Volonté pour deux differents Appétits, est, qu'elles sont assez souvent opposées l'une à l'autre; à cause que le dessein que l'Esprit forme sur ses propres connoissances, ne s'accorde pas tousiours avec les pensées que luy donne la disposition de son Corps; laquelle l'oblige souvent à vouloir une

chose , pendant que sa raison luy en fait souhaiter vne autre.

Or dautant que toutes nos perceptions , tant celles qui dépendent de la volonté , que celles qui n'en dépendent point , contiennent toutes quelque chose de clair , qui incite l'Ame à aimer ou à haïr l'objet qui luy est present , selon qu'elle le Iuge conuenable ou nuisible ; S'il arriue qu'ensuite de la perception de nos sens , & du Iugement qu'elle a fait , qui ne manquent point de la pousser à la recherche ou à la fuitte de l'objet qu'elle enuise , nous nous ressouuenions d'en auoir formé cy-deuant , ou que nous en formions alors vn Iugement contraire , sur d'autres connoissances , l'Ame tasche de destourner la glande de dessus cet objet qui émeut sa volonté , en s'apliquant à considerer successiuelement diuerses choses. Mais quand l'impression que le premier objet a faite est si forte , que la glande reprend sa premiere forme , si-tost que l'Esprit suspend son application , ou que la chose qu'elle considere n'a pas assez de force pour la retenir ; ou s'il arriue que le cours des esprits animaux qui sortent des arteres voisines ramene la glande , & luy fasse reprendre sa premiere disposition ; pour lors l'Ame se sent portée tour à tour à desirer tantost vne chose & tantost vne autre , selon les diuers mouuemens que sa volonté , ou l'action des objets , ou la disposition de son Corps , donnent à la glande. Et c'est en cela que

consistent les combats qu'on a coustume d'imaginer entre la partie superieure & inferieure de l'Ame ; Non pas que l'Ame puisse vouloir en mesme temps deux choses contraires , n'y que la glande puisse pancher dans le mesme instant vers deux costez oposez ; mais l'effort que font les Esprits poussant la glande d'un costé , & celuy que fait l'Ame par sa volonté la repoussant de l'autre , cela fait que l'Ame se sent poussée presqu'en mesme temps à vouloir , & ne vouloir pas vne mesme chose.

La cause de ces combats vient de l'vnion de l'Esprit & du Corps , & des articles de leur alliance ; En consequence desquels le Corps oblige l'Esprit à estre attentif à l'objet qui agit fortement sur luy , lors mesme qu'il voudroit bien s'en detourner , & penser à vne autre chose. Mais bien que l'Ame n'ait presque aucune pensée , qui ait esté excitée par quelque objet des sens , qui ne l'émeue , & qui ne luy donne quelque pente & quelque inclination ; Cette inclination neanmoins & cette pente ne seroit pas fort considerable , si elle pouuoit quand il luy plaist detourner son attention de cet objet ; ou si l'ayant detournée , & ayant par là changé l'estat de la glande , il ne se rencontroit rien , soit dedans , soit dehors le Corps , qui pust ramener la glande , & luy faire reprendre la disposition qu'elle auoit quittée.

L'opposition de ces deux parties se remarque  
princi-

principalement dans nos passions. Et quant aux perceptions des Sens que nous raportons aux objets de dehors, nous en sommes assez les Maîtres; Car bien que nous ne puissions pas les exciter en l'absence des objets, ny les empêcher en leur présence; nous pouvons au moins presque toujours ouvrir ou fermer nos Sens, & nous aprocher ou nous éloigner des objets extérieurs. Et ainsi il arrive rarement que nous ne soyons pas en partie cause des actions des objets & des perceptions de nos Sens; Ou s'il arrive que les vñes & les autres se fassent sans que nous y consentions, nous pouvons pour l'ordinaire y remédier quand nous voulons, & nous empêcher de les souffrir. Il n'en est pas de même des perceptions que nous raportons à nostre Corps, ny de celles qui dépendent des vestiges de la Mémoire, dont nous ne sommes presque jamais les Maîtres: Car nous ne pouvons pas quitter nostre Corps, ny effacer les vestiges de la Mémoire, quand nous voulons.

Cette opposition est bien plus considérable dans les passions que dans toutes les autres perceptions & mouvemens de l'Ame, pour deux raisons; La première, parce qu'il n'y a point de pensées qui inclinent l'Ame si fortement à consentir à quoy que ce soit, que sont les passions à consentir aux mouvemens auxquels elles disposent & préparent le Corps; Et la seconde, parce que les passions étant entretenues & fomentées par la dis-

position qui se trouue dans le cœur , dans le sang , & dans les Esprits , si cette disposition est vn peu forte , quand mesme l'Ame auroit le pouuoir de changer quand elle voudroit le mouuement des Esprits , & le panchement de la glande , toutesfois à moins qu'elle ne perseuere longtemps dans cette volonté ( ce qui est tres-difficile à cause que le Corps l'oblige d'estre attentiuë à vne autre chose ) les Esprits qui viennent de nouueau du cœur , ramenant sans cesse la glande vers le mesme costé , renouellent en elle à tous momens la mesme passion , & font ainsi qu'elle deuient ordinairement la Maistresse.

Tout ce que peut faire l'Ame dans cette rencontre , c'est de ne pas consentir à ses effets , & d'arrester autant qu'elle peut les mouuemens du Corps qui l'accompagnent ; Et les Ames qui peuuent le plus aisément vaincre leurs passions , & retenir ces mouuemens , sont sans doute les plus fortes. Or cette force ne s'acquiert pas en voulant simplement mouuoir les Esprits d'vn autre costé que celui où les pousse la passion ; ( car nous sçauons bien que cela seroit inutile ) mais en s'apliquant à détourner autant que l'on peut son imagination , de la consideration de l'objet de sa passion , pour la porter à regarder ce qui la peut détruire , en considerant ce qu'il y a veritablement de bon ou de mauuais à nostre égard dans cet objet ; parce qu'il n'y a rien qui soit plus capable de maintenir la Volonté ferme , que



la connoissance de la verité ; C'est pourquoy nous devons principalement tascher d'acquiescer de veritables connoissances, lors que nous sommes sans émotion ; afin que les jugemens que nous ferons alors sur des perceptions évidentes, nous munissent contre les troubles confus des passions.

*De la Volupté, & de la Douleur.*

CHAP. XXIV.

**E**NTRE toutes les pensées & les sentimens qui naissent dans l'Esprit à l'occasion du Corps, il n'y en a point qui luy donnent plus de peine, ny qui obligent plus souvent la partie Superieure de céder à l'Inferieure ; que ceux de la Volupté & de la Douleur ; C'est pourquoy si nous désirons conserver l'empire de l'Esprit sur le Corps, nous devons exactement considerer la nature de l'une & de l'autre ; afin de sçavoir iusques à quel point nostre Esprit doit se laisser aller aux choses à quoy elles l'incitent.

La Volupté & la Douleur ; comme la plus part des autres pensées de l'Ame, sont de deux sortes ; l'une sensuelle, qui dépend du Corps ; & qui en fait son principal objet ; & l'autre intellectuelle. l'appelle Volupté & Douleur intellectuelle, cette émotion triste ou agreable de

l'Ame qui naist d'une connoissance claire & distincte du bien ou du mal que l'on ressent, soit qu'il soit Corporel ou Spirituel. La raison de cette distinction paroistra manifestement, si l'on considere que la Volupté ou la Douleur sensuelle peut estre sans l'intellectuelle; Car non seulement on a de la douleur quand on nous coupe quelque membre; mais encore on ressent de la tristesse quand on se voit priué de quelque organe necessaire à la vie; Et bien que la douleur cesse souvent après l'action du couteau qui nous a emporté vn membre, la tristesse ne laisse pas de persueuer; Ce qui fait voir que ce sont deux choses differentes. Comme aussi quelque-fois la douleur se peut rencontrer sans la tristesse, & mesme avec la joye, quand on considere la perte de ce membre comme vn moyen assuré pour acquerir vn plus grand bien. Il en est de mesme de la Volupté sensuelle, elle peut quelque-fois se rencontrer sans la joye, & mesme avec la tristesse; Par exemple, celuy qui violeroit par force vne honneste femme, pourroit exciter en elle le chatouillement qui produit la Volupté Corporelle; Mais cette Femme ne laisseroit pas d'estre accablée de tristesse, en considerant la violence qu'on luy feroit, comme vn tres-grand malheur. Cela fait voir éuidemment la diuersité des deux sortes de Volupté & de Douleur que j'ay alleguées.

Elles conuiennent pourtant ensemble, en ce que toute volupté, soit Sensuelle soit Intelle-

*Etuelle, est vne émotion agreable de l'Ame, dans laquelle consiste la jouissance du bien qui est excité en elle par tout ce qui l'oblige à se considerer comme possédant quelque bien qui luy appartient : Comme aussi la douleur en general est vne langueur desagreable, dans laquelle consiste l'incommodité que l'Ame reçoit du mal ou du defect qui luy vient de tout ce qui peut l'obliger à se regarder comme priuée de quelque bien qui luy est propre. Ces deux deffinitions ne different point de celles que Monsieur Descartes a données de la Ioye & de la Tristesse, sinon qu'elles sont plus estenduës ; à cause que nous considerons icy la Volupté & la Douleur en general, auquel sens la Ioye & la Tristesse ne leur sont pas oposées.*

Pour mieux connoistre l'une & l'autre il les faut diuiser en trois degrez ; Le premier n'est presque rien autre chose qu'un sentiment fâcheux ou agreable ; Le second est la passion de la Ioye & de la Tristesse ; Et le troisieme est vne émotion de l'Ame, toute spirituelle, qui n'a bien souvent aucun commerce avec le Corps. J'ay dit que le premier degré n'estoit presque rien autre chose qu'un sentiment fâcheux ou agreable ; Car en effet le premier degré de la Volupté n'est autre chose, sinon un chatouillement ou un sentiment agreable, qui consiste en ce que les objets des sens excitent quelque mouuement dans les nerfs, qui seroit capable de leur nuire, s'ils n'auoient pas assez de force pour luy resister, ou que le Corps

ne fust pas bien disposé ; Ce qui fait vne impression dans le cerueau , laquelle est instituée de la nature pour tesmoigner à l'Ame cette force & cette bonne disposition de son Corps. Et le premier degré de la douleur qu'est-ce autre chose, sinon vn sentiment fâcheux ; qui vient toujours de quelque action si violente, qu'elle offense les nerfs, & est quelquefois capable de les rompre ; Ce qui fait aussi vne impression dans le cerueau, laquelle est instituée de la Nature pour signifier à l'Ame le dommage que reçoit le Corps par cette action, & sa foiblesse en ce qu'il n'a pû luy resister. Et parce que ces impressions qui se font dans le cerueau, luy représentent ce qui se passe dans le Corps, comme vn bien ou vn mal qui luy appartient en tant qu'elle est vnie au Corps, cela excite aussi ordinairement en elle la passion de la Joye ou de la Tristesse. J'ay appellé ce premier degré de Volupté & de Douleur vn sentiment, parce que ce nom appartient à toutes les pensées confuses qui naissent dans l'Esprit à l'occasion du Corps. Je raporte à ce degré le plaisir qu'on prend quelquefois à entreprendre des choses difficiles ; parce qu'on ne le feroit iamais, si l'on ne se croyoit assez fort pour surmonter les difficultez qu'on se propose ; Et c'est cette difficulté qui fait qu'on y prend plaisir ; à cause qu'elle rend témoignage de l'adresse du Corps, & de la grandeur du courage. C'est pour la mesme raison que les

vieillards sont bien aises de raconter les perils qu'ils ont eûitez, & les maux qu'ils ont soufferts; à cause que c'est vn témoignage qu'ils ont deû estre assez forts pour subsister, malgré toutes les difficultez qui se sont présentées. C'est aussi pour cela que l'on prend plaisir à voir représenter des actions tragiques sur vn theatre, ou à lire quelques auantures estranges; Parce que les passions qui s'excitent en nous tour à tour, charoüillent l'Ame, pour ainsi dire, & la resjouyssent, luy faisant voir qu'elle est assez forte pour resister à toutes leurs Emotions.

Le second degré de la Volupté est la passion de la Ioye; On la deffinit *une émotion agreable de l'Ame, dans laquelle consiste la jouissance qu'elle a du bien que les impressions du cerueau luy representent comme sien*; Et au contraire la passion de la Douleur ou de la Tristesse est *une certaine langueur desagreable dans laquelle consiste l'incommodité que l'Ame reçoit du mal ou du defaut que les impressions du cerueau luy representent comme luy appartenans*. Ces deux passions appartiennent encore à cette sorte de Volupté que nous auons appellée Corporelle; dautant qu'elles sont accompagnées de ces pensées confuses qui tirent leur origine de l'vnion du Corps & de l'Esprit. L'une & l'autre naissent de l'opinion qu'on a de posseder quelque bien, ou d'auoir quelque mal. Et bien que pour l'ordinaire la cause en soit assez manifeste, comme il se rencontre lors que quelque chose sert

ou nuit manifestement à nostre Corps ; ou bien quand la Joye ou la Tristesse intellectuelle excitent en nous les mesmes passions ; néanmoins il arriue assez-souuent que nous nous sentons gais ou tristes, sans pouuoir dire pourquoy, comme quand nostre Corps est bien ou mal disposé, sans que nous y prenions garde ; Ce qui se fait lors que ce bien ou ce mal font leurs impressions dans le cerueau sans l'entremise de l'Ame ; Car lors que tout le Corps est suffisamment plein d'Esprits, & partant aussi capable qu'il puisse estre d'exercer toutes ses fonctions, ou lors que la disposition du cerueau est telle, que les esprits animaux coulent plus aisément dans les nerfs qui seruent à dilater le cœur, que dans les autres ; ( ce qui excite la passion de la joye, ) ou enfin lors que le bel air agite & chatouille luy-mesme nos nerfs, on peut dire que nous nous trouuons gais, sans sçauoir précisément pourquoy. Et au contraire aussi, nous nous sentons quelque-fois tristes, lorsque nostre Corps est indisposé, encore que nous ne sçachions pas qu'il le soit.

Le troisiéme degré de la Volupté ou de la Douleur est celuy qui appartient à la Joye & à la Tristesse intellectuelle, lequel ne differe du second, qu'en ce que l'émotion de l'Ame en quoy il consiste, n'est excitée en elle que par l'action de l'Entendement pur, qui luy represente quelque bien, ou quelque mal, comme luy appartenant.

nant. Telle est la satisfaction qu'on ressent d'une bonne action, ou le déplaisir qu'on a d'avoir manqué à son devoir. Mais quoy que souvent les biens ou les maux, qui produisent la Joye ou la Tristesse intellectuelle, n'appartiennent point au Corps, il arrive pourtant fort rarement que la Joye intellectuelle ne soit pas suivie de celle qui est une passion; A cause que l'étroite union qui est entre l'Ame & le Corps nous a tellement accoustumés à nous servir de nostre Imagination, que si tost que nostre Entendement s'aperçoit que nous possédons quelque bien, encore que ce bien puisse être si différent de tout ce qui appartient au Corps, qu'il ne soit point du tout imaginable, l'Imagination ne laisse pas de faire incontinent quelque impression dans le cerveau, de laquelle suit le mouvement des Esprits, qui excite la passion de la Joye.

Que si après cela nous voulons sçavoir, lequel de ces trois degrez de Volupté touche l'Ame le plus agreablement, il n'y a point de doute que celui qui appartient à la Joye intellectuelle l'emporte sur les deux autres; Premièrement, parce que tous les biens du Corps ne nous peuvent jamais si bien appartenir, que ceux que l'Entendement nous fait connoître être de l'apanage de l'Esprit, à cause qu'il n'y a que ceux-là qui ne nous puissent être ostés; Secondement, parce que ce ne sont point nos Sens que nous regardons dans la possession de ces biens, mais

nous mesmes , entant que nous nous considérons dans nostre meilleure partie ; & parce que c'est nous qui en sommes les Auteurs ; Et enfin parce qu'il est impossible que les perceptions des Sens & de l'Imagination , qui sont obscures & confuses , puissent engendrer en nous vne aussi forte persuasion de posséder quelque bien , ny par consequent nous donner autant de loye , que celles de l'Entendement , qui nous font connoître clairement & distinctement la grandeur du bien que nous possédons , & qui nous en assurent en mesme temps la iouissance. Aussi ie ne doute point que ceux qui ont gousté ces trois sortes de Voluptés , ne iugent que la satisfaction interieure que nous ressentons quand nous auons fait quelque bien , ne soit la plus douce de toutes nos joyes ; & que le remors ou le repentir d'une mauuaise action ne soit la plus aigre de toutes nos douleurs.

Je ne serois pourtant pas d'avis qu'on rejetast pour cela toutes les autres Voluptez , ny qu'on les poursuiuist aussi avec trop d'avidité ; mais ie croy qu'on peut iouir de toutes , quand elles ne blessent point la conscience , & ne s'oposent point à la raison ; quand elles ne détruisent point la santé ; & qu'elles ne nous détournent point de nos fonctions spirituelles ; Ma raison est , que pendant cette vie l'Homme ne se doit pas considérer comme vn pur Esprit , mais comme vne substance composée d'Esprit & de Corps ,



duquel l'Esprit dépend en la plus-part de ses fonctions ; C'est pourquoy i'estime que nous pouvons luy accorder tout ce qui peut raisonnablement entretenir sa bonne disposition, comme nous devons luy refuser tout ce qui la peut corrompre

*De l'Estat de l'Ame apres la Mort.*

C H A P. XXV.

**I**'AY tasché iusques icy de faire connoistre la Nature de l'Esprit de l'Homme. Premièrement en luy'-mesme , entant qu'il est vne chose qui pense , & en suite par rapport au Corps ; entant qu'il luy est vny ; l'ay aussi tasché d'expliquer en quoy consiste cette vnion , & quelles sont toutes les diuerses pensées de l'Esprit ; qui en tirent leur origine ; Et bien que i'aye traité toutes ces choses assez succinctement , i'estime néanmoins qu'il y a peu de questions qu'on puisse faire sur cette matiere , qu'on ne puisse résoudre tres-facilement par les maximes que i'ay établies ; qui sont si évidentes , & suivent si clairement des premieres veritez que Monsieur Descartes a démontrées , que quand ie ne pourrois pas les faire voir toutes dans les Liures qu'il a laissés , il n'y auroit pourtant pas lieu de douter que ce ne fussent des consequences tirées de

EE c ij.

ses Principes. C'est pourquoy il ne me reste plus rien autre chose à faire, sinon de faire voir ce que nous pouuons découurir par la seule lumiere naturelle, sans l'aide de la Foy ( Car tout ce que j'ay dit dans ce Traitté ne dépend point des choses qu'elle nous a reuelées ) de l'estat de nostre Ame apres cette vie ; Et de quelle maniere nous deuons conduire les perceptions de nostre Entendement & les déterminations de nostre Volonté pendant celle-cy, pour estre aussi heureux que nous sommes capables de l'estre en ce monde.

Je sçay tres-bon gré à Monsieur Descartes, d'en auoir écrit de la sorte à Madame la Princesse Elisabeth, dans la 9. Lettre du premier » Volume. Pour ce qui est, dit-il, de l'estat de » l'Ame apres cette vie, j'en ay bien moins de » connoissance que Monsieur d'Igby ; Car laissant à part ce que la Foy nous en enseigne, ie » confesse que par la seule raison naturelle nous » pouuons bien faire beaucoup de conjectures » à nostre auantage, & auoir de belles esperances, mais non point aucune assurance. Dont la raison est, que la condition de l'Ame apres cette vie, dépend de la libre Volonté de Dieu, aussi bien que la maniere de son Vnion avec le Corps pendant celle-cy. C'est pourquoy, comme nous ne sçaurions auoir maintenant aucune experience de la maniere dont elle exercera alors ses fonctions, nous n'en pouuons aussi détermi-

ner que fort peu de choses , sans beaucoup de temerité.

Ce qui trompe icy beaucoup de monde , c'est qu'il y en a qui se persuadent que l'Ame apres cette vie possedera toutes les perfections qui ne repugnent point à sa Nature ; comme seroit l'exacte connoissance de toutes les choses Corporelles, la puissance de mouvoir les Corps, & plusieurs autres semblables , dont elle ne sera peut-estre point alors auantagée , ou du moins avec toute la perfection & l'estenduë qu'ils s'imaginent , & dont nous n'auons aucune certitude.

C'est pourquoy , pòur marcher seurement dans ces obscuritez , nous deuons seulement attribuer à l'Ame dans l'autre vie, toutes les choses qui suiuent necessairement de son essence , quand on la regarde toute seule , comme vne chose qui pense , & non pas luy attribuer tout ce dont elle pourroit estre capable , si telle estoit la Volonté de son Createur ; Et nous n'en pouuons rien déterminer dauantage , à moins de presupposer le decret de Dieu, ce qu'il ne nous est pas loisible de faire dans vn Traitté purement Philosophique , où nous deuons nous abstenir de parler des choses qui ne nous sont connuës que par la reuelation Diuine.

Suiuant cette regle ie trouue premierement que nostre Ame sera immortelle , c'est à dire, qu'elle ne perira point , & ne sera point détruite par la destruction du Corps, mais qu'elle con-

tinuëra tousiours d'estre , & par consequent de penser ; Car l'Ame & le Corps estant deux substances reellement distinctes. ( ainsi que i'ay prouué auparauant ) il s'ensuit necessairement que la destruction de l'une ne doit point emporter la destruction de l'autre ; & comme sa Nature est de penser , elle pensera tousiours.

Secondement, nostre Ame n'estant plus alors vnice au Corps, elle n'aura plus de sentiment , de Memoire, ny d'imagination ; parce que ces manieres de penser en sont dependantes, & ne seruoient presque qu'à luy faire connoistre l'estat de son Corps, & en quoy les autres Corps, parmi lesquels le sien subsistoit, luy pouuoient estre vtils ou nuisibles, Mais elle conceura les choses par la seule action de l'Entendement, qui luy fournira des Idées beaucoup plus claires & plus distinctes, que toutes celles qu'elle a eües pendant cette vie par la voye des sens ; quoy qu'en les comparant entre elles, il y en ait peut-estre de plus obscures & de plus évidentes les vnes que les autres. C'est pourquoy dans cet estat l'Ame sera sans comparaison plus heureuse qu'elle n'est à present : Car bien qu'elle n'ait plus de Memoire Corporelle, & que ses premieres Idées ne luy reuiennent plus fortuitement en sa pensée, comme elles font maintenant, elle pourra en reuanche produire de nouveau les mesmes pensées qu'elle a eües en cette vie ; Et la facilité qu'elle aura alors à les produire, jointe à la clar-

té avec laquelle elle les conceura, la fera souven-  
 nir qu'elle a desja eu autrefois ces pensées ; &  
 mesme elle s'en souviendra plus distinctement  
 & plus facilement qu'elle ne fait à present, à cau-  
 se que l'action de sa Memoire Intellectuelle ne  
 pourra pas alors estre interrompuë, comme l'est  
 celle de sa Memoire Corporelle, par l'action des  
 objets extérieurs.

En troisieme lieu, nostre Ame estant alors se-  
 parée du Corps, & n'y ayant que l'Vnion qu'-  
 elle a avec luy, qui la rende susceptible de l'a-  
 ction des objets extérieurs, les Corps ne pou-  
 ront plus agir sur elle, & ainsi nostre Esprit sera  
 le maistre de ses pensées, & ne pensera plus qu'a  
 ce qu'il voudra penser ; Si ce n'est peut-estre  
 que son Createur, ou les autres Esprits avec les-  
 quels il pourra conuerfer, luy donnent quelque  
 nouvelle pensée. C'est pourquoy aucun Corps  
 ne l'inquietant plus, & ayant autant d'aplica-  
 tion qu'il en voudra apporter, il sera bien plus  
 attentif aux choses ; & conceuant les objets qui  
 luy seront presens plus clairement, il fera vn  
 progresz sans comparaison plus grand dans les  
 sciences : Car ses Idées, ou notions, n'ayant  
 rien de Corporel, mesme dès cette vie, il n'y  
 a pas de doute qu'il s'en pourra servir dans l'autre  
 avec bien plus de facilité & de netteté, parce  
 qu'elles ne seront plus jointes aux especes des  
 sens.

En quatrieme lieu, la Volonté, c'est à dire

la puissance de se déterminer de soy-mesme, accompagnera tousiours l'Esprit; sans qu'il luy arriue aucun changement, si ce n'est peut-estre, qu'estant deliurée de toutes les Emotions auxquelles elle estoit sujette à l'occasion du Corps, elle agira avec plus de liberté, & aura moins d'irresolution; Elle ne sera pas toutesfois exempte de faillir, parce que l'Entendement ne connoistra pas tout; Mais comme elle sera alors déhurée des passions, & des préjugez des sens, & de plus qu'elle sera maistresse de son attention, elle pourra plus facilement obtenir d'elle, de ne consentir qu'à ce qu'il y aura de clair dans sa connoissance, & ainsi s'empescher de faillir. Neanmoins quoy qu'elle soit libre de passion, elle ne laissera pas d'estre émeuë par le bien & le mal que l'Entendement luy représentera comme luy appartenant; Il est vray que ses Emotions ne pourront pas estre nommées des passions, parce qu'elles ne contiendront rien que l'Esprit ne conçoie fort clairement; Aussi l'Ame en cet estat ne sera capable que d'une Joye ou d'une douleur Intellectuelle, & non pas d'une Corporelle; si ce n'est que Dieu voulast vnir l'Ame de l'Homme à quelque autre Corps, & joindre tellement ses pensées aux mouuemens de ce Corps, qu'à proportion du plus ou du moins de violence de l'un, il resultast vn sentiment de douleur plus ou moins grande dans l'autre. Et de cette façon il seroit ce me semble assez facile de concevoir, comment

comment le feu peut brusser & tourmenter les Ames de ceux qui sont morts dans vn estat de peché ; Mais ce seroit passer les bornes que ie me suis prescrites.

En cinquiesme lieu , ie dis qu'il y a lieu de douter si l'Esprit separé retiendra le pouuoir qu'il a de mouuoir quelque Corps , parce que ce pouuoir n'est pas vne suite necessaire de l'essence de l'Esprit finy , & que sa volonté n'a en cela de pouuoir , qu'autant qu'il a pleu à son Createur de luy en accorder , c'est à dire , qu'autant qu'il a resolu d'employer sa vertu motrice selon la determination de sa volonté. Mais enfin comme il y va de la Gloire de Dieu que ses Ouurages soient connus , & qu'il n'y a point de Creature plus capable de les conoistre que les Esprits separez ; puisque nous experimentons que l'Esprit de l'Homme , dans l'estat de son vnion avec le Corps , a le pouuoir de remuer quelques-vnes de ses parties , nous pouuons nous flatter de cette esperance , que la Bonté du Createur luy laissera la liberté de ioindre ses pensées à tel Corps que bon luy semblera , & de la maniere qu'il luy plaira , pour le mouuoir & le connoistre. Et si cela estoit , il seroit sans doute dans le plus heureux estat où il puisse estre sans le secours d'vne grace surnaturelle. Car outre que nous auons desia veu les auantages qui luy viendront de cette separation , en considerant les empeschemens dont il sera déliuré , & la fa-

cilité avec laquelle il pourra exercer toutes ses fonctions spirituelles, il en tirera encore bien d'autres, si Dieu luy accorde le pouuoir de se joindre ainsi au Corps; Car premierement quel que soit le Corps auquel il se joindra, il le pourra porter tres-viste & tres-loin, en déterminant le cours du premier & du second élément qui seront autour du Corps auquel il se sera joint; De mesme qu'il détermine à present le cours des esprits animaux, en les enuoyant dans les muscles par la volonté qu'il a de mouuoir quelque membre; Ce qui luy fera connoistre tres-clairement la Nature particuliere de ce Corps, & celle de tous les autres qui l'environnent, & ainsi successiuement de tout l'Vniuers, en connoissant par ce moyen la maniere dont tous les autres Corps agiront sur luy, ou resisteront à son mouuement. Il est vray qu'il n'aura pas le sentiment des couleurs, des odeurs & des autres qualités sensibles; Mais neanmoins il les connoistra mieux que nous ne faisons à present; Dautant qu'il conceura tres-manifestement quelles sont les figures & les mouuemens capables d'exciter les especes auxquelles ces pensées confuses que nous apellons sentimens sont attachées, & qui en sont les veritables causes; Et il les connoistra, parce que, comme ie viens de dire, les Corps qui environnent celuy auquel il se fera vny, agiront dessus luy, ou resisteront à son action, selon la disposition



& la nature des vns & des autres. Il n'y aura plus meſme de qualitez occultes pour cét Eſprit: Car il pourra diuiſer les Corps les plus groſſiers; & ſeparer tellement leurs parties, qu'il vienne à connoiſtre l'arrangement & la diſpoſition qu'elles ont entr'elles. Il pourra encore connoiſtre par l'experience aydée de la raiſon, quelles ſont les perceptions & les penſées des autres Eſprits qui ne ſont pas ſeparez; Parce que, comme nous agiſſons bien plus ſouuent, conformément aux choſes auxquelles noſtre Corps eſt diſpoſé, que nous ne faiſons autrement, & ſachant à quoy les objets qui agiſſent ſur les Corps des Hommes diſpoſent leur Corps, il pourra apprendre à la longue quelles penſées de l'Ame ſont iointes aux eſpeces qui ſe tracent ſur la glande, & conjecturer (quand il verra qu'elles ſ'y formeront) quelles ſont nos penſées, nos deſſeins, & nos intentions, ſans que les mouuemens de noſtre Corps luy en donnent aucun témoignage.

Si l'Eſprit ſeparé auoit le pouuoir que ie diſ, il pourroit encore produire vne infinité d'effets ſurprenans, en arrangeant diuerſement les Corps les vns avec les autres, & leur donnant le mouuement & la figure qui ſeroit conuenable à ſes deſſeins; Il pourroit auſſi ſe joüer de nos Sens, & nous inciter à faire telle choſe qu'il luy plairoit, en mouuant nos Sens, nos Eſprits, ou la glande, de la maniere que feroient les objets

mesmes, & comme elle le doit estre pour auoir les pensées qu'il voudroit que nous eussions. Il pourroit encore nous parler, soit en agitant l'air de la façon qu'il le doit estre pour nous faire oïr les paroles qui exprimeroient ses pensées, soit en imprimant sur la glande l'espece de la chose qu'il voudroit nous faire entendre.

Deux Esprits separez qui auroient le pouuoir de se joindre ainsi à tel Corps qu'ils voudroient, pouroient aussi se parler, soit en attachant leurs pensées à certains signes extérieurs dont ils seroient conuenus, soit par la seule volonté de se communiquer leurs pensées; Non pas que cette volonté fuisse toute seule; Car ie ne vois point de liaison necessaire entre la volonté que l'un peut auoir de faire connoistre sa pensée à l'autre, & l'acte par lequel il la doit connoistre; Mais parce qu'il est ce me semble de la bonté & de la Sagesse du Createur, afin que deux Esprits puissent parler l'un à l'autre, d'auoir voulu qu'au mesme temps que l'un a dessein de faire connoistre sa pensée à l'autre, tout aussi-tost la pensée de celuy - cy prenne la forme de la pensée de l'autre, & luy represente ce qu'il veut qu'il connoisse. Mais comme j'ay desja dit, tous ces auantages sont fort incertains, & la lumiere Naturelle ne nous en découure rien avec assurance; Et bien loin de pretendre que nous puissions sçauoir quelle sera la grandeur & l'estendue du pouuoir que nous aurons de mouoir les Corps.

nous ne sçauons pas mēme si nous en aurons aucun sur eux, ny de quelle maniere les Esprits separez pourront conuerfer ensemble, parce que toutes ces choses n'appartiennent point à l'essence de l'Esprit ; & que sa volonté n'a de pouuoir au dehors, qu'autant qu'il a pleu à Dieu de luy en donner, c'est à dire, qu'autant qu'il a resolu de joindre sa volonté à la sienne: Car en Dieu vouloir & faire ne sont qu'une mēme chose. Neanmoins quand bien vn Esprit separé seroit priué de tous les auantages qui suivent du pouuoir de se joindre au Corps selon sa volonté, il ne laisseroit pas d'estre, sans comparaison, plus heureux qu'il n'est à présent ; sa pensée n'estant plus alors diuertie par les impressions des Sens & les troubles de l'Imagination ; ny sa volonté inquiétée & emportée par les fougues des passions.

*Quel est le Souuerain Bien de l'Homme,  
pendant cette vie.*

#### CHAP. XXVI.

C'EST avec beaucoup de raison que Senèque a dit que tous les Hommes souhaitent d'estre heureux ; mais qu'ils estoient presque tous aucugles, quand il s'agissoit de voir en quoy consistoit la Beatitude, & quels moyens

il falloit choisir pour y paruenir. En effet, quoy que tous les Hommes, & principalement les Philosophes Anciens, ne soient pas tous d'accord touchant la nature du Souuerain Bien, ils conuiennent pourtant tous en cela, qu'ils n'ont jamais rien fait, ny dit, ny pensé, que ce n'ait esté pour paruenir à ce Souuerain Bien, dont la possession seule les peut rendre heureux. Je ne croy pas mesme que les plus des-interressez de nos Anachorettes fassent difficulté d'auoüer, que s'ils ne sentoient pas vne extreme satisfaction à suiure la Vertu, ou s'ils n'attendoient aucun bonheur, & n'esperoient aucune recompense apres la mort, ils ne se resoudroient pas si facilement à se priuer, comme ils font, de plusieurs plaisirs innocens, dont ils pourroient jouir en cette vie. C'est pourquoy nous deuons aussi, ce me semble, employer la connoissance que nous auons de la nature de nostre Esprit, à rechercher quel est son Souuerain Bien, & voir de quelle maniere nous deuons vser de ses fonctions, pour viure les plus heureux que l'on puisse estre.

Bien qu'il y ait peu de difference entre le Souuerain Bien, la Beatitude, & la Derniere Fin de nos actions, ce n'est pourtant pas la mesme chose; D'autant que la Beatitude presupose le Souuerain Bien, n'estant autre chose que le contentement & la satisfaction d'Esprit qui resulte de la possession; & que la derniere fin de nos actions les comprend tous deux; le Souuerain

Bien estant comme le but auquel nous les deuons diriger, & la satisfaction d'Esprit estant comme l'attrait & le prix qui fait que nous le recherchons ; C'est pourquoy il n'y a que les Substances qui pensent qui puissent estre heureuses ; dautant qu'il n'y a qu'elles seules, qui soient capables de connoistre qu'elles possèdent quelque bien, & qui puissent se satisfaire dans sa possession. Mais comme on ne possède pas proprement ce qu'on ne tient que par emprunt, & qu'on peut perdre à tout moment ; Entre les Natures Intelligentes, il n'y a que Celle qui subsiste par elle-mesme, indépendamment de toute autre chose, qui soit véritablement Heureuse ; Aussi n'y a-t-il qu'elle seule qui possède le Souuerain Bien dans toute son estendue, & qui le possède necessairement sans le pouuoir iamais perdre, estant elle mesme le Souuerain Bien. Nous ne deuons pas néanmoins conclure que les autres Natures Intelligentes, qui sont dependantes de cette Premiere & Souueraine, soient incapables d'estre heureuses. Car outre la Beatitude à laquelle la Foy & les Graces surnaturelles nous peuuent faire paruenir, toute personne raisonnable ne sçauroit nier, que les seules forces de la nature ne nous puissent faire acquerir quelques biens, & nous deliurer de plusieurs maux, & ainsi nous mettre en possession d'une espèce de Beatitude Naturelle.

Pour sçauoir quelle est cette Beatitude, nous

considererons premierement que la Beatitude particuliere de chaque Nature Intelligente consiste dans la satisfaction interieure de son Esprit, causée par la connoissance qu'elle a de posseder le plus grand de tous les biens dont elle est naturellement capable. Je dis le plus grand de tous les biens, & non pas la possession de tous les biens, tant parce qu'il est impossible qu'un Homme puisse posseder tout à la fois toutes les perfections de l'Esprit, tous les avantages du Corps, & toutes les faueurs de la Fortune, toutes lesquelles choses peuuent croistre sans cesser; que parce que cette espece de beatitude n'est pres-que point à nostre usage.

Or le plus grand & le Souuerain de tous les Biens peut-estre consideré en luy-mesme, sans le rapporter à autrui, & alors il est évident que c'est Dieu qui est le Souuerain Bien; ou il peut-estre consideré par raport à chacun de nous, & alors ie ne vois pas qu'il y en puisse auoir d'autre que le bon usage de nostre libre arbitre. Car entre tous les biens, il n'y a que ceux que nous pouuons posseder par nous mesmes, sans le secours d'aucune autre Creature, qui nous puissent donner vne veritable satisfaction interieure, & nous rendre pleinement satisfaits. C'est pourquoy les biens de la Fortune, qui ne dépendent point absolument de nous; La santé du Corps & la connoissance de l'Esprit, qui sont tres-souuent hors de la puissance de l'Homme, ne peuuent pas  
passer

passer pour le plus grand de tous les biens dont il est capable. Il ne reste plus que nostre Volonté qui soit absolument à nous ; le bon usage de laquelle dependant de nous entierement , doit estre le plus grand bien que nous puissions posseder , & le seul qui puisse nous donner vne veritable satisfaction , & faire nostre Beatitude naturelle.

Il est aisé par ce moyen ; comme dit Monsieur Descartes, d'accorder Zenon avec Epicure touchant le Souuerain Bien de cette vie ; D'autant que c'est en effet dans le bon usage de la liberté que consistent toutes les vertus, dans lesquelles Zenon établissoit la Beatitude ; Et c'est de luy aussi que resulte la plus grande & la plus assurée volupté , dans laquelle Epicure faisoit consister le Souuerain Bien.

Comme le Libre Arbitre est la plus noble faculté de l'Ame , c'est aussi luy principalement qui fait que nous portons l'Image de Dieu , & que nous luy sommes semblables. Mais il est à remarquer que comme c'est par son bon usage que nous pouuons acquerir la Vertu, & nous rendre Heureux ; De mesme aussi, c'est par l'abus que nous en faisons que nous deuenons coupables, & que nous nous rendons malheureux.

Il est vray que les plaisirs des Sens paroissent plus grands que ceux de l'Esprit presque à tout le monde ; Mais c'est vne erreur dont nous nous

déliurerons aisément, si nous nous acoûtons à examiner la iuste valeur de tous les biens dont l'acquisition peut dépendre de nostre conduite, afin de sçauoir exactement combien chaque chose peut contribuer à nostre contentement; Et nous verrons que les plaisirs des Sens se présentent confusément à nostre Imagination paroissent pour l'ordinaire beaucoup plus grands qu'ils ne sont en effet, principalement auant qu'on les possède, & qu'on en iouïsse; puis, quand on a bien pris de la peine à les acquérir, la jouïssance nous en faisant connoître les défauts, nous apprend que nous ne les deuons pas beaucoup estimer, ny nous laisser surprendre à l'apparence & à l'eclat qui les enuironne. En effet n'auons nous pas plus de sujet de nous réjouir, lors que nostre Ame a esté assez forte pour résister à l'impetuosité de la colere, ou aux flatteries de l'Amour; que non pas lors que nous auons esté si lasches que d'assouuir nostre vengeance, & de contenter nostre passion.

Pour les biens de la Fortune ils ne sont pas capables de nous donner de veritables plaisirs, si ce n'est peut estre que nous les considérons comme des recompenses de nostre Vertu. Mais quand bien mesme ils en seroient la recompense, ils ne seroient pas suffisans pour cela de nous rendre Heureux, puisque nous n'en serions pas absolument les Maîtres, & qu'on pourroit nous les enleuer. Or la plenitude de nostre sa-



tisfaction, ou nostre Beatitude, ne dépend pas seulement de la grandeur du bien que nous possédons par nous mesmes, mais aussi de la certitude de cette possession ; C'est pourquoy tous les biens du Corps & de la Fortune ne sont pas à comparer avec le bon usage de nostre Libre-Arbitre, n'y ayant aucun bien qui soit si grand à nostre égard que son bon usage, ny de la possession duquel nous puissions estre si assurez.

L'on me dira, sans doute, que ce n'est pas assez de dire que nostre plus grand bien dans cette vie consiste dans le bon usage de nostre Libre-Arbitre, si ie n'ajoute aussi en quoy consiste ce bon usage. Mais ie ne voy pas qu'il soit possible d'en user mieux, que si l'on a tousiours vne ferme & constante resolution de faire exactement toutes les choses que l'on jugera estre les meilleures, & d'employer toutes les forces de son Esprit à les bien connoistre. Car toutes les facultez de nostre Esprit se reduisant à deux, l'une à apercevoir ce qui est vray & bon, & le distinguer de ce qui est faux & mauuais ; & l'autre à nous déterminer, c'est à dire, à donner nostre auen & consentement à ce que nous connoissons estre vray ou bon ; le pense qu'on doit estre satisfait de la premiere, lors qu'on a aporté tout le soin dont on est capable pour connoistre ce qui est le meilleur ; & qu'on doit estre content de la seconde, quand nostre choix a suiuy ponctuellement nostre connoissance, puisque nous

G G ij

n'auons point d'autre guide en cette vie. Or bien que nous puissions nous tromper en beaucoup de choses , & que ce que nous auons fuiuy puisse estre mauvais , nous sommes asseurez neanmoins d'auoir fait nostre deuoir , & nous deuons estre alors entierement satisfaits.

Cette Beatitude naturelle a deux ennemis principaux , le premier est l'ignorance , lorsque nous negligions d'apprendre les choses que nous deuons & pouuons sçauoir en qualité d'Hommes , suiuant le genre de vie dans lequel nous nous trouuons , ou que nous auons embrassé. Cette ignorance est non seulement criminelle , mais elle est mesme la mere de tous les vices ; Car tout ainsi que la Vertu considerée en general , n'est rien autre chose que cette ferme resolution & vigueur par laquelle on se porte à faire les choses qu'on juge estre bonnes , lors qu'on sçait des auoir autant examinées qu'on en est moralement capable ; Et bien que ce que l'on fait puisse estre materiellement mauvais , l'on sçait neanmoins qu'on fait son deuoir , & qu'on produit vn acte de Vertu , quand on a employé toute la diligence possible pour le bien connoistre ; dautant que nostre Esprit estant finy l'on n'est pas obligé de tout sçauoir ; De mesme nous rombons dans le vice , dés aussi-tost que cette fermeté dégenere en opiniastrété , ou molesse , par le peu de soin que nous auons pris de nous instruire. Et ceux qui agissent sans sçauoir si ce

qu'ils font est bon ou mauvais, & qui negligent de s'en enquerir, ne doiuent pas passer pour Hommes vertueux, quand bien ils produiroient des actes qui feroient materiellement de Vertu. Neanmoins toute sorte d'ignorance n'est pas vicieuse; Elle ne merite ce nom, que lorsque nous negligons d'apprendre les verités necessaires pour la conduite de nos actions, dans le genre de vie que nous professons.

L'autre ennemy de nostre Beatitude, c'est le Corps auquel l'Esprit est attaché; soit parce que ses maladies luy peuuent oster l'usage de la raison, & qu'il ne peut pas s'empescher de compatir à ses foiblesses, à cause qu'il ne fait qu'un tout avec luy; soit parce que nous sentôs que nos passîons nous portent souuent à faire des choses auxquelles nostre raison s'oppose; C'est pourquoy si nous voulons estre heureux, la liaison qui est entre l'Esprit & le Corps nous oblige de donner quelques-uns de nos soins à la conseruation de nostre Santé, & à garentir nostre Corps de Maladie; de peur que par ses infirmités il ne trouble nostre felicité, en nous ostant l'usage de la raison.

Mais nous deuons encore prendre plus de peine à surmonter nostre ignorance & vaincre nos passions, qu'à éuiter les Maladies; Car les Maladies, au lieu de s'oposer à nostre Beatitude, seruent souuent de matiere à nostre Vertu, en les supportant avec patience; & nous donnent ainsi lieu d'augmenter plustost que de diminuer la satisfac-

ction de nôtre Esprit; là où les passions, quand elles sont immodérées, & l'ignorance qui est vicieuse, la détruisent entierement. C'est pourquoy nous ne sçaurions mieux finir ce Traitté, qu'en tâchant de decouvrir la principale source de nos erreurs, afin de les éviter, & d'instruire nôtre Ignorance; & qu'en prescriuant des regles & des maximes pour vaincre & moderer nos passions; Car par ce moyen sçachant de quelle maniere nous devons conduire nôtre Entendement & nôtre Volonté, il ne dépendra plus, pour ainsi dire, que de nous, que nous ne possédions le plus grand bien dont nous soyons capables de jouir en cette vie, par les seules forces de nôtre Nature, pendant que les Maladies ne nous ostent point l'usage de la raison.

---

*De la principale source de nos Erreurs, & des  
moyens de les éviter.*

C H A P. XXVII.

**I**E pense qu'il est hors de doute que nous ne nous trompons iamais que quand nous iugeons des choses que nous ne connoissons pas bien; & ainsi que la principale source de nos Erreurs ne vient que de ce que nous estendons témérairement la puissance que nous auons de iuger, au delà des bornes de nôtre connoissance; Car si nous la

renfermions précisément dans ses limites, nous ne courrions jamais risque de nous tromper. C'est pourquoy ie m'estonne que Monsieur Gassendy, qui n'a pasignoré que nous prenons la Volonté, pour cette puissance que nous auons de nousdeterminer, de quelque maniere que nous le faisons, soit en iugeant, ou autrement; & que nous prenons l'Entendement pour la faculté de connoistre & d'apercevoir simplement vn objet, sans aucune affirmation ou negation, ait pû nier que la Volonté s'estende au delà de l'Entendement; Puisque nous experimentons tous les jours que nous estendons cette faculté au delà des bornes de l'autre, toutes les fois que nous jugeons de ce que nous ne connoissons pas

Il est vray neanmoins que pour bien iuger, c'est à dire pour ne point faillir en iugeant, il y a diuerfes regles à garder, selon les diuerfes rencentres, & la diuersité des choses dont nous auons à porter nostre iugement; Car où nous considerons les choses en elles mesmes pour en connoistre simplement la verité, ou nous les considerens par raport à la pratique & aux actions de nostre vie; Si nous les considerons en la premiere façon, on doit absolument s'empeschier d'en iuger quâd on ne les connoist pas bien, c'est à dire, quand l'objet que nous examinons est encore accompagné de quelque obscurité & confusion; Si nous les considerons en la seconde, il n'est pas necessaire d'y apporter vne aussi grande precaution; Car l'occa-

sion d'agir passeroit souuent, auant que nous nous fussions entierement déliurez de tous nos doutes; outre que bien souuent il n'est pas en nostre pouuoir d'en auoir vne entiere connoissance; C'est pourquoy, si l'affaire ne souffre point de delay, il suffit d'examiner la chose, autant qu'on en est alors capable; & l'on doit se determiner à suiure ce qui paroist le plus clair & le meilleur à l'Entendement; & ensuite nous deuons agir avec la mesme fermeté & resolution, que si la chose estoit tres asseurée, & que nous la conuissions par vne euidente demonstration.

Afin d'éclaircir cette matiere vn peu dauantage, considerons premierement comment nous deuons conduire nostre raison, lors que nous cherchons la verité seulement pour elle mesme; Et nous verrons par apres quelle regle nous deuons suiure, quand nous la voulons mettre en pratique.

Il me semble qu'un Homme qui veut sçauoir les choses autrement que par ouy-dire, & à qui l'experience ne permet pas de douter; que ses sens & les preiugez de son enfance ne luy ayent donné occasion de se tromper tres souuent; doit obseruer les regles suiuantcs pour ne plus tomber dans l'Erreur.

La premiere est, de rapeller vne fois en sa vie toutes les opinions à l'examen, principalement celles qui n'ont point de meilleur fondement que les pensées confuses des sens; Et pour lors rejetant

jettant toutes celles où l'on trouue la moindre apparence de doute, l'on découvrira que la premiere conclusion certaine, qui se presente à celuy qui cherche la verité par ordre, est celle-cy, *ie pense, donc ie suis*. Car bien qu'il soit aussi veritable, que si ie marche, ie suis; Neanmoins ie ne suis pas si assuré que ie marche, lors que ie croy marcher, que ie suis assuré que ie pense, lors que ie croy penser; Et ainsi cette seconde conclusion n'est pas si certaine que la premiere, *ie pense, donc ie suis*. Et mesme celle-cy, *tout ce que ie conçois, est ou n'est pas*, ne luy est pas comparable, ny anterieure; tant parce qu'elle est inutile, & qu'elle ne nous apprend l'existence d'aucune chose; que parce que ie ne suis pas si tost assuré de mon existence, que ie le suis de ma pensée, puisque ie ne la connois que par elle.

Après cela, pour estendre de plus en plus sa connoissance, l'on pourra remarquer qu'il n'y a point d'autre raison qui nous rende certains de la verité de cette proposition, *ie pense, donc ie suis*, que parce qu'elle paroist clairement & distinctement à nostre Esprit. D'où l'on tirera cette consequence, que l'on doit pareillement se tenir assuré de tout ce qu'on apperçoit clairement & distinctement.

C'est pourquoy la seconde regle que l'on doit suivre, c'est de s'abstenir de iuger, toutes les fois qu'on n'a pas des perceptions claires & distinctes; & de n'affirmer ou nier jamais aucune chose, qui.

HHh

ne réponde exactement à nostre connoissance, & à l'evidence de nostre perception.

Mais parce que beaucoup de gens se trompent, en pensant connoître ce qu'ils ne connoissent point; Afin qu'on puisse remarquer si l'on apperçoit quelque chose évidemment, ou si l'on se le persuade témérairement, il faut prendre garde soigneusement à cette troisieme regle, qui est d'estre attentif à la question que l'on examine, & voir si ce que l'on croit appercevoir évidemment, est vne suite nécessaire de ces premieres & infaillibles veritez, que l'on a trouuées par le nouuel examen que l'on a fait de toutes les anciennes opinions; Par exemple, si c'est vne suite de cette verité; Que celuy qui cherche la verité de cette sorte doit estre vne substance qui pense: ou de cét autre; Que la pensée n'enferme dans sa notion aucune estenduë; ou de celle-cy, Que toutes nos perceptions claires & distinctes sont veritables; Ou bien si ce sont des consequences des Idées primitiues que nous auons en nous; Et s'il se trouue que cela soit, pour lors on se peut asseurer qu'on aperçoit veritablement ce que l'on croit bien connoître. Mais au contraire lorsque la proposition qu'on examine s'opose à ces premieres notions, on la doit rejeter comme vn vain phantasmie qui n'a que l'apparence de la verité.

Au reste, comme nous n'auons que tres-peu de ces idées primitiues, il est tres-aisé de s'en



souuenir ; Car pour connoistre toutes les propriétés de l'Esprit, nous n'auons que la notion de la pensée ; Et pour toutes celles du Corps, nous n'en auons point d'autre que celle de l'estenduë, & ensuite celles de la figure & du mouuement ; Et pour la Nature Diuine, tout ce que nous en connoissons, sans l'aide de la Reuelation, est fondé sur cette grande & sublime Notion , d'vn Estre tres-parfait, d'où il suit qu'il est tres-simple, necessaire, infiny, tout connoissant, tout-puissant, la premiere & la principale Cause de tous les autres Estres.

Mais bien qu'il puisse arriuer que ces Idées ne nous découurent pas tous les Attributs ou toutes les Propriétés que Dieu possède , ny toutes celles qu'il a mises dans le Corps, ou dans l'Esprit ; Neanmoins, puisque nous conceuons clairement qu'vn mesme sujet simple ne sçauroit contenir en mesme temps des propriétés oposées, nous deuous estre certains qu'il n'en sçauroit posseder aucune , qui s'opose à celles que leurs Idées claires & distinctes nous découurent, ny qui puisse estre contraire à ces premieres veritez qu'on peut déduire de nostre principe inébranlable, *Je pense, donc ie suis.*

Et quand mesme il arriueroit que Dieu nous auroit reuelé quelque chose que nous n'en pourrions peut-estre pas déduire, & que nous ne verrions pas comment pouuoir accorder avec ces premieres veritez ; Nous deurions , à la verité,

croire tres-fermement ce qui nous auroit esté reuelé ; Car Dieu estant tres-veritable , ou plûtost la Verité mesme , tout ce qu'il luy plaît de nous reueler est incomparablement plus certain que tout le reste ; Mais nous ne deurions pas pour cela nier les verités que nous aurions decouuertes par les lumieres évidentes de nostre raison ; Dautant que la Puissance de Dieu estant Infinie , & la puissance que nous auons de connoistre estant tres-limitée , nous ne deurions pas trouuer estrange s'il auoit fait quelque chose que nous ne pussions comprendre , & qui surpassast la capacité de nostre Esprit ; Outre que Dieu n'estant point trompeur , comme il ne peut pas nous rien reueler qui ne soit vray , il ne peut pas aussi nous auoir donné vne Lumiere Naturelle qui tende à la fausseté , lorsque nous nous en seruons comme il faut , & que nos Ingemens répondent précisément à l'évidence de nos connoissances ; C'est pourquoy j'estime que dans cette rencontre il faudroit demeurer d'accord de ces deux sortes de Veritez , sans examiner trop curieusement comment elles pourroient s'accorder ensemble ; parce que ce seroit luy qui auroit reuelé l'une & l'autre , quoy que par des voyes differentes.

C'est donc par le raport , & par la conuenance que les secondes Verités ont avec les premieres , que nous sommes certains que nous aperceuons quelque chose clairement ; Mais nous le serons encore dauantage , si nous nous seruons de cette

Quatriesme regle, qui est de diuiser la difficulté que nous examinons, en autant de parties qu'elle le peut estre commodement, & qu'il est necessaire pour la mieux resoudre.

La cinquieme est, d'arranger les parties de cette diuision, de telle maniere que l'on commence par les plus simples & les plus aisées à connoistre; gardant en cela l'ordre de la Nature, s'il y en a, & y en mettant mesme vn à discretion, s'il n'y en a point.

Enfin, la derniere est, d'examiner toutes ces parties les vnes apres les autres, avec tant d'exactitude & d'attention, qu'on soit asseuré de n'en omettre aucune; prenant garde sur tout, si elles ne s'oposent point à ces premieres Veritez que nous auons decouuertes, & à ces Notions primitiues qui sont en nous.

Je sçay bien que ces regles meriteroient d'estre expliquées plus amplement & plus exactement; Mais outre que les bornes que ie me suis prescrites dans ce Traitté ne me le permettent pas, on les trouuera bien mieux déduites, qu'elles ne le pourroient iamais estre icy, dans cette admirable Logique (ou Art de penser) qu'un tres-Sçauant Homme de ce Siecle a mise au jour depuis quelques années.

Il n'est pas necessaire d'aporter tousiours vn examen si rigoureux, c'est à dire, de rechercher vne Verité qui soit exempte de toute incertitude, lors qu'il est question des choses qui regardent la

conduite de nostre vie ; Car, comme i'ay desia dit, souuent nous sommes obligez d'agir, auant que nous ayons pû nous déliurer de tous nos doutes ; Il y a pourtant en cela certaines regles & mesures à garder, sans quoy nous ne pourrions avec justice nous exempter d'estre blâmes.

La premiere regle qu'il me semble qu'on doive en cela obseruer, est, que nos actions pour estre justes doiuent tousiours repondre à nos jugemens, comme nos jugemens ne peuuent estre raisonnables, s'ils ne suiuent exactement nos connoissances. Mais nous ne deuons pas former ces jugemens, ny dans le temps que nous sommes agitez de passions, ny sur les connoissances obscures & confuses des Sens, qui les pourroient souuent rendre chancelans ; Mais sur ce que la lumiere de nostre raison nous dicte, lors que nous sommes libres de passion, & que la necessité d'agir ne nous force point à estre précipitez ; Et nous deuons estre fermes & resolus dans les jugemens que nous auons ainsi formez, sans que les impressions & les sollicitations des Sens nous en puissent faire démodre.

La seconde regle est de ne point agir lors que nous sommes dans le doute & dans l'irresolution, si c'est vne chose qui souffre du delay, & qui se puisse remettre ; Car si nous agissons dans cet estat, quelque party que nous prenions, nous nous exposons aux remors & aux repentirs. Mais

si c'est vne affaire qui ne souffre point de retardement, apres auoir consideré, tout autant que l'on peut, ce qui est le meilleur, quoy que nous n'en soyons pas entierement assurez, nous ne deuons pas laisser apres cela de nous déterminer à ce que nous voyons de mieux, & d'estre aussi resolu dans nos actions, que si nous n'estions point irresolu dans nos jugemens. Et quoy qu'il puisse arriuer que le party que nous aurons suiuy soit mauuais, neanmoins nous serons assurez d'auoir fait nostre deuoir; Ce qui sera capable de nous déliurer de tous les repentirs & les remors qui ont coustume d'agiter les consciences de ces Esprits foibles & chancelans, qui se laissent aller inconstamment à pratiquer aujourd'huy comme bonnes, les choses que demain ils jugeront estre mauuaises. Or afin que nous soyons preparez contre cette irresolution, & disposez à bien juger en toutes sortes d'occasions, & à nous resoudre promptement; Il faut prendre garde à trois ou quatre Verités que Monsieur Descartes, dans la 7. Lettre du 1. Volume, écrivant à Madame la Princesse Elizabeth, a si bien établies, que ie ne pense pas pouuoir rien faire de mieux pour mon sujet que de les rapporter icy.

La premiere, & la principale est, *Qu'il y a « vn Dieu, de qui toutes choses dépendent, dont « les Perfections sont Infinies, dont le Pouuoir « est Immenſe, & dont les Decrets sont Infail-*

libles ; Car cela nous apprend à recevoir en bonne part tout ce qui nous arrive , comme nous estant expressement enuoyé de Dieu .

La seconde chose qu'il faut sçavoir est , que la Nature de nostre Ame , entant qu'elle peut subsister sans le Corps , est beaucoup plus noble que luy , & capable de jouir d'une infinité de contentemens , qui ne se trouuent point en cette vie . Car cela nous empesche de craindre la Mort , & détache tellement nostre affection des choses du monde , que nous ne regardons qu'avec mépris tout ce qui est au pouuoir de la Fortune . Mais quoy qu'il ne faille pas apprehender la Mort , il ne faut pas pour cela haïr la Vie , puisque nous sçavons maintenant qu'il ne dépend que de nous de la rendre tres-heureuse .

La troisieme chose qu'il faut sçavoir , est de iuger dignement des œuvres de Dieu , & d'avoir cette vaste Idée de l'estendue de l'univers ; que j'ay tâché de faire concevoir au troisieme Livre de mes Principes . Car si l'on s' imagine qu'au de là des Cieux il n'y a rien que des espaces imaginaires , & que tous les Cieux ne sont faits que pour le service de la Terre , ny la Terre que pour l'Homme ; Cela fait qu'on est enclin à penser , que cette Terre est nostre principale demeure , & cette vie nostre meilleur ; & qu'au lieu de connoistre les perfections qui sont véritablement en nous , on attribue aux autres Creatures

des.

des imperfections qu'elles n'ont pas, pour s'ele-  
uer au dessus d'elles, & entrant dans vne pre-  
sompction impertinente, on veut estre du con-  
seil de Dieu, & prendre avec luy la charge de  
conduire le Monde; Ce qui cause vne infinité  
de vaines inquietudes & faulxeries.

La quatriesme est de prendre garde, que  
bien qu'un chacun de nous soit vne personne  
separée des autres, dont les interets par conse-  
quent sont en quelque facon distincts de ceux  
du reste du Monde; on doit toutesfois penser  
qu'on ne sçauoit subsister seul, & qu'on est en  
effet l'une des parties de l'univers, & plus parti-  
culierement encore l'une des parties de cette Ter-  
re, de cet Estat, de cette société, de cette famille,  
à laquelle on est joint par sa demeure, par son  
serment, par sa Naissance; Et qu'il faut tou-  
siours preferer les interets du tout dont on est  
partie, à ceux de sa personne en particulier;  
Toutesfois avec mesure & discretion; Car on  
auroit tort de s'exposer à un grand mal, pour  
procurer seulement un petit bien à ses parents  
ou à son païs; Et si un Homme vaut plus luy  
seul que tout le reste de sa ville, il n'auroit pas  
raison de se vouloir perdre pour la sauuer.

La troisieme regle est, d'estre bien persuadé que  
toutes les actions de l'Esprit par lesquelles nous  
pouuons acquerir quelque perfection sont ver-  
tueuses; Et que tout nostre contentement ne con-  
siste qu'au tesmoignage interieur que nous auons

par vne longue & frequente Meditation, nous l'ayons tellement imprimée dans nostre Esprit, qu'elle soit tournée en habitude.

---

*Remedes Generaux contre les fougues des Passions , & les aduersitez de la Fortune.*

# CHAP. DERNIER.

C'E n'est pas mon dessein d'expliquer icy tous les moyens que la Philosophie nous fournit, pour nous opofer à chaque Passion en particulier, parce que Monsieur Descartes l'a desia fait, & que mon dessein dans ce Traitté n'a esté que d'expliquer, vn peu plus au long qu'il n'auoit fait, les Facultés de l'Ame; C'est pourquoy ie me contenteray d'apporter icy seulement quelques considerations generales, qui peuuent seruir de regle pour reprimer toutes leurs impetuosités.

La premiere est, que nous deuons nous empêcher de porter aucun jugement sur quoy que ce soit qui se presente, pendant que nous sommes agitez de passions; Car tous leurs mouuemens, & toutes les inclinations qui en naissent, ne viennent que de la connoissance confuse des Sens, & nous auons desia cy-deuant estably pour regle, que nous deuons nous abstenir de juger pendant que nous ne voyons pas les choses assez claire-



ment. Mais parce que cette considération n'a lieu que lorsqu'il s'agit de l'Amen, elle n'est pas obligée de se déterminer promptement à agir, & qu'elle a le loisir de s'appliquer aux pensées qui sont capables de détourner son Imagination de la considération de l'objet de sa Passion; Lors qu'il arrive au contraire que l'occasion presse de prendre résolution, on doit, autant que l'on peut, s'appliquer à méditer & à suivre les raisons qui nous persuadent de faire le contraire de ce que nostre Passion nous dicte, parce que nous devons une fois estre advertis que tout cela ne tend qu'à nous tromper. Et bien qu'il soit difficile d'empêcher le cours des Esprits qui tendent à aller dans les muscles qui peuvent servir à executer les mouvemens de nos Passions, nous en viendrons pourtant à bout, pourveu que nous nous appliquions à détacher de nostre Esprit les pensées qui ont accoustumé d'en accompagner les mouvemens, & que nous apportions autant de soin & d'industrie pour en détourner le cours, que nous en employons quelque-fois à dresser nos chevaux & nos chiens. Car toute la discipline des Animaux ne consiste qu'en ce que par nostre industrie, c'est à dire; par les coups que nous leur donnons, & par les menaces ou caresses que nous leur faisons, nous faisons en sorte, que certains mouvemens de leurs muscles se joignent à d'autres especes de la glande qu'à celles auxquelles ils sont joints naturellement: Car par ce

icy la septième regle) que les biens qui ne dépendent pas entièrement de nous, sont autant éloignez de nostre pouuoir les vns que les autres; & partant que nous ne les devons point desirer avec inquietude & empressement: Car il n'y a que ces sortes de desirs qui détruisent la Beatitude; tous les autres; que nous n'estendons point au delà de nos forces, ne seruant que de matiere à nostre Bon-heur.

La huitième est, de suiure les Loix & les Coustumes des Hommes, parmy lesquels on a à viure, pourueu qu'elles ne s'oposent point à la raison, ny aux Veritez que Dieu a reuelées; C'est pourquoy il les faut examiner avec soin, pour sçauoir iusques où elles doiuent estre suiuiues. Et quoy qu'on ne puisse auoir des démonstrations certaines de toutes choses, il faut neanmoins, comme nous auons dit, prendre party, & embrasser les opinions les plus communes & les plus moderées, touchant les choses qui sont en vusage; Car on ne sçautroit rien faire de pis, que de demeurer tousiours irresolû.

Le neuvième; que bien que les plaisirs du Corps soient beaucoup inferieurs à ceux de l'Esprit, on ne les doit pourtant pas tout à fait rejeter, quand ils ne s'oposent point à la raison; mais se contenter de ne les pas rechercher avec empressement; On ne doit pas non plus s'étudier à n'auoir point de passions, mais seulement à les soumettre à la raison.

moyen les vieilles routes que les esprits animaux auoient formées entre les fibres du cerueau se flattrissent, & il s'en forme de nouuelles.

Mais la plus vtile consideration de toutes, est des'occuper, pendant qu'on n'est point ému de Passion, à considerer les biens & les maux qui peuuent tomber dans nostre partage, pendant le cours de nostre vie, & de peser leur juste valeur, pour former par apres là-dessus de solides jugemens, & prendre de fermes resolutions de fuir les vns & de rechercher les autres, nonobstant les pensées ou les raisons nouuelles que nous pourront suggerer nos Passions. Car c'est par ces jugemens certains & premeditez que nous deuons regler toutes les actions de nostre vie, & combattre les efforts de nos passions, & non pas en les oposant les vnes aux autres ; Et c'est aussi par ce plus ou moins de fermeté que l'on juge de la force ou de la foiblesse des Ames ; entre lesquelles il n'y en a point de si foible, laquelle estant bien conduite, & s'accoustumant à faire de ces reflexions, ne puisse à la fin acquerir vn pouuoir absolu sur toutes ses Passions.

Deplus, bien que le desir soit vne passion particuliere, neanmòins d'autant qu'il se mesle presque dans toutes les autres, on peut mettre entre les remedes generaux des passions, les considerations qui seruent à le moderer ; Outre que ce sont les desirs qui ont coustume de faire le plus de rauage, quand ils sont dereglez ; & qui pour

cette raison ont le plus de besoin d'estre bien conduits. Or il ne suffit pas pour cela de sçauoir, que quand ils naissent d'une veritable connoissance de la bonté de leur objet, & que nous les mesurons à nos forces, ils sont tous bons, & que lors qu'ils sont fondez sur quelque erreur, ils ne sçauroient manquer d'estre mauuais; il faut outre cela prendre garde, qu'entre les choses que nous pouuons desirer, il y en a qui dependent entierement de nous, d'autres qui n'en dependent point, & d'autres qui dependent de nous & d'autrui. Pour celles qui ne dependent que de nous, les desirs n'en sçauroient estre ny en grand nombre, ny mauuais, pourueu qu'ils ayent vn bon fondement. Ils ne sçauroient estre en grand nombre, parce qu'à proprement parler, nous n'auons que nostre libre arbitre, dont nous puissions entierement disposer; Ils ne peuuent non plus estre mauuais: car procedans d'une veritable connoissance du bien, & ne tendans qu'à nous perfectionner, c'est suiure la vertu que de les satisfaire, & il est certain qu'on ne sçauroit auoir des desirs trop ardens pour la vertu. Aussi, si nous péchons en ces occasions, c'est seulement en ne desirant pas assez les choses qui peuuent perfectionner nostre Esprit. Le souuerain remede contre ce deffaut, c'est de se déliurer de toutes les autres sortes de desirs; parce qu'ils sont moins vtils, & qu'ils nous empeschent de nous appliquer serieusement à connoistre & à pratiquer  
les

les moyens que nous auons d'augmenter nostre perfection.

Mais si nous ne pouuons auoir trop de desir pour les choses bonnes qui dépendent de nous, nous n'en sçaurions auoir trop peu, pour toutes celles qui n'en dépendent point, de quelque nature qu'elles puissent estre. Et il me semble que pour s'empescher de les desirer, il faut s'accoutumer à faire souuent reflexion sur la grandeur de Dieu, qui conduit tout par sa Prouidence, de qui les Decrets sont eternels, & tellement Infaillibles & Immuables, qu'excepté les choses qu'il a voulu par son decret mesme dépendre de nostre Libre Arbitre, nous deuons penser qu'à nostre égard il n'arriue rien qui ne soit necessaire, en sorte que nous ne pouuons sans erreur desirer qu'il arriue d'autre façon. Iusques-là mesme que les effets naturels qui dépendent en quelque façon de nous, c'est à dire, qui ne se produiroient pas si nous n'apliquions les causes aux effets, n'en dépendent, que parce qu'il a enfermé nostre Volonté dans son Decret, laquelle ayant preueü de toute Eternité, il a voulu que ses déterminations fussent des conditions necessaires pour la production de ces choses. Ainsi, à moins que d'estre déraisonnables, nous ne les deuons point desirer, du moins avec passion, parce que nous sçauons qu'il est absolument impossible qu'elles arriuent autrement qu'elles doivent arriuer, suiuant les Loix qu'il a voulu.

KKK.

observer dans la conduite des choses purement naturelles. C'est pourquoy nous n'aprehendons point aussi les aduersités de la Fortune, parce que ce n'est qu'une chymere qui ne vient que de l'erreur de nostre Entendement ; Mais nous nous y soumettrons, comme à des Ordres de la Prouidence ; Et faisant de nécessité vertu, nous les attendrons sans les craindre, sçachant qu'elles ne sçauroient nous dépouiller de nos veritables biens, mais qu'elles peuuent au contraire beaucoup contribuer à nostre bon-heur, si nous en sçauons faire vn bon vsage.

Pour les desirs des choses qui dépendent en partie de nous & en partie d'autrui, comme la santé, ou la conduite de nos affaires, la regle qu'on doit observer n'est pas de n'en point auoir du tout, puisque nous y pouuons quelque chose, mais de les retenir, & de ne les estendre qu'à ce qui dépend de nous ; & pour le surplus s'en remettre entierement à la Prouidence. C'est pourquoy l'on ne doit pas dans ces occasions s'y abandonner totalement sans rien faire, puisque Dieu nous a donné le pouuoir d'agir, & qu'il peut auoir mis nos actions comme des conditions necessaires pour l'éuenement de ces choses ; Mais nous deuons faire tout ce qui est en nous pour les faire reüssir ; Car si elles succedent, nous aurons ce que nous auons recherché ; & si elles manquent de nous reüssir, nous deuons estre satisfaits d'auoir fait nostre deuoir, & penser que ces choses-

là estoient à nostre égard impossibles, & que n'estant pas les Maistres du succez, elles ne nous appartenoient pas proprement.

Il y a encore quelques remedes generaux contre les Passions; dont le premier est, de considerer que nostre bien & nostre mal dépend principalement des Emotions de l'Ame, qui sont excitées en nous par elle mesme; en quoy nous auons dit qu'elles different des Passions qui tirent leur origine du mouuement particulier des esprits animaux. Et bien qu'assez souuent ces Emotions de l'Ame leur soient semblables; il arriue neanmoins quelquefois qu'elles leur sont contraires, & qu'elles ne laissent pas de subsister malgré elles. Monsieur Descartes en aporte vn exemple dans la personne d'un Mary qui pleure sa Femme morte, que quelque-fois il seroit bien fâché de voir ressuscitée. Car il peut arriuer, dit-il, que l'appareil des Funerailles, vn reste d'Amour, la priuation de sa compagnie à laquelle il estoit accoustumé, exciteront en luy vne veritable tristesse, iusques à luy serrer le cœur, & luy faire couler de veritables larmes; Et cependant dans le fond de son Ame, & dans son Interieur, il sentira vne Ioye secrette, de se voir deliuré d'une personne incommode; laquelle ne laisse pas de subsister malgré la Passion de la Tristesse qui occupe pour lors son Imagination. Nous nous sentons de mesme touchez de diuerses Passions à la lecture d'un Liure, ou à la representation d'une

Comedie ; mais de quelque Nature que soient celles qui s'excitent alors en nous, selon la diuersité des objets qui s'offrent à nostre Imagination, nous ne laissons pas d'auoir de la Ioye ; & l'Ame se plaist à sentir ainsi exciter en elle plusieurs diuerfes Passions, dont elle ne peut estre offensée.

Et afin que nous ayons tousiours dans l'intérieur de nostre Ame vn fond de Ioye que tous les troubles qui peuuent venir d'ailleurs ne puissent iamais alterer, il faut nous munir de deux remèdes qui nous seruiron de preseruatifs contre toutes sortes d'éuenemens. Le premier est, de conduire sa vie de telle sorte que nous ayons sujet d'estre satisfaits de nous-mêmes ; Cè qui ne peut manquer à celuy qui a vne ferme & constante volonté d'exécuter ce que son Entendement luy découure estre le meilleur ; Car il en reçoit vne satisfaction qui est si puissante pour le rendre heureux, que les plus violens efforts des Passions n'ont jamais assez de pouuoir pour troubler la tranquillité de son Ame. Le second est, de considérer toutes les choses qui se font dans le monde, & qui ne dépendent point de nous, comme des actions qui se representent sur vn Theatre, où nous ne sçaurions mieux faire que d'y assister simplement comme des spectateurs, sans y prendre d'autre part que celle que l'amitié & la charité nous obligent d'y prendre ; ce qui ne troublera point pour cela nostre Ioye ; au contraire



cela l'affirmera de plus en plus, en nous fortifiant par ce moyen dans la pratique du bien.

Après cela, vn autre des plus puissans moyens que nous ayons pour nous opposer au dereglement de nos Passions, est la generosité, par laquelle vn Hommes s'estimant au plus haut point qu'il puisse legitimement s'estimer, & reglant sur ce pied toutes les actions de sa vie, n'oublie rien de ce qu'il doit faire, & ne fait rien qui soit indigne de luy. Et comme il voit qu'il n'y a rien qui luy soit propre que la libre disposition de ses Volontés, ny qui merite d'estre loüé que le bon vsage qu'il en peut faire, il se croira paruenü au plus haut point d'estime où il soit possible d'atteindre, s'il sent qu'il ait en luy vne ferme resolution de ne manquer iamais de Volonté à entreprendre & executer les choses qu'il jugera estre les meilleures. Mais ce sentiment qu'il aura de luy-mesme, ne luy fera pas pour cela mépriser les autres : Car il verra qu'il n'y a personne qui ne le puisse aussi auoir de foy, pour ce qu'il n'y a rien en cela qui dépende d'autrui ; Et quand mesme il en verroit quelques-vns tomber dans quelques fautes qui feroient paroistre leur foiblesse, il sera plus porté à les excuser qu'à les blâmer, & à croire que c'est plustost par faute de connoissance, que par faute de bonne Volonté qu'ils les commettent ; d'autant qu'il est plus aisé de vouloir ce que l'on connoist estre bon, que de connoistre ce que l'on doit vouloir. Cét Homme genereux sera aussi

tres-humble ; parce qu'il connoist l'infirmité de sa Nature ; & qu'il sçait auoir commis , ou du moins pouuoir commettre d'aussi lourdes fautes que les autres ; Ce qui l'obligeant à se rendre Iustice à soy-mesme & aux autres , l'exemptera de toutes les fougues des Passions.

Le dernier & le plus efficace de tous les remèdes contre les Passions, est l'Amour de Dieu ; Je ne parle pas seulement de cet Amour, qui nous estant donné par vne grace surnaturelle, & comme la preuue & le couronnement de nostre Foy, peut nous iustifier & nous meriter la Vie Eternelle ; Mais encore de celuy que la Connoissance Naturelle de Dieu peut faire naistre dans nos cœurs. Car il n'a pas seulement la force de nous déliurer des autres Passions, mais encore il peut oster toute l'amertume que les maladies & les aduersités auxquelles la vie est sujette, peuvent opposer à nos plaisirs. Monsieur Descartes en a parlé si dignement dans vne Lettre à Monsieur Chanut, qui est la 35. du 1. Volume, que ie ne feray point de difficulté de rapporter icy ce qu'il en a dit, comme estant vne chose qui ne se sçauroit trop dire, & que ie voudrois qui fust grauée dans le cœur de tous les Hommes.

„ Mais j'ose dire (dit-il, parlant de l'Amour  
 „ de Dieu) qu'au regard de cette vie c'est la plus  
 „ rauissante & la plus vtile passion que nous puif-  
 „ sions auoir ; Et mesme qu'elle peut estre la plus  
 „ forte, bien qu'on ait besoin pour cela d'vne

Meditation fort attentive, à cause que nous sommes continuellement diuertis par la presence des autres objets. Or le chemin que ie iuge que l'on doit suiure, pour paruenir à l'Amour de Dieu, est qu'il faut considerer qu'il est vn Esprit, ou vne chose qui pense; en quoy la nature de nostre Ame ayant quelque ressemblance avec la sienne, nous venons à nous persuader qu'elle est vne emanation de sa Souueraine Intelligence. *Diuina quasi particula aure;* Mesme, à cause que nostre connoissance sensible se pouuoit accroistre par degrez iusques à l'infiny, & que celle de Dieu estant infinie, elle est au but où vise la nostre; Si nous ne considerons rien dauantage, nous en pouuons venir à cette extrauagance, de souhaitter d'estre des Dieux, & ainsi, par vne tres-grande erreur, aymer seulement la Diuinité; au lieu d'aymer Dieu. Mais si avec cela nous prenons garde à l'infinité de sa Puissance, par laquelle il a créé tant de choses, dont nous ne sommes que la moindre partie; à l'estendue de sa Providence, qui fait qu'il voit d'une seule pensée tout ce qui a esté, qui est, qui sera, & qui scauroit estre; à l'Infaillibilité de ses decretz, qui bien qu'ils ne troublent point nostre Libre-Arbre, ne peuuent neanmoins en aucune façon estre changez; Et enfin, d'un costé à nostre petitesse, & de l'autre à la grandeur de toutes les choses créées, en remarquant de quelle

„ sorte elles dépendent de Dieu , & en les con-  
„ siderant d'une façon qui ait du rapport à sa tou-  
„ te Puissance, sans les renfermer dans une bou-  
„ le, comme font ceux qui veulent que le Mon-  
„ de soit finy; La Meditation de toutes ces cho-  
„ ses remplit un Homme qui les entend bien  
„ d'une loye si extreme, que tant s'enfaut qu'il  
„ soit injurieux & ingrat envers Dieu, iusques  
„ à souhaitter de tenir sa place, qu'au contraire  
„ il pense desja avoir assez vescu, de ce que Dieu  
„ luy a fait la grace de paruenir à de telles con-  
„ noissances; Et se joignant entierement à luy  
„ de volonté, il l'ayme si parfaitement, qu'il  
„ ne desire plus rien au Monde, sinon que la  
„ Volonté de Dieu soit faite; Ce qui est cause  
„ qu'il ne craint plus ny la mort, ny les dou-  
„ leurs, ny les disgraces, parce qu'il sçait que  
„ rien ne luy peut arriuer, que ce que Dieu aura  
„ decreté; Et il ayme tellement ce Diuin de-  
„ cret, il l'estime si iuste & si necessaire, il sçait  
„ qu'il en doit si entierement dépendre, que  
„ mesme lors qu'il en attend la mort, ou quel-  
„ qu'autre mal, si par impossible il pouuoit le  
„ changer, il n'en auroit pas la volonté. Mais s'il  
„ ne refuse point les maux, ou les afflictions,  
„ parce qu'elles luy viennent de la Prouidence  
„ Diuine, il refuse encore moins tous les biens  
„ ou plaisirs licites dont il peut jouir en cette  
„ vie, parce qu'ils en viennent aussi; Et les re-  
„ ceuant avec loye, sans auoir aucune crainte  
des.

des maux , son amour le rend parfaitement “  
 Heureux. Il est vray qu'il faut que l'Ame se “  
 détache fort du commerce des sens , pour se “  
 représenter les veritez qui excitent en elle cet- “  
 te Amour ; D'où vient qu'il ne semble pas “  
 qu'elle puisse la communiquer à la faculté ima- “  
 ginatiue, pour en faire vne passion ; Mais nean- “  
 moins ie ne doute point qu'elle ne luy com- “  
 munique. Car encore que nous ne puissions “  
 rien imaginer de ce qui est en Dieu , lequel “  
 est l'objet de nostre Amour ; nous pouons “  
 imaginer nostre Amour mesme ; qui consiste “  
 en ce que nous voulons nous vnir à quelque “  
 objet , c'est à dire , au regard de Dieu , nous “  
 considerer comme vne tres-petite partie de “  
 toute l'immensité des choses qu'il a créées ; Par- “  
 ce que selon que les objets sont diuers , on se “  
 peut vnir avec eux , ou les joindre à soy , en “  
 diuerses façons ; Et la seule Idée de cette vnion “  
 suffit pour exciter de la chaleur autour du cœur, “  
 & causer vne tres-violente passion. “

Ce sont là les regles suiuant lesquelles il me  
 semble qu'un Esprit raisonnable doit conduire  
 les actions de son Entendement & de sa Vo-  
 lonté. Et c'est par leur moyen que Monsieur  
 Descartes est paruenu à ce haut point de con-  
 noissance qui le rend aujourd'huy l'admira-  
 tion de tous les Sçauans ; & qui luy a acquis  
 vne reputation, qui est telle, que tous les vains  
 discours & toutes les oppositions de ceux qui

portent enuie à sa gloire ne pouront iamais l'étrouffer.

Il ne m'auroit pas esté difficile de le deffendre de tous les sanglans reproches dont on a voulu depuis quelques années noircir sa Philosophie, tant dedans que dehors ce Royaume; Tantost en s'en mocquant, comme d'une chose tout à fait extrauagante & contraire au bon sens; Elle qui n'admet point d'autres Principes en Physique que ceux qui sont communement reçeus de tout le Monde; sçauoir la grandeur, la figure, & le mouuement; Elle qui fait du bon sens sa principale Maxime; Et elle enfin qui s'est ouuert l'entrée dans le Monde par ces paroles, *le bon sens est la chose du Monde la mieux partagée*; Tantost en la décriant, comme contraire aux veritez fondamentales de la Theologie; comme si la vraye Theologie dependoit de ce fatras d'Estres Scolastiques, qui ne sont à vray dire que des chimeres; Contre quoy pourtant nostre Philosophie ne s'est point eleuée, mais dont elle a fait voir seulement qu'on pouuoit se passer; Tantost en la taxant comme dangereuse, & fauorisant le libertinage; Elle qui ne tire toutes ses conclusions que de la preuue certaine & euidente qu'elle a donnée de l'existence d'un Dieu; qui n'a fondé les loix inuiolables de la Nature que sur son Immutabilité; Et qui a si bien distingué l'Esprit & le Corps, qu'il faut auoir renoncé à toutes les lumieres de la

raison pour n'en pas voir la difference, & les confondre encore ensemble; Ce qui n'auoit point encore esté bien éclaircy, ny bien prouué, auant l'establissement de cette Philosophie, dont ceux-là mesmes qui n'en sçauoient bien dire, sçauent pourtant fort bien profiter; & qui n'a point d'autre défaut sinon qu'elle est trop sensible, trop claire, trop vraye semblable, & trop ennemie des disputes; Et c'est ce qui a emeu contre elle ceux qui se contentent de belles paroles, sans se mettre en peine du sens; Ceux qui croient qu'il suffit de parler, sans se soucier qu'on les entende, & sans s'entendre eux mesmes; Ceux qui ne recherchent que la vanité, & non pas la vérité; Et enfin, ceux dont toute la science & toute la réputation n'est fondée que sur la chicane, & sur vne malheureuse contestation de mots, que chacun entend à sa mode; mais que pas vn ne veut expliquer.

Cependant, pour ne me point departir du procédé de celuy dont ie fais gloire de suiure les maximes, aussi bien dans la Morale, comme dans la Physique, ie me suis contenté d'establi mes opinions, sans entrer dans aucune dispute; Et laissant à chacun la liberté de ses pensées, j'ay tâché seulement de rendre les miennes les plus claires que j'ay pû. *Que* si j'estois si Heureux que d'auoir rencontré la vérité, cela suffiroit pour détruire de soy-mesme, & sans autre contestation, tout ce que l'on pourroit penser au contraire; Et

au lieu de me faire des ennemis, en reprenant les autres, ie m'attirerois l'estime & la bienveillance de tout le monde en l'instruisant; qui est le but que ie me suis proposé, & ce que j'ay tousiours regardé comme la principale récompense & le fruit le plus doux que ie pouuois esperer de mes travaux & de mes veilles.

Voilà ce que j'auois à dire de la Nature de l'Esprit en general, & de celuy de l'Homme en particulier; Enquoy ie pense n'auoir rien auancé, qui ne se trouue dans les escrits de Monsieur Descartes, ou qui ne se puisse tirer par des consequences necessaires des premieres veritez qu'il a démontrées dans sa Methaphysique. Je seray rayuy que tous ses veritables Disciples veüillent prendre la peine de l'examiner; Car i'ose me promettre que leur iugement ne me fera pas contraire, s'ils en veulent croire leur raison, & ce que l'experience journaliere leur fait ressentir en eux-mesmes. Mais i'appelle dès à present du Iugement de ceux qui laissent estouffer leur lumiere Naturelle par les préjugés de l'enfance, ou qui la rendent esclau de l'autorité de Platon, d'Aristote, d'Epicure, ou de quelque autre Philosophe; Ces grands Hommes ont esté sans doute tres sçauans, i'en tombe d'accord; Mais il doit estre aussi honteux à vn Philosophe de ceder à leur autorité, quand elle n'est pas souûtenüe de la raison; qu'il est honorable & auantageux à vn Homme de bon sens de ceder à la raison, ne fust elle souûtenüe d'aucune



DE L'ESPRIT DE L'HOMME, 453  
 à l'autorité; Et qu'il est aussi louable à vn Chrestien  
 de se soumettre (còme ic feray toute ma vie) à  
 l'autorité de l'Eglise, qui est infaillible.

# F I N.

*Si l'absence de l'Auteur est cause qu'il s'est glissé beaucoup de fautes,  
 l'examen exact qu'en on a fait les a icy suffisamment réparées.*

*Corrigez-les donc, s'il vous plaist, auant que d'entreprendre  
 la Lecture de l'Ouvrage.*

**D**Ans la Preface page 2. ligne 7. es pour me faire entendre. page 3.  
 ligne 1. lisez & qu'ils n'eussent jamais. page 9. à la marge, lisez si non  
 elles page 10. à la marge, ligne 1. est te viuer. ligne 4. hoc manifestum est.  
 page 13. ligne 2. en routes. page 14. ligne 13. il ne pourra se Page 15. ligne 15.  
 pas toute entiere. Page 20. ligne 12. & apres auoir dit. ligne 25. de l'Esprit &  
 del'Ame. page 27. à la marge ligne 22. confusione, personneli tamen page 42.  
 ligne 17. mais vous me demanderez.

Dans le Corps du Liure page 18. ligne 17. les, lisez ces. P. 19. l. 19. des suites.  
 P. 21. l. 14. de la. Ibidem l. dernière, lisez d'autre. P. 22. l. 28. t-elle. P. 23. l. 4.  
 l'organe. Ibid. l. 7. dispose. P. 25. l. 1. premier. Ibid. l. 8. on l'a. P. 28. l. 9. l'ence  
l'airement. P. 29. l. 17. or je. Ibid. l. 29. passions. P. 38. l. 29. les sceptiques. P. 39.  
 l. 17. car ce mot. P. 41. l. 12. lisez la figure quartée, & l. 29. des Corps. P. 43. l.  
 6. propriété. P. 45. l. 22. rencontrent. P. 47. l. 21. il la. P. 56. l. 19. des suites.  
Ibid. l. 23. qu'elle, & 24. tous les. P. 66. l. 27. qui peuuent cesser. P. 69.  
 l. 30. qui pense. P. 73. l. 1. mais où. P. 74. l. 27. leur Esprit. P. 76. l. 25. que  
 ce. P. 77. ligne 7. notions. P. 78. l. 27. si l'Idée, & l. 28. distincte, nous. P.  
 80. l. 10. exterieure. P. 87. l. 14. de si bas. P. 90. l. 16. ne pult estre. P. 92.  
 l. 6. le panchemenr, & l. 23. par ces. P. 93. l. 19. nous formons, & l. 20.  
 pa'ais enchané, & lig. 25. exterieur. P. 94. l. 2. qu'il y ait, & l. 2. exterieur.  
 P. 95. l. 20. s'abuser. P. 116. l. 3. interieure. P. 101. l. 27. peu à peu, & l. 28. les  
 espèces Corporelles. P. 102. l. 5. d'auec, & l. 7. de ces. P. 104. l. 27. & quand.  
 P. 105. l. 26. ne scauroient receuoir. P. 107. l. 4. les sons, & l. 15. meime sans,  
 P. 108. l. 13. des sons, P. 118. l. 21. que l'en dise encore icy. P. 112. l. 29. ce chan-  
 gement. P. 114. l. 28. informant. P. 117. l. 17. & ainsi, & l. 19. parfaites. P. 124. l.  
 3. doient estre. P. 125. l. 19. ce nom-là. P. 126. l. 8. ces signes, & l. 23. & s'il a.  
 P. 140. l. 1. font conceuoir, & l. 24. l'Idée de l'Homme. P. 141. l. 6. existels,  
 & l. 20. trois fois. P. 147. l. 28. il a. P. 149. l. 7. confidete, & l. 17. l'vn. P. 150.  
 l. 14. effacez, & P. 151. l. 1. de se. P. 156. l. 25. refuse. P. 161. l. 18. & de. P. 162. l.  
 15. vn exemple. P. 172. l. 3. connoissons, & l. 6. & ains, & l. 8. les objets. P.  
 177. l. 3. celle. P. 188. l. 14. & qu'ainsi deux. P. 190. l. 1. effacez, par cette vnion.  
 P. 194. l. 8. la liaison, & l. 11. par ses. P. 197. l. 18. vny à vn Corps, & l. 19.  
 à certains mouuemens de ce Corps. P. 202. l. 8. quelques vnes. P. 204. l. 4. effacez,  
 & Ibid. l. 5. & ses mouuemens. P. 207. l. 27. parties. P. 212. l. 13. part. P. 213. l. 4.  
 la plus. P. 218. l. 13. les plus. P. 239. l. 27. de tous. P. 245. l. 11. ces. l. 12. pour ce que.  
 l. 13. outre ces. P. 251. l. vn Espr. P. 262. l. 14. est bien. P. 264. l. 6. & de paitir.  
 P. 272. l. 22. des sons. P. 275. l. 7. quelqu' vne. P. 276. l. 20. ajoutez & à la-  
 quelle la Nature l'a jointe. P. 282. l. 7. a jallées, & l. 9. lesquelles. P. 283.  
 l. 14. cette. P. 285. l. 21. cela perseuer. P. 293. l. 1. nous sentions vn objet.  
 P. 298. l. 30. le pouuoir. P. 307. l. 11. l'uites. P. 310. l. 20. sçachez, & l. 22.  
 raisonnement. P. 334. l. 29. vices. P. 338. au titre. De la partie superieure &  
 inferieure del'Ame, ou de l'Esprit del'Homme.

## PRIVILEGE DV ROY.



LOUIS PAR LA GRACE DE DIEU  
 ROY DE FRANCE ET DE NAVARRE:  
 A nos amez & feaux Conſeillers les Gens  
 tenans nos Cours de Parlement, Reque-  
 ſtes de noſtre Hoſtel & du Palais, Baillifs,  
 Senefchaux, leurs Lieutenans, & tous  
 autres nos Officiers & Juſticiers qu'il appartiendra, Salut.  
 Noſtre tres-cher & bien amé LOUIS DE LA FORGE,  
 Docteur en Medecine demeurant à Saumur, Nous a fait  
 expoſer qu'il deſireroit faire imprimer vn Liure intitulé,  
*Traité de l'Eſprit de l'Homme*; Et pour cét effet Nous a  
 ſupplié de luy accorder nos Lettres à ce neceſſaires. A CES  
 CAUSES, deſirant fauorablement traiter ledit Expoſant,  
 Nous luy auons permis & permettons de faire imprimer  
 par tel Imprimeur qu'il voudra choiſir ledit Liure, en  
 vn ou pluſieurs volumes & caracteres que bon luy ſem-  
 blera, durant le temps & eſpace de cinq années, à com-  
 mencer du iour que ledit Liure ſera acheué d'imprimer;  
 pendant lequel temps Nous faiſons tres-expreſſes deſſen-  
 ces à tous Libraires, Imprimeurs, & autres perſonnes de  
 quelque condition qu'elles ſoient, d'imprimer ou faire  
 imprimer, vendre ny debiter, en quelque ſorte & mani-  
 re & ſous quelque pretexte que ce ſoit ledit Liure, ſi ce  
 n'eſt du conſentement dudit Expoſant, ou de ceux qui  
 auront droit de luy, ſur peine de conſiſcation des exem-  
 plaires, quatre mil liures d'amende, applicable vntiers  
 à Nous, vn tiers à l'Hoſtel-Dieu de Paris, & l'autre tiers  
 au profit dudit Expoſant, & de tous deſpens, dommages  
 & intereſts; à la charge de mettre deux exemplaires du-  
 dit Liure en noſtre Bibliothèque publique, vn autre en  
 celle de noſtre Cabinet du Chateau du Louure; comme  
 auſſi vn en celle de noſtre tres-cher & ſeal Cheualier le  
 Sieur Seguier Chancelier de France, auant que de l'ex-

poser en vente, à peine de décheance des presentes; lesquelles seront enregistrées sur le Liure du Syndic des Marchands Libraires & Imprimeurs de nostre Ville de Paris: Voulant qu'en mettant au commencement ou à la fin dudit Liure vn extrait d'iceluy, il soit tenu pour deuëment signifié: S I vous mandons & à chacun de vous, ainsi qu'il appartiendra, ordonnons par ces presentes que du contenu en icelles, vous fassiez iouyr & vser ledit Exposant, ou ceux qui auront droit de luy, pleinement & paisiblement, cessant & faisant cesser tous troubles & empeschemens au contraires. COMMANDONS en outre au premier nostre Huissier ou Sergent sur ce requis, faire pour l'exécution desdites presentes tous exploits, commandemens, saisies, & autres actes necessaires, sans demander autre permission, Nonobstant oppositions ou appellations quelconques, Clameur de Haro, Charte Normande, & lettres à ce contraires: CAR tel est nostre plaisir. DONNE' à Paris, le vingt-sixième iour d'Octobre, l'An de grace mil six cens soixante-cinq, Et de nostre Regne le vingt-troisième. Signé, Par le Roy en son Conseil, DE SEIGNEROLLE. Et scellé de cire jaune sur simple queuë.

Acheué d'imprimer pour la premiere fois le  
5. Nouembre 1665.

*Registré sur le Liure de la Communauté des Imprimeurs & Marchands Libraires de cette Ville, suivant l'Arrest de la Cour de Parlement du 8. Avril 1653. & conformément à l'Arrest du Conseil Privé du Roy du 27. Feurier 1665. aux charges & conditions portées par le present Priuilege. A Paris ce 31. Octobre 1665. Signé, S. P I-GET Syndic.*

Ledit sieur DE LA FORGE a cedé son droit de Priuilege à THEODORE GIRARD, Marchand Libraire à Paris, pour en iouyr suiuant l'accord fait entr'eux.

Et ledit GIRARD a fait part de la moitié dudit Priuilege à MICHEL ROBIN, & NICOLAS LE GRAS, aussi Marchands Libraires à Paris, pour en iouyr conformément & suiuant l'accord fait entr'eux.







